

SANCTORUM PATRUM

OPUSCULA SELECTA.

XXX.

SANCTORUM PATRUM

OPUSCULA SELECTA

AD USUM PRAESERTIM STUDIOSORUM THEOLOGIAE.



XXX.

EDIDIT ET COMMENTARIIS AUXIT

H. HURTER S. J.,

S. Theol. et Philos. Doctor, ejusdemque s. Theol. in
C. R. Univers. Oenipont. Professor p. o.

Cum Approbatione Celsissimi et Reverendissimi Episcopi Brixinensis
et Facultate Superiorum.

OENIPONTI.

LIBRARIA ACADEMICA WAGNERIANA.

1875.

S. AMBROSII
MEDIOLANENSIS EPISCOPI
DE FIDE
AD GRATIANUM AUGUSTUM
LIBRI QUINQUE.



LONDINI

apud David Nutt.

MEDIOLANI

apud Boniardi-Pogliani.

PARISIIS

apud P. Lethielloux.

OENIPONTI. TYPIS WAGNERIANIS.

974

Lectori.]

Gratianus Caesar, cum in procinctu esset, ut in Orientem proficisceretur, Valenti patruo contra gothos bellum gerenti suppetias laturus s. Ambrosium (cujus vitam a Paulino ejus notario conscriptam tibi exhibuimus opusc. t. VII.) rogavit, ut sibi commentationem, qua Filii Dei divinitas adstrueretur, lucubraret, quo scil. regiones arianorum contagione infectas aditurus remedio non esset destitutus. Imperatoris votis obsecundans s. doctor priores duos libros *de fide* ad illum misit a. 378., qui integrum opus contra arianos constituerent. Eos autem ita probavit Gratianus, ut redux in patriam per literas obsecraverit s. praesulem, ut ipsos iterum deferendos ad se curaret, hisque disputationem de Spiritus s. divinitate adjiceret. Ad novas tamen arianorum cavillationes refutandas s. doctor serius tres alios libros duobus illis addidit singulari cura a. 379. elaboratos. In his, qui priorum sunt velut supplementum, partim omissa adjungit, partim jam dicta fusius explanat, partim novas quasdam objectiones inanes esse ostendit. Totus

autem in eo est s. doctor, ut Filii cum Patre aequalitatem, consubstantialitatem, divinitatem ex divinis probet literis, ad omnes arianorum exceptiones contra haec Ecclesiae catholicae dogmata respondeat atque eorum refellat perversas textuum s. Scripturae interpretationes. Magno semper in pretio habiti sunt hi libri ac praecipuis antiquitatis de fide catholica operibus adnumerari debent. Citantur a multis auctoribus, praesertim antiquioribus (a Magistro sententiarum, Gratiano, Thoma etc.) sub titulo *de Trinitate*, quo similiter in mss. haud paucis inscribuntur. Verumtamen certum est, communem epigraphen *de Fide* illis praenotatam esse ab ipso Ambrosio ¹⁾.

1) Cf. editorum Maurinorum in ll. de fide admonitionem et Fessler institut. patrol. § 176, 179.

LIBER I.

PROLOGUS.

Gratianum ob ardorem discendae fidei laudat Ambrosius, semet vero deprimit. Quamquam autem illum humana doctrina indigere neget, quippe qui a Deo ipso fuerit institutus, addit tamen, eundem hac sua pietate viam sibi ad victoriam munire. Tum difficultate operis insinuata, non tam rationem quam auctoritatem, maxime vero nicaeni concilii, secuturum se profitetur.

1. Regina Austri venit audire sapientiam Salomonis, ut in libro Regnorum legimus (3. Reg. 10, 1). Hiram quoque rex ad Salomonem misit (3. Reg. 5, 1), ut cognosceret eum. Tu quoque, sancte imperator Gratiane, veteris imitator historiae, fidem meam audire voluisti. Sed non ego Salomon, cujus mireris sapientiam: neque tu unius gentis, sed totius orbis Augustus fidem libello exprimicensuisti: non ut disceres, sed ut probares.

2. Quid enim discas, imperator Auguste, quam ab ipsis incunabulis pio fovisti semper affectu? *Priusquam te, inquit, formarem in utero matris tuae, novi te: et priusquam*

exires devulva, sanctificavi te (Jerem. 1, 5). Sanctificatio ¹⁾ ergo non traditur, sed infunditur; et ideo divina dona custodi. Quod enim nemo te docuit, utique Deus auctor infudit.

3. Petis a me fidei libellum, sancte imperator, profecturus ad praelium. Nosti enim fide magis imperatoris quam virtute militum quaeri solere victoriam. Nam et Abraham trecentos decem et octo duxit ad bellum (Gen. 14. 14. et seqq.), et ex innumeris tropaea hostibus reportavit; signoque dominicae cru-

1) Nomine *sanctificationis* intelligitur regenerationis gratia, quae includit virtutes infusas, inter has et habitum fidei et dona s. Spiritus. Haec porro juvant animam praesertim innocentem, ut pio foveat affectu doctrinam revelatam, ad hanc inclinetur, hanc amet, amplectatur atque penetret. Significare ergo vult s. Ambrosius, tum Gratianum in recta fide jam satis esse institutum, proinde non indigere ulteriori institutione: tum ipsius imperatoris propensionem erga veram fidem, spiritum et zelum fidei, quo inter tot turbas et controversias ab arianis excitatas fidei catholicae constanter inhaerebat, non tam humanae esse adscribendam institutioni, quam potius habitui fidei donisque s. Spiritus divinitus infusis. Cum vero imperatori applicat verba prophetae, significare tantum vult, Gratianum divina praedestinatione jam a prima juventute gratia fidei donisque s. Spiritus fuisse prae-ventum.

cis et nominis ¹⁾, quinque regum victricium-
que turmarum subacto robore, et ultus est
proximum, et fratris filium meruit et trium-
phum. Jesus quoque filius Nave hostes, quos
totius exercitus manu valida superare non
poterat (Josuë 6, 6), septem tubarum sa-
cerdotalium sono vicit, ubi ducem militiae
coelestis agnovit, (Ibid. 13. et seqq.). Ergo et
tu vincere paras, qui Christum adoras: vin-
cere paras, qui fidem vindicas, cujus a me
libellum petisti.

4. Mallem quidem cohortandi ad fidem
subire officium, quam de fide disceptandi;

1) Signum crucis ponitur in litera T, quam in
antiquis hebraeorum characteribus hanc ipsam figuram
habuisse Hieronymus post Origenem auctor
est in Ez. 9, 4, cujus opinionem Grotius ad eun-
dem locum contra Scaligerum defendit. Quod au-
tem numerum 318 spectat, is apud graecos arith-
metice efferebatur literis τ et ιη, quarum posteriores
duae suavissimi nominis Jesu initiales sunt, et hinc am-
brosianae allusionis ratio patet. Illum autem hoc ipso l. c.
18. rursus proponit, non secus ac l. 1. de Abraham c. 9.
jam expresserat. Neque vero ea propria est s. prae-
suli; eandem enim etiam exhibet l. 1. de Spiritu
s. c. 1. Paschasius diaconus Gelasio papae syn-
chronus: sicut et Prudentius in praef. psychom.,
sed obscurius. His autem omnibus praeiverat Cle-
mens alex., qui eandem interpretationem quasi ab
antiquis theologis acceptam luculenter explicat l. 6.
Strom. p. 656. Edit. maurin,

in altero enim religiosa confessio est, in altero incauta praesumptio: sed quoniam neque tu cohortatione indiges, neque ego excusandi liber, ubi pietatis officium est, audax negotium verecunda occasione suscipiam, ut de fide pauca disceptem, de testimoniis ¹⁾ plura contexam.

5. De conciliis id potissimum sequar, quod trecenti decem et octo sacerdotes ²⁾, tamquam Abrahae electi iudicio, consona fidei virtute victores, velut tropaeum, toto orbe subactis perfidis, extulerunt; ut mihi videatur hoc esse divinum, quod eodem numero in conciliis fidei habemus oraculum, quo in historia pietatis exemplum.

CAPUT I.

Catholicam fidem a gentilium, judaeorum ac haereticorum erroribus distinguit: expositoque vocum Dei et Domini significatu, personarum discrimen et naturae unitatem demonstrat: quam dum separant

1) *De testimoniis* scil. s. Scripturae, quibus opponere solet *argumenta*, probationes scil. humano ingenio et solertia excogitatas.

2) *Sacerdotes*. Hanc comparisonem inter numerum servorum Abrahae, quorum ope victoriam retulit de hostibus, et numerum episcoporum concilii nicaeni alii quoque patres libenter instituunt.

ariani, non tres deos tantum inducunt, sed etiam Trinitatis regnum destruunt.

6. Assertio autem nostrae fidei haec est, ut unum Deum esse dicamus: neque ut gentes Filium separemus: neque ut judaei natum ex Patre ante tempora et ex Virgine postea editum denegemus: neque ut Sabellius Patrem confundamus et Verbum, ut eundem Patrem asseramus et Filium: neque ut Photinus initium Filii ex Virgine disputemus¹⁾: neque ut Arius plures credendo et dissimiles potestates, plures deos gentili errore faciamus; quia scriptum est: *Audi, Israël, Dominus Deus tuus, Deus unus est* (Deut. 6, 4).

7. Deus enim et Dominus nomen magnificentiae, nomen est potestatis, sicut ipse dicit: *Dominus nomen est mihi*. Et sicut alibi Propheta asserit: *Dominus omnipotens nomen est ei* (Isai. 42, 8). Dominus ergo et Deus vel quod dominetur omnibus, vel quod spectet omnia, et timeatur a cunctis²⁾.

1) *Disputemus* i. e. asseramus. Asseruit scil. Photinus ex Galatia provincia natus et sirmicensis episcopus, Filium Dei Maria priorem non fuisse, sed ex ea (et s. Josepho, teste Mario Mercatore) prodiisse. De Photini erroribus cf. opusc. VI, 184. et 192; IX, 178; X, 176.

2) *Quod spectet omnia*. Derivatur nomen θεός, Deus,

8. Si ergo unus Deus, unum nomen, potestas una est Trinitatis. Denique ipse dicit: *Ite, baptizate gentes in nomine Patris et Filii et Spiritus sancti* (Matth. 28, 19). In nomine utique, non in nominibus.

9. Ipse etiam dicit: *Ego et Pater unum sumus* (Joan. 10, 30). *Unum* dixit, ne fiat discretio potestatis et naturae: *sumus* addidit, ut Patrem Filiumque cognoscas; quod perfectus Pater perfectum Filium genuisse credatur: et Pater et Filius unum sint, non confusione personae, sed unitate naturae.

10. *Alias cap. II.* Unum ergo Deum, non duos aut tres deos dicimus; ut impia arianorum haeresis dum criminatur ¹⁾, incurrit. Tres enim deos dicit, qui Divinitatem separat Trinitatis; cum Dominus dicendo: *Ite, baptizate gentes in nomine Patris et Filii et Spiritus sancti*, unius esse Trinitatem potestatis ostenderit. Nos Patrem et Filium et Spiritum sanctum confitemur; ita ut in

a pluribus (cf. Gregorium Naz. or. theol. opusc. XXIX, 282) a voce θεᾱςθαυ, videre. Alia derivatio hic indicatur a voce θεός, quae metum significat, quod Deus timorem incutiat, hinc *et timeatur a cunctis*.

1) *Dum criminatur* scil. Filium impugnando et negando ejus cum Patre aequalitatem.

Trinitate perfecta et plenitudo sit Divinitatis, et unitas potestatis.

11. *Omne regnum in se divisum facile destruetur* (Matth. 12, 25), Dominus hoc dicit. Non ergo divisum est regnum Trinitatis. Si ergo divisum non est, unum est; quod enim unum non est, divisum est. Tale ergo regnum esse cupiunt Trinitatis, quod divisione sui facile destruat. Imo quia non potest destrui, constat non esse divisum. Non enim dividitur unitas, nec scinditur; et ideo nec corruptelae subditur, nec aetati.

CAPUT II.

Imperatorem ad fidei zelum exhortatus, ab ea quae Christo cum Patre inest, voluntatis atque operationis unitate ipsum Deum esse ostendit. Quapropter expositis divinis attributis, eadem Christo etiam convenire affirmat: cujus praeterea varias appellationes prosecutus, iis substantialem unitatem personalemque distinctionem probari docet; tum exemplis aliquot ad explicandam unitatem illam adductis, negat aliter Dei unitatem defendi posse.

12. *Non quicumque, inquit, mihi dicit: Domine, Domine, intrabit in regnum coelorum* (Matth. 7, 21). Non ergo perfunctoria fides debet esse, imperator Auguste; scriptum est enim: *Zelus domus tuae comedit*

me (Psal. 68, 10). Itaque fideli spiritu et mente devota Jesum Dominum invocemus, Deum esse credamus, ut in nomine ejus quidquid a Patre petimus, impetremus. Pater enim se per Filium vult rogari, Filius vult rogari Patrem.

13. Concordat pietatis gratia, nec virtutis facta discordant. Quaecunque enim Pater facit, eadem et Filius facit similiter. Et similiter facit, et eadem facit Filius: sed vult rogari Patrem in eo, quod ipse facturum est, ut non impossibilitatis indicium, sed unitatem potestatis agnoscas. Jure igitur adorandus atque venerandus est Dei Filius, qui mundum Divinitate sua condidit, et nostrum pietate sua informavit affectum.

14. Et ideo bonum Deum, sempiternum, perfectum, omnipotentem, verum debemus credere, ut in Lege accepimus et prophetis Scripturisque divinis ceteris, quia sine his Deus non est. Non potest enim bonus non esse, qui Deus est, cum in natura Dei plenitudo bonitatis sit: neque ex tempore Deus potest esse, qui fecit tempora: neque potest imperfectus Deus esse; qui enim minor est, imperfectus utique est, cui desit aliquid, quo majori possit aequari. Haec igitur fidei praedicatio: Deus malus non est, Deo impossi-

bile nihil est: Deus temporalis non est, Deus minor non est. Si fallor, redarguant.

15. Quia igitur Deus Christus, et bonus utique et omnipotens et sempiternus et perfectus et verus est; haec enim in natura Divinitatis sunt. Aut igitur negent naturam Divinitatis in Christo, aut quae divinae naturae sunt, Deo negare non possunt.

16. Certe ne quis possit errare, sequatur ea, quibus Scriptura sancta, ut intelligere possimus Filium, significavit. Verbum dicitur, Filius dicitur, Dei virtus dicitur, dicitur Dei sapientia. Verbum, quia immaculatus: virtus, quia perfectus: Filius, quia genitus ex Patre: sapientia, quia unum cum Patre, unum aeternitate, unum Divinitate. Non enim Pater ipse, qui Filius: sed inter Patrem et Filium generationis expressa distinctio est; ut ex Deo Deus, ex manente manens, plenus e pleno sit.

17. Non sunt igitur haec nuda nomina, sed operatricis virtutis indicia; est enim plenitudo Divinitatis in Patre, est plenitudo Divinitatis in Filio, non discrepans, sed una Divinitas. Nec confusum, quod unum est: nec multiplex, quod indifferens.

18. Etenim si omnium credentium, sicut scriptum est, erat anima una et cor unum

(Act. 4, 32): si omnis qui adhaeret Domino, unus spiritus est (1. Cor. 6, 17), ut Apostolus dixit: si vir et uxor in carne una sunt: si omnes homines, quantum ad naturam pertinet, unius substantiae sumus: si hoc de humanis Scriptura dicit, quia multi unum sunt, quorum nulla potest esse cum divinis comparatio; quanto magis ¹⁾ Pater et Filius Divinitate unum sunt, ubi nec substantiae nec voluntatis ulla est differentia?

19. Namque aliter quomodo unum Deum dicemus? Diversitas plures facit, unitas potestatis excludit numeri quantitatem; quia unitas numerus non est, sed haec omnium ipsa principium est.

CAPUT III.

Patris ac Filii unitatem Scripturae testimoniis probat, et primo Isaiae locum aliorum comparatione ita illustrat, ut nullam a Patris natura in Filio inesse differentiam astruat, nisi quantum ad carnem; ac proinde unam utriusque Deitatem esse. Quod ubi auctoritate Baruch confirmatum est, fidem prophetis hac in re habendam tradit.

20. Quantam vero Scriptura divina Patris et Filii secundum Divinitatem expresserit

1) *Quanto magis* scil. non solum unitate morali vel specifica, ut omnes homines sunt unius substantiae, sed unitate etiam physica et numerica ejusdem divinitatis,

unitatem, prophetica testantur oracula. Sic enim dicit Dominus Sabaoth: *Laboravit Aegyptus, et mercatus Aethiopum et Sabaim: viri excelsi ad te transibunt, et tui erunt servi, et post te sequentur alligati vinculis, et adorabunt te, et in te deprecabuntur; quoniam in te est Deus et non est Deus praeter te. Tu enim es Deus, et nesciebamus, Deus Israël* (Isai. 45, 14).

21. Audi prophetica vocem: *In te, inquit, est Deus, et non est Deus praeter te.* Quomodo hoc secundum arianos convenit? Necesse est negent aut Patris aut Filii Divinitatem, nisi ejusdem Divinitatis crediderint unitatem.

22. *In te, inquit, est Deus; quoniam in Filio Pater. Scriptum est enim: Pater qui in me manet, ipse loquitur; et: Opera quae ego facio, et ipse facit* (Joan. 14, 10). Sed et alibi in Patre Filius est, qui dicit: *Ego in Patre, et Pater in me est* (Ibid.). Dissolvant, si possunt, hanc naturae proprietatem et operis unitatem.

23. Deus igitur in Deo est, sed non duo dii: scriptum est enim, quia *unus Deus*: et Dominus in Domino, sed non duo domini; quia aequè scriptum est: *Nolite duobus dominis servire* (Matth. 6, 24). Et Lex dicit:

Audi, Israël, Dominus Deus tuus Deus unus est (Deut. 6, 4). Et utique in eodem est Testamento: *Pluit Dominus a Domino*. Dominus, inquit, a Domino pluit (Gen. 19, 24). Sic et in Genesi habes: *Et dixit Deus, et fecit Deus*; et infra: *Et fecit Deus hominem ad imaginem Dei* (Ib. 1, 3. et 26); sed tamen non duo dii, sed unus Deus fecit. Utrobique igitur unitas operationis servatur et nominis. Nam utique cum legimus, Deus ex Deo, non duos deos dicimus.

24. Denique habes in Psalmo quadragésimo quarto, quod et Deum Patrem dixit propheta, et Deum Filium declaravit, dicens: *Sedes tua, Deus, in seculum seculi*; et infra: *Unxit te Deus Deus tuus oleo laetitiae prae consortibus tuis* (Psal. 44, 7. 8). Deus est qui ungit, et Deus qui secundum carnem ungitur Dei Filius. Denique quos habet unctionis suae Christus nisi in carne consortes? Vides igitur quia Deus a Deo unctus: sed in assumptione naturae unctus humanae Dei Filius designatur, nec Legis forma ¹⁾ violatur.

25. Et hic ergo cum dicitur: *Pluit Do-*

1) *Nec Legis forma violatur*, quae dicit (Deut. 6, 4. cf. supra n. 23): *Audi Israel, Dominus Deus tuus Deus unus est*.

minus a Domino, unitatem Divinitatis agnosce. Operationis enim unitas non facit pluralem Divinitatem, sicut ipse Dominus ostendit, dicens: *Credite mihi, quia ego in Patre, et Pater in me: alioquin vel propter opera ipsa credite* (Joan. 10, 38). Et hic advertimus, quod unitatem Divinitatis per unitatem operum designaverit.

26. Ut autem una Deitas et Patris et Filii, et una dominatio probaretur; ne gentilis aut judaicae impietatis incurreremus errorem, providens Apostolus, quid sequi deberemus ostendit dicens: *Unus Deus Pater, ex quo omnia, et nos in ipso: et unus Dominus Jesus Christus, per quem omnia, et nos per ipsum* (1. Cor. 8, 6). Sicut enim unum dicendo Dominum Jesum Christum, Patrem Dominum non negavit; ita unum dicendo Deum Patrem, aequae a Deitatis veritate nec Filium separavit ¹⁾. Unde nec pluralitatem

1) Eandem responsionem, qua invicte retunditur arianorum exceptio ex hoc loco contra Filii divinitatem petita, reperies quoque infra l. 5. n. 47. et apud alios patres, ut Chrysostomum hom. 5. contra anomaeos n. 2. (opusc. XXIX, 91), in Phocam M. n. 3. s., hom. 14. in Gen. n. 2; hom. 20. in 1. Cor. n. 3; Severianum gabalitanum h. de serpente n. 8.; Hieronymum in Eph. 4, 5; Hilarium de Trinit. l. 8. n. 34 ss., l. 11. n. 1; Novatianum de

Divinitatis, sed unitatem potestatis ostendit; quia et in dominatione Divinitas, et in Divinitate dominatus est; sicut scriptum est: *Scitote quoniam Dominus ipse est Deus, ipse fecit nos, et non ipsi nos* (Psal. 99, 3).

27. *In te igitur est Deus*, per unitatem naturae: *et non est Deus praeter te*, per proprietatem substantiae, repulsa differentia.

28. In Hieremiae quoque libro unum Deum Scriptura dicit, et tamen et Patrem et Filium confitetur. Itaque sic habes: *Hic Deus noster, et non reputabitur alius ad eum. Hic adin-*

Trinit. c. 30; Ephiphanium haer. 57. n. 5; h. 76 n. 9; Augustinum ep. 238. al. 164. n. 18; Theodoretum et Ambrosiastrum in h. l. etc. Ceterum evidenter hic Filius Deus demonstratur et quidem Deus ejusdem plane cum Patre essentiae, illo apposito *per quem omnia*. Hinc enim patet, eadem illa *omnia*, quae sunt ex Patre, esse et per Filium. Sed *omnium* nomine non tantum creata intelligi debent, sed etabilia; seu Deus Pater fons et ratio est omnis ordinis non solum realis sed et possibilis, non solum ordinis ontologici sed et logici, omnis veritatis, bonitatis, pulchritudinis, realitatis et possibilitatis. Ergo et per Filium sunt haec omnia. Sed repugnat ut duplex re distinctus sit fons omnis veritatis, bonitatis etc. Ergo cum Pater non nisi ratione divinae naturae sit fons *ex quo omnia*, necesse est ut eadem plane natura sit in Filio, ut possit esse is, *per quem omnia*.

venit omnem viam disciplinae, et dedit eam Jacob puero suo, et Israël dilecto suo. Post haec in terris visus est, et cum hominibus conversatus est (Baruch. 3, 36—38).

29. De Filio dicit: ipse enim est cum hominibus conversatus; et dicit: *Hic Deus noster, et non aestimabitur alius ad eum*. Quid discutimus eum, de quo tantus dicit propheta, quod ad eum non possit alius aestimari? Quae enim potestesse alia aestimatio ¹⁾, ubi Deitatis unitas est? Confitebatur hoc populus in periculis constitutus, nesciebat serere quaestiones qui religionem timebat.

30. Adesto, sancte Spiritus, prophetis tuis, quibus inesse consuesti, quibus credimus. Si prophetis non credimus, sapientibus credam hujus mundi? Sed ubi sapiens, ubi scriba? Rusticus noster cum ficus insereret ²⁾, invenit quod philosophus ignoravit. Quae stulta sunt enim hujus mundi, elegit Deus, ut confundat quae sunt fortia (1. Cor. 1, 27).

1) *Alia aestimatio*. Quomodo possumus alium aestimare majorem, alium minorem (ut faciebant ariani), ubi teste propheta unitas est deitatis?

2) *Rusticus noster*. Non alium rusticum designat Ambrosius, quam Jeremiam, quem citaverat: alludit enim ad ficum calathos, quorum apud eundem 24, 1 s. fit mentio.

Credimus judaeis, quia notus aliquando in Judaea Deus (Psal. 75, 2)? Sed hoc ipsum negant propter quod credimus ¹⁾, quia non norunt Patrem, qui Filium negaverunt.

CAPUT IV.

Argumentis aliquot ad probandam Dei unitatem collectim propositis, in tribus magorum muneribus Christi Divinitatem humanitatemque adumbratas ostendit; non secus ac in angelo cum tribus pueris inter flammamas deambulante, Divinitatis ac Trinitatis veritatem.

31. Unum Deum communis natura testatur, quia unus est mundus. Unum Deum fides significat, quia una fides novi et veteris Testamenti. Unum Spiritum sanctum ²⁾ testificatur

1) *Propter quod credimus.* Judaei non quidem verbis sed re et aequivalenter negant Deum. Qui enim negat Filium, non novit Patrem, hinc nec verum Deum, qui est Pater et Filius (et Spiritus s.); propterea a vera exciderunt fide, atque in eorum veluti locum successerunt gentes, secundum illud Rom. 11, 30: *Nunc autem misericordiam consecuti estis propter incredulitatem ipsorum*, scil. judaeorum. Cf. Act. 13, 46.

2) *Unum Spiritum sanctum.* Puto nomine Spiritus sancti designari hic non tertiam ss. Trinitatis personam, sed ipsum Deum unum et trinum. Neque enim sermo est de unitate tertiae personae, sed de unitate trium personarum, et hanc colligunt etiam

gratia, quia unum baptismum in nomine Trinitatis est. Unum Deum prophetae dicunt, Apostoli audiunt. Unum Deum magi crediderunt, et aurum, thus et myrrham supplices ad Christi cunabula detulerunt, auro regem fatentes, ut Deum thure venerantes. Thesaurus enim regni, sacrificium Dei, myrrha est sepulturae.

32. Quid igitur voluerunt sibi mystica munera inter abjecta praesepia; nisi ut intelligeremus in Christo differentiam Divinitatis et carnis? Ut homo cernitur, ut Dominus adoratur: jacet in pannis, sed fulget in stellis: cunae nascentem indicant, et stellae dominantem: caro est quae involvitur: Divinitas, cui ab angelis ministratur. Ita nec dignitas naturalis majestatis amittitur, et assumptionis carnis veritas comprobatur.

33. Haec est fides nostra. Sic se Deus cognosci voluit ab omnibus, sic tres pueri crediderunt, nec incendia circumjecta senserunt; cum infidos noxius ignis exureret, et fidelibus innoxia flamma roraret, quibus aliorum incendia refrigerabant; quia merito fidei perdidit suam poena naturam. Aderat enim in

patres ex forma baptismatis, quod non in nominibus, sed in nomine trium personarum confertur. Vocat autem hic Deum unum et trinum Spiritum sanctum, quia re vera Deus spiritus est et baptismum sanctificat.

specie angeli qui monebat, ut in numero Trinitatis unius esset laudatio potestatis. Benedicebatur Deus, videbatur in angelo Dei Filius, sancta et spiritalis in pueris gratia loquebatur ¹⁾).

CAPUT V.

Arianorum variae in Christum blasphemiae referuntur, quibus antequam respondeatur, monentur catholici caveant a sophismatis philosophorum; eo quod scilicet in illis haeretici spem praecipuam collocarent.

34. (*Alias cap. III.*) Nunc consideremus quas ariani de Dei Filio inferant quaestiones.

35. Dissimilem Patri dicunt esse Dei Filium. Hoc si homini obijciatur, injuria est.

36. Ex tempore coepisse dicunt Dei Filium, cum conditor ipse sit temporum. Homines sumus, et esse volumus temporales. Ex tempore coepimus, et sine tempore futuros esse nos credimus. Fieri nos optamus aeternos,

1) Sensus est, in numero puerorum ternario adumbrabatur personarum trinitas. in angelo, qui unus erat, indicabatur unitas potestatis seu naturae, quas voces promiscue adhibet s. doctor in hoc opere. Alio quoque modo significat in illo facto adumbratam fuisse Trinitatem, quod scil. benediceretur Deus, adesset angelus Dei, loqueretur in pueris Spiritus seu gratia Dei.

et quomodo negare possumus Dei Filium sempiternum, quem sempiternum docet atque demonstrat natura, non gratia?

37. Creatum dicunt. Quis auctorem inter opera sua deputet, ut videatur id esse quod fecit?

38. Bonum negant. Sacrilega vox ipsa se damnat, ut indulgentiam sperare non possit.

39. Negant verum Dei Filium, negant omnipotentem; cum fateantur omnia facta per Filium, omnia creata per Dei esse virtutem. Quid est enim virtus, nisi perfecta natura?

40. Negant etiam Divinitate unum esse cum Patre. Deleant ergo Evangelium, deleant Christi vocem. Ipse enim dixit: *Ego et Pater unum sumus* (Joan. 10, 30). Non ego hoc dico, Christus dixit. Numquid fallax, ut mentiretur? Numquid impius, ut quod non erat usurparet? Sed singula suis locis plenius digerentur.

41. Nunc quoniam haereticus dicit esse dissimilem, idque versutis disputationibus adstruere nititur, dicendum est nobis quod scriptum est: *Cavete ne quis vos depraedetur per philosophiam et inanem seductionem secundum traditionem hominum, et secundum elementa hujus mundi, et non secun-*

dum Christum; quia in ipso habitat omnis plenitudo Divinitatis corporaliter (Coloss. 2, 8. 9).

42. Omnem enim vim venenorum suorum in dialectica disputatione constituunt, quae philosophorum sententia definitur non adstruendi vim habere, sed studium destruendi. Sed non in dialectica complacuit Deo salvum facere populum suum: *Regnum enim Dei in simplicitate fidei est, non in contentione sermonis* (1. Cor. 4, 20).

CAPUT VI.

Christum Patri dissimilem non esse probaturus, memoratis celebrioribus arianorum ducibus, quam male inter eos conveniat, aperit, atque adversus eos tamquam in monstra quaedam praesidium Scripturarum ostendit.

43. (*Al. cap. IV.*) Dissimilem igitur dicunt esse: nos negamus; imo potius horremus hanc vocem. Sed nolo argumento credas, sancte imperator, et nostrae disputationi: Scripturas interrogemus, interrogemus apostolos, interrogemus prophetas, interrogemus Christum. Quid multa? Patrem interrogemus, cujus honori studere se dicunt, si Filius degener judicetur. Sed non est honorificentia boni Patris Filii injuria. Non potest bono

Patri placere, si Filius degenerasse potius a Patre, quam Patrem aequasse credatur.

44. Da veniam, sancte imperator, si ad ipsos paulisper verba converto. Sed quem potissimum legam Eunomiumne, an Arium, vel Aëtium ejus magistros? Plura enim nomina, sed una perfidia, impietate non dissonans, communione discordans: non dissimilis fraude, sed cōitione discreta. Cur enim secum nolint convenire, non intelligo.

45. Eunomii personam defugiunt ariani, sed ejus perfidiam asserunt, impietatem exsequuntur. Ajunt eum prodidisse effusius, quae Arius scripserit. Magna coccitatis effusio! Auctorem probant, exsecutorem refutant. Itaque nunc in plures sese diviserunt formas. Alii Eunomium, vel Aëtium, alii Palladium, vel Demophilum atque Auxentium, vel perfidiae hujus heredes sequuntur, alii diversos. Numquid divisus est Christus? Sed qui eum a Patre dividunt, ipse se scindunt.

46. Et ideo quoniam communiter adversus Ecclesiam Dei, quibus inter se ipsos non convenit, conspirarunt, communi nomine haereticos, quibus respondendum est, nominabo. Haeresis enim, velut quaedam hydra fabularum, vulneribus suis crevit: et dum saepe reciditur, pullulavit, igni debita incendioque

peritura: aut velut quaedam monstruosi Scylla portenti in varias formas distincta perfidiae, velut supervacuum christianae sectae nomen obtendit: sed quos in illo impietatis suae freto miseros inter naufragia fidei reperit fluctuantes, belluinis succinta prodigiis, tetri dogmatis saevo dente dilacerat ¹⁾).

47. Cujus speluncam, sancte imperator, ut ferunt nautae, coecis latebris inhorrentem, omnemque ejus viciniam caeruleis canibus inter perfidiae saxa resonantem, clausa quodam modo praeterire aure debemus. Scriptum est enim: *Sepi aures tuas spinis* (Eccli. 28, 28). Et alibi: *Videte canes, videte malos operarios* (Philip 3, 2). Et iterum: *Haereticum hominem post primam correptionem evita, sciens quia subversus est qui*

1) Sensus est, haeresim esse instar hydrae, monstri fabulosi plura habentis capita, quorum si unum truncabatur, septem alia in ejus locum succrescebant seu pullulabant; et instar scyllae, alterius cujusdam monstri fabulosi, quod variarum erat formarum canibus stipatum atque habitabat in rupe Scylla dicta prope Charybdim, omnesque transeuntes et in Charybdi vortice perclitantes devorabat: ita haeresis christianae religionis nomen sed re vacuum obtendit seu praetendit, et sub eo varias perfidiae formas induit, suisque fraudibus fluctuantes et naufragos in fide absorbet atque veneno suae perfidiae inficit.

ejusmodi est, et delinquit, cum sit proprio judicio damnatus (Tit. 3, 10. 11). Itaque tamquam boni gubernatores quo tutius praetermeare possimus, fidei vela tendamus Scripturarumque relegamus ordinem.

CAPUT VII.

Ex Paulo, prophetis atque Evangelio Christus asseritur Patri similis; maxime vero ex hominis ad similitudinem divinam creatione.

48. Apostolus dicit imaginem Patris Christum esse; ait enim quod ipse sit imago Dei invisibilis, primogenitus universae creaturae (Coloss. 1, 15). Primogenitus, inquit, non primocreatus; ut et genitus pro natura, et primus pro perpetuitate credatur. Alibi quoque Apostolus asseruit, quod ipsum *posuit heredem omnium, per quem fecit et secula, qui est splendor gloriae, et character substantiae ejus* (Hebr. 1, 2). Imaginem apostolus dicit, et Arius dicit esse dissimilem: cur imago, si similitudinem non habet? In picturis homines nolunt esse dissimiles, et Arius dissimilem Patrem contendit Filio, et vult ut Pater dissimilem genuerit sui, quasi impotens qui generare similem non potuerit.

49. Prophetæ dicunt: *In lumine tuo videmus lumen* (Psal. 35, 10). Prophetæ dicunt: *Splendor est enim lucis aeternae, et speculum sine macula Dei majestatis, et imago bonitatis illius* (Sap. 7, 26). Vide quanta dicantur. *Splendor*, quod claritas paternae lucis in Filio sit: *Speculum sine macula*, quod Pater videatur in Filio: *imago bonitatis*, quod non corpus in corpore, sed virtus in Filio tota cernatur. *Imago* docet non esse dissimilem, *character* expressum esse significat, *splendor* signat aeternum ¹⁾. Imago utique non vultus est corporalis, non fucis composita, non ceris; sed simplex de Deo, egressa de Patre, expressa de fonte.

50. Per hanc imaginem Philippo Patrem Dominus demonstravit, dicens: *Philippe, qui me videt, videt et Patrem. Et quomodo tu dicis: Ostende nobis Patrem? Non credis quia ego in Patre, et Pater in me est* (Joan. 14, 9. 10)? Videt enim in imagine Patrem, qui videt in Filio. Vides quam imaginem dicat? Imago ista veritas est, imago

1) *Splendor signat aeternum*, quia splendor est coaevus rei, cujus est splendor: hinc cum Pater sit aeternus et Filius ejus splendor, erit Filius Patri coaeternus.

ista justitia est, imago ista Dei virtus est: non muta, quia Verbum est: non insensibilis, quia sapientia est: non inanis, quia virtus est: non vacua, quia vita est: non mortua, quia resurrectio est. Vides ergo quia dum imago dicitur, Patrem significat esse, cujus imago sit Filius, quia nemo potest ipse sibi imago sua esse.

51. Plura possem de Filii testimoniis dicere, sed ne forte ipse sibi nimium favisse dicatur, Patrem interrogemus. Nempe ipse dixit: *Faciamus hominem ad imaginem et similitudinem nostram* (Gen. 1, 26). Pater Filio dicit: *Ad imaginem et similitudinem nostram*; et tu dissimilem Filium Dei dicis?

52. Joannes dicit: *Dilecti, filii Dei sumus, et nondum apparet quid erimus: scimus quia si revelatum fuerit, similes ei erimus* (1. Joan. 3, 2). O improvida armentia! o impudens pervicacia! Homines sumus, et in quo possumus, ad similitudinem Dei erimus; et similem audemus Dei Filium denegare?

53. Ergo Pater dixit: *Faciamus hominem ad imaginem et similitudinem nostram*. In principio ipsius mundi Patrem et Filium esse audio, et unum opus cerno. Audio loquentem, agnosco facientem: sed et Patris et Filii

unam imaginem, unam similitudinem lego. Similitudo haec non diversitatis, sed unitatis est. Quod igitur tibi usurpas, Filio Dei derogas; cum utique nisi per imaginem Dei, ad imaginem Dei esse non possis.

CAPUT VIII.

Ex probata Filii cum Patre similitudine eundem aeternum etiam esse haud aegre demonstrari, quod nihilominus astruitur e prophetia Isaiae ac Joannis Evangelio; cujus auctoritate obrui haeresiarchae declarantur.

54. (*Al. cap. V.*) Claret igitur non esse dissimilem, et ideo proclivior via est, ut etiam sempiternum esse fateamur, cum similis sempiterni utique sempiternus sit. Si autem Patrem sempiternum dicimus, et hoc idem Filium denegamus, dicimus esse dissimilem; sempiterno enim temporale dissimile est. Clamat propheta sempiternum, clamat et apostolus sempiternum: plenum est vetus Testamentum testimoniis Filii sempiterni, plenum est novum.

55. Ordinem ergo teneamus. Scriptum est in veteri Testamento, ut vel unum de pluribus dicam: *Ante me non fuit alius Deus, et post me non erit* (Isai. 43, 10). Nihil ego argumentabor, te ipsum interrogo. Quis

hoc dicit, Pater, an Filius? Utrum dixeris, eo te convinci intelliges: vel si credas, doceri. Quis ergo hoc dicit, Pater, an Filius? Si Filius: *Ante me*, inquit, *non fuit alius Deus*: si Pater: *Post me*, inquit, *non erit*. Hic priorem, ille posteriorem non habet: invicem in se et Pater in Filio, et Filius in Patre cognoscitur. Cum enim Patrem dixeris, ejus etiam Filium designasti; quia nemo ipse sibi pater est: cum Filium nominas, etiam Patrem ejus fateris; quia nemo ipse sibi filius est. Itaque nec Filius sine Patre, nec Pater potest esse sine Filio. Semper igitur Pater, semper et Filius.

56. *In principio enim erat Verbum, et Verbum erat apud Deum, et Deus erat Verbum, hoc erat in principio apud Deum* (Joan. 1, 1). *Erat*, inquit, *apud Deum*. *Erat, erat, erat, erat*: ecce quater erat. Ubi impius invenit quod non erat? Alibi quoque Joannes in epistola sua dicit: *Quod erat in principio* (1. Joan. 1, 1); indefinite tenditur, *erat*: quidquid excogitaveris, erat Filius ¹⁾.

1) Non minus praeclare et alii patres ex hisce Joannis verbis Filii probant aeternitatem. „Quid est istud *in principio erat*? interrogat Hilarius de Trinit. l. 2. n. 13. Transeuntur tempora, transmit-

57. Omnes autem haereses hoc capitulo brevi piscator noster exclusit. Quod enim

tuntur secula, tolluntur aetates. Pone aliquod quod voles tua opinione principium, non tenes tempore, *erat* enim unde tractatur. . . . Meus piscator illiteratus, indoctus, liber a tempore, solutus a seculis est, vicit omne principium. *Erat* enim quod est, neque in tempore aliquo concluditur, ut coeperit quod *erat* potius *in principio* quam fiebat etc.“ Basiliius de Spiritu s. c. 6. n. 14: „Neque ex hac voce *erat* cogitatio exitum reperire potest, neque *principium* imaginatio transcendere. Quantumvis enim cogitatione curras ad anteriora, ex voce *erat* exitum non reperis. Et quantumvis institeris videre quae sint ultra Filium, non tamen poteris superare *principium*. Itaque pium est juxta hanc rationem Filium simul cum Patre intelligere.“ Cf. c. Eunomium l. 2. n. 14. et integram hom. 16. in hunc prologum. Victorinus afer adv. Arium l. 1. n. 3: „Qui *erat in principio* erat semper. Quae igitur audacia, quae blasphemia *non erat aliquando* dicere, toties Joanne dicente *erat λόγος* in principio, *erat* ad Deum, *erat* Deus *λόγος* ipse, *erat* hic in principio ad Deum. Licet enim *erat* praeteriti temporis significationem habeat, frequenter non sine principio, sed hic sine principio accipiendum, quoniam dixit: *In principio erat*.“ Fulgentius fragm. 19. c. Fabianum: „Hoc enim vere in principio erat, quod sine existendi principio erat: quia non vere in principio esset, si esse coepisset: illud enim vere in principio esse dicitur, in quo ipsum esse sine initio naturaliter invenitur. Dicens itaque evangelista: *In principio erat Verbum*, tale aliquid dixit, quasi si diceret: In aeternitate

erat in principio, non includitur tempore, non principio praevenitur. Ergo Arius conticescat. Quod autem erat apud Deum, non permutatione confunditur: sed manentis Verbi apud

erat Verbum.“ Cyrillus thesauri assert. 32. (Migne 75, 531): „Si *erat*, factum non est: si factum est, non *erat*. Sed quoniam *erat*, factum non est: quod enim jam est atque subsistit idque *in principio*, id fieri sive factum esse dici non potest.“ Cf. etiam dial. 3. de Trin. (Mig. 75, 331); de Trinit. n. 6. (ib. 1151); l. 1. in Joan. 1.: „Principio nihil est antiquius, si principii definitionem in se retineat. Principium enim principii nusquam fuerit, aut si quidam aliud ante ipsum intelligatur oriaturve, verum principium esse desinit. . . Quod si erat in principio, quae mens amabo poterit vim illius verbi *erat* transvolare? Quando denique illud *erat* velut in fine consistet, cum persequentem cogitationem semper antecedit mentemque praecurrat?“ Et Severianus gabalitanus or. 1. de creat. mundi n. 3. conferens haec duo incisa: *In principio creavit* (Gen. 1, 1.) et *in principio erat* (Joan. 1, 1.) scribit: Ubi namque creatio erat, dixit Moyses *fecit*; ubi vero creator, posuit (Joannes) *erat*. . . Dei est esse, creaturae vero fieri.“ Hinc bene Alexander alex. in ep. ad Alexandrum (P. (apud Theodoretum Hist. eccl. l. 1. c. 3) vocat τὸ ἦν (τοῦ Θεοῦ λόγου) μακρὸν καὶ ὑπεραίρον τῆς τῶν γεννητῶν διανοίας. Cf. praeterea Chrysostomum h. 2. in Joan. n. 4; Eusebium emesenum hom. 2. (Mig. 77, 1439), Augustinum serm. 135. n. 4; Faustinum de Trinit. c. 1. § 2. s.

Patrem solida perfectione distinguitur, ut Sabellius obmutescat. *Et Deus erat Verbum.* Non ergo in prolatione sermonis hoc Verbum est, sed in illa coelestis designatione virtutis ¹⁾, ut confutetur Photinus. Quod vero erat in principio apud Deum, sempiternae Divinitatis in Patre et Filio inseparabilis unitas edocetur, ut erubescat Eunomius. Postremo cum omnia per ipsum facta dicantur, ipse conditor novi utique Testamenti et veteris designatur; ut Manichaeus locum tentationis habere non possit. Ita piscator bonus intra unum omnes rete conclusit, ut faceret inhabiles fraudi, quamvis essent inutiles captioni,

CAPUT IX.

Haereticos interrogat Vir sanctus, ostensaque illorum responsione, qua Filium omni quidem tempore priorem, Patre autem posteriorem esse affirmabant, in Deum induci mutationem, aeternitatem utrique personae tribuendam colligit.

58. Dic mihi, haeretice, dat enim veniam clementissimus imperator, ut te non collo-

1) *Designatione virtutis.* Eo ipso enim quod Verbum sit Deus, significatur, Filium non esse verbum transiens ac προσφωριστόν, sed substantiale, expressionem et characterem substantialem coelestis virtutis, Patris, Deum de Deo.

quendi studio, nec audiendi cupiditate, sed exponendi gratia, paulisper alloquar: dic mihi, inquam, fuitne aliquando tempus, quo omnipotens Deus Pater non erat, et Deus erat? Tempus, inquis, non adstruo. Bene et argute. Si enim tempus dixeris, te ipse convinces; quia necesse est asseras fuisse tempus ante Filium, cum Filius temporis auctor sit et creator; non potest enim post opus suum ipse coepisse; necesse est igitur auctorem operis sui esse fatearis.

59. Ante tempora, inquis, non nego Filium: sed cum Filium dico, ostendo priorem Patrem, quia Pater, inquis, Filio prior. Quid est hoc? Negas esse tempus ante Filium, et tamen nescio quid ante Filium vis praecessisse, quod temporis sit; et ostendis media nescio quae molimina fuisse generandi, in quo generationem Patris significas temporalem. Nam si Pater esse coepit, Deus ergo primo erat, postea Pater factus est. Quomodo ergo immutabilis Deus? Si enim ante Deus, postea Pater: utique generationis accessione mutatus est.

60. Sed avertat Deus hanc amentiam; nos enim ad impietatem eorum redarguendam, hanc retulimus quaestionem. Pia namque mens generationem sine tempore asserit; ut

et sempiternum Patrem cum Filio dicat, nec aliquando asserat esse mutatum.

61. Jungat igitur honorificentia Patri Filium, quem Divinitas junxit: non separet impietas, quem generationis proprietas copulavit. Honorificemus Filium, ut honorificemus et Patrem (Joan. 5, 23), sicut et in Evangelio scriptum est. Sempiternitas Filii paternae majestatis insigne est. Si iste non semper fuit, ergo ille mutatus est: sed semper fuit Filius, ergo nec Pater aliquando mutatus est; quia immutabilis semper est. Itaque videmus, quod illi qui volunt negare Filium sempiternum, volunt Patrem docere esse mutatum.

CAPUT X.

Ubi Christi aeternitatem confirmavit ex Apostolo, divinam generationem non ad humanae modulum exigendam, aut curiosius excutiendam; at declinatis quae hinc nascuntur, difficultatibus, quidquid more corporeo de hac generatione dicitur, spiritali sensu intelligendum esse declarat.

62. Accipe aliud, quo clareat Filium sempiternum. Apostolus dicit, quod Dei sempiterna virtus sit atque Divinitas (Rom. 1, 20): virtus autem Dei Christus; scriptum est enim Christum esse Dei virtutem et Dei sapien-

tiam (1. Cor. 1, 24). Ergo si Christus est Dei virtus, quia virtus Dei sempiterna: sempiternus igitur et Christus.

63. Non ergo ex usu generationis humanae calumniam, haeretice, struas; neque ex nostro sermone componas. Neque enim angustis sermonibus nostris immensae magnitudinem possumus Divinitatis includere, cuius magnitudinis non est finis (Psal. 144, 3). Namque hominis generationem si definire contendas, tempus ostendis: generatio autem divina supra omnia est: late patet, supra omnes cogitationes ascendit et sensus. Scriptum est enim: *Nemo venit ad Patrem, nisi per me* (Joan. 14, 6). Quidquid igitur de Patre cogitaveris, quamlibet ejus aeternitatem, non potes de eo aliquid nisi per Filium cogitare: nec potest ullus ad Patrem nisi per Filium transire sensus. *Hic est*, inquit, *Filius meus dilectissimus* (Matth. 17, 5). Est, inquit, qui quod est, semper est. Unde et David: *In aeternum*, inquit, *Domine permanet Verbum tuum in coelo* (Psal. 118, 89). Quod enim manet, nec substantia, nec aeternitate deficit.

64. Quaeris a me quomodo Filius sit, si non priorem habeat Patrem? Quaero item abs te, quando aut quomodo Filium putes

esse generatum? Mihi enim impossibile est generationis scire secretum: mens deficit, vox silet, non mea tantum, sed et angelorum. Supra potestates, supra angelos, supra cherubim, supra seraphim, supra omnem sensum est; quia scriptum est: *Pax autem Christi, quae est supra omnem sensum* (Philip. 4, 7). Si pax Christi supra omnem sensum est, quemadmodum non est supra omnem sensum tanta generatio?

65. Tu quoque manum ori admove, scrutari non licet superna mysteria. Licet scire quod natus sit: non licet discutere quemadmodum natus sit. Illud negare mihi non licet, hoc quaerere metus est. Nam si Paulus ea, quae audivit raptus in tertium coelum, ineffabilia dicit; quomodo nos exprimere possumus paternae generationis arcanum, quod nec sentire potuimus, nec audire?

66. Verum si me ad consuetudinem trahis generationis humanae, ut Patrem dicas priorem; vide utrum ad generationem Dei terrenae generationis exempla convenient. Si secundum hominem loquamur, negare non poteris priores esse in homine patris quam filii passiones. Prior crevit, prior senuit, prior doluit, prior flevit. Si igitur hic tempore minor, ille antiquior passione. Si hic genera-

tionis incurrit aetatem, nec ille generandi evasit pudorem.

67. Quid te ista quaestionum tormenta delectant? Audis Dei Filium: aut dele nomen, aut agnosce naturam. Audis uterum, agnosce generationis perspicuae veritatem. Audis cor, Verbum intellige. Audis dexteram, agnosce virtutem. Audis os, agnosce sapientiam. Non haec sunt in Deo corporaliter aestimanda. Incomprehensibiliter generatur Filius: impassibiliter generat Pater; et tamen ex se generavit, et ante omnem intellectum generavit Deus verus Deum verum. Pater diligit, et tu discutis: Pater complacet; et tu cum judaeis invides: Pater honorificat, et tu cum gentibus conviciaris.

CAPUT XI.

Non posse probari e Scriptura Patrem Filio priorem esse; neque etiam argumentis ex hominum generatione desumptis; cum inde innumera secutura essent absurda: quod autem Christum ex tempore natum audent pronunciare, id cumulum esse impietatis.

68. Quaeris a me, utrum prior non possit esse, qui Pater est. Quaero a te, ut doceas quando Pater prior fuerit, testimoniis aut argumentis collige veritatem. Si testimoniis, accepisti utique sempiternam Dei esse virtu-

tem. Legisti etiam dicentem: *Israël, si me audieris, non erit in te Deus recens, neque adorabis Deum alienum* (Psal. 80, 9, 10). Aliud horum aeternitatem, aliud proprietatem substantiae indifferentis significat; ut neque posteriorem Patre, neque alterius Divinitatis Filium esse credamus. Nam si Patre posterior est, recens est: et si unius non est Divinitatis, alienus est. Sed nec posterior, quia recens non est: nec alienus, quia ex Patre natus; quia *supra omnia est Deus benedictus in secula* (Rom. 9, 5), sicut scriptum est.

69. Sed si alienum putant, cur adorant eum, cum scriptum sit: *Neque adorabis Deum alienum* (Psal. 80, 10)? Aut si non adorant, fateantur, et finis est ¹⁾; ne quem sub religiosi nominis professione decipiant.

1) *Et finis est.* Tunc aperte se prodent atque manifestum erit, se non amplius esse christianos, sed esse impios haereticos, nec ullum vere catholicum sub religiosi nominis professione decipient. Nam etiam tunc ariani volebant esse christiani et catholici, imo et boni catholici, pluresque simplices suis formulis fidei aequivocis et ambiguis vocibusque dolosis speciem tamen quandam catholicam praeseferentibus misere decipiebant: quam fraudem dein quavis aetate haeretici, etiam sec. 19. neoprotestantes, imitati sunt.

Haec nempe sunt testimonia Scripturarum. Aut si habes aliud, proferre debebis.

70. Superest ut et argumentis veritas colligatur. Quamquam etiam humanis testimoniis argumenta cedere soleant; argumentare tamen, haeretice, ut voles. Usu, inquis, accipimus eo qui nascitur, priorem esse qui generat. Persequere igitur omnia vestigia consuetudinis, et si cetera conveniunt, non obsisto quin et istud requiras: si autem nulla concordant, quemadmodum cum desint cetera, hoc solum exigis? Ergo quia usum requiris, quando generatus est ex Patre, parvulus fuit. Vidisti in cunis infantulum vagientem, processus aliquos accepit aetatis; si enim infirmitatem generationis habuit, necesse est ut non solum nascendi, sed etiam vivendi inciderit infirmitatem.

71. Sed fortasse eo prolaboris amentiae, ut de Dei Filio ista non abnuas, qui eum ex infirmitate metiris humana; quid si Deum negare non potes nomine, infirmitate tamen hominem vis probare? Quid si dum Filium discutis, Patrem arguis: et dum Christo praejudicas, Patrem adjudicas ¹⁾?

1) *Patrem adjudicas*, in eandem causam trahis ac imperfectionibus, defectibus obnoxium statuis. Op-

72. Nam si divina generatio subjecta temporis fuit, et id ex usu generationis usurpatur humanae; ergo et Pater corporali utero portavit Filium, decem mensium curriculis onus vexit. Sed quomodo sine sexu altero generationis usus? Vides solemnem ¹⁾ generationis seriem non coepisse, et tu partus cujusdam corporeae necessitatis putas fuisse solemnes. Tu usum quaeris, ego sexum: tu tempus exigis, ego ordinem: tu finem discutis, ego quaero principium. Nempe finis ex principio, non principium pendet ex fine.

73. Omne, inquis, quod natum est, principium habet; et ideo quia Filius est, principium habet, et ex tempore esse coepit. Quod ipsorum ore sit dictum. Ego autem Filium natum esse profiteor: quod reliquum est impietatis, horresco. Deum confiteris, homo, et tali circumscribis calumnia? Deus hanc averruncet amentiam.

CAPUT XII.

Iteratae in Filium objectioni iterum respondetur eam retorqueri etiam in Patrem posse; cum ergo Pater

time s. doctor in hoc semper insistit, omnem injuriam Filio illatam in Patrem redundare.

1) *Solemnem*, communem, quotidianam, qualem lex naturalis exigit.

nec loco, nec tempore, aliave ulla creatura indigeat, sic nec eorum indigentiam attribuendam Filio: cujus singularis generatio est non solum e Patre, sed etiam e Virgine; proptereaque cum in hac non sexus aut similia locum habuerint, in illa quoque non habuisse.

74. Rursus objiciunt: Ergo non est Filius, si non habet quae habent filii. Ignoscat mihi Pater, ignoscat Filius, ignoscat et Spiritus sanctus, quaestionem pro pietate referre cupienti. Est certe Pater, et manet semper: sunt etiam creaturae pro dispositione divina. Est ergo aliquid earum quod non subjectum sit aut locis, aut temporibus, aut creationi, aut causae alicui vel auctori? Profecto nihil. Quid ergo dicitis? Est horum aliquid, quo egeat Pater? Impium est dicere. Ergo aut desinite, quae creaturarum sunt, aptare Divinitati: aut si comparare contenditis, considerate quo vestra procedat impietas; quod absit ut vel in sensus nostros aliquando veniat.

75. Nos enim piam responsionem tenemus. Namque omnipotens Deus est, et ideo nullo eorum Pater indiget, qui non habet mutationem sui aliquam, vel profectum quo nos egemus, quorum infirmitas ex hujusmodi rebus profectum accipit. Qui autem omnipotens est, utique non creatus et sine loco, et supra tem-

pura est. Nihil enim ante Deum, imo hoc ipsum verbum, ante Deum dicere esse aliquid, grave. Ergo si ita est, quia nihil horum est in Deo Patre, quae profectum significant, quia Deus est; nihil horum aptari etiam potest Dei Filio, ut vel initium accipiat, vel profectum, quia Deus verus ex Deo vero est.

76. Ergo quia usitatum non reperimus ordinem, acquiesce, ariane, praecipuam ¹⁾ Filii generationem fuisse. Acquiesce, inquam; et si mihi non credis, erubescere vel Dei vocem dicentis: *Cui me similem aestimastis* (Isai. 46, 5). Et iterum: *Quia non sicut homo, ita et Deus* (Num. 23, 19). Etenim si operatio Dei praecipua est, quia non manibus operatur aliquid, non labore conficit, non diebus absolvit; *Ipse enim dixit, et facta sunt: ipse mandavit, et creata sunt* (Psal. 148, 5): cur non credamus praecipuam generationem esse ejus in Filio, cujus praecipuam creationem in operibus agnoscimus? Dignum certe est ut specialiter et praecipue videatur generasse Filium. Habeat generationis inusitatae gloriam, qui habet potestatis inusitatae gratiam.

1) *Praecipuam*, plane singularem nullique communem.

77. Non sola admirabilis ex Patre generatio Christi, admirabilis etiam ipsa generatio ejus ex Virgine. Tu illam dicis nostrae similem conceptionis, et ego probo et istam nostrae esse dissimilem, imo te ipsum cogam fateri. Dic quemadmodum sit natus ex Maria, quo usu uterus eum habuerit virginalis, quomodo sine semine viri partus, unde virgo praegnans, quemadmodum puella mater ante fetus (*al.* feta), quam copulam ut uxor experta? Causa deerat, et generabatur filius. Unde ergo legis novatae partus?

78. Si igitur in Virgine usus defuit generationis humanae, quemadmodum in Deo Patre propriae generationis usum requiris? Certe usus in sexu est, quia sexus in carne est: ubi ergo caro non est, quemadmodum carnis infirmitatem exigis? Nemo meliorem discutit: credere tibi jussum est, non discutere permissum est. Scriptum est enim: *Credidit Abraham Deo, et reputatum est illi ad justitiam* (Gen. 15, 6). Nec solum in generatione Filii sermo deficit, sed etiam in operibus Dei. Scriptum est enim: *Omnia opera ejus in fide* (Psal. 32, 4). Opera ergo in fide ¹⁾, generatio sine fide? Et discutimus

1) *Opera in fide*, scilicet opera Dei tam magna sunt,

quae non videmus, qui jubemur credere magis quam discutere, quae videmus.

CAPUT XIII.

Quaestionem quomodo genitus sit Filius, solvit sanctus Doctor; et revelationi credendum Nabuchodonosoris ac Petri exemplo docet. Hujus ultimi visione aeternitatem Divinitatemque Filii signatam esse; atque adeo illi credendum neglectis philosophis, quibus jam ubique fides abrogabatur. Contra vero gentilibus ostenduntur similes ariani.

79. Dicet aliquis: Quomodo generatus est Filius? Quasi sempiternus, quasi Verbum, quasi splendor lucis aeternae (Hebr. 1, 3); quia simul splendor operatur, ut nascitur. Apostoli istud exemplum est, non est meum. Noli ergo credere quod fuerit vel momentum aliquod, quo fuerit sine sapientia Deus, aut sine splendore lux. Noli, ariane, ex nostris aestimare divina: sed divina crede, ubi humana non invenis.

80. Rex gentilis in igne cum tribus pueris hebraeis quarti quasi angeli vidit figuram (Dan. 3, 92): et quia praestare putabat an-

ut ea comprehendere vel intelligere non possimus, sed tantum fide tenere. Quanto magis ergo generatio divina captum nostrum ita superat, ut tantum credi possit.

gelis ¹⁾, Dei Filium, quem non legit, sed credidit, iudicavit. Abraham quoque tres vidit, et unum adoravit (Gen. 18, 2).

81. Petrus in monte Moysen et Eliam cum Filio Dei vidit, nec erravit in natura, nec erravit in gloria. Denique quid facere deberet, non illos, sed Christum interrogavit; nam etsi tribus parabat obsequium, unius tamen expectabat imperium. Sed quoniam vel tabernaculorum numerum deferendum tribus simpliciter aestimavit, emendatur Dei Patris auctoritate dicentis: *Hic est Filius meus dilectissimus, ipsum audite* (Matth. 17, 5) id est: Quid conservos tuos cum Domino socias tuo? *Hic est Filius meus*. Non Moyses filius, non Elias filius: sed hic Filius ²⁾. Sensit emendationem apostolus, procidit in faciem, consternatus Patris voce et Filii claritate, sed sublevatur a Filio, qui jacentes erigere consuevit. Unum vidit, solum vidit Dei Filium. Recesserunt enim servuli, ut solus Dominus, qui solus designabatur Filius, videretur.

82. Quid igitur sibi voluit illa visio, non

1) *Et quia praestare, praestantiorum esse putabat angelis illum quartum, quem quasi in angeli figura viderat, eum Dei Filium iudicavit.*

1) Cf. aliorum patrum similem commentarium opusc. XIV, 148 ss.

aequalitatem Christi servorumque significans, sed mysterium signans, nisi ut appareret nobis, quod Lex et prophetae cum Evangelio congruentes, sempiternum Dei Filium, quem annuntiaverant, revelarent? Ergo et nos cum audimus ex utero Filium, ex corde Verbum, credamus quia non plasmatus manibus, sed ex Patre natus: non artificis opus, sed progenies est parentis.

83. Et ideo qui dicit: *Hic est Filius meus*, non dicit: *Hic est temporalis*; non dicit: *Haec est creatura mea, haec factura mea, hic servus meus*; sed *hic Filius meus, quem videtis in gloria. Hic est Deus Abraham, Deus Isaac, Deus Jacob, qui apparuit in rubo Moysi, de quo Moyses ait: Qui est, misit me* (Exod. 3, 14). Non Pater in rubo, non Pater in eremo: sed Filius Moysi locutus est. Denique de ipso Stephanus dicit: *Hic est qui fuit in ecclesia, in eremo, cum angelo* (Act. 7, 38). Hic est ergo qui legem dedit, ipse qui locutus est Moysi, dicens: *Ego sum Deus Abraham, Deus Isaac, Deus Jacob* (Exod. 3, 16). Hic est ergo Deus patriarcharum, hic Deus est prophetarum.

84. Filium ergo legimus: mens tua percipit lectionem, edat lingua confessionem. Aufer hinc argumenta, ubi fides quaeritur:

in ipsis gymnasiis suis jam dialectica taceat. Non quaero quid loquantur philosophi, requiro quid faciant. Soli in suis gymnasiis remanserunt. Vide quam fides argumentis praeponderet. Illi quotidie a suis consortibus deseruntur, qui captiose disputant: isti quotidie crescunt, qui simpliciter credunt. Non creditur philosophis, creditur piscatoribus; non creditur dialecticis, creditur publicanis. Illi voluptatibus et deliciis orbem ligarunt, isti jejuniis et doloribus exuerunt. Plures itaque jam coepit illicere injuria, quam voluptas.

85. Nunc videamus quo distant a gentilibus ariani. Illi deos appellant dispares sexu, dissimiles potestate: isti Trinitatem asserunt differentis Divinitatis et dissimilis potestatis. Illi deorum suorum principium asseverant temporale; et isti Christum coepisse ex tempore mentiuntur. Nonne ex philosophia omnem impietatis suae traxerunt colorem? Illi tamen quod venerantur, amplificant ¹⁾: isti Dei Filium creaturam asserunt esse, qui Deus est.

CAPUT XIV.

Creaturam non esse Dei Filium hinc adstruitur, quod non jusserit sibi praedicari Evangelium, quod crea-

1) *Amplificant.* Gentiles toti sunt in extollendis suis diis, ariani vero in deprimendo Dei Filio.

tura vanitati subdita sit, quod omnia creaverit, quod legatur genitus, quod tandem tradita fuerit generationis et adoptionis differentia: ubi utraque natura in ipso declaratur. Quae tot ac tanta testimonia Apostoli expositione confirmantur.

86. (*Al. cap. VI.*) Patuit, ut arbitror, sancte imperator, neque dissimilem Patri, neque ex tempore esse Dominum Jesum. Restat ut illud quoque sacrilegium redarguatur, et probemus creaturam non esse Dei Filium: in quo nobis praesentis oraculum lectionis aspirat; audivimus enim legi dicente Domino: *Itē in orbem universum, et praedicate Evangelium universae creaturae* (Marc. 16, 15). Qui universam creaturam dicit, nullam excipit. Et ideo ubi sunt, qui creaturam Christum appellant? Nam si creatura esset, numquid ipse sibi mandaret Evangelium praedicari? Non igitur creatura est, sed creator, qui docendae creaturae discipulis suis mandat officium.

87. Non creatura Christus: *Vanitati enim creatura subjecta est* (Rom. 8, 20), sicut Apostolus dixit. Numquid ergo Christus subjectus est vanitati? Rursus juxta eundem Apostolum: *Creatura congemiscit et comparturit usque nunc* (Ibid. 22). Numquid ergo Christus congemiscit et comparturit,

qui nostros a morte gemitus liberavit? *Creatura*, inquit, *liberabitur a servitute corruptionis* (Ibid. 21). Videmus igitur magnam inter creaturam et Dominum esse distantiam; quia servitus creatura est; *Dominus autem spiritus est; ubi autem spiritus Domini est, ibi libertas* (2. Cor. 3, 17).

88. Quis hunc induxit errorem, ut eum qui creavit omnia, qui fecit omnia, diceret creaturam? Numquid ipse Dominus se creavit? Si enim lectum est, quod *per ipsum omnia facta sunt, et sine ipso factum est nihil* (Joan. 1, 3): numquid ipse se fecit? Si lectum est, quod negari non potest, quia Deus in sapientia fecit omnia (Psal. 103, 24): numquid verisimile videri potest, quia in se ipsa est facta sapientia?

89. Legimus genitum, quia Pater dixit: *Ego ex utero ante Luciferum genui te* (Id. 109, 3). Legimus primogenitum Filium (Colos. 1, 15), legimus unigenitum (Joan. 1, 14): primogenitum, quia nemo ante ipsum: unigenitum, quia nemo post ipsum: legimus etiam: *Generationem ejus quis enarrabit* (Isai. 53, 8)? Generationem, inquit, non creationem. Quid his tantis ac talibus conferri potest?

90. Ostendit etiam Dei Filius distantiam

generationis et gratiae dicens: *Ascendo ad Patrem meum et Patrem vestrum, Deum meum et Deum vestrum* (Joan. 20, 17). Non dixit: Ascendo ad Patrem nostrum, sed: *Ascendo ad Patrem meum et Patrem vestrum*. Separatio ista diversitatem ostendit, quod illius generator, noster creator sit.

91. Et addidit: *Deum meum et Deum vestrum*; quia licet ipse et Pater unum sint, et illi Pater sit proprietate naturae, nobis Deus Pater coeperit esse per Filium, non naturae jure, sed gratiae; tamen utramque naturam hic significare videtur in Christo et Divinitatis et carnis, Divinitatis ex Patre, carnis ex matre, illamque ante omnia, istamque ex Virgine. Denique ante Patrem ut Filius nominavit, Deum postea ut homo nuncupavit.

92. Ubique autem Deum suum quod ex persona dicat hominis, testimonia docent: *Deus, Deus meus, respice me; quare me dereliquisti* (Psal. 21, 1)? Et alibi: *De ventre matris meae Deus meus es tu* (Ibid. 11). Et supra quasi homo patitur: et infra homo est, qui ex matris ventre jactatur. Itaque cum dicit: *De ventre matris meae Deus meus es tu*, significat eum qui Pater semper erat, ex eo Deum sibi esse, ex quo de ventre matris jactatus est.

93. Cum igitur in Evangelio, in Apostolo, in prophetis generationem Christi legerimus, unde audent dicere creatum esse vel factum? Et quidem in quo creatum legerint, in quo factum, considerare deberent. Edoctum est enim Dei Filium de Deo esse genitum, de Deo natum: factum autem in quo legerint, diligenter advertant; non enim Deus factus, sed Deus Dei Filius natus est: postea autem secundum carnem homo factus ex Maria est.

94. Si mihi non credunt, credant Apostolo dicenti: *Postquam vero venit plenitudo temporis, misit Deus Filium suum factum ex muliere, factum sub lege* (Galat. 4, 4). *Filium*, inquit, *suum*, non unum de multis: non communem, sed suum. *Suum* cum dicit, generationis aeternae proprietatem signavit. Hunc postea *factum ex muliere* asseruit, ut factura non Divinitati, sed assumptioni corporis adscriberetur: *factum ex muliere* per carnis susceptionem: *factum sub Lege* per observantiam Legis: generatio autem illa coelestis ante Legem, ista post Legem. (Conc. Chalcedon. act.1. in exposit. fid. Nic.)

CAPUT XV.

Duobus Scripturae locis, quibus factus et creatus Christus dicitur, ut satisfaciat sanctus Praesul, illos non-

nisi secundum naturam hominis ipsi convenire declarat: in quibus etiam praeteritum pro futuro positum esse ex sacrorum codicum auctoritate planum facit.

95. (*Al. cap. VII.*) Unde et illud vane jacitare consuerunt, quod scriptum est: *Et Dominum eum et Christum fecit Deus*. Imperiti legant totum, et intelligant; sic enim scriptum est: *Et Dominum eum fecit, et Christum fecit Deus hunc Jesum, quem vos crucifixistis* (Act. 2, 36). Non Divinitas crucifixa, sed caro est. Hoc utique fieri potuit, quod potuit crucifigi. Non ergo factura Dei Filius.

96. Facessat igitur et illud, de quo calumniari solent, et discant quemadmodum dictum sit: *Dominus creavit me* (Prov. 8, 22). Non dixit: Pater creavit, sed *Dominus creavit me*. Caro Dominum agnoscit, gloria Patrem significat: creatura nostra Dominum confitetur, caritas Patrem novit. Itaque quis ignoret, quia ob causam incorporationis hoc dicitur ¹⁾? In eo igitur se creatum dicit, in quo et hominem testificatur dicens: *Quid me quaeritis occidere hominem, qui veritatem locutus sum vobis* (Joan. 7, 20)? Hominem dicit, in quo et crucifixus et mortuus, et sepultus est.

1) De hoc textu fuse egimus in annot. ad opusc. XXIX. pag. 246.

97. Nec dubitandum quod praeteritum posuit, quod erat futurum; haec enim consuetudo est prophetiae, ut quae futura sunt, vel quasi praesentia vel quasi facta dicantur. Denique in Psalmo vigesimo primo legisti: *Tauri pingues obsederunt me*; legisti etiam: *Diviserunt sibi vestimenta mea* (Psal. 21, 13. et 19): quod evangelista de tempore passionis prophetatum esse significat; Deo enim quae sunt futura, praesentia sunt: et ei cui praecognita sunt omnia, ventura pro factis sunt, sicut scriptum est: *Qui fecit quae ventura sunt* (Isai. 45, 1 1. sec. 70).

98. Nec mirum si ante secula fundatum se esse dicit, cum legeris praedestinatum ante tempora secularia (2. Tim. 1, 9). Quam vere de incarnatione id videatur expressum, declarant sequentia: *Sapientia, inquit, aedificavit sibi domum, et subdidit columnas septem et interfecit suas hostias: miscuit in cratera vinum suum, et paravit suam mensam; et misit suos servos, convocans cum altissima praedicatione, dicens: Qui est insipiens, declinet ad me* (Prov. 9, 1 ss.). Nonne in Evangelio post incarnationem haec omnia videmus esse completa, quod sacri convivii celebravit mysteria, quod apostolos misit, voce magna clamavit dicens: *Si quis sitit, veniat ad me*

et bibat (Joan. 7, 37)? Ergo sequentia respondent prioribus, et totius cursum incarnationis videmus prophetiae expositione digestum.

99. Multa alia documenta praesto esse possent hujusmodi de incarnatione dicta videri: sed non me involvo libris, ne tractatus videatur esse diffusior.

CAPUT XVI.

Arianos, si creatum et genitum illis idem sit, Christo inferre injuriam: sin autem illa distare credant, quem legerint genitum, creaturae loco non habendum. Hoc Pauli ne creaturae serviatur, prohibentis, Christi tamen se servum esse profitentis, testimonio confirmari: cui potius credendum quam Ario. Subditur etiam creaturam in Deo non esse, cum simplex sit: nec Filium in creaturae ordinem redigendum, cum in eo Patri complaceat.

100. Nunc ipsos arianos interrogo, utrum idem putent esse genitum, quod creatum? Si enim idem dicunt, nihil utique distat inter generare et creare. Ergo quoniam et nos creati sumus, inter nos et Christum et elementa nulla distantia est. Sed quamvis amenes sint, id tamen non audebunt dicere.

101. Postremo ut insipientiae eorum quod verum non est, indulgeam; si nihil, ut pu-

tant, distat in verbo: cur non eum quem colunt, meliore appellant nomine? cur verbo non utuntur Patris? cur abjiciunt quod honorificentiae est, assumunt quod injuriae?

102. Si autem distat inter creatum et genitum, ut ego arbitror, cum legerimus genitum, non utique idem et genitum intelligimus et creatum. Dicantigitur generatum ex Patre, ex Virgine procreatum: aut dicant quomodo Dei Filius et genitus et creatus. Una natura et maxime Deus diversitatem non recipit.

103. Certe facessat nostra sententia: Paulum interrogemus, qui Spiritu Dei plenus has praevidens quaestiones, generaliter contra gentes, specialiter contra arianos locutus, ait divino judicio eos esse damnatos, qui servirent creaturae potius quam Creatori. Denique sic habes: *Tradidit illos Deus in desideria cordis ipsorum, ut contumeliis afficiant corpora sua inter semetipsos: qui commutaverunt veritatem Dei in mendacium, et coluerunt et servierunt creaturae potius quam Creatori, qui est Deus benedictus in secula* (Rom. 1, 24. 25).

104. Prohibet itaque me Paulus creaturae servire, et Christo admonet serviendum. Non ergo creatura Christus. *Paulus*, inquit, *servus Jesu Christi* (Ibid. 1). Et bonus servus,

qui Dominum recognoscit, ipse creaturae servire nos prohibet: quemadmodum ergo Christo ipse serviret, si creaturam Christum putaret? Aut igitur desinant colere quem creaturam appellant, aut desinant quem colere se simulant, dicere creaturam, ne sub appellatione cultorum sacrilegia graviora committant. Detestabilior enim domesticus hostis, quam extraneus: et gravius scelus ut adversus Christum abutantur Christi nomine.

105. Quem igitur meliorem interpretem quaerimus Scripturarum, quam illum doctorem gentium, vas electionis, electum de persecutoribus? Qui Jesum persecutus fuerat, fatetur. Legerat utique Salomonem plus quam Arius, et erat peritus in Lege; et ideo quia legerat, non creatum Christum dicit esse, sed genitum. Legerat enim: *Ipse dixit, et facta sunt: ipse mandavit, et creata sunt* (Psal. 148, 5). Numquid dicto factus est Christus? numquid mandato creatus est Christus?

106. Quomodo autem creatura in Deo esse potest? Etenim Deus naturae simplicis est, non conjunctae atque compositae: cui nihil accedat, sed solum quod divinum est in natura habeat sua: complens omnia, nusquam ipse confusus: penetrans omnia, nusquam

ipse penetrandus: ubique totus, eodemque tempore vel in coelo, vel in terris, vel in novissimo maris praesens: visu incomprehensibilis, fatu ininterpretabilis, sensu inaestimabilis, fide sequendus, religione venerandus; ut quidquid religiosius sentire potest, quidquid praestantius ad decorem, quidquid sublimius ad potestatem, hoc Deo intelligas convenire.

107. Ergo quia in Filio complacet Pater (Matth. 17, 5), crede quia dignus Patre Filius, crede quia a Deo exivit Filius, ut ipse testatur dicens: *Ex Deo processi et veni* (Joan. 8, 42); et alibi: *A Deo exivi* (Id. 16, 27). Qui ex Deo processit, et a Deo exivit, nihil aliud potest habere, nisi quod Dei est.

CAPUT XVII.

Christum Deum verum esse ex eo probat, quod sit proprius Dei Filius; praemissaque difficultatis suborientis solutione, eandem rem inde confirmat, quod sit genitus, quodque ex Deo exierit. His subdit Patris ac Filii unitatem operationis ac voluntatis. Tum apostolis et centurione, quem cum arianis contendit, in testimonium adductis Isaiam jungit ac Joannem.

108. Unde non solum Deus, sed etiam verus Deus, verus e vero, et adeo verus, ut ipse sit veritas. Itaque si nomen quaerimus, veri-

tas est; si majestatem quaerimus naturalem, eo usque Filius Dei verus est, ut et proprius. Scriptum est enim: *Qui proprio Filio non pepercit, sed pro nobis tradidit eum* (Rom. 8, 32): tradidit utique secundum carnem. Proprietas Divinitatis est, veritas proprietatis, misericordia pietatis, oblatio securitatis.

109. Sed ne calumniarentur, quia scriptum est: *Tradidit eum Pater*; ipse Apostolus alibi dixit: *Pax a Deo Patre, et Domino nostro Jesu Christo, qui se dedit pro peccatis nostris* (Galat. 1, 3. 4); et alibi: *Sicut Christus dilexit nos, et tradidit semetipsum pro nobis* (Ephes, 5, 2). Si ergo et traditus est a Patre, et ipse se tradidit, apparet unam esse operationem, unam esse Patris et Filii voluntatem.

110. Si naturalem ergo majestatem quaerimus, genitus est. Qui genitum inficiatur, proprium negat: qui proprium abnuvit, communem ceteris arbitratur. Sin vero generationis ipsius proprietatem requirimus, ex Deo exivit. Nam cum in usu nostro id sit exire quod jam sit, et ex interioribus secretis prodire videatur, quod exire perhibetur: angustis licet sermonibus proprietatem divinae generationis advertimus, ut non ex loco aliquo videatur exisse, sed ut Deus ex Deo, Filius

ex Patre; nec videatur coepisse ex tempore, qui ex Patre nascendo prodit, ut dixit ipse, qui natus est: *Ex ore Altissimi prodii* (Eccli. 24, 5).

111. Sed si naturam non agnoscunt, si non credunt Scripturis, vel operibus credant. Qui dicit Pater: *Faciamus hominem* (Gen. 1, 26), nisi ei quem verum Filium sciret? In quo nisi in vero suam imaginem recognosceret? Non est unum adoptivus et verus; nec Filius diceret: *Unum sumus* (Joan. 10, 30), si se cum vero, qui verus non esset ipse, conferret. *Faciamus* ergo dicit Pater. Qui dixit, verus est: potestne ergo verus non esse ille, qui fecit; et quod dicenti defertur, facienti negatur?

112. Quomodo autem nisi verum Filium sciret, committeret ei voluntatis suae unitatem et operis veritatem? Cum enim eadem faciat Filius opera, quae Pater facit, et quos vult vivificet Filius (Joan. 5, 19. 21), sicut scriptum est, nec differens potestate et liber est voluntate: ita unitas servatur quia et virtus Dei in Divinitatis proprietate est, et libertas non in aliqua differentia, sed in unitate est voluntatis.

113. Turbati in freto apostoli, licet adhuc non credentes corde, ubi primum sub pedibus

Domini ludere aquas et inquieto maris aestu deambulantis Domini super aquas intrepida videre vestigia (Matt. 14, 25. et seq.); subitoque navi, quae fluctibus turbaretur, ubi eam tamen Christus ascendit, placidata aequora et elementa conspexere famulantia, verum Dei Filium crediderunt, dicentes: *Vere Dei Filius es* (Ibid. 33).

114. Hoc idem centurio cum aliis, qui secum erant, tremefactis mundi cardinibus in passione Domini confitetur: et tu, haeretice, negas! Centurio dicit: *Vere Filius Dei erat iste* (Matth. 27, 54). *Erat*, inquit centurio, et arianus dicit: Non erat. Ille ergo generationis et veritatem et aeternitatem asserit manu cruentus, sed mente devotus: tu, haeretice, veritatem generationis negas, tempus adscribis! Utinam manus potius quam animam cruentasses! Sed nec manu innocens et mente ferax, quantum in te est, mortem infers, qui infirmum opinaris; imo, quod gravius est, etsi Divinitas vulnus sentire non possit, quod in te tamen est, majestatem suam in Christo, non corpus interficere conaris.

115. Verum igitur Deum dubitare non possumus, quem verum Dei Filium et carnifices crediderunt, et daemones fatebantur: quorum nunc non testimonia requiruntur,

sed tuis tamen sacrilegiis praeferuntur. Illos nominavimus, ut erubesceres: divina quoque responsa adhibuimus, ut crederes.

116. Clamat Dominus per Isaiam: *Servientibus mihi vocabitur nomen novum, quod benedicetur super terram, et benedicent Deum verum et qui jurant super terram, jurabunt per Deum verum* (Isai. 65, 16). Haec, inquam, dixit Isaias, quando vidit majestatem ejus. Hoc in Evangelio designatur, quod majestatem viderit Christi, et locutus sit de eo.

117. Accipe tamen quid etiam scripserit evangelista Joannes in epistola sua dicens: *Scimus quia Filius Dei apparuit, et dedit nobis sensum, ut cognoscamus Patrem, et simus in vero Filio ejus Jesu Christo Domino nostro. Hic est verus Deus et vita aeterna* (1. Joan. 5, 20). Verum Joannes Filium Dei et verum Deum dicit: ergo si verus Deus, utique non creatus, nihil fallax habens atque fucatum, nihil confusum atque dissimile.

CAPUT XVIII.

In nicaena definitione arianos errores, ne quem decipiant, commemorari. Iidem cum anathemate suo re-

1) Alios patres, qui hoc utuntur testimonio, cf. opusc. XVI, 228.

feruntur, quod non modo Nicaeae latum dicitur, sed et Arimini semel ac iterum.

118. (*Al. cap. VIII.*) Deus igitur ex Deo, lumen de lumine, Deus verus de Deo vero, ex Patre natus, non factus, unius substantiae cum Patre.

119. Sic nempe nostri secundum Scripturas dixerunt patres, qui etiam sacrilega dogmata ideo suis inserenda putavere decretis, ut Arii perfidia ipsa se proderet; ne quasi fucis quibusdam et coloribus illita velaretur. Fucum enim faciunt, qui non audent explicare quod sentiunt. Censorie itaque impietas ariana non expositione reseratur, sed damnatione detegitur; ut qui curiose gestit audire, prius damnatam cognosceret, ne laberetur, quam expositam audiret, ut crederet.

120. (*Al. cap. IX.*) Eos, inquit, qui dicunt: Erat quando non erat, et antequam nasceretur non erat: et qui ex nihilo factum, aut ex alia substantia vel ὁμοίᾳ dicunt esse, aut mutabilem, aut convertibilem Dei Filium anathematizat catholica et apostolica Ecclesia.

121. Accepisti, sancte imperator, eos qui talia asserunt, jure damnatos. Non humana industria, non composito aliquo ¹⁾ trecenti

1) *Non composito aliquo.* Plures editiones et

decem et octo, ut supra pressius dixi, episcopi ad concilium convenerunt: sed ut in numero eorum per signum suae passionis et nominis Dominus Jesus suo probaret se adesse concilio; crux in trecentis, Jesu nomen in decem et octo est sacerdotibus.

122. Hoc et in ariminensi concilio habuit prima confessio, et post ariminense concilium secunda correctio. Confessionem epistola ad imperatorem Constantium missa testatur, correctionem secuta concilia confitentur ¹⁾).

quidam codd. mss. legunt: *Non compositione aliqua, sed* etc. scil. neque humana industria, neque humano consilio factum est, ut episcopi praecise tot numero, qui mysticam habuerit significationem, convenerint. De hujus numeri significatione cf. supra prologi n. 5. cum annot. subjecta.

1) Episcopi concilii ariminensis, qui ad 400 et amplius coiverant, certiore fecerunt imperatorem, se statuuisse, ne quid eorum, quae apud Nicaeam statuta fuerant, mutaretur. Haec est *prima confessio*. Verum praeclara illa confessio non diu integra perseveravit. Nam hi episcopi partim ab imperatore territi, partim ab arianis decepti in vocum *substantiae* et *consubstantialis* abolitionem consensere. Secuta est correctio, quam *secundam* vocat Ambrosius, sive per ipsos illos episcopos, qui errorem suum agnoscen-tes acta in concilio ariminensi retractarunt (cf. opusc. XVIII, 188 s.), sive per *secuta concilia* scil. alexandrinum, cui praefuit Athanasius, et parisinum a. 362. et romanum sub Damaso a. 369.

CAPUT XIX.

Ubi Ario primum e memoratis erroribus attribuit, eundem refellit Joannis testimonio, ac e re nata tragicam haeresiarchae mortem describit. Mox singillatim reliquas ejusdem blasphemias expendit et confutat.

123. Arius ergo dicit: Erat quando non erat; sed Scriptura dicit: *erat*, non dicit: Non erat. Denique Joannes scripsit: *In principio erat Verbum, et Verbum erat apud Deum, et Deus erat Verbum: hoc erat in principio apud Deum* (Joan. 1, 1). Ecce quoties *erat*, et nusquam dixit quod non erat. Cui ergo credimus? Joanni in Christi pectore recumbenti, an Ario intereffusa se sua viscera volutanti; ut agnosceremus similem Judae proditoris Arii quoque fuisse perfidiam, quem similis poena damnavit.

124. Effusa sunt enim et Arii viscera, pudet dicere ubi, atque ita crepuit medius, prostratus in faciem, ea quibus Christum negaverat, foeda ora pollutus. Crepuit enim, sicut etiam de Juda Petrus apostolus dixit, quia possedit agrum de mercede injustitiae, et in faciem prostratus crepuit medius, et effusa sunt omnia viscera ejus (Act. 1, 18). Non est fortuita mors, ubi in sacrilegio pari poenae parilis processit exemplum; ut idem

subirent supplicium qui eundem Dominum negaverunt, et qui eundem Dominum proderunt.

125. Veniamus ad alia. Arius dicit: Antequam nasceretur, non erat: sed Scriptura dicit omnia esse per Filium. Quomodo ergo aliis dedit esse, qui non erat? Cum autem dicit impius, quando et ante, haec utique duo verba tempus ostendunt. Quomodo ergo negant tempus ante Filium, et volunt prius fuisse quae temporis sunt: cum idipsum, quando et ante, et aliquando non fuisse, sit temporis?

126. Arius dicit ex nihilo Dei Filium. Quomodo ergo Dei Filius? quomodo paterno generatus ex utero? quomodo eructatum ex corde Verbum legitur (Psal. 44, 2), nisi ut ex intimo et inaestimabili Patris intelligatur, ut scriptum est, prodiisse secreto? Filius enim aut per adoptionem, aut per naturam est: per adoptionem nos filii dicimur (Galat. 4, 5), ille per veritatem naturae est. Quomodo ergo ex nihilo ille, qui ex nihilo fecit omnia?

127. Non habet Filium, qui nescit unde sit. Denique nec judaei habebant Filium, quia unde esset nesciebant. Et ideo dixit his Dominus: *Nescitis unde veni* (Joan. 8, 14); et

infra: *Neque me nostis, neque Patrem meum scitis* (Ibid. 19). Qui enim negat ex Patre Filium, nec Patrem ex quo est Filius, novit: neque Filium novit, quia Patrem nescit.

128. Arius dicit: Ex alia substantia. Quae igitur alia substantia aequatur Dei Filio, ut ex ipsa Dei Filius sit? Aut quomodo reprehendunt, quia nos in Deo aut *ὁμοίαν* graece, aut latine substantiam dicimus, cum ex alia dicendo substantia Dei esse Filium, etiam ipsi substantiam Dei esse confirment?

129. Sed si de nomine substantiae aut naturae divinae voluerint dicere, facile revincuntur; quia et *ὁμοίαν* graece, et latine substantiam frequenter Scriptura memoravit. Et Petrus vult nos, ut legimus, divinae consortes fieri naturae (2. Petr. 1, 4). Quod si ex alia substantia Filium dicent, ipsi se revincunt, et verbum substantiae quod metuunt confitendo, et Filium creaturis quibus praeferre se simulant, conferendo.

130. Arius dicit creaturam Dei Filium, non sicut ceteras creaturas. Quae enim creatura non sicut alia creatura non est? Homo non ut angelus, terra non ut coelum, sol non ut aqua, lumen non ut tenebrae. Nihil ergo praeferendo donavit, sed ad simplices decipiendos misero colore fraudem suae impietatis obduxit.

131. Arius dicit mutabilem et convertibilem Dei Filium. Quomodo ergo Deus, si mutabilis; cum ipse dixerit: *Ego sum, ego sum, et non sum mutatus* (Malach. 3, 6)?

CAPUT XX.

Optat ad se mundandum ut olim ad Isaiam seraphim aliquem advolare: imo vero ad se, ad Imperatorem aliosque lectores suos Christum invitat: ac tandem Dominico poculo mystice designato, ut ejus virtute Gratianus ceterique fideles inebrientur, petit.

132. Verum nunc mihi propheticum illud est confitendum, quod prophetaturus de Domino praemittit Isaias dicens: *O miser ego et compuncto corde, qui cum immunda labia habeam: in medio quoque populi inhabitem immunda labia habentis; vidi Dominum Sabaoth* (Isai. 6, 5). Ergo si Isaias miserum se dicit, qui vidit Dominum Sabaoth: quid ego de me dicam, qui cum immunda labia habeam, cogor de Dei generatione tractare? Quo igitur de iis quae metuo, locuturus erumpo, cum David de iis quae sciat, ori suo custodiam petat (Psal. 38, 2)? O si mihi quoque unus de seraphim candentem illum carbonem, quem de altari divino sumpsit, utriusque forcipe deferens Testamenti, immunda adurat labia!

133. At quia tunc seraphim descendit in figura ad prophetam (Isai. 6, 6): tu autem, Domine, revelato mysterio ad nos in carne venisti, non per legatum, neque per nuncium, sed ipse per te ab occultis meis conscientiam meam mundes; ut ego quoque dudum immundus, sed jam per tuam misericordiam fide mundus, illud davidicum canam, dicens: *Psallam tibi in cithara, Deus Israël: gaudebunt labia mea, dum cantavero tibi; et anima mea quam redemisti* (Psal. 70, 22. 23).

134. Itaque, Domine, calumniatores tuos et hostes relinquens, confer te ad nos; et sanctifica aures principis Gratiani omniumque praeterea, quorum in manus hic libellus venerit, vacuas mihi praesta aures, necubi auditae perfidiae sordes resideant. Emunda ergo, emunda aurem non fontanis poculis, nec fluviali haustu, nec susurro praetermentis rivuli: sed sermonibus ad vicem aquarum operantibus, supra nitorem aquarum perspicuis et omni purioribus nive; illis utique sermonibus, quibus dixisti: *Si fuerint peccata vestra sicut phoenicium, ut nivem dealbabo* (Isai. 1, 18).

135. Est etiam poculum, quo secreta mentis mundare consuevisti, poculum non naturae veteris, nec ex vite solemni: sed po-

culum novum de coelo delatum in terram, expressum ex illo botryone peregrino, qui sicut uva de vite, ita ille in carne crucis pendit e ligno ¹⁾. Ex hoc ergo botryone est vinum, quod laetificat cor hominis, sobrietatem inebriat, crapulam fidei et verae religionis exhalat, crapulam castitatis infundit.

136. Hoc igitur vino, Domine meus, domini aures Augusti mentis emunda, ut sicut vino naturali homines inebriati quietem diligunt, timorem mortis expellunt, injurias non sentiunt, aliena non quaerunt, suorum obliviscuntur: ita etiam vino tuo crapulatus pacem diligit, et fidei exultatione securus, mortem infidelitatis ignoret, patientiam caritatis exhibeat, sacrilegia aliena non teneat, fidem etiam pignoribus suis praeferat, secundum quod scriptum est: *Relinque omnia tua, et veni, sequere me* (Matth. 19, 21).

137. Hoc vino, Domine Jesu, sensus etiam nostros dilue, ut te adoremus, te colamus visibilium et invisibilium Creatorem. Non potes ergo invisibilis aut bonus non esse, qui id etiam tuis operibus contulisti.

1) Poculum eucharisticum praeclare hic designatur.

LIBER II.

PROLOGUS.

Ambrosius libro superiori hunc adjecturus duodecim nomina Filii Dei primo trifariam divisa non ejus tantum, sed Patris etiam aeternitatem probare docet. Mox eadem cum duodecim sacerdotalis vestis lapidibus cursim comparans, quam necessario conjungenda sint, inducta ipsorum nova distributione patefacit. Deinde ad propositam comparisonem rediens, allegorice memorati amictus texturam ac lapillos laudat. Hinc mystica etiam geminae divisionis ratione allata, institutam comparisonem pergit exponere; ex qua fidem operibus colligens attexendam esse, contractam ejusdem fidei de Filio descriptionem subdit.

1. Satis, ut arbitror, libro superiore, sancte Imperator, edoctum est sempiternum esse Dei Filium, non dissimilem Patri, genitum, non creatum: Deum quoque verum Dei Filium Scripturarum lectionibus approbavimus, et apertis majestatis suae indicibus designatum.

2. Itaque quamvis ista ad fidem copiose redundantia sint, quod a fontis meatu magnitudo plerumque decurrentis fluminis aestimatur; tamen quo purius niteat fides nostra, tripartito videtur derivanda distinctio. Sunt

enim evidentia indicia quae proprietatem Deitatis ostendant: sunt quae similitudinem Patris et Filii: sunt etiam quae perspicuam divinae majestatis exprimant unitatem. Proprietatis itaque sunt, generatio, Deus, Filius, Verbum: similitudinis, splendor, character, speculum, imago: unitatis aeternae, sapientia, virtus, veritas, vita.

3. Haec indicia ita Dei Filium signant, ut ex his et sempiternum Patrem esse cognoscas, nec ab eo Filium discrepantem. Ex eo enim qui est, generatio ¹⁾; ex sempiterno, Deus, ex Patre Filius, ex Deo Verbum, splendor gloriae, character substantiae, speculum Dei, majestatis imago, de bono bonitas, de sapiente sapientia, de forti virtus, de vero veritas, de vivente vita. Concordant igitur Patris et Filii indicia, quibus non discrepare inter se, sed unius majestatis esse nemo dubitaverit. Quorum singulorum proferremus exempla nominum, nisi coarctandi sermonis studio teneremur.

4. His duodecim tamquam lapidibus pretiosis fidei columna cōnsurgit. Hi sunt enim pretiosi illi lapides (Exod. 28, 17. et seqq.),

1) *Generatio* i. e. genitus. Filius genitus est ex eo, qui est, seu ex eo, qui est ὁ ὢν Ex. 3, 14.

sardius, jaspis, smaragdus, chrysolitus et ceteri, quibus sancti Aaron, illius utique qui figuram gerit Christi, veri scilicet vestimentum sacerdotis intexitur: circumdati auro lapides, et insculpti de nominibus filiorum Israël, duodecim lapides sibi invicem cohaerentes. Nam si eos aliquis separet atque secernat, omnis fidei structura dissolvitur.

5. Itaque principium fidei nostrae est scire, quod genitus est Dei Filius: si genitus non est, nec Filius est. Nec satis est dixisse Filium, nisi et unigenitum Filium designaveris. Si creatura est, Deus non est: si Deus non est, nec vita est: si non est vita, nec veritas est.

6. Ergo tria illa, id est, generatio, Filius, unigenitus, principaliter et proprie indicant ex Deo Filium.

7. Tria sequentia, id est, Deus, vita, veritas, virtutem ejus manifestant, qua condidit et fecit subsistere creaturam: *In ipso enim vivimus, movemur et sumus* (Act. 17, 28), sicut Paulus dixit. Et ideo in illis tribus proprietatis Filii, in istis aliis paternae ac Filii operationis unitas declaratur.

8. Imago quoque et splendor et character dicitur Dei Filius; quia haec incomprehensibilem et investigabilem paternae majestatis

Divinitatem in Filio, et expressam similitudinem revelarunt. Haec quoque tria videmus ad similitudinem pertinere.

9. Reliquum est, virtus, sapientia, justitia ¹⁾, ut his singulis operationibus aeternitas probaretur.

1) *Sapientia, justitia.* Cod. audoen., ebrul. et alii nonnulli, *sapientia, verbum.* Sed neque haec dictio, neque *justitia*, quae in aliis mss. et edit. omnibus legitur, satis huic loco conveniunt. Nam *Verbum* pertinebat ad primam seriem, ubi expositum fuit *unigenitus* (n. 6.): de justitia vero nulla mentio facta fuerat (n. 2). Unde colligas in his vocibus liberius lusisse s. doctorem. Edit. maur. Hinc vero aeternitas probatur eatenus, quatenus nonnulli ita inferebant: Filius est Patris virtus, sapientia, justitia: sed profecto Pater nunquam caruit sua virtute, sapientia, justitia. Ergo nunquam caruit Filio, seu Filius est aeternus. Cf. patrum verba, qui ita colligunt apud Petavium de Trin. l. 6. c. 9., qui de hoc argumento haec n. 10. animadvertit: „Quod ad veteres illos attinet, qui sic disputant, ideo συναρί-
δτον esse Patri Filium, quia nunquam Pater sine sapientia virtuteque exstitit, neque lux sine splendore suo et hujus generis alia, recte ab illis usurpantur ista, si non formali, ut appellant, sensu, sed causali vel illativo capiantur. Quamvis enim Filius qua Filius est, non sit illa sapientia, qua Pater est sapiens, necessario tamen cum illa conjungitur ab eaque oritur. Quippe sapientia vel intelligentia, quae est in Patre, imo quae est Pater, actus est simplex, non habitus aut facultas. Porro actus omnia sapiendi in-

10. Hoc igitur est illud vestimentum pretiosis lapidibus adornatum, hic veri amictus est sacerdotis (Exod. 28, 3. et seqq.); haec vestis nuptialis; hic textor propheticus, qui bene noverit ista contexere. Neque vilis ista textura est, de qua Dominus dicit per prophetam: *Quis dedit mulieribus texturae sapientiam* (Job. 38, 36)? Nec communes isti lapides, lapides, ut legimus ¹⁾, supplementi (Exod. 35, 27): omnis enim in eo perfectio est, si nihil desit. Lapidēs compositi et circumdati auro, intelligibili scilicet natura; si eos bene mens nostra componat naturalisque sensus

telligendique expressam notionem sive sapientiam h. e. Verbum necessario complectitur, neque sine illo potest vel animo concipi. Merito itaque patres aeternitatem Verbi ex Patris aeternitate concludunt. Cf. etiam annot. ad opusc. XXVIII. pag. 153.

1) *Septuaginta* interpretes τοὺς λίθους τῆς πληρώσεως . . . καὶ τὰς συνθέσεις. Textus hebr., *lapides plenitudinum*; chaldaica paraphrasis, *lapides ad implendas caelaturas*. Quod autem subdit Ambrosius *lapides compositi*, quae verba sunt referenda sunt ad τὰς συνθέσεις, ea nihil habent in hebraeo aut in versionibus aliis, quod sibi repondeat: sicut nec *lapides supplementi* in Vulgata. Edit. maur. *Lapides compositi et circumdati auro intelligibili scil. natura*. Lapidēs hi non sunt materiales sed spirituales, spirituale designantes objectum, spirituales naturam.

probabili ratione compaginet. Denique quam non mediocres lapides sint, lectio docet, quod cum alii alia viliora deferrent, istos tamen lapides super humeros suos religiosi principes attulerunt, ex quibus fecerunt rationale, opus textile (Ibid.). Textile enim opus est, quando fidei facta concordant.

11. Nec me aliquis errare putet, quia supra triparitam de quaternis, subter vero quadripartitam de ternis feci distinctionem. Boni operis gratia per diversas plus placet formas ¹⁾. Bona enim et illa, quae textrinum indumenti sacerdotalis ostendit, vel Lex scilicet, vel Ecclesia, quae binas vestes fecit

1) Sensus hujus loci obscuri videtur: Bonum opus plus delectat, si formis diversis proponitur, quia tunc undique ejus bonitas apparet et apprehenditur. Potest autem textura sacerdotalis indumenti duplici modo considerari, prout illam vel synagoga vel Ecclesia conficit. Illa eam confecit opere, haec eam efficit spirituali modo, ex spiritualibus elementis, ex piis de Deo sensibus seu ex fide et factis, quae fidei consentiunt, quod iterum duplici modo fieri potest, ut exponit n. 13. Hic vero duplex modus adumbratus fuit eo duplici modo, quo vestes sacerdotales confici solebant. Varia vero elementa seu materiae, ex quibus splendidae vestes sacerdotales in synagoga componebantur, adumbrant elementa, e quibus constat corpus nostrum, cujus operibus ad fidei normam expressis vestis sacerdotalis spiritualis N. T. componitur.

viro suo, sicut scriptum est (Prov. 31, 22) unam operis, alteram mentis, fidei intexens factorumque velamina. Itaque alibi, sicut legimus, aurum praetexit, et postea hyacinthum ac purpuram cum cocco subjungit et bysso. Rursus alibi ex hyacintho et ceteris prius flosculos format aurumque subnectit, et unus est habitus sacerdotis, ut iisdem coloribus micans, gratiae decorisque diversitas ordinis diversitate resplendeat.

12. Itaque ut etiam rationis typicae series digeratur, auro et argento probabili non est dubium eloquia Domini designari, quibus fides constat. Scriptum est enim: *Eloquia Domini, eloquia casta, argentum igne examinatum, probatum terrae, purgatum septuplum* (Psal. 11, 7). Hyacinthus autem aëris habet similitudinem, quem spiramus et cujus carpimus flatum: purpura quoque speciem aquarum exprimit: per coccum ignis intelligitur: terra per byssum; haec enim ex terra gignitur. Ex his autem quatuor elementis corpus subsistit humanum.

13. Sive ergo mentis fidei praecedenti concinentia corporis facta subnectas: sive facta praecedant, et fides astipuletur comes religiosa factorum, hic religiosi ornatus antistitis, hoc velamen est sacerdotis.

14. Bona ergo fides, cum pulchro operum renitet ornatu: de qua, ut ad summam loquar, definitiones istae sunt, quae non queunt solvi. Si ex nihilo est, non est Filius: si creatura est, non est Creator: si factura est, non est omnium factor: si discens, non praecognitor: si accipiens, non est perfectus: si proficiens, non est Deus: si dissimilis, non imago: si per gratiam, non per naturam: si Divinitatis expers, auctor malitiae ¹⁾: *Nemo bonus, nisi unus Deus* (Marc. 10, 18).

CAPUT I.

Arianorum Dei Filio bonitatem abrogantium objectionem non sine horrore propositam ut solvat, Christi sententiam ex personis loquentium, nec non ex ipsis dictionibus explicat.

15. Stupeo itaque ad reliqua, sancte Imperator, et toto corpore animoque deficio, esse aliquos homines, vel potius non homines, sed humana adopertos specie, intus autem demenciae bestialis, qui post tanta Domini et tam divina beneficia, bonum negent ipsum auctorem bonorum.

1) Si Divinitatis expers, auctor malitiae, non est impeccabilis, peccare potest, et ita auctor est malitiae si non actu, saltem potentia.

16. Scriptum est, inquiunt: *Nemo bonus, nisi unus Deus*. Scriptum agnosco: sed litera errorem non habet; utinam ariana interpretatio non haberet! Apices sine crimine sunt, sensus in crimine. Dictum Domini Salvatoris agnosco: sed consideremus quando dicat, cui dicat, qua circumspectione dicat.

17. Dicit utique in hominis forma Dei Filius, et dicit scribae, ei scilicet qui magistrum bonum Dei Filium nominaret, Deum negaret. Quod ille non credit, Christus adjungit; ut Dei Filium non ut bonum magistrum, sed ut bonum Deum credat. Nam si cubi unus Deus dicitur, nequaquam tamen Dei Filius ab unitatis plenitudine separatur; quomodo ubi unus Deus bonus nuncupatur, a plenitudine divinae bonitatis unigenitus excluditur? Necesse est igitur aut Deum negent Dei Filium, aut Deum bonum esse fateantur.

18. Et ideo circumspectione coelesti non dixit: *Nemo bonus, nisi unus Pater*; sed: *Nemo bonus, nisi unus Deus*. Pater enim proprium generantis est nomen, Deus autem unus nequaquam Deitatem Trinitatis excludit, et ideo natura laudatur. Bonitas ergo in natura est Dei, et in natura Dei etiam Dei

Filius; et ideo non quod singularitatis, sed quod unitatis est, praedicatur.

19. Non igitur a Domino bonitas negatur, sed talis discipulus refutatur. Nam cum Scriba dixisset: *Magister bone*, respondit Dominus: *Quid me dicis bonum* (Marc. 10, 18,)? id est, quem Deum non credis, non est satis ut bonum dicas. Non tales ego quaero discipulos, qui me magis secundum hominem magistrum bonum, quam secundum Divinitatem Deum bonum credant.

CAPUT II.

Bonum esse Dei Filium ab operibus probat, nimirum ab ejus in Israelitis sub Testamento veteri, et in christianos sub novo beneficiis. Tum ubi subjecit, utile sibi esse, ut bonum dominum ac judicem suum arbitretur: paternum de Filio testimonium affert; imo etiam partis non exiguae judaeorum, quibus proinde peiores ariani esse declarantur. Quae omnia verborum sponsae, eandem Christi bonitatem designantium, claudit expositio.

20. Sed nolo praerogativa naturae suae et privilegio potestatis utatur. Non dicatur bonus, si non meretur, a nobis. Si hoc non meretur operibus, si beneficiis non meretur, abdicetur suae jure naturae, subdatur nostro judicio. Qui judicaturus de nobis est, non de-

dignatur judicari, ut justificetur in sermonibus suis, et vincat cum judicatur (Psal. 50, 6).

21. Hiccine ergo non bonus, qui bona tribuit mihi (Psal. 12, 6)? Hiccine non bonus, qui cum sexcenta millia populi judaeorum persecutoribus suis cederent, dehiscentem subito rubri maris aestum individua aquarum mole divisit (Exod. 14, 6—27); ut fideles circumfusa unda muniret, infidos refusa demergeret?

22. Hiccine non bonus, cujus imperio maria solidata fugientibus, saxa humefacta sitientibus (Id. 17, 6); ut opus veri agnosceretur auctoris, cum humor rigesceret, petra inundaret? Quod ut agnosceres opus Christi, Apostolus dixit: *Petra autem erat Christus* (1. Cor. 10, 4).

23. Hiccine non bonus, qui tam innumera populi millia, ne qua incesseret fames, in deserto pavit pane coelesti, sine usu laboris, cum fructu quietis; ita ut eorum per quadraginta annos nec vestimenta veterascerent, nec calceamenta tererentur (Exod. 16, 13. et seqq.), instar fidelibus futurae resurrectionis, ostendens, quod nec factorum decor splendorum, nec circumfusae virtutis nitor, nec vitae cursus periret humanae?

24. Hiccine non bonus, qui nobis coelum

fecit esse quod terra est, ut sicut in coelo, quasi in speculo quodam, stellarum lucentium refulgerent globi, ita etiam apostolorum et martyrum et sacerdotum, vice stellarum fulgentium, toto illucescerent chori mundo?

25. Ergo non solum bonus, sed etiam pastor bonus, hoc est, non sibi tantum, sed etiam ovibus suis bonus: *Bonus enim pastor animam suam ponit pro ovibus suis* (Joan. 10, 11). Posuit plane animam suam, ut nostram levaret: sed pro Divinitatis potestate posuit et sumpsit, sicut scriptum est: *Potestatem habeo ponendi animam meam, et potestatem habeo sumendi eam. Nullus eam tollit a me, sed ego a memetipso pono eam* (Ibid. 17. 18).

26. Vides bonitatem, quia sponte posuit: vides potestatem, quia sumpsit; et tu bonum negas, cum ipse de se in Evangelio dixerit: *Si ego bonus, quare oculus tuus nequam* (Matth. 20, 15)? Ingrate, quid agis? Bonum negas, per quem bona speras, si tamen credas? Bonum negas, qui dedit nobis quae oculus non vidit, nec auris audivit (1. Cor. 2, 9)?

27. Mihi expedit, ut bonum credam: *Bonum est enim confidere Domino* (Psal. 117, 8). Mihi expedit ut Dominum confitear; scri-

ptum est enim: *Confitemini Domino, quoniam bonus* (Ibid. 1).

28. Mihi expedit, ut iudicem meum bonum arbitrer; Dominus enim iudex bonus domui Israël. Ergo si iudex Dei Filius, utique quoniam iudex Deus bonus, iudex autem Dei Filius est; Deus bonus iudex et Dei Filius est.

29. Sed fortasse non credas aliis, non credas Filio? audi Patrem dicentem: *Eructavit cor meum Verbum bonum* (Psal. 44, 2). Bonum ergo Verbum est, Verbum hoc, de quo scriptum est: *Et Verbum erat apud Deum, et Deus erat Verbum* (Joan. 1, 1). Ergo si Verbum bonum, Filius autem Dei Verbum est: bonus utique Deus est Dei Filius, etiamsi non placeat arianis. Erubescant aliquando.

30. Judaei dicebant: *Bonus est*. Etsi alii dicebant: *Non est*, alii dicebant tamen: *Bonus est* (Joan. 7, 12); et vos omnes bonum negatis.

31. Bonus est, qui peccatum unius donat; et bonus non est, qui peccatum mundi abstulit? De ipso enim dictum est: *Ecce Agnus Dei, ecce qui tollit peccatum mundi* (Id. 1, 29).

32. Sed quid dubitamus? Credidit jam Ec-

clesia bonum, et confessa est dicendo : *Osculetur me ab osculis oris sui, quoniam bona ubera tua super vinum* (Cant. 1, 1), et alibi : *Et fauæ tua tamquam vinum est optimum* (Id. 7, 9). Bonus ergo ille nos legis et gratiae nutrit uberibus, coelesti curas hominum praedicatione demulcens; et nos bonum negamus, cum sit imago bonitatis, exprimens aeternae in se bonitatis effigiem, sicut et supra ostendimus scriptum, quia ipse est *speculum sine macula et imago bonitatis illius* (Sap. 7, 26)?

CAPUT III.

Filium Dei Deum bonum ac verum esse, cum Deus unus sit.

33. (*Al. cap. II.*) Sed quid vobis videtur, qui bonum et verum Deum Dei Filium denebatis, cum scriptum sit, quod nullus Deus, nisi unus (1. Cor. 8, 4)? Nam etsi sunt qui dicantur dii, an inter eos Christum annumeratis, qui dicuntur et non sunt? Cum speciale sit ejus, ut semper sit: et praeter ipsum bonus et verus alius Deus non sit, quoniam in ipso est Deus: speciale autem etiam Patris sit, ut post ipsum verus alius Deus non sit, quia unus Deus, nec juxta sabellianos Patrem Filiumque confundens, nec juxta aria-

nos Patrem Filiumque secernens. Pater enim et Filius distinctionem habent, ut Pater et Filius; separationem Divinitatis non habent.

CAPUT IV.

Omnipotentem esse Dei Filium prisci novique foederis auctoritate demonstratur.

34. (*Al. cap. III.*) Itaque cum verus et bonus Dei Filius, utique omnipotens Deus Dei Filius, num hinc quoque dubitari potest? Supra diximus lectum, quia Dominus omnipotens nomen est ei (*Sup. lib. 1. cap. 1*). Ergo quia Filius Dominus, Dominus autem omnipotens; omnipotens est Dei Filius.

35. Sed accipe etiam eam, de qua dubitare nequeas, lectionem: *Ecce venit, inquit, cum nubibus, et videbit eum omnis oculus, et qui eum compunxerunt: et plangent se super eum omnes tribus terrae. Etiam, amen. Ego sum A et Ω, dicit Dominus Deus, qui est, et qui erat, et qui venturus est omnipotens* (*Apoc. 1, 7, 8*). Quem igitur compunxerunt, et quem speramus esse venturum, nisi Filium? Ergo omnipotens Dominus et Deus Christus est.

36. Accipe aliud, sancte Imperator, et accipe Christum loquentem: *Haec dicit Domi-*

nus omnipotens: Post honorem misit me super gentes, quae depraedaverunt vos; quoniam qui tangit vos, quasi qui tangit pupillam oculi ejus. Quia ecce ego in jicio manum meam super eos, qui depraedaverunt vos, et eruam vos; et erunt in praedam, qui depraedaverunt vos, et scient quia Dominus omnipotens misit me (Zach. 2, 8). Utique qui dicit: Dominus est omnipotens: et qui misit, Dominus est omnipotens. Ergo et Patris et Filii omnipotentia: sed tamen Deus unus omnipotens; quia unitas potestatis est.

37. Atque ut scias, Imperator Auguste, Christum esse, qui locutus est et in propheta et in Evangelio, tamquam in praedestinatione Evangelii per Isaïam dicit: *Ipse qui loquebar, adsum* (Isai. 52, 6), hoc est: Adsum in Evangelio, qui loquebar in lege.

38. Deinde alibi: *Omnia quae Pater habet mea sunt* (Joan. 16, 25). Quae sunt omnia? Non utique locutus est de creatis; haec enim omnia facta sunt per Filium: sed ea quae Pater habet, id est, aeternitatem, majestatem, Divinitatem, quae nascendo possedit. Ergo eum qui omnia habet, quae Pater habet (scriptum est enim: *Omnia quae Pater habet mea sunt*), omnipotentem esse dubitare non possumus.

CAPUT V.

Objectos adversus Christi omnipotentiam Scripturae textus exponit; ac maxime in eo immoratur, ut eundem non raro ex humanae naturae affectu locutum probet.

39. Nec vereor ne, quia scriptum est de Deo: *Beatus et solus potens* (1. Tim. 6, 15), ab eo Dei Filius separaretur; cum Scriptura Deum solum potentem dixerit, non Patrem solum: et ipse de Christo Deus Pater asserat per prophetam: *Posui adjutorium super potentem* (Psal. 88, 20). Non ergo Pater solus potens, sed potens etiam Deus Filius; in Patre enim laudatur et Filius.

40. Certe ostendat aliquis quid sit, quod non possit Dei Filius: quis ei adjutor cum coelum faceret, fuit: quis adjutor cum conderet mundum? An qui in constitutione angelorum et dominationum adjutore non eguit, eguit ut hominem liberaret?

41. Scriptum est, inquiunt: *Pater meus, si possibile est, transfer a me calicem hunc* (Matth. 26, 39. et Luc. 22, 42). Et ideo si omnipotens est, quomodo de possibilitate ambigit? Ergo quia omnipotentem probavi, probavi utique ambigere eum de possibilitate non posse.

42. Verba, inquis, Christi sunt. Verum dicis: sed quando et in qua forma loquatur, adverte. Hominis substantiam gessit, hominis assumpsit affectum. Denique supra habes, quia progressus pusillum procidit in faciem suam, orans et dicens: *Pater, si possibile est*. Non ergo quasi Deus, sed quasi homo loquitur; Deus enim possibile aliquid aut impossibile nesciebat? Aut aliquid impossibile Deo, cum scriptum sit: *Impossibile enim tibi nihil est* (Job. 22, 17)?

43. De quo autem dubitat, de se, an de Patre? De eo utique qui dicit: *Transfer*: et dubitat hominis affectu ¹⁾. Ergo propheta non putat aliquid impossibile Deo. Propheta non dubitat, et Filium dubitare tu credis? Num infra homines constituis Deum? Et dubitat de Patre Deus, et de morte formidat? Timet ergo Christus; et cum Petrus non timeat, Christus timet? Petrus dicit: *Animam meam pro te ponam* (Joan. 13, 37); Christus dicit: *Anima mea turbatur* (Id. 12, 27).

44. Utrumque verum est, et plenum utrum-

1) Quae hic Ambrosius de dubio Christi scribit, ea ratione accipi possunt, inquit Magister sententiarum l. 3. dist. 17., non quia ipse (Christus, etiam in quantum homo est) dubitaverit, sed quia modum gessit dubitantis et hominibus dubitare videbatur.

que rationis; quod et ille qui est inferior, non timet: et ille qui superior est, gerit timoris affectum: ille enim quasi homo vim mortis ignorat, iste quasi Deus in corpore constitutus fragilitatem carnis exponit; ut eorum qui sacramentum incarnationis abjurant, excluderetur impietas. Denique et haec dixit, et Manichaeus non credidit ¹⁾, Valentinus negavit, Marcion phantasma judicavit.

45. Eo usque autem hominem, quem veritate corporis demonstrabat, aequabat affectu, ut diceret: *Sed tamen non sicut ego volo, sed sicut tu vis* (Matth. 26, 39); cum utique similiter sit Christi velle, quod Pater vult: cujus similiter est facere, quod Pater facit

46. Quo loco etiam illa vestra quaestio conticescit, quam soletis objicere, quia dixit Dominus: *Non sicut ego volo, sed sicut tu vis* (Ibid.); et alibi: *Ad hoc descendi de coelo, non ut faciam voluntatem meam, sed voluntatem ejus qui me misit* (Joan. 6, 38).

1) *Et Manichaeus non credidit.* Licet Christus tam evidens verae naturae humanae praebuerit argumentum, tamen plures haeretici ut Manichaeus, Valentinus, Marcion etc. naturae humanae veritatem in Christo negarunt. Quot illam negassent, si Christus talia non dedisset argumenta,

CAPUT VI.

Occasione superiorum Scripturae locorum tantisper digrediens, libertatem Domini primum ex eo, quod eadem praeditus affirmetur Spiritus sanctus, deinde expressis quibus ipsa Filio Dei attribuitur, testimoniis demonstrat.

47. Ergo ut quasi interpositis plenioris expositionis paulisper induciis, cur dixerit: *Si possibile est*, voluntatis interim liberae Dominum fuisse doceamus. In tantum processistis impietatis, ut negetis, quod Filius Dei liberae voluntatis sit. At certe soletis etiam sancto Spiritui derogare, et negare non potestis scriptum esse: *Spiritus ubi vult, spirat* (Joan. 3, 8). *Ubi vult*, inquit, non ubi jubetur. Ergo si Spiritus ubi vult, spirat, Filius quod vult, non agit? Et certe idem Dei Filius in Evangelio suo dicit, ubi velit spirandi suppetere Spiritui facultatem. Numquid ergo superiorem fatetur quia illi licet, quod sibi non licet?

48. Apostolus quoque dicit, quia *omnia operatur unus atque idem Spiritus, dividens singulis prout vult* (1. Cor. 12, 11). *Pro-ut vult*, inquit, hoc est, pro liberae voluntatis arbitrio, non pro necessitatis obsequio. Et dividit Spiritus non mediocria, sed quae Deus

consuevit operari, gratiam curationum et operationem virtutum. Ergo dividit Spiritus prout vult, Filius Dei non liberat, quem vult? Sed audi etiam ipsum agere quod vult: *Ut faciam voluntatem tuam, Deus meus volui* (Psal. 39, 9). Et alibi: *Voluntarie sacrificabo tibi* (Id. 53, 8).

49. Scivit sanctus apostolus Petrus Jesum in potestate habere quae vellet; et ideo cum videret ambulare eum supra mare ait: *Domine, si tu es, jube me venire ad te super aquas* (Matth. 14, 28). Petrus credidit quia si Christus jubeat, naturae possit conditio mutari, ut humanis se subjiciat unda vestigiis, et discrepantium naturarum possit convenire concordia. Petrus poscit ut jubeat, non ut roget Christus: Christus non rogavit, sed jussit et factum est: et Arius contradicit?

50. Quid est tamen quod Pater velit, Filius nolit: aut Filius velit, et Pater nolit? *Pater quos vult, vivificat*, et Filius quos vult vivificat (Joan. 5, 21), sicut scriptum est. Dic nunc quos vivificaverit Filius, et Pater vivificare noluerit. Cum autem Filius quos velit vivificet operatio una sit, vides quia non solum Filius voluntatem Patris, sed etiam Pater Filii faciat voluntatem? Quid est autem vivificare, nisi

per Filii passionem? Passio autem Christi voluntas est Patris. Quos ergo Filius vivificat, per Patris vivificat voluntatem. Una igitur est voluntas.

51. Quae autem voluntas Patris, nisi ut veniret Jesus in hunc mundum, et nos mundaret a vitiis? Audi leprosum dicentem: *Si vis, potes me mundare*. Respondit Christus, *Volo* (Matth., 8, 2); et statim secutus est effectus sanitatis. Vides quia Filius suae arbitri voluntatis est, et Christi voluntas eadem quae paterna est? Quamquam cum dixerit: *Omnia quae Pater habet, mea sunt* (Joan. 16, 15); sine dubio quia nihil excipitur, quam Pater habet, eandem habet et Filius voluntatem.

CAPUT VII.

Redit ad propositae difficultatis solutionem, et voluntatem affectusque humanos a Christo vere susceptos esse, ac proinde quidquid in ipso non congruit Divinitati, ex eisdem oriri docet, atque ad id quod simul Deus et homo erat, referri.

52. Una ergo voluntas, ubi una operatio: in Deo enim voluntatis series operationis effectus est. Sed alia voluntas hominis, alia Dei. Denique ut scias vitam in voluntate esse hominis, quia mortem timemus: passionem autem Christi in voluntate divina, ut

pateretur pro nobis: cum Petrus eum vellet a passione revocare, Dominus ait: *Non sapis quae Dei sunt, sed quae sunt hominum* (Matth. 16, 23).

53. Suscepit ergo voluntatem meam, suscepit tristitiam meam. Confidenter tristitiam nomino, quia crucem praedico. Mea est voluntas, quam suam dixit; quia ut homo suscepit tristitiam meam, ut homo locutus est; et ideo ait: *Non sicut ego volo, sed sicut tu vis* (Matth. 26, 39). Mea est tristitia, quam meo suscepit affectu: nemo enim moriturus exultat. Mihi compatitur, mihi tristis est, mihi dolet. Ergo pro me et in me doluit, qui pro se nihil habuit quod doleret.

54. Doles igitur, Domine Jesu, non tua, sed mea vulnera: non tuam mortem, sed nostram infirmitatem, sicut ait Propheta: *Quia pro nobis dolet* (Isai. 53, 4): et nos, Domine, aestimavimus te esse in doloribus; cum tu non pro te, sed pro me doleres.

55. Et quid mirum si pro omnibus doluit, qui pro uno flevit? Quid mirum si moriturus pro omnibus taedeat, qui Lazarum resuscitaturus illacrymat? Verum et ibi pia sororis lacrymis commovetur, quia mente humana tangebatur: et hic alto operatur affectu, ut sicut mors ejus mortem abstulit, livor ejus

ulcera nostra sanavit: ita etiam moerorem nostrum moeror ejus aboleret ¹⁾).

1) Pulcherrima patrum doctrina, Christum nostra suscepisse, ut ea sanaret, sanctificaret vimque inderet meritoriam. Hinc Thomassini ex patrum doctrina statuit de incarn. l. 3. c. 18. § 5: „Deinde non partes tantum físicas, corpus et animam, sed et minutissima quaeque Verbo Deo ss. patres affigere laborarunt: dolorem, metum, lacrymas affectusque omnes, conceptus, natales, cunas, aetates omnes, esuriem, sitim, fatigationem aerumnasque, ut quocunque irrepserit peccatum, insinuaretur et medicina, utque omnia mors tabefecerat, sic omnibus vita aspergeretur.“ Belle Gregorius nazianzenus or. 37. al. 31. n. 2: „Quin hac quoque fortasse ratione somnum capit, ut somnum benedicat: fortasse etiam fatigatur, ut fatigationem sanctificet; fortasse etiam lacrymas fundit, ut lacrymas laudabiles reddat.“ Egrege quoque Cyrillus alex. in Joan. 12, 27. (Mig. 74, 91): „Enimvero, quemadmodum non aliter mors nisi Servatore mortuo destructa fuisset, sic de unaquaque carnis affectione censendum est. Quippe nisi timuisset, immunis timendi natura haud exstisset: nisi contristatus esset, nusquam eadem tristitia et dolore caruisset: nisi perturbatus et percussus fuisset, nusquam horum vacuitatem nacta foret. Et in unoquoque eorum, quae humanitus fiunt, convenientem rationem reperies in Christo commotasque carnis passionem, non ut victoriam obtinerent velut in nobis, sed ut commotae vi Verbi in carne habitantis sedarentur et comprimerentur, transformata in meliorem statum natura.“ Quo vero sensu Christus obnoxius fuerit humanis affectionibus, explicavimus in annot. opuso,

56. Ut homo ergo dubitat, ut homo turbatur. Non turbatur ejus virtus, non turbatur ejus Divinitas: sed turbatur anima: turbatur secundum humanae fragilitatis assumptionem. Et ideo quia suscepit animam, suscepit et animae passiones; non enim Deus eo quod Deus erat, aut turbari aut mori potuisset. Denique, *Deus, Deus*, inquit, *meus*, *quare me dereliquisti* (Psal. 21, 2)? Ut homo ergo loquitur, meos circumferens metus, quod in periculis positi, a Domino deseri nos putamus. Ut homo turbatur, ut homo flet, ut homo crucifigitur.

57. Sic enim et apostolus Paulus dixit: *Quia Christi carnem crucifixerunt* (Galat. 5, 24). Et alibi apostolus Petrus ait: *Christo passo secundum carnem* (1. Petr. 4, 1). Caro igitur est passa, Divinitas autem mortis libera: passioni corpus naturae humanae lege concessit; an vero mori Divinitas potest, cum anima non possit? *Nolite*, inquit, *ti-*

XIV, 160. Qua occasione advertimus ibidem in verbis Augustini ex tract. 60. in Joan. excidisse integram lineam, proinde ita in fine esse legendum: „Nos ipsos in illius perturbatione videamus, ut quando turbamur, non desperatione pereamus; quando turbatur, qui non turbaretur nisi volens, eum consolatur qui turbatur et nolens.“

mere eos, qui corpus possunt occidere, animam autem non possunt (Matth. 10, 28). Si ergo anima occidi non potest, quomodo Divinitas potest?

58. (*Al. cap. IV.*) Unde illud quod lectum est, Dominum majestatis crucificum esse, non quasi in majestate sua crucifixum puteamus (1. Cor. 2, 8): sed quia idem Deus idem homo, per Divinitatem Deus, per susceptionem carnis homo Jesus Christus, Dominus majestatis dicitur crucifixus; quia consors utriusque naturae, id est, humanae atque divinae, in natura hominis subiit passionem; ut indiscrete et Dominus majestatis dicatur ¹⁾ esse qui passus est, et Filius hominis, sicut scriptum est: *Qui descendit de coelo* (Joan. 3, 13).

CAPUT VIII.

Ex principio proxime ante constituto illud solvitur, quod Christus dixit: Pater major me est. Quae verba et alia ejusdem rationis ubi secundum humanitatem intelligenda esse ostensum est, eundem Dominum secundum naturam divinam dici non posse Patri inferiore multum confirmatur.

1) De hac idiomatum communicatione disseruimus opusc. XXV, 197. annot. Ceterum hic locus a s. Leone ep. 165. allegatur. Cf. opusc. XXV, 250.

59. Per naturam igitur hominis et dubitavit, et taeduit, et resurrexit; quod enim cecidit, hoc resurgit. Per naturam hominis dicit etiam illud, de quo calumniari solent, quia dictum est: *Quoniam Pater majorem est* (Id. 14, 28).

60. Verum quia alibi dicitur: *Exivi a Patre, et veni in mundum: iterum relinquo mundum, et vado ad Patrem* (Id. 16, 28); quomodo vadit, nisi per mortem: et venit, nisi per resurrectionem? Denique addidit, ut de assumptione se dixisse signaret: *Propterea dixi vobis priusquam fiat; ut cum factum fuerit, credatis* (Id. 14, 29). Loquebatur enim passionem sui corporis et resurrectionem, per quam credere coeperant, qui ante dubitabant; neque enim Deus de loco ad locum transit, qui ubique semper est. Ut homo est qui vadit, ipse est qui venit. Denique et alibi dicit: *Surgite, eamus hinc* (Joan. 14, 31). In eo ergo vadit et venit, quod est commune nobiscum.

61. Nam quomodo potest minor esse Deus, cum Deus perfectus et plenus sit? Sed minor in natura hominis: et miraris si ex persona hominis ¹⁾ Patrem dixit majorem, qui in per-

1) Evidens est haec nestoriano errori minime suf-

sona hominis se vermem dixit esse, non hominem; dixit enim: *Ego autem sum vermis, et non homo* (Psal. 21, 7); et alibi: *Sicut ovis ad occisionem ductus est* (Isai. 53, 7).

62. Si in hoc minorem dicis, negare non possum: sed, ut verbo utar Scripturae, non minor natus, sed *minoratus* (Hebr. 2, 9), hoc est, minor factus est. Quomodo autem minor factus, nisi quia *cum in forma Dei esset, non rapinam arbitratus est esse se aequalem Deo, sed semetipsum exinanivit* (Philip. 2, 6. 7): non remittens utique quod erat, sed assumens quod non erat; quia formam servi accepit.

63. Denique ut sciremus per susceptionem corporis minoratum, de homine se David prophetare signavit dicens: *Quid est homo, quod memor es ejus: aut Filius hominis, nisi quia visitas eum? Minorasti eum paulo minus ab angelis* (Psal. 8, 5. 6). Et hoc ipsum interpretatus Apostolus, ait: *Nam*

fragari, cum orthodoxa s. Ambrosii de unitate personae in Christo sententia satis innotescat. Eo proinde significato accipienda est hic *personae* vox, quo vulgus dicit aliquem in persona alicujus loqui vel agere i. e. vice, nomine vel auctoritate. Ita etiam l. 4. n. 69. dicit, eundem Christum *ex personae hominis incarnati susceptione loqui*.

paulo quam angelos minoratum videmus Jesum, propter passionem mortis gloria et honore coronatum; ut sine Deo pro omnibus gustaret mortem (Hebr. 2, 9).

64. Non solum ergo Patre, sed etiam angelis minor Filius Dei factus est. Et si hoc ad praejudicium trahis; num ergo Filius in natura Dei minor est, quam sui angeli qui ei serviunt et ministrant (Matth. 4, 6)? Ita dum minorem vultis asserere, impietatem incurritis, ut angelorum naturam Dei Filio praeferatis. Sed *non est servus supra Dominum suum* (Matth. 10, 24). Denique et in carne constituto angeli ministrabant, ut nihil eum agnoscas per naturam corporis imminutum. Neque enim Deus sui pati potuit detrimentum, cum id quod assumpsit ex Virgine, nec accessio divinae nec diminutio potestatis sit.

65. Non est ergo secundum Divinitatem minor, qui plenitudinem habet Divinitatis et gloriae. Major enim et minor in iis quae corporalia sunt, distingui solent: aut statu major, aut plenitudine, aut certe aetate. Vacant ista, ubi de divinis tractatus inducitur. Major enim vulgo dici solet, qui aliquem instituit et informat: in Dei autem sapientiam non cadit, ut instituta sit alterius discipli-

nis, cum ipsa disciplinarum omnium traderit institutum. Quam bene autem posuit Apostolus: *Ut sine Deo pro omnibus gustaret mortem* (Hebr. 2, 9); ne Divinitatis illam passionem putaremus fuisse, non carnis!

66. Ergo si non invenerunt quemadmodum possent probare majorem, non verbis calumnientur, sed verborum rationem requirant. Ergo illos interrogo, quo putent esse majorem? Si quia Pater est, eo majorem putant: sed non hic aetas et tempus, neque canities patris, et filii pueritia est; haec enim majorem solent facere patrem ¹⁾. Ceterum pater et filius generantis et nati nomina sunt, quae non videntur separare, sed jungere; non enim pietas naturae detrimentum est: namque homines sibi invicem conciliat necessitudo, non separat.

67. Itaque si nec de natura afferre possunt

1) *Majorem solent facere patrem.* Sola aetate praecellit apud homines pater filium, nam secundum naturam pater filio est aequalis, quoad reliqua filius potest etiam patrem praecellere. Sed ubi aeternitas, ibi nulla aetatis differentia. Ceterum ut advertit acute s. Ambrosius, nomina patris et filii distinctionem quidem significant personarum earumque ad invicem relationem, sed non diversitatem naturae, imo potius naturae aequalitatem, unitatem, supponunt.

aliquam quaestionem, [vel testimoniis credant. Denique Filium non esse eo minorem, quia Filius est, evangelista testatur; et aequalem esse, quia Filius est, ipse significat dicens: *Propterea enim volebant eum occidere judaei, quia non solum solvebat sabbatum, sed et Patrem proprium dicebat Deum, aequalem se faciens Deo* (Joan. 5, 18).

68. Non judaei hoc dicunt, sed evangelista testatur, quod aequalem se faciebat Deo, proprium se Filium Dei dicens. Non enim scriptum est ex persona judaeorum dicentium: Propterea volebamus eum occidere; sed evangelista ex sua persona dicit: *Propterea enim volebant illum judaei occidere*. Et interpretatus est causam, ideo judaeos ad necem ejus esse commotos, quod cum et sabbatum quasi Deus solveret, et Deum Patrem sibi proprium vindicaret, non solum in solutione sabbati majestatem divinae potestatis, sed etiam in Patris proprii nomine jus sibi aeternae aequalitatis adscisceret.

69. Quibus aptissime respondit Dei Filius, ut et Dei se Filium et aequalem probaret: *Quaecumque, inquit, Pater fecerit, eadem et Filius facit similiter* (Ibid. 19). Filius igitur Patri et dicitur et probatur aequalis. Bona aequalitas, quae et differentiam Divini-

tatis excludit, et cum Filio Patrem signat ¹⁾, cui Filius sit aequalis: non est enim diversa, nec singularis aequalitas; quia nemo aequalis ipse sibi solus est. Ergo Evangelista interpretatus est quid sit proprium Filium Dei se dicere, hoc est, aequalem se facere Deo.

70. Unde id secutus Apostolus dixit: *Non rapinam arbitratus est esse se aequalem Deo* (Philip. 2, 6). Quod enim quis non habet, rapere conatur. Ergo non quasi rapinam habebat aequalitatem cum Patre, quam in substantia sui tamquam Deus et Dominus possidebat. Unde addidit: *Formam servi accepit* (Ibid. 7). Contrarium utique servus et aequalis. Aequalis ergo in Dei forma, minor in susceptione carnis et hominis passione. Nam quomodo eadem posset minor esse aequalisque natura? Quomodo autem si minor est, eadem similiter facit, quae Pater facit? Nam quemadmodum eadem operatio diversae esset potestatis? Numquid sic potest minor, quemadmodum major operari? aut una operatio potest esse, ubi diversa substantia est?

71. Itaque accipe Christum secundum Di-

1) *Signat*, significat, exprimit. Ad aequalitatem duo requiruntur, termini distincti, nemo enim sibi aequalis dicitur: et ut hi termini non differant ab invicem.

vinatatem minorem non posse dici ¹⁾. Ipse loquitur ad Abraham: *Per me ipsum juraui* (Gen. 22, 16). Ostendit autem Apostolus eum, qui per se jurat, minorem esse non posse. Itaque sic ait: *Abraham cum repromisisset Deus, quoniam nullum alium majorem habebat, juravit per seipsum, dicens: Nisi benedicendo benedixero te, et multiplicando multiplicavero te* (Hebr. 6, 13. 14). Ergo majorem non habuit Christus, et ideo per se juravit. Et bene addidit: *Homines enim per majorem se jurant* (Ibid. 16); quia homines majorem habent, Deus non habet.

72. Aut si volunt de Patre dictum videri, reliqua non cohaerent; neque enim Pater visus est Abraham, nec Deo Patri pedes lavit, sed ei in quo futuri hominis est figura. Denique Filius Dei dicit: *Abraham diem meum vidit, et gavisus est* (Joan. 8, 56). Ipse est ergo qui per se juravit, quem Abraham vidit.

1) Certum plane est, Filium secundum divinitatem non esse Patre minorem, una enim eademque divinitas est in Patre Filioque. Tamen patres graeci concedunt Patrem non solum majorem esse Filio secundum humanam naturam, sed etiam secundum characterem personalem seu aliquod *ἄξιωμα ὑποστατικόν*, qua de re cf. opusc. XXIX. pag. 260. cum annot. subjecta.

73. Et revera quomodo majorem habet, qui Divinitate cum Patre unum est (Id. 10, 30)? Quod enim unum est, dissimile non est: inter majorem autem minoremque discretio est. Ergo de Filio et Patre praesentis docet lectionis exemplum, quia nec Pater minorem habet, nec majorem Dei Filius; cum in Patre et Filio nulla distantia Divinitatis sit, sed una majestas.

CAPUT IX.

Objicientibus Filium, cum a Patre sit missus, eo utique minorem esse, respondetur illum etiam a Spiritu missum, quo tamen minor non habeatur. Additur etiam Spiritum mitti a Patre et Filio, ut utriusque operationum unitas designetur. Hinc admonemur sedulo distinguendum quae locutiones Christo ut Deo, quaeve eidem ut homini convenient: quarum exempla non pauca subjiciuntur exponunturque.

74. Nec illud sane metuo, quod solent obtendere, minorem esse, quia missus est. Si enim et minor non docetur ¹⁾, et honori-

1) *Si enim et minor, non docetur* i. e. hoc non sequitur ex eo quod dicitur missus. — N. seq. *Non ergo humani sermonis angustias* etc. Cum s. Scripturae saepe claris verbis Filii cum Patre aequalitatem doceant, eamque pariter testentur opera, non licet eam in dubium vocare propter unicum vocabulum, ad quod nos, cum de Deo est sermo, usurpandum humani ser-

ficientiae docetur aequalitas: cum ita omnes honorificent Filium, sicut honorificant Patrem (Joan. 5, 23), constat eo minorem non esse, quod missus est.

75. Non ergo humani sermonis angustias, sed verborum claritatem intueri, operibus crede. Considera quia Dominus noster Jesus Christus in Isaia locutus est ab Spiritu sancto esse se missum (Isai. 61, 1). Numquid ergo Spiritu minor Filius, quia missus ab Spiritu est? Habes igitur scriptum, quod Filius a Patre et Spiritu ejus dicat esse se missum: *Ego sum, inquit, primus, et ego in aeternum, et manus mea fundavit terram, dextera mea solidavit coelum; et infra: Ego locutus sum, et ego vocavi; adduxi eum, et prosperum iter ejus feci. Accedite ad me, et audite haec: non in occulto ab initio locutus sum. Cum fierent, illic eram: et nunc Dominus misit me, et Spiritus ejus* (Isai. 48, 12—16). Utique qui coelum fecit et terram, ipse dicit a Domino et a Spiritu ejus

monis cogunt angustiae. Loquimur enim de Deo deque rebus divinis verbis, quibus de creatis disserentes utimur, quae proinde saepe imperfectionem creaturis propriam adsignificant. Forte melius *caritatem*, i. e. vel humanitatem verbo *missus* expressam, vel verborum *inopiam*.

esse se missum. Videtis ergo quod simplicitas sermonis non injuria missionis sit. Ipse igitur missus a Patre, ipse est missus ab Spiritu.

76. Et ut cognoscas nullam majestatis esse distantiam, etiam Filius Spiritum mittit, sicut ipse dixit: *Cum venerit autem Paraclitus, quem ego mittam vobis a Patre meo, Spiritus veritatis, qui a Patre meo procedit* (Joan. 15, 26). Hunc eundem Paraclitum et a Patre esse mittendum supra docuit dicens: *Paraclitus autem ille Spiritus sanctus, quem mittet Pater in nomine meo* (Id. 14, 26). Vide unitatem, quia quem Deus Pater mittit, mittit et Filius: et quem mittit Pater, mittit et Spiritus. Aut si nolunt Filium missum, quia dexteram Patris Filium legimus; ipsi de Patre quod de Filio abnuunt, fatebuntur: nisi forte aut alterum sibi Patrem, aut alterum sibi Filium inveniant ariani.

77. Sileant igitur inanes de sermonibus quaestiones; quia regnum Dei, sicut scriptum est, non in persuasionem verbi est, sed in ostensione virtutis (1. Cor. 2, 4). Servemus distinctionem Divinitatis et carnis. Unus in utraque loquitur Dei Filius; quia in eodem utraque natura est: et si idem loquitur, non uno semper loquitur modo. Intende in eo nunc glo-

riam Dei, nunc hominis passiones. Quasi Deus loquitur quae sunt divina, quia Verbum est: quasi homo dicit quae sunt humana, quia in mea substantia loquebatur.

78. *Hic est panis vivus, qui descendit de coelo* (Joan. 6, 51). Panis hic caro est, sicut ipse dixit: *Hic panis quem ego dabo, caro mea est* (Ibid. 52). Hic est qui descendit de coelo, hic est quem Pater sanctificavit, et misit in hunc mundum. Nec ipsa litera nos docet sanctificatione Divinitatem eguisse, sed carnem. Denique ipse Dominus dixit: *Et ego memetipsum sanctifico pro ipsis* (Joan. 17, 19); ut agnoscas quod et sanctificatur in carne pro nobis, et Divinitate sanctificat.

79. Hic idem est quem Pater misit, sed *factum ex muliere, factum sub lege* (Galat. 4, 4), ut Apostolus dixit. Hic est qui ait: *Spiritus Domini super me, propter quod unxit me, evangelizare pauperibus misit me* (Luc. 4, 18). Hic est qui dicit: *Mea doctrina non est mea, sed ejus qui misit me. Si quis voluerit voluntatem ejus facere, cognoscet de doctrina, utrum ex Deo est, an ego a me ipso loquar* (Joan. 7, 16). Alia ergo ex Deo doctrina, alia ex homine. Itaque judaei cum doctrinam ejus secundum hominem quaerent, et dicerent: *Quomodo hic literas no-*

vit, cum non didicerit? respondit Jesus et dixit: *Mea doctrina, non est mea* (Ibid. 15); nam cum sine eruditione literarum doceat, non quasi homo, sed potius ut Deus videtur docere, qui doctrinam non didicerit, sed invenerit.

80. Adinvenit enim omnem viam disciplinae, ut supra lectum est. Nam utique de Filio Dei dictum est: *Hic est Deus noster, et non aestimabitur alius ad eum, qui adinvenit omnem viam disciplinae. Post haec in terris visus est, et cum hominibus conversatus est* (Baruc. 3, 36. et seqq.). Quomodo ergo secundum Divinitatem doctrinam suam non habet, qui adinvenit omnem viam disciplinae, antequam videretur in terris? Aut quomodo minor, de quo dictum est: *Non aestimabitur alius ad eum?* Utique incomparabilis dicitur, ad quem nemo alius aestimari potest: sed ita incomparabilis, ut Patri nequeat anteferri. Quod si de Patre dictum putant, impietatem Sabellii non evadent, ut Patris susceptionem humanae carnis attribuant.

81. Persequamur sequentia: *Qui a semetipso, inquit, loquitur, gloriam suam quaerit* (Joan. 7, 18). Vide unitatem, quae et Patrem signat et Filium ¹⁾. Non potest non esse,

1) Hisce verbis significatur naturae unitas in dis-

qui loquitur: sed non potest a semetipso esse quod loquitur, in quo naturaliter ex Patre sunt omnia.

82. Quid est autem: *Gloriam suam quaerit*? Hoc est, non divisam a Patre gloriam; nam utique et Verbum Deus habet gloriam. Denique dicit: *Ut videant gloriam meam* (Id. 17, 24). Sed illa Verbi gloria eadem Patris gloria est, sicut scriptum est: *Dominus Jesus Christus in gloria est Dei Patris* (Philip. 2, 11). Ita igitur secundum Divinitatem Dei Filius suam gloriam habet, ut Patris et Filii una sit gloria: non est ergo minor in claritate, quia una gloria; non minor Divinitate, quia plenitudo Divinitatis in Christo est.

83. Et quomodo, inquis, scriptum est: *Pater venit hora, clarifica Filium tuum* (Joan. 17, 1)? Qui hoc dicit, clarificatione, inquis, indiget. Huc usque oculos habes: quod reliquum est non legisti: sequitur enim: *Ut Filius tuus clarificet te* (Ibid.). Num-

tinctis personis. Eo ipso enim quod loquitur et docet, se personam esse significat: sed qui loquitur non a semetipso sed ex Patris doctrina, se a Patre distinctum esse docet, ita tamen ut unam eandemque cum Patre habeat doctrinam et propterea naturam, quia in Deo non aliud est esse et intelligere.

quid et Pater indiget, quia clarificandus a Filio est?

CAPUT X.

Objectionem a Filii obedientia desumptam solvit, ostenditque Trinitatis unam potentiam, Divinitatem atque operationem esse, addit Christum etiam matri, quam minor dici nequaquam potest, obedientiam exhibuisse.

84. Pari modo obedientiam Filii objicere solent; quia scriptum est: *Et specie inventus ut homo, humiliavit semetipsum, factus obediens usque ad mortem* (Philip. 2, 7, 8). Et hominem praemisit, et usque ad mortem dixit; ut intelligeremus obedientiam mortis non Divinitatis fuisse, sed incarnationis: in qua et officia nostra suscepit et nomina.

85. Didicimus itaque unam esse potentiam Trinitatis, quam nos in ipsa atque post ipsam docuit passionem; Filius enim patitur per corporis sacramentum, apostolis Spiritus sanctus infunditur: in manus Patris commendatur spiritus, Deus quoque Pater maxima voce signatur. Didicimus unam Patris et Filii esse imaginem, unam similitudinem, unam sanctificationem. Didicimus unam esse operationem, unam gloriam, unam quoque Divinitatem.

86. Unus ergo et solus Deus, quia scriptum est: *Dominum Deum tuum adorabis, et illi soli servies* (Deut. 6, 13). Unus Deus, non ut ipse sit Pater et Filius, sicut impius Sabellius asserit: sed quia Patris et Filii Spiritusque sancti una Divinitas sit: ubi autem una Divinitas, una voluntas, una praeceptio.

87. Denique ut scias et Patrem esse, et Filium esse, et unum opus Patris ac Filii esse, Apostolum sequere, qui dixit: *Ipse autem Deus et Pater noster, et Dominus noster Jesus dirigat viam nostram ad vos* (1. Thess. 3, 11). Et Patrem loquitur, et Filium loquitur: sed unitas directionis est, quia unitas potestatis est. Sic et alibi habes: *Ipse autem Dominus noster Jesus Christus, et Deus et Pater noster, qui dilexit nos, et dedit consolationem aeternam, et spem bonam in gratia, consoletur corda vestra et confirmet* (2. Thess. 2, 15. 16). Quantam unitatem ostendit, ut consolationis unitas, non pluralitas sit? Conticescat ergo perfidia, aut si ratione non vincitur, morali humanitate flectatur ¹⁾.

1) *Morali humanitate flectatur.* Si perfidia, quae ex Filii obedientia eum Patri esse inaequalem infert,

88. Consideremus quam moraliter egerit Dominus, ut nos non solum fidem, sed etiam mores doceret. Namque in forma hominis constitutus, subditus erat Joseph et Mariae (Luc. 2, 51). Numquid ergo minor et hominibus, quia subditus? Aliud pietatis, aliud potestatis est: sed non praejudicat pietas potestati. In quo ergo legis subditum Patri? In corpore scilicet, in quo erat subditus matri.

CAPUT XI.

Proponit cum arianis humaniter agere Christi exemplo vulnera vino et oleo curantis: ad quod coeleste medicamentum omnes invitans, quo consilio is carnem induerit et qua utilitate tradit. Hinc aperit, quantum prosit fidem habere, qua Christum propter nos omnem infirmitatem suscepisse cognoscimus, cujus Divinitas in passione erumpebat. Ex quibus intelligere est, Dei Filium sine subjectione ulla missum fuisse: nec metuendum ne fides haec displiceat Patri, quippe qui in Filio sibi complacere significet.

89. Agamus et nos moraliter, persuadeamus illis quod sibi prosit, obsecremus et

rationibus hucusque allatis non vincitur, saltem ex ejus humanitate, quæ morum seu virtutum omnium est exemplar, discat, obedientiam non necessario supponere inferiorem conditionem, dignitatem, naturam: nam Christus obedivit etiam Mariae et Joseph, quibus certo non erat inferior.

ploremus ante Dominum qui fecit nos (Psal. 94, 6). Non enim vincere volumus, sed sanare: non insidiosae agimus, sed religiose monemus. Saepe flectit humanitas, quos nec virtus potuerit superare, nec ratio. Denique Dominus illum hominem, qui ex Jericho descendens, incidit in latrones, quem non asperioribus legis medicamentis, non prophetico rigore curaverat, oleo curavit et vino (Luc. 10, 30. et seqq.).

90. Veniant ergo ad hunc omnes, qui sanari volunt, accipiant medicamentum, quod et a Patre detulit et praeparavit in coelo, ex illis confectum immortalibus succis. Hoc ex terra non pullulat; expers enim est omnis natura hujus confectionis. Divino enim consilio suscepit hanc carnem, ut ostenderet legem carnis legi esse subditam mentis. Suscepit carnem, ut quasi homo vinceret, qui homines erudiret.

91. Quid mihi prodesset, si quasi Deus exserta potestate Divinitatem suam tantummodo inviolabilem demonstrasset? Aut cur susciperet carnem, nisi ut tentari se naturae atque infirmitatis meae conditione pateretur? Tentari debuit, compati mihi debuit, ut scirem quemadmodum tentatus vincerem, compassus evaderem. Vicit per continentiam, vicit

per contemptum divitiarum, vicit per fidem: calcavit ambitionem, fugavit intemperantiam, lasciviam relegavit.

92. Hoc medicamentum Petrus vidit, et retia sua, instrumenta videlicet quaestus et subsidia dereliquit, renunciando carnis concupiscentiae tamquam corruptae navi, in quam quasi sentina quaedam multarum ingreditur passionum. Magnum ergo medicamentum, quod non solum cicatricem vetusti vulneris amputavit, sed etiam causam passionis incidit. O fides thesauris omnibus opulentior! o vulnerum nostrorum peccatorumque medicina praestantior!

93. Consideremus quia nobis prodest bene credere. Mihi enim prodest scire, quia propter me Christus suscepit meas infirmitates, mei corporis subiit passiones: pro me peccatum, hoc est, pro omni homine, pro me maledictum factus est (2. Cor. 5, 21), pro me atque in me subditus atque subjectus, pro me agnus, pro me vitis, pro me lapis, pro me servus, pro me filius ancillae, pro me diem iudicii ignorans ¹⁾, pro me nesciens diem aut horam.

1) Omnino tenendum est, Christum hominem humano intellectu (quamvis non virtute ipsius naturali)

94. Nam quomodo posset diem nescire, qui dies fecit et tempora? Quomodo posset diem ignorare iudicii, qui et horam futuri iudicii expressit et causam? Factus ergo maledictum non secundum Divinitatem, sed secundum carnem; scriptum est enim: *Maledictus omnis qui pendet in ligno* (Deut. 21, 23). Secundum carnem utique pependit; et ideo maledictum, qui nostra maledicta suscepit. Ille flevit, ne tu homo diu fleres: ille injurias passus est, ne tu injuriam tuam doleres.

95. Grande remedium, solatium habere de Christo. Ille enim pro nobis haec patientius tulit, et sumus qui patienter haec pro illius nomine ferre nequeamus! Quis appetitus non

cognovisse diem et horam iudicii (cf. annot opusc. XXIX. pag. 276), proinde nisi s. doctori absque sufficienti argumento adscribere velimus sententiam falsam, haec verba *pro me diem iudicii ignorans* ita explicari debent, ut sit sensus: Ita Christus se gessit ac si ignoraret diem iudicii: sicut se gessit ac si esset servus, quamvis revera non esset servus, sed Dei Filius. Ac revera Christus pro me i. e. exempli gratia ad docendam humilitatem plures abscondit praerogativas, quas revera habuit: ita nullum per triginta annos edidit miraculum etc. Hinc clarius infra l. 5. c. 4. n. 54. scribit: „Nescire se simulat, ut scire faciat nescientes.“

discat ignoscere, quando et pro persecutoribus suis Christus etiam crucifixus orabat? Videsne illas, quas tu putas Christi infirmitates, tuas esse virtutes? Cur de remediis nostris ei quaestionem movemus? Lacrymae illae nos lavant, fletus illi nos abluunt, ac dubitatio illa nos firmat, ne tu si coeperis dubitare, desperes. Quanto major est injuria¹⁾, tanto uberior debetur gratia.

96. Sed in ipsis injuriis cognosce Divinitatem. In cruce pendebat, et elementa ei omnia serviebant (Matth. 27, 51). Sol refugit, dies occidit, offusae et circumfusae tenebrae, terra tremuit: non tremuit qui pependit. Quid aliud haec, quam Auctoris reverentiam signant? Quia in cruce est, vides: quia regnum Dei donat, non vides. Quia mortem gustavit, legis: quia latronem quoque ad paradisum invitavit (Luc. 23, 43), non legis. Mulieres flentes intueris ad tumulum, non intueris angelos excubantes (Joan. 20, 12). Quid dixerit legis, quid gesserit non legis. Dicis chananaeae mulieri dixisse Dominum: *Non sum missus nisi ad oves, quae perie-*

1) *Quanto major est injuria* Christi, quo humilior fuit conditio et passio, quam Christus in se suscepit ex nostri amore, eo uberior fuit gratia, quam ea nobis promeruit.

runt domus Israël (Matth. 15, 24): non dicis, quoniam id quod ab ea rogatus est fecit.

97. Unde intelligere te convenit, quia missus non id significat, quod alieno sit coactus imperio, sed quod voluntario functus sit arbitratu: alioquin contemptum ostendis Patris. Si enim, ut tu interpretaris, paternorum famulus praeceptorum Christus venerat in Judaeam, ut solis ejus incolis mederetur, et Chananaeae prius filiam, ut legimus, liberavit; non utique alieni fuit executor imperii, sed voluntarii liber arbitrii ¹⁾. Ubi autem libertas voluntatis, ibi nulla praevaricatio missionis.

98. Nec vereare ne displiceat Patri, quod fecit Filius; cum ipse dicat: *Quaecunque placita sunt ei, facio semper* (Joan. 8, 29); et alibi: *Opera quae ego facio, ipse facit* (Id. 14, 12). Quomodo ergo Patri potuit displicere, quod ipse fecit per Filium? Unus enim Deus, sicut scriptum est, *qui justificavit circumcisionem ex fide, et praeputium per fidem* (Rom. 3, 30).

1) Cum Christus missum se dicit tantum ad oves Israel, et tamen pro arbitrio Chananaeae filiam sanavit, manifestum est, non ita fuisse missum, ut famulus tantum esset paternorum praeceptorum, sed ita ut propriam retineret auctoritatem, nec minor esset dignitate Patre mittente.

99. Omnia lege, omnia diligenter adverte; invenies sic demonstrasse se Christum, ut Deus in homine cerneretur: nec malitiose accipias de Patre Filium gloriantem, cum audias Patrem in Filio complacentem (Matth. 17, 5).

CAPUT XII.

Christum in persona iudicis consideratum catholici an ariani melius sibi concilient, inquiritur. Objectio propter iudicis sessionem ac Patris voces exorta dissolvitur; demonstraturque nullam in Filio nec subjectionem significari, quod sedeat a Patre invitatus: nec praelationem, quod ad ejus dextram sedeat. Denique ex angelico Trisagio personarum in Deo Trinitatem, ac simul unitatem naturae significari declaratur.

100. Sed si moralibus flecti non queunt, provocemus ad iudicem. Ad quem tandem ibimus? Nempe ad eum, qui iudicium habet. Numquid ad Patrem? Sed *Pater non iudicat quemquam; omne enim iudicium dedit Filio* (Joan. 5, 22). Dedit utique generando, non largiendo. Vide quam te noluerit Filio suo derogare, ut tibi ipsum iudicem daret.

101. Videamus ergo ante iudicium quis causam meliorem habeat, ego, an tu. Nempe prudentis actoris est prius conciliare sibi iudicem. Hominem honoras, Deum non honoras? Quid ergo conciliat, cognitorem, honori-

ficentia, an injuria? Pone me peccasse, quod non est; num offenditur honore suo Christus? Peccamus omnes: quis ergo veniam promerebitur, qui deferthonorificentiam, an qui irrogat contumeliam?

102 Aut si te ratio non movet, species saltem judicii ipsa commoveat. Attolle oculos ad judicem tuos, intueri qui sedeat, cum quo sedeat, ubi sedeat. Sedet Christus ad dexteram Patris. Aut si oculis hoc non potes comprehendere, audi dicentem Prophetam: *Dixit Dominus Domino meo: sede ad dexteram meam* (Psal. 109, 1). Sedet ergo ad dexteram Patris Filius. Dic nunc qui de secularibus arbitraris aestimanda divina, num tibi videatur inferior qui ad dexteram sedet? Num injuria Patris, quia ad sinistram sedet? Pater honorat, et tu injuriam putas? Pater mavult id esse pietatis exemplum, et tu putas praeceptionis imperium? De morte surrexit, et ad dexteram Dei sedet.

103. Sed *dixit*, inquis, Pater. Accipe etiam ubi non dicit Pater, et praedicat Filius: *Amodo videbitis Filium hominis sedentem ad dexteram virtutis* (Matth. 26, 64). Et hoc de assumptione corporis ¹⁾ dicit; huic

1) *Corporis* i. e. humanitatis.

dicit: *Sede ad dexteram meam*. Nam si de aeterna sede Divinitatis inquiris, interrogatus a Pilato si ipse esset rex judaeorum, ait: *In hoc sum natus* (Joan. 18, 37). Unde et Apostolus monet hoc esse nobis utile, si Christum non ex praecepto, neque ex gratia, sed quasi dilectissimum Filium ad dexteram Dei sedere credamus. Sic enim habes: *Quae sursum sunt quaerite, ubi Christus est ad dexteram Dei sedens: quae sursum sunt sapite* (Coloss. 3, 2). Hoc est enim superiora sapere, credere quia Christus ut sedeat, non quasi jussus obsequitur, sed quasi Filius dilectissimus honoratur. Propter rationem ergo corporis dicit: *Sede ad dexteram meam, donec ponam inimicos tuos scabellum pedum tuorum* (Psal. 109, 1).

104. Quid si et hoc ad calumniam trahis, quia Pater dixit: *Ponam inimicos tuos*; etiam Pater trahit ad Filium, quos Filius suscitet atque vivificet. *Nemo enim, inquit, potest venire ad me, nisi Pater, qui misit me, attraxerit eum: et ego resuscitabo eum in novissimo die* (Joan. 6, 44). Et tu Filium Dei pro infirmitate dicis esse subjectum, cui Pater attrahit, quos ille in novissimo die suscitet? Haec tibi videtur esse subjectio, in qua regnum Patri paratur, cum Pater ad

Filium trahat, et calumniae locus non sit, cum Patri regnum Filius tradat, nec aliquid praeferatur¹⁾? Haec enim documenta pietatis sunt, quod et Pater Filio, et Filius Patri tradat; ita enim sibi tradunt, ut neque ille qui accipit, quasi alienum acquirat: nec qui tradit, amittat.

105. Ad dexteram quoque sedere nulla praelatio est, neque ad sinistram injuria; Divinitas enim gradum nescit, nec loco aliquo circumscribitur, nec temporibus definitur. Angustis animis homines ista pensamus. Nulla differentia caritatis, nullum discrimen est unitatis.

106. Sed cur longius evagamur? Circumspectasti omnia, vidisti judicem, advertisti angelos praedicantes. Illi laudant, et tu vituperas! Dominationes et potestates venerantur, et tu calumniaris! Adorant omnes sancti ejus: non adorat Dei Filius, non adorat Spiritus sanctus. Seraphim dicunt: *Sanctus, sanctus, sanctus* (Isai. 6, 3).

1) *Nec aliquid praeferatur.* Codex Albin.: *Nec aliquis.* Forte haec ita intelligenda sunt: Nec aliquis praeferatur Filio, cui conceditur sedere ad dexteram Patris: hac ipsa praerogativa sicut et aliis excluditur omnis subjectionis servilis injuria et suspicio.

107. Quid sibi vult sub uno nomine sanctitatis trina repetitio? Si trina repetitio, cur una laudatio? Si una laudatio, cur trina repetitio? Trina repetitio cur, nisi quia Pater et Filius et Spiritus sanctus sanctitate unum sunt (1. Joan. 5, 7)? Non dixit semel, ne Filium sequestraret: non bis, ne Spiritum praeteriret: non quater, ne creaturas conjungeret. Et ut ostenderet Trinitatis unam esse Deitatem, cum tertio dixisset: *Sanctus, sanctus, sanctus*, addidit singulariter: *Dominus Deus sabaoth*. Sanctus igitur Pater, sanctus Filius, sanctus et Dei Spiritus. Adoratur igitur Trinitas, non adorat: laudatur Trinitas, non laudat. Ego malo sicut seraphim credere, et sicut omnes potestates virtutesque coelestes adorare ¹⁾.

CAPUT XIII.

Continuata iudicii dominici allegoria, blasphemias arianorum, sabellianorum et manichaeorum de suo iudice opiniones Ambrosius paucis refellit. Deinde propositis Christi de ceteris suis adversariis expostulationibus, iudicium sibi mitius futurum sperat.

108. Igitur prosecutionem tuam videamus, quemadmodum concilies tibi iudicem. Dic

1) Cf. aliorum patrum effata de angelico Trisagio annot. opusc. XVI, 178.

sane, dic, inquam: Ego te, Christe, puto esse dissimilem Patri. Respondebit et ille: Discerne, si potes; discerne, inquam, in quo putes esse dissimilem.

109. Dic aliud: Creaturam, inquires, te arbitror. Respondebit et Christus: Si duorum hominum testimonium verum est, tu nec mihi nec Patri saltem credere debuisti, qui genitum nominavit?

110. Bonum, inquires nego. Dicet et ille: Fiat tibi secundum fidem tuam, ut tibi bonus non sim.

111. Omnipotentem non arbitror. Respondebit et ipse: Non possum ergo tibi tua peccata donare.

112. Subjectum dico. Referet ad hoc: Cur igitur libertatem ac veniam ab eo petis, quem putas pro servitio esse subjectum?

113. Video haerere prosecutionem tuam: non urgeo, quia peccatorum meorum ipse sum conscius. Non invideo veniam, quia ipse opto indulgentiam: votum tuum scire desidero. En allego apud judicem desideria tua; non prodo crimina, seriem tuorum expecto votorum.

114. Dic itaque ea, quae in communi voto sunt; dic, inquam: Domine, fac me ad ima-

ginem Dei. Respondebit ille? Ad quam imaginem? Quam negasti?

115. Dic: Fac me incorruptibilem. Referet utique: Quomodo te incorruptibilem facere possum, quem tu creaturam dicendo, capacem corruptibilitatis esse voluisti? Mortui resurgent incorrupti (Cor. 15, 52), et tu corruptibilem dicis, quem Deum cernis?

116. Dic: Bonus esto mihi. Dicet tibi: Quid postulas, quod negasti? Ego te bonum esse volui, ego dixi: *Estote sancti, quoniam ipse sanctus sum* (Levit. 19, 2); et tu mihi id negare contendis? et tu exspectas veniam peccatorum? Sed nemo potest donare peccata, nisi solus Deus. Itaque cum verus et solus tibi Deus non sim, non possum utique tua peccata donare.

117. Haec arianus dicat et photinianus: Nego te, inquit, Deum. Respondebit ei Dominus: *Dixit insipiens in corde suo: Non est Deus* (Psal. 13, 1. et 52, 1). De quo dictum putas, de judaeo, de gentili, an de diabolo? De quovis dictum sit, photiniane, tolerabilior est ille, qui tacuit: tu vero et voce ausus es dicere, ut insipiente insipientior probareris. Negas ergo, inquit, Deum: cum ego dixerim: *Dii estis, et filii Excelsi omnes*

(Id. 81, 6). Et tu Deum negas, cujus opera divina circumspicis?

118. Dicat et sabellianus: Ego te ipsum Patrem et Filium et Spiritum sanctum arbitror. Respondebit et Dominus: Non audis Patrem, non audis Filium. Numquid hic ulla confusio est? Scriptura ipsa te docet Patrem esse, qui detulit judicium: Filium esse, qui judicat. Non audisti me dicentem: *Solus non sum; sed ego et qui misit me Pater* (Joan. 8, 29).

119. Dicat et manichaeus: Ego auctorem carnis nostrae diabolum credo. Respondebit ei: Ergo quid facies in coelestibus? Vade ad auctorem tuum. Ego eos volo mecum esse, quos dedit mihi Pater. Tu te a diabolo creatum, manichaeae, arbitraris: ad illius ergo festina sedem, ubi ignis et sulphur, ubi non restinguitur ejus incendium, ne unquam poena moriatur.

120. Mitto alia haereticorum portenta, non nomina; quid eis erit judicii, quae erit forma sententiae? Respondebit his omnibus et ille moraliter: *Populus meus, quid feci tibi, aut quid contristavi te* (Mich. 6, 3)? *Nonne ex Aegypto eduxi te, et ex domo servitutis liberavi te?*

121. Sed parum est ex Aegypto liberasse,

et ex domo servitutis eripuisse: plus est te ipsum dedisse pro nobis. Dices ergo: Nonne vestras omnes suscepi injurias? Nonne corpus meum pro vobis obtuli? Nonne mortem appetivi, quod non erat Divinitatis meae, sed vestrae redemptionis? Haecine referuntur gratiae? Hoc profecit sanguis meus, sicut in propheta ipse jam dixi: *Quae utilitas in sanguine meo, quia descendi in corruptionem* (Psal. 29, 10)? Hoc ergo profecit, ut me impie negaretis, pro quibus ista sustinui.

122. Ego vero tunc, Domine Jesu, etsi gravium peccatorum mihi ipse sim conscius, dicam tamen: Non te negavi; habes quod ignoscas fragilitati carnis. Delictum fateor, peccatum non abnuo: *Si vis, potes me mundare* (Matth. 8, 2); quia hoc dixit ¹⁾, emeruit. *Ne quaeso, in judicium intres cum servo tuo* (Psal. 142, 2). Non quaero ut judices, sed ut ignoscas.

CAPUT XIV.

Judicis exponit sententiam; discussisque adversariorum cavillis, ab ea provocationem non dari planum facit.

1) *Quia hoc dixit* plenus fide scil. leprosus ille, de quo est serm. Matth. 8, 1 ss., ideo emeruit, ut mundaretur a lepra.

123. Quid putamus Christum judicaturum? Ego scio. Judicaturum dico? Imo jam judicavit. Tenemus ejus sententiam: *Omnes, inquit, honorificent Filium, sicut honorificant Patrem. Qui non honorificat Filium, non honorificat Patrem, qui misit illum* (Joan. 5, 23).

124. Si displicet sententia, appella ad Patrem, rescinde judicium, quod Pater detulit. Dic quia dissimilem habet Filium. Respondebit tibi: Ego ergo mentitus sum, qui dixi Filio: *Faciamus hominem ad imaginem et similitudinem nostram* (Gen. 1, 26).

125. Dic quia creavit. Respondebit tibi: Cur ergo adorasti, quem creaturam putasti?

126. Dic quia minorem generavit Filium. Respondebit: Metire, videamus.

127. Dic quia ei non debuisti credere. Referet ad hoc: Non tibi dixeram: *Hic est Filius meus dilectissimus, in quo complacui, ipsum audite* (Matth. 17, 5). Quid est, *Ipsum audite?* dicentem utique: *Omnia quae Pater habet, mea sunt* (Joan. 17, 10). Hoc audierunt apostoli, sicut scriptum est: *Et ceciderunt in faciem suam, et timuerunt valde* (Matth. 17, 6). Si ceciderunt qui confessi sunt, quid facient qui negarunt? Sed illos

Jesus tetigit et levavit; vos jacere patietur; ne videatis gloriam, quam negastis.

128. Videamus ergo quoniam quem Filius damnat, et Pater damnat. Et ideo honorificemus Filium, sicut honorificamus Patrem, ut per Filium ad Patrem pervenire possimus.

CAPUT XV.

Modeste sentit de opere suo: dicit tamen ad fidem illud sufficere, cum divinae generationi tot locis Scriptura suffragetur, cui obsurdescunt ariani. Horum pervicaciam judaeae plane similem patefaciens, apprecatur illis veritatis amorem. Postremo deserendos eos, utpote haereticos et antichristos, docet.

129. Haec ego, imperator Auguste, carptim ac breviter impolita magis proposui, quam enodata digessi. Quod si qua ariani inconsummata ¹⁾ arbitrantur, ego vix fateor inchoata: si qua adhuc superesse opinantur, ego prope omnia; infidelibus enim totum deest, abundat fidelibus. Denique una confessio Petri abundavit ad fidem Christo: *Tu es Christus Filius Dei vivi* (Id. 16, 16); sat est enim generationem scire divinam, non

1) *Inconsummata*, imperfecta, non plene soluta et explicata.

divisam, non diminutam ¹⁾, non derivatoriam, non creatam.

130. Hoc etiam totis Scripturarum expōnitur libris, nec adhuc ab impiis creditur: *Incrassatum est enim, ut scriptum est, cor populi hujus, et auribus graviter audierunt, et oculos suos gravaverunt: ne quando oculis suis videant, et auribus audiant, et corde intelligant* (Isai. 6, 10). Namque more judaico aures suas ariani claudere solent, aut serere tumultus, quotiescunque verbum salutis auditur.

131. Et quid mirum si humanis vocibus credere non soleant infideles, qui non credunt divinis? Filius Dei dicebat, sicut habes in Evangelio: *Pater, clarifica nomen tuum. Vox Patris de coelo audita est dicentis: Et clarificavi, et iterum clarificabo* (Joan. 12, 28). Infideles haec audiebant, sed non credebant. Dicebat Filius, respondebat Pater; et dicebant judaei: *Tonitruum factum est illi*

1) *Non diminutam.* Mss. haud pauci *demutatam*. Illustrari haec possunt ex hoc s. Hilarii loco l. 6. de Trinit. n. 10. sic loquentis: „Nescit (Ecclesia) in Filio portionem, sed scit Deum totum ex Deo toto: scit ex uno unum; non desectum, sed natum: scit nativitatem Dei nec diminutionem esse gignentis, nec infirmitatem esse nascentis.“

(Ibid. 29); alii dicebant: *Angelus locutus est ei.*

132. Paulus quoque, sicut scriptum est in Actibus Apostolorum (Act. 9, 4), cum voce Christi vocaretur ad gratiam, pluresque comites pariter incederent, solus vocem Christi audisse se dixit. Adeo, sancte Imperator, qui credit, audit; et audit, ut credat: qui non credit, non audit; sed nec vult, nec potest audire ¹⁾, ne credat!

133. Atque utinam, quod in me est, audire vellent, ut crederent: audire cum bona caritate et mansuetudine, ut verum quaerentes, non veritatem impugnantes. Scriptum est enim, ut non intendamus *fabulis et genealogiis interminabilibus, quae quaestiones magis praestant quam aedificationem Dei, quae in fide est. Finis autem praecepti est caritas de corde puro, et conscientia bona, et fide non ficta. A quibus quidam aberrantes, conversi sunt in vaniloquium, volentes esse legis doctores, non intelligentes ne-*

1) *Nec potest audire.* Haec audiendi impotentia repeti non debet sive ex reprobatione positiva sive ex negativa, neque ex defectu gratiae ex sua indole et natura se ipsa efficacis, sed ex conditione praevia *sed nec vult*, est proinde impotentia consequens malam voluntatis dispositionem, non eandem praecedens.

que quæ loquuntur, neque de quibus affirmant (1. Tim. 1, 4. et seqq.). Alibi quoque idem Apostolus dicit: *Stultas autem et sine disciplina quaestiones evita* (2. Tim. 2, 23).

134. Tales deserendos Apostolus dicit, qui quaestiones serunt, hoc est, haereticos: de quibus et alibi dicit, quod *discedent quidam a fide, intendentes spiritibus erroris, et doctrinis daemoniorum* (1. Id. 4, 1).

135. Et Joannes dicit haereticos esse antichristos (1. Joan. 2, 18), arianos utique designans. Haec enim haeresis post omnes haereses coepit, et ex omni haeresi venena collegit. Sicut enim de antichristo scriptum est, quia *aperuit os suum in blasphemiam ad Deum, blasphemare nomen ejus, et bellum facere cum sanctis ejus* (Apoc. 13, 6): ita et isti Filio Dei derogant, nec martyribus pepercerunt; et, quod fortasse ille non faciet, Scripturas falsavere divinas. Itaque qui dicit, quia Jesus non est Christus, hic est antichristus: qui negat Salvatorem mundi, negat Jesum: qui negat Filium, negat et Patrem, quia scriptum est: *Omnes qui negat Filium, negat et Patrem* (1. Joan. 2, 23).

CAPUT XVI.

Gratiano victoriam spondens, eam ab Ezechiele prae-

dictam narrat. Ex pietate Imperatoris hanc spem confirmat, superiores clades haeresi Orientalium acceptas ferens. Deum tandem obsecrat, ut jam placatus, fideli exercitui, regioni ac duci ferat auxilium.

136. Neque vero te, Imperator, pluribus tenere debeo bello intentum, et victricia de barbaris trophaea meditantem. Progredere plane scuto fidei septus et gladium spiritus habens: progredere ad victoriam superioribus promissam temporibus et divinis oraculis prophetatam.

137. Neque et futuram nostri depopulationem, et bella gothorum Ezechiel illo jam tempore prophetavit; sic enim habes: *Propterea prophetiza, fili hominis, et dic: O Gog, haec dicit Dominus: Nonne in die illa cum constituetur habitare populus meus Israël in pace, surges et venies de loco tuo, ab extremo Aquilone: et gentes tecum multae, sessores equorum omnes, congregatio multa et magna et virtus copiosa; et ascende ad populum meum Israël, ut nubes operire terram in novissimis diebus, etc. (Ezech. 38, 14. et seqq.).*

138. Gog iste Gothus est, quem jam videmus exisse, de quo promittitur nobis futura victoria, dicente Domino: *Et depraedabuntur eos, qui depraedati eos fuerant, et*

despoliabunt eos, qui sibi spolia detraxerant, dicit Dominus. Eritque in die illa, dabo Gog, hoc est, gothis, locum nominatum, monumentum Israël multorum virorum congestum, qui supervenerunt ad mare: et per circuitum struet os vallis, et obruet illic Gog et totam multitudinem ejus, et vocabitur Ge Polyandrium Gog¹⁾; et obruet eos domus Israël, ut purgetur terra (Id. 39, 10. et seqq.).

139. Nec ambiguum, sancte Imperator, quod qui perfidiae alienae pugnam excepimus, fidei catholicae in te vigentis habituri simus auxilium. Evidens enim antehac divinae indignationis causa praecessit, ut ibi primum fides romano imperio frangeretur, ubi fracta est Deo.

140. Non libet confessorum neces, tormenta, exilia recordari, piorum sacerdotia proditorum munera²⁾. Nonne de Thraciae par-

1) Graece Γαῖ τὸ πολυάνδριον (coemeterium): valles autem et confragosa loca hebraice dicta *gai* sive *ge* auctor est Hieronymus in h. l. Idem tamen praef. l. 11. in Ezech. sicut et in qq. seu traditionibus hebraicis c. 10. interpretationem, qua per vocem Gog *gothi* significantur, non omnino probat, sed nec aperte eam improbare audet.

2) Piorum sacerdotia, sedes episcopales confereban-

tibus per ripensem Daciam et Mysiam omnemque Valeriam Pannoniorum, totum illum limitem sacrilegis pariter vocibus et barbaricis motibus audivimus inhorrentem? Quid poterat nobis vicinia tam feralis invehere? aut quemadmodum res romana tali tuta poterat esse custodia?

141. Sed jam satis superque, omnipotens Deus, nostro exilio nostroque sanguine confessorum necesse, exsilia sacerdotum et nefas tantae impietatis eluimus: satis claruit eos, qui violaverint fidem, tutos esse non posse. Convertere, Domine, fideique tuae attolle vexilla.

142. Non hic aquilae militares, neque volatus avium exercitum ducunt: sed tuum, Domine Jesu, nomen et cultus. Non hic infidelis aliqua regio, sed ea quae confessores mittere solet Italia; Italia aliquando tentata, mutata nunquam: quam dudum ab hoste

tur proditoribus fidei, iis qui deficiebant ad partes arianorum. — *Sacrilegis pariter vocibus* scil. arianorum et hinc in poenam atque vindictam *barbaricis motibus*, incursionibus audivimus inhorrentem. Neque mirum, ubi tanta grassabantur sacrilegia, res romanae tutae esse non poterant. Huc spectat illud Hieronymi dictum: „Nostris peccatis barbari fortes sunt, nostris vitiis romanus superatur exercitus.“ Ep. 60. n. 17. opusc. XI, 239.

barbaro defendisti, nunc etiam vindicasti. Non hic in Imperatore mens lubrica, sed fides fixa.

143. Ostende nunc evidens tuae majestatis indicium, ut is, qui te verum virtutum Dominum et coelestis militiae ducem: is qui te veram Dei virtutem credit esse atque sapientiam, non temporalem utique nec creatam, sed sempiternam, sicut scriptum est, Dei virtutem et Divinitatem (1. Cor. 1, 24), tuae majestatis fultus auxilio fidei suae trophaea mereatur.

LIBER III.

CAPUT I.

Ubi praemisit Ambrosius quamobrem strictius tractata in prioribus libris, in his uberius tractanda suscipiat; objectum sibi fabularum usum exemplo Scripturae diluit cum alia poëtica memorantis, tum maxime sirenas, quae figurae sunt voluptatum: a quibus et Pauli verba et Christi facta oportet avocent christianos.

1. Quoniam, clementissime Imperator, instruendi tui gratia, aliqua de fide mihi scribenda mandaveras, et verecundantem coram etiam ipse fueras adhortatus; ideo quasi in procinctu positus, duos tantum conscripsi libellos, quibus vias quasdam fidei et semitas demonstrarem.

2. Sed quoniam mens prava quorundam serendis intenta quaestionibus, stilo lacessit uberiore confici; tuae quoque pia me cura clementiae ad cetera vocat, volens in pluribus experiri, quem in paucis probasti; ea quae perstricta paucis superius sunt, placuit mihi paulo latius exsequi; ne ea quasi diffi-

dentia assertionis deseruisse potius, quam securitate fiduciae proposuisse videamur.

3. Et quia hydraei nominis et scyllaei comparisonem induximus ¹⁾, ut ostenderemus vel rediviva plantaria cavenda perfidiae, vel famosa naufragia: si quis contra licitum putat colorem disputationis ejusmodi a poëticis fabulis derivatum, et cum in fide nihil quod vituperare possit invenerit, aliquid in sermone reprehendit: agnoscat non solum sententias, sed etiam versiculos poëtarum Scripturis incertos esse divinis.

4. Unde enim illud: *Hujus et genus sumus* (Act. 17, 28), quod Paulus usu prophetico doctus usurpat? Nam et gigantes (Num. 13, 34), et vallem Titanum prophetici sermonis series non refugit (2. Reg. 5, 18). Et Isaias sirenas et filias passerum dixit (Isai. 13, 22). Et Jeremias de Babylonia memoravit, quod habitabunt in ea filiae sirenum (Jer. 50, 39); ut ostenderet Babylonis, hoc est, secularis confusionis illecebras vetustae lasciviae fabulis comparandas, quae velut scopuloso in istius vitae littore dulcem resonare quandam, sed mortiferam cantilenam ad capiendos animos adolescentium vide-

1) Supra l. 1. c. 6, n. 46, s.

rentur: quam sapiens etiam ab ipso poëta graeco ¹⁾ inducitur, quasi quibusdam prudentiae suae circumdatus vinculis praeteriisse. Ita difficile judicatum est ante adventum Christi etiam fortiores non posse capi speciosae deliciis voluptatis.

5. (*Al. cap. II.*) Quod si poëta ille perniciosam mentibus hominum et subeundis obnoxiam naufragiis lasciviae secularis illecebram judicavit, quid nos aestimare oportet, quibus scriptum est: *Carnis curam ne feceritis in concupiscentia* (Rom. 13, 14)? Et alibi: *Castigo corpus meum et servituti redigo, ne aliis praedicans, ipse reprobus efficiar* (1. Cor. 9, 27).

6. Non enim per luxuriam nobis Christus, sed per jejunium salutem attulit. Neque ille emerendae gratiae suae causa, sed nostrae eruditionis gratia jejunavit. Neque infirmitate corporis victus est, ut esuriret: sed esuriendo suscepti corporis fidem praestitit; ut non solum corpus, sed etiam infirmitates nostri corporis doceret a se esse susceptas, sicut scriptum est: *Quoniam infirmitates nostras suscepit, et aegritudines nostras portavit* (Isai. 53, 4).

1) *A poeta graeco* scil. ab Homero Odyss. 12.

CAPUT II.

Quae corporis sunt a Christo pro nobis suscepti Divinitati non tribuenda: secundum hanc illum altissimum; quod qui neget, eum Patri adscribere incarnationem. Cum Deus legitur solus esse, aut solus habere immortalitatem, id etiam intelligendum de Christo, tum ut memorata impietas declinetur, tum quia eadem Filii ac Patris asseritur operatio.

7. Corporis est igitur, hoc est, nostrum est, quod esurivit; nostrum est quod flevit, quod tristis fuit usque ad mortem. Cur ad Divinitatem quae sunt nostra referuntur? Corporis est, quod etiam factus asseritur. Denique sic habes: *Mater Sion dicet: Homo, et homo factus est in ea, et ipse fundavit eam Altissimus* (Psal. 86, 5). *Homo*, inquit, *factus est*, non Deus factus est.

8. Qui autem idem Altissimus, idem homo, nisi *Mediator Dei et hominum, homo Christus Jesus*, qui dedit semetipsum redemptionem pro nobis (1. Tim. 2, 5)? Et hoc utique ad incarnationem pertinet; redemptio enim nostra per sanguinem, remisso per potestatem, vita per gratiam. Quasi Altissimus donat, quasi homo precatur: aliud Creatoris, aliud Redemptoris est. Distincta licet, unius tamen auctoris beneficia sunt; decuit enim ut ille nos redimeret, qui creavit.

9. Quis autem neget Christum esse Altissimum significatum? Nam qui aliter sentit, Deo Patri sacramentum incarnationis adscribit. Sed hinc dubitari non potest, quod altissimus Christus sit, cum etiam alibi dixerit de mysterio passionis: *Dedit vocem suam Altissimus, et mota est terra* (Psal. 17, 14). Et in Evangelio habes: *Et tu, puer, propheta Altissimi vocaberis; praeibis enim ante faciem Domini parare vias ejus* (Luc. 1, 76). Qui Altissimus? Dei Filius. Ergo qui Altissimus Deus, Christus est.

10. Et solus ubique cum dicitur Deus, non separatur etiam Dei Filius. Qui enim Altissimus, solus, sicut scriptum est: *Et cognoscant quoniam nomen tibi Dominus, tu solus Altissimus super omnem terram* (Psal. 82, 19).

11. Unde etiam illud explosum est, quod solent ad calumniam derivare, quia de Deo scriptum est: *Qui solus habet immortalitatem, et lucem habitat inaccessibilem* (1. Tim. 6, 16); de Deo enim scriptum est, quod est commune nomen Patri et Filio.

12. Nam si ubicunque Deum legunt, negant etiam Filium designari, et impii sunt, Divinitatis potentiam Filio denegando, et incarnatum Patrem sabelliana impietate adstru-

ere videbuntur. Dicant enim quomodo illud non impie de Patre intelligere possint, quod Apostolus ait: *In quo et consurrexistis per fidem operationis Dei, qui suscitavit illum a mortuis* (Coloss. 2, 12); et advertant de sequentibus quid incurrant; sequitur enim: *Et cum mortui essetis delictis et praeputio carnis vestrae, vivificavit nos cum illo, donans nobis omnia delicta, delens quod adversum nos erat chirographum decreti, quod erat contrarium nobis: et ipsum tulit de medio, affigens illud cruci, exuens se carne* (Coloss. 2, 13. 14).

13. Ergo non Deus Pater solus intelligendus est, qui suscitavit carnem et non etiam Filius, cujus templum resuscitatum est. Qui suscitavit, utique et vivificavit: qui vivificavit, et delicta donavit: qui delicta donavit, et chirographum tulit: qui chirographum tulit, affixit illud cruci: qui affixit illud cruci, carnem se exuit. Sed Pater non se exuit carnem; non enim Pater caro factus est, sed *Verbum*, sicut legimus, *caro factum est* (1. Joan. 1, 14). Videtis ergo, quod ariani dum separant a Patre Filium, in id periculum incidant, ut Patrem passum esse commemorent.

14. Nos autem facile docemus de Filii dic-

tum operatione; nam et ipse corpus suum resuscitavit, sicut ipse dixit: *Solvite templum hoc, et in triduo resuscitabo illud* (Id. 2, 19). Et ipse vivificat nos cum suo corpore: *Sicut enim Pater suscitavit mortuos et vivificat; sic et Filius quos vult, vivificat* (Id. 5, 21). Et ipse delicta donavit dicens: *Dimissa sunt tibi peccata tua* (Luc. 5, 20). Et ipse chirographum affixit cruci, qui crucifixus est per corporis passionem. Nec alius se carnem exuit, nisi Dei Filius, qui carnem se induit. Ipse ergo significatur Deus, qui opus nostrae resurrectionis operatus est.

CAPUT III.

Filium a Patre non separandum ex Apostolo confirmari, cum Filio quoque conveniat beatum esse, solum potentem ac immortalem, natura videlicet, non gratia, qua ipsi etiam angeli sunt immortales, et lucem habitare inaccessibilem: quo ultimo qua ratione fiat explicato, quo pacto Pater solus ac Filius pariter solus dicantur, ostenditur.

15. Ergo cum legis Deum, non separes Patrem, non separes Filium, quia Deitas et Patris et Filii una eademque est. Et ideo nec ibi separes, ubi legis, quia *beatus et solus potens*; de Deo enim dictum est, sicut habes: *Praecipio coram Deo, qui vivificat omnia*;

sed etiam Christus vivificat: convenit ergo et Patri et Filio Dei nomen, quando convenit et operationis effectus. Persequamur et cetera. *Praecipio*, inquit, *coram Deo, qui vivificat omnia, et Christo Jesu* (1. Tim. 6, 13).

16. In Deo est etiam Verbum, sicut scriptum est: *In Deo laudabo Verbum* (Psal. 55, 11). In Deo sempiterna sua virtus est Jesus: in Deo igitur unitatem Divinitatis, in Christi autem nomine incarnationis testificatus est sacramentum.

17. Denique ut de incarnatione Christi se dixisse ostenderet, subdidit: *Qui testimonium reddidit sub Pontio Pilato bonam confessionem; ut serves mandatum sine macula usque in adventum Domini nostri Jesu Christi: quem suis temporibus ostendet beatus et solus potens, Rex regum et Dominus dominantium, qui solus habet immortalitatem, et lucem habitat inaccessibilem: quem vidit hominum nemo, sed nec videre potest* (1. Tim. 6, 13. et seqq.). Ergo de Deo haec scripta sunt, cujus nominis et dignitas et veritas communis est Filio.

18. Cur igitur hoc loco Filius separatur, cum etiam Filio haec cuncta conveniant? Aut si non conveniant, nega Deum; ut neges quae Deo sunt convenientia. Beatus ne-

gari non potest, qui beatitudines donat: *Beati enim quibus remissae sunt iniquitates* (Psal. 31, 1). Beatus negari non potest, qui sanam doctrinam tribuit, sicut scriptum est: *Quae est secundum Evangelium claritatis beati Dei* (1. Tim. 1, 1). Potens abnuī non potest, de quo Pater dicit: *Posui adjutorium super potentem* (Psal. 88, 20). Immortalitatem autem ejus quis audeat diffiteri, cum etiam aliis immortalitatem ipse largitus sit, sicut scriptum est de Sapientia Dei: *Per hanc habeo immortalitatem* (Sap. 8, 13)?

19. Sed alia immortalitas suae naturae, alia nostrae. Non sunt fragilia comparanda divinis: una sola substantia Divinitatis est, quae mori nescit. Unde et Apostolus, cum sciret et animam et angelos immortales, quod solus Deus immortalitatem habeat praedicavit. Nam et anima moritur: *Anima enim quae peccat, ipsa morietur* (Ezech. 18, 20): nec angelus immortalis est naturaliter ¹⁾, cujus immortalitas in voluntate est Creatoris.

1) *Nec angelus immortalis est naturaliter*, i. e. immortalitas non ita est de essentia angeli sicut est de essentia Dei. Nam Deus ita existit, ut necessario existat, ut non existere non possit; existentiam non aliunde acceptam habet, sed vi essentiae suae, seu ea est ipsa sua essentia. Non ita angelus, qui

20. Neque ad praejudicium trahas, quod non moritur Gabriel, non moritur Raphaël, non moritur Uriel ¹⁾; et in ipsis enim na-

existentiam a Deo accipit, hinc ejus existentia non est de ejus essentia, sed quasi extrinsecus et aliunde ad essentiam accedens concipitur: hinc sicut vi essentiae suae non existit, sed nonnisi voluntate Creatoris, ita dici potest, virtute ejusdem voluntatis non vi essentiae suae eum manere in existentia, ac proinde esse immortalem. Quamvis alio sensu angeli immortalitas possit dici *naturalis*, quatenus nulla virtute creata possit annihilari, nihilque in ipso sit, quod exigat, ut annihiletur a Deo; imo omnia exigant, ut postquam semel est creatus, in existentia etiam semper conservetur.

1) *Non moritur Uriel.* Cum s. Ambrosius magni fecerit l. 4. Esdrae ibique saepius mentio fiat *Urielis*, mirum esse non debet, quod s. doctor etiam hic Urielem nominet. Jam mortalitatem latiori sensu accipit, quo significat quamlibet mutabilitatem, nam ut patres acute observant, omnis mutatio quaedam species est mortis. Praeclare s. Bernardus s. 81. in Cant. n. 5: „Vera namque et integra immortalitas tam non recipit mutationem quam nec finem, quod omnis mutatio quaedam mortis imitatio sit. Omne etenim quod mutatur, dum de uno ad aliud transit esse, quodammodo necesse est moriatur quod est, ut esse incipiat quod non est. Quod si tot mortes, quot mutationes, ubi immortalitas?“ Quod vidit et Plutarchus, qui apud Eusebium praepar. evang. l. 11. c. 12. ita scribit. „Ridicule sane facimus qui mortem unam timemus, jam mortui toties totiesque morientes. Succedente sene vir ex-

turae capacitas vitio obnoxia, sed non obnoxia disciplinae. Omnis enim rationabilis

stinguitur, ut vir juvene, juvenis puero, puer infante extincto succedit; imo hesternus in hodiernum interit ut in crastinum interit hodiernus. Manet autem nemo, nemo unus (i. e. sibi semper idem) est, sed omnino multi efficimur, dum circa unum aliquod simulacrum exemplarque commune volutatur labiturque materia. Enim vero si iidem manemus, qui tandem alia nobis placent modo, qui aliis antea ducebamur? qui contraria aut amamus aut odimus aut praedicamus vel damnamus? Nec enim plura Deus est uti nostrum quilibet, qui congeries quaedam sumus ex omni sexcentarum varietatum genere etc.^a Secundum hunc sensum patres libenter explicant verba Pauli 1. Tim. 6, 16: *qui solus habet immortalitatem* i. e. immutabilitatem. Hoc certe sensu angeli non sunt immortales, nam natura sunt peccabiles, ut probat multorum lapsus: quod si modo peccare non possunt, id non habent ex se, sed gratiae adscribi debet. Ita etiam in bono proficere potuerunt, profectus autem sicut et defectus seu lapsus accidentalis est mutatio. Ceterum argumentum mutabilitatis hinc et mortalitatis omnis creaturae est Dei iudicium. Neque enim judicaret Deus creaturas rationales, nisi deficere et proficere possent et de facto defecerint vel profecerint. — *Et in ipsis enim naturae capacitas vitio obnoxia est* etc. Sensus videtur esse: Et in his angelis natura est capax vitii, defectus, hinc mutationis et hoc sensu mortis: sed de facto non sunt lapsi, hinc disciplinae seu poenae non sunt obnoxii. Vel forte *disciplina* (propter sequentia) idem est ac institutio, qua quis pedetentim bono assuefit et in

creatura accidentia recipit et subjecta iudicio est. In accidentibus autem et poena iudicii et corruptela est, et profectus. Unde et Ecclesiastes ait: *Quoniam omne opus suum Deus adducet in iudicium* (Eccle. 12, 14). Ergo corruptelae et mortis, etiamsi non moriatur aut peccet, capax tamen omnis est creatura: nec ex immortalis natura habet, sed ex disciplina vel gratia, si se in aliquibus ad vitia non mutat. Alia ergo immortalitas quae donatur, alia quae sine capacitate mutabilitatis est semper.

21. An negatur immortalis Divinitas Christi, quia in carne pro omnibus mortem gustavit? Jam ergo melior Gabriel quam Christus; quia ille non est defunctus, hic mortuus est. Sed non est servus supra Dominum (Matth. 10, 24); alia enim carnis infirmitas, alia Divinitatis aeternitas: mors carnis est, immortalitas potestatis. Quod si Divinitas fecit, ne caro videret corruptionem, quae utique corruptelae erat obnoxia per naturam, quomodo mori posset ipsa Divinitas?

22. Quomodo autem lucem inaccessibilem non habitat Filius, cum in sinu Patris Filius

bono confirmatur. Ejusmodi veluti educatio non convenit naturae angelicae, sed naturae humanae quae inde habet, ut non peccet.

sit: lux autem Pater, lux etiam ipse sit Filius, quia Deus lux est (Joan. 1, 9)? Aut si aliam lucem inaccessibilem nisi Deitatis putamus, numquid melior Pater lux est, ut non sit in luce ¹⁾, qui sicut scriptum est, et apud Patrem est et in Patre (Ibid. 1)? Non ergo separent Filium, cum legunt solum Deum: nec Patrem separent, cum legunt Filium solum.

23. In terris Filius sine Patre non est, et putas quia Pater sine Filio sit in coelo? In carne est Filius; cum dico: In carne est, vel in terris, secundum Evangelii tempora loquor; nunc enim secundum carnem jam non novimus Christum (2. Cor. 5, 16): ergo in carne est Filius, et solus non est, secundum quod scriptum est: *Et non sum solus, quia Pater mecum est* (Joan. 8, 16); et putas quod sit Pater solus in luce?

24. At ne hoc argumentum ²⁾ putes, ac-

1) Si haec lux non est ipsa Deitas, sed aliquid aliud praeter deitatem, jam videtur sequi secundum adversariorum exceptionem, hanc lucem esse majorem Patre, quia Filius quidem potest esse in Patre, sed non in hac luce, quam solus inhabitat Pater: ergo videtur tantae excellentiae, ut sit inaccessa Filio, cui tamen accessibilis est ipse Pater.

2) *At ne hoc putes argumentum* i. e. probationem humano ingenio et solertia excogitatam, ac proinde forte fallacem vel labilem.

cipe etiam testimonium : *Deum*, inquit, *nemo vidit unquam, nisi unigenitus Filius, qui est in sinu Patris, ipse enarravit* (Joan. 1, 18). Quomodo solus Pater, si in sinu Patris Filius est? quomodo enarrat, quem non videt? Non ergo solus Pater.

25. Accipe nunc et solum Patrem et solum Filium. Solus Pater, quia alius Pater non est: solus Filius, quia alius Filius non est: solus Deus, quia una Divinitas Trinitatis est.

CAPUT IV.

Christum nonnisi secundum carnem factum narrari; quippe qui ut homines redimeret, non eguerit adiutorio, sicut nec ut se resuscitaret; cum aliis ut mortuos resuscitarent, oratione opus fuerit. Etsi autem ipse oraverit, hoc referendum ad humanitatem: Divinitatem vero ex eo quod imperaverit, aestimandam; in quo diabolus arianis anteponitur. Tum exposito cur Filius hominis petens dicatur, argumenti ponitur conclusio.

26. (*Al. cap. III.*) Satis ergo claret et solum Deum non esse Patrem sine Filio, et solum Deum non intelligi Filium sine Patre; quia secundum carnem factus legitur Dei Filius, non secundum divinam generationem.

27. In quo autem factus sit, per os sancti patriarchae locutus asseruit, dicens: *Quia*

repleta est malis anima mea, et vita mea inferno appropinquavit. Aestimatus sum cum descendentibus in lacum: factus sicut homo sine adjutorio inter mortuos liber (Psal. 87, 4). Et hic *sicut homo*, inquit, non sicut Deus, *factus sum*. Et *repleta est malis anima mea*: anima utique, non Divinitas. Factus est in eo, in quo erat infernis debitus ¹⁾: factus est in eo, in quo cum aliis aestimatus est; Divinitas enim similitudinem collationis abjurat. Et tamen in ipsa carne morti obnoxia majestatem adverte Divinitatis in Christo. Et si factus est sicut homo, et sicut caro factus est; factus est tamen inter mortuos liber, et liber sine adjutorio.

28. Sed quomodo hic sine adjutorio fuisse se Filius dicit, cum supra dictum sit (cap. 2): *Posui adjutorium super potentem* (Ps. 88, 20)? Ergo et hic distingue naturas. Adjutorium caro habet, Divinitas non habet. Liber igitur est, quia mortis vincula nescivit; non captus ab inferis, sed qui operatus sit in infernis: sine adjutorio est, quia neque per

1) *In quo erat infernis debitus*, secundum quod ad inferos descendit seu ad inferos descendere debuit, sive ex voluntate Patris, sive ex quadam convenientia et oeconomia scil. ad liberandas justorum animas etc.

nuncium, neque per legatum, sed ipse per se Dominus salvum fecit populum suum. Quomodo enim potuit adjutorium sui corporis quaerere suscitandi, qui alios suscitavit?

29. Ac licet homines quoque suscitaverint mortuos, non in sua tamen virtute fecerunt, sed in Christi nomine. Aliud est rogare, aliud imperare: aliud mereri, aliud donare.

30. Elias ergo suscitavit, sed oravit, non imperavit (3. Reg. 17, 21. 22). Elisaeus suscitavit configuratus mortuo ¹⁾: suscitavit etiam ipsius mortui corporis tactus (4. Reg. 13, 21), ut esset typus venturum eum, qui missus in similitudinem carnis peccati (Rom. 8, 3), etiam sepultus mortuos suscitaret.

31. Petrus quoque cum Aeneam curaret, ait: *In nomine Jesu Nazareni surge et ambula* (Act. 2, 6): non in suo ait, sed in Christi nomine. Surge autem verbum est imperantis: sed fiducia de merito est, non praesumptio de potestate; et de nominis operatione, non de sua virtute praeceptionis auctoritas. Quid igitur ariani dicunt? In nomine Christi

1) *Configuratus mortuo*, quia ut narratur 4. Reg. 4, 34, *incubuit super puerum* (mortuum) *posuitque os suum super os ejus, et oculos suos super oculos ejus, et manus suas super manus ejus et incurvavit se super eum.*

et Petrus imperat, et illi nolunt imperasse Dei Filium, sed rogasse.

32. Sed lectum est, quia rogavit (Joan. 11, 41). Disce distantiam. Rogat quasi filius hominis, imperat quasi Dei Filius (v. 42). An non defertis hoc Dei Filio, quod etiam diabolus detulit, et vos majore sacrilegio derogatis? Ille dicit: *Si filius Dei es, dic lapidi huic ut fiat panis* (Luc. 4, 3). Ille dicit, impera: vos dicitis, obsecra. Ille credit quod, jubente Dei Filio, elementorum rerumque natura in adversum vertatur: vos creditis, quod nisi roget Dei Filius, nec voluntas ipsius impleatur. Et diabolus de potestate aestimandum putat Dei Filium, vos de infirmitate. Tolerabiliora sunt tentamenta diaboli, quam argumenta Arii.

33. Nec moveat, quia potentem Filium dixit hominis, cum Dominum majestatis legeris crucifixum (1. Cor. 2, 2). Quae autem major potentia, quam supra coelestes potestates habere dominatum (Ephes. 1, 21)? Habebat autem qui thronis, dominationibus, angelis imperabat. Nam etsi erat inter bestias, sicut scriptum est, tamen angeli ministrabant ei (Marc. 1, 13); ut agnoscas aliud incarnationis esse, aliud potestatis. Secundum

carnem itaque tentatur a bestiis, secundum dignitatem (f. divinitatem) ab angelis adoratur.

34. Didicimus igitur factum esse hominem, et ad hominem hoc esse referendum. Denique et alibi habes: *Qui factus est ei ex semine David* (Rom. 1, 3), secundum carnem utique ex semine David factus est: Deus autem ante secula ex Deo natus est.

CAPUT V.

Factum in Scriptura non semper idem esse ac *creatum* exemplis ex ipsa petitis docet. Inde colligit non cavillandum ex litera more judaeorum, quibus tamen haereticos peiores probat; atque iterum propositam confirmat sententiam.

35. Nec semper tamen factum esse ad creationem refertur; scriptum est enim: *Domine, refugium factus es nobis* (Psal. 89, 1); et, *Factus es mihi in salutem* (Id. 117, 14). Non utique creationis definitio vel editio declaratur: sed refugium factus mihi, et conversus mihi dicitur ad salutem, sicut et Apostolus dixit: *Qui factus est nobis sapientia a Deo, et justitia, et sanctificatio, et redemptio* (1. Cor. 1, 30). Nobis factum non creatum ex Patre dixit. Denique quomodo dicat factum nobis esse sapientiam, in posterioribus exposuit dicens: *Sed loquimur Dei*

sapientiam in mysterio, quae abscondita est, quam praedestinavit Deus ante tempora secularia in gloriam nostram, quam nemo principum hujus seculi cognovit. Si enim cognovissent, nunquam Dominum majestatis crucifixissent (Id. 2, 6). Ubi mysterium passionis exprimitur, non utique generationis aeternae series declaratur.

36. Sapientia igitur mea crux Domini est, redemptio mea mors Domini est; sanguine enim pretioso redempti sumus, ut apostolus Petrus dixit (1. Petr. 1, 19). Sanguine igitur suo, quasi homo, Dominus nos redemit; idemque quasi Deus peccata donavit.

37. Non ergo in verbis quasdam constituamus insidias, et verborum tendiculas aucupemur; ut quia et aliud secundum impios significare putatur sermo qui legitur, non id quod sensus exprimat, sed quod litera ostendat, interpretemur. Sic perierunt judaei, dum sensuum profunda despiciunt, et sequuntur nuda verborum; *litera enim occidit, spiritus autem vivificat* (2. Cor. 3, 6).

38. Et tamen inter duo gravia sacrilegia fortasse detestabilius sit ad Divinitatem referre quae carnis sunt, quam ad literam referre quae spiritus sunt. Illi timuerunt in Deo carnem credere, et ideo redemptionis

gratiam perdiderunt, quia causam salutis abjurant: isti Divinitatis majestatem usque ad carnis infirma deducunt. Detestandi judaei, qui carnem Domini crucifixerunt: detestabiliores tamen eos arbitror, qui Divinitatem Christi cruci subditam crediderunt. Denique qui cum judaeis saepe tractabat: *Haereticum*, inquit, *post unam correptionem devota* (Tit. 3, 10).

39. Nec tamen sine injuria Patris factum nobis esse sapientiam, ad illam inenarrabilem, nec ullis temporibus momentisque obnoxiam Christi generationem sacrilega interpretatione derivant. Nam praeter id quod Filii injuria Patris est contumelia, etiam in Patrem sacrilegia ista procedunt, de quo scriptum est: *Fiat autem Deus verax, omnis autem homo mendax* (Rom. 3, 4). Aut si de Filio putant dictum ¹⁾, generationi quidem

1) *Aut si de Filio putant dictum* scil. secundum sublimiorem naturam illud Pauli: *Factus est nobis sapientia etc., generationi quidem non praejudicant*, quia non dicitur *creatus* et de Deo passim legimus eum nobis *factum esse* refugium etc., *Deum autem confitentur hujus lectionis auctoritate*, quia non esset nobis sapientia etc., si fuisset tantum homo, quia omnis homo mendax, vel etiam nobilissima creatura, quia solus Deus est ipsa sapientia et justitia.

non praejudicant: Deum autem et Deum verum hujus lectionis auctoritate quod abnuunt, confitentur.

40. Prolixum est si velim singula recensere, quoties factum legerimus, non utique per naturam, sed per gratiam. Nam et Moyses dicit: *Adjutor et protector factus est mihi in salutem* (Exod. 15, 2). Et David dicit: *Esto mihi in Deum protectorem, et in domum refugii, ut salvum me facias* (Psal. 30, 3). Et Isaias dicit: *Factus est omni civitati humili adjutor* (Isai. 25, 4). Non utique sancti Deo dicunt: Creatus es, sed, protector et adjutor per gratiam tuam factus es nobis.

CAPUT VI.

Objectionem ex Joanne desumptam ut diluat, primo demonstrat manichaeis patrocinari arianum sensum: deinde varia distinguendorum verborum ejusdem loci exposita ratione, ipsum nullo modo ad substantiam divinam sine Patris injuria referri posse aperte probat, verumque illius exponit intellectum.

41. Unde nec illud verendum est, quod solent ariani saeva interpretatione componere, dicentes factum esse Dei Verbum; quia scriptum est, inquiunt: *Quod factum est, in ipso, vita est* (Joan. 1, 4).

42. Primum intelligant, si ad substantiam divinam referant *quod factum est*, manichaeorum se quaestionibus implicari. Objiciunt enim manichaei: Si quod in ipso factum est, vita est: est ergo aliquid quod in ipso factum non sit, et mors sit; ut duo impie inducant principia. Sed hoc damnat Ecclesia.

43. Deinde unde possunt docere sic pronunciasse Evangelistam? Plerique enim docti et fideles sic pronunciant: *Omnia per ipsum facta sunt, et sine ipso factum est nihil quod factum est* (Joan. 1, 3. 4); alii sic: *Omnia per ipsum facta sunt, et sine ipso factum est nihil*; denique: *Quod factum est* pronunciant, et subjungunt *in ipso* ¹⁾, hoc est: Quidquid autem factum est in ipso. Quid est *in ipso*? Apostolus docet dicens: *In ipso enim sumus, et vivimus, et movemur* (Act. 17, 28).

44. Tamen etiamsi quemadmodum velint, pronuncient, non possunt hic calumniari Deo Verbo, si ad substantiam ejus velint re-

1) Hanc distinctionem absurdam censet Augustinus, qui aliam probat: *Quod factum est in ipso vita erat*. Primam, quam sequitur Vulgata, Epiphanius in Ancor. n. 75. acerbe notat quasi Spiritui s. injuriosam: ea enim abutebantur pneumatomachi,

ferre *quod factum est*, quin calumnientur et Patri Deo, de quo scriptum est: *Qui autem facit veritatem, venit ad lucem; ut manifestentur opera ejus, quia in Deo sunt facta* (Joan. 3, 21). Ecce hic opera hominis in Deo facta legimus, et ad substantiam tamen divinam referre non possumus: sed aut per ipsum facta cognoscimus, ut est etiam illud apostolicum, quod *omnia per ipsum, et in ipso creata sunt; et ipse est ante omnes, et omnia in ipso constant* (Coloss. 1, 16): aut, ut docet praesentis lectionis testimonium, virtutes, quibus vitae aeternae fructus acquiritur, in Deo factas aestimare debemus, castitatem, pietatem, religionem, fidem et alia hujusmodi, quae in voluntate Dei facta sunt.

45. Ergo sicut in Dei Patris, ita etiam in Christi voluntate et virtute facta sunt, sicut legimus: *Creati in Christo in operibus bonis* (Ephes. 2, 10); et in Psalmo: *Fiat pax in virtute tua* (Psal. 121, 7); et alibi: *Omnia in sapientia fecisti* (Id. 103, 24). *In sapientia*, inquit, *fecisti*, non sapientiam fecisti. Nam cum omnia in sapientia facta sint, Christus autem Dei sapientia sit (1. Cor. 1, 24), non accidens utique, sed subsistens et permanens in aeternum; si facta est sapientia, jam deteriore conditione facta est quam

omnia, quia sapientia fieri per se ipsam non potuit. Ergo si factum esse frequenter ad aliquid, non ad naturam refertur, etiam creatum esse ad causam refertur ¹⁾).

CAPUT VII.

Quod a Salomone dictum est: Dominus creavit me, etc., incarnationem Christi ad redimenda Patris opera factam signare; quo ex ipsius Filii verbis declarato, principium ostendit etiam accipi posse de documentis virtutum, quarum omnium vias nobis Dominus aperuisse, ac vere principium extitisse demonstratur.

(46. *Al. cap. IV.*) Unde intelligimus illud, quod de incarnatione Domini scriptum est: *Dominus creavit me principium viarum*

1) *Ergo si factum* etc. Ergo etiamsi de aliquo subjecto dicatur, illud esse factum, id non necessario intelligi debet de ejus natura seu essentia, sed referri potest ad aliquam ejus qualitatem, vel relationem seu respectum tantum, quem cum ante non habuerit, modo induit; proinde etiam verbum *creatum* non necessario semper de natura seu essentia intelligi debet, sed significare potest, subjectum illud sub certo tantum respectu aliquid esse factum, ad certam causam seu certum quoddam munus destinatum, quin propterea creatum seu factum censi debeat ipsum subjectum secundum essentiam. Ita s. doctor viam sibi parat ad solvendum (c. seq.) praecipuum arianorum argumentum ex Prov. 8, 22. derivatum, de quo cf. annot. opusc. XXIX. pag. 246.

suarum in opera sua (Prov. 8, 22), id significare, quod ad redimenda opera Patris Dominus Jesus ex Virgine sit creatus. Neque enim dubitari potest de incarnationis dictum esse mysterio, cum propter opera sua a corruptelae servitio liberanda Dominus suscepit carnem; ut illum, qui imperium habebat mortis, per sui corporis destrueret passionem. Caro enim Christi propter opera, Divinitas ante opera; qui ipse ante omnia, sed et omnia in ipso constant.

47. Non ergo Divinitas propter opera, sed propter Divinitatem opera; sicut Apostolus declaravit dicens, quod propter Filium Dei omnia. Sic enim habes: *Decebat autem eum, per quem omnia et propter quem omnia, multis filiis in gloriam adductis, ducem salutis eorum per passionem consummari* (Heb. 2, 10). Nonne evidenter exposuit, quia Dei Filius, qui propter Divinitatem suam omnia creavit, is postea propter populi salutem et carnis susceptionem et mortis assumpserit passionem?

48. Propter quae autem opera sit creatus ex Virgine, ipse Dominus cum illum caecum curaret, ostendit dicens: *In illo me oportet operari opera ejus, qui misit me* (Joan. 9, 4). Et addidit, ut de incarnatione ejus dictum

crederemus: *Cum in hoc mundo sum, lux sum hujus mundi* (Ibid. 5). Etenim quasi homo in hoc mundo pro tempore est; nam quasi Deus semper est. Denique et alibi ait: *Ecce ego vobiscum sum usque ad consummationem mundi* (Matth. 28, 20).

49. Nec de principio residet aliquid quaestionis, cum interrogatus in carne: *Tu qui es?* responderit: *Principium quod et loquor vobis* (Joan. 8, 25). Quod non solum ad substantiam Divinitatis aeternae refertur, sed etiam ad documenta virtutum. Ex hoc enim et Deum se probavit aeternum, quia omnium ipse principium est, et uniuscujusque virtutis auctor; quia Ecclesiae caput est, sicut scriptum est: *Quia ipse est caput corporis Ecclesiae, qui est principium, primogenitus ex mortuis* (Coloss. 1, 18).

50. Liquet igitur et de incarnatione dictum esse *principium viarum suarum*, quod ad sacramentum suscepti corporis videtur esse referendum. Ideo enim carnem suscepit, ut ad coelum nobis sterneret iter. Denique ait: *Ascendo ad Patrem meum et Patrem vestrum, Deum meum et Deum vestrum* (Joan. 20, 17). Denique ut scias, quod vias suas omnipotens Pater secundum incarnationem praescripserit Filio, habes in Zacharia ad

Jesum indutum vestimenta sordida ab angelo dictum: *Haec dicit Dominus omnipotens: Si in viis meis ambulaveris, et praecepta mea custodieris* (Zach. 3, 7). Quod est vestimentum illud sordidum, nisi carnis assumptio?

51. Viae igitur Domini velut quidam trames bonae vitae sunt, quae diriguntur a Christo, qui ait: *Ego sum via, et veritas, et vita* (Joan. 14, 6). Via ergo superna est Dei virtus, Christus enim nobis via est. Et bona via, quae credentibus coeli regna patefecit. Viae autem Domini viae rectae sunt, sicut scriptum est: *Vias tuas, Domine, notas fac mihi* (Psal. 24, 4). Via castitas, via fides, via est abstinencia. Est namque via virtutis, est et via iniquitatis; scriptum est enim: *Et vide, si est via iniquitatis in me* (Id. 138, 24).

52. Principium itaque nostrae virtutis est Christus. Principium integritatis, qui docuit virgines non viriles expectare concubitus (2. Cor. 11, 2), sed integritatem mentis et corporis sancto magis dicare Spiritui, quam marito. Principium parcimoniae Christus, qui pauper factus est, cum esset dives (2. Cor. 8, 9). Principium patientiae Christus, qui cum malediceretur, non remaledixit; cum

percuteretur, non reperiussit (1. Petr. 2, 23). Principium humilitatis Christus, qui formam servi accepit (Philip. 2, 7), cum Patrem Deum maiestate virtutis aequaret. Ex illo enim accepit virtus unaquaeque principium.

53. Et ideo ut haec virtutum genera disceremus, *Filius datus est nobis, cujus principium super humeros ejus* (Isai. 9, 6). Principium illud crux Domini est; principium fortitudinis, quo via sanctis est reserata martyribus ad sacri certaminis passionem.

CAPUT VIII.

Versiculus in Isaia proxime citatus de Christi humanitate ac Divinitate explicatur, eoque varias haereses jugulari evincitur.

54. Vidit hoc principium Isaia, et ideo ait: *Puer natus est, Filius datus est nobis*. Viderunt et magi, et ideo cum parvulum in praesepe cernerent, adoraverunt dicentes: *Puer natus est*; cum stellam conspicerent, praedicantes: *Filius datus est nobis* (Matth. 2, 11). Aliud munus e terris, aliud munus e coelo, et utrumque unus in utroque perfectus, et sine mutabilitate Divinitatis, et sine humanae imminutione naturae. Unum adoraverunt, eidemque munera obtulerunt, ut osten-

derent ipsum esse coeli Dominum, qui in praesepebus videretur.

55. Distingue singulorum momenta verborum: *Puer natus est, Filius datus est nobis*. Etsi ex Patre natus, non tamen nobis natus, sed datus est; quia non Filius propter nos, sed nos propter Filium. Neque enim nobis natus est, qui et ante nos natus est, et totius est conditor creaturae: neque nunc primum nascitur, qui erat semper, et erat in principio; sed illud quod non erat, nobis nascitur. Quod etiam angelus pastoribus cum loqueretur, dixit esse generatum, sicut habes scriptum: *Qui natus est nobis hodie Salvator, qui est Christus Dominus, in civitate David* (Luc. 2, 11). Nobis ergo quod non erat, natum est: hoc est, puer ex Virgine, corpus ex Maria; hoc enim post nos, illud ante nos.

56. Alii codices sic habent: *Puer natus est nobis, Filius datus est nobis*; hoc est, qui erat Filius Dei, hic ex Maria puer natus est nobis et datus est nobis. Quia datus sit, audi prophetam dicentem: *Et salutare tuum da nobis* (Psal. 84, 8). Quod enim supra nos est, datur: quod de coelo est, datur; sicut etiam de Spiritu legimus, quod *caritas Dei effusa est in cordibus nostris per Spiritum*

sanctum, qui datus est nobis (Rom. 5, 5).

57. Sed videte quemadmodum hic locus multas haereses exstinguat. *Puer natus est nobis* non judaeis: *nobis*, non manichaeis: *nobis*, non marcionitis. Propheta dicit *nobis*, hoc est, credentibus, non incredulis. Et ille quidem misericordia sua omnibus natus est, sed perfidia haereticorum fecit, ut non omnibus nasceretur, qui omnibus natus est. Nam et lumen diei oriri jubetur super bonos et malos (Matth. 5, 45): sed oriri non videntibus non videtur.

58. Sicut ergo puer non omnibus natus est, sed fidelibus: sic Filius non infidelibus datus est, sed fidelibus. Nobis datus est, non photinianis; illi enim non datum nobis Dei Filium dicunt esse, sed ab initio inter nos natum: nobis datus est, non sabellianis; illi enim nolunt Filium datum, eundem asserentes Patrem esse quem Filium: nobis, non arianis; et ipsi enim non habent Filium pro salute datum, sed pro infirmitate transmissum: non habent consiliarium, quem putant futura nescisse: non habent Filium, quem sempiternum non putant; cum scriptum sit de Verbo Dei: *Quod erat in principio*; et alibi: *In principio erat Verbum* (Joan. 1, 1, 2). Denique ut ad propositum revertamur

exemplum *In principio inquit, antequam terram faceret, antequam abyssos faceret, et antequam produceret fontes aquarum, ante omnes colles genuit me* (Prov. 8, 23 et seqq.).

CAPUT IX.

Difficultatem ex loco Salomonis supra laudato exorientem solvit Ambrosius, illic et praeteritum sumi pro futuro, et geminam in Christo naturam designari patefaciens.

59. Fortasse dices, quomodo de incarnatione Christi dictum esse memoraverim: *Dominus creavit me* ¹⁾, cum ante incarnationem Christi creatura sit mundi? Sed considera, quia moris est Scripturis divinis et futura pro praeteritis dicere, et geminam in Christo significare substantiam Divinitatis et carnis; ne quis aut Divinitatem neget ejus, aut carnem.

1) *Dominus creavit me.* Quomodo haec verba et illa *antequam terram faceret* etc. referri possunt ad incarnationem, cum D^eus haec creaverit antequam Verbum factum sit caro^l, imo dicta sint ab auctore ante incarnationem? Respondet moris esse Scripturis futurum designare per praeteritum (*creavit*), et hoc loco designari duplicem Christi naturam: divinam verbis *ante omnes colles genuit me*; et humanam verbis *creavit me*.

60. Nam sicut in Isaia habes: *Puer natus est nobis, et Filius datus est nobis* (Isai. 9, 6); ita hic quoque ante praemisit creaturam carnis, et subtexit assertionem Divinitatis; ut scires non duos Christos, sed unum esse: qui et ante secula generatus sit ex Patre, et ultimis temporibus creatus ex Virgine, hoc est: Ego sum ille creatus ex homine, creatus ad causam, qui sum generatus ante secula.

61. Denique dicturus: *Dominus creavit me*, praemisit: *Commemorabo quae a seculo sunt*. Dicturus *genuit*, praemisit: *In principio antequam terram faceret, ante omnes colles genuit me*. Ante, cum dicitur, in infinitum retro sine aliqua definitione porrigitur. Denique *ante Abraham* inquit, *ego sum* (Joan. 8, 58), non utique post Adam: et *ante Luciferum* (Psal. 119, 3), non utique post angelos. Sed *ante* cum dixit, non se intra aliquem, sed omnia intra se dixit; sic enim moris est aeternitatem Dei Scripturis significare divinis. Denique alibi habes: *Priusquam montes fierent, et formaretur orbis terrae, a seculo et usque in seculum tu es* (Id. 89, 2).

62. Ante omnia ergo generatio, inter om-

nia et propter omnia creatura. Natus ex Patre supra Legem, factus ex Maria sub Lege.

CAPUT X.

Baptistae verba ex quibus Christum etiam ante incarnationem factum disputabant, soluturus, ubi prae-misit ea referri posse ad praedestinationem, intelligenda tamen de incarnatione ab antecedentibus probat. Hinc progrediens ad mystica, ipsum dignitate ac merito ante Joannem fuisse declarat, maxime cum Ecclesiae, cujus typus in historia Ruth expressus fuerat, sponsus, etiam excluso Moyse, solus extiterit, quam licet synagoga non omnino neglecta, solus vocavit.

63. (*Al. cap. V.*) Sed scriptum est: *Post me venit vir, qui ante me factus est: quia prior me erat* (Joan. 1, 30). Unde dicunt: Ecce qui erat, factus est. Ipsa verba perpendamus. *Post me*, inquit, *venit vir*. Vir ergo est qui venit, ipse qui factus est. Vir autem nomen est sexus: sexus autem non utique Divinitati, sed naturae deputatur humanae.

164. Possem ergo dicere: Erat in praecognitione quidem corporis, sed aeternitate virtutis; nam et Ecclesia erat, et sancti erant praedestinati ante secula: sed non id hoc loco dico, at illud assero, factum esse non ad Divinitatem, sed ad incarnationis pertinere naturam, sicut ipse Joannes dixit: *Hic*

est de quo dixi: Post me venit vir, qui ante me factus est.

65. Itaque cum geminam, sicut supra dixi, in Christo substantiam proposuisset, ut utramque intelligas et Divinitatis et carnis, hoc loco coepit a carne. Est enim Scripturis promiscua consuetudo divinis, ut interdum a Divinitate Christi incipiant, et ad incarnationis sacramenta descendant; interdum ab humilitate incarnationis exordium sumant, et ad gloriam Divinitatis assurgant, ut in prophetis et in evangelistis frequenter, et in Paulo. Ergo et hic juxta memoratam consuetudinem ab incarnatione Domini coepit de ejus Divinitate dicturus; non ut confunderet humana atque divina, sed ut distingueret. Verum ariani, velut judaici caupones, miscent aquam cum vino ¹⁾, quia divinam generationem humanamque confundunt, ad Deitatem referentes, quod de carne sit dictum.

66. Nec metuo quod objecturi videntur, quia in superioribus habet *virum*; sic enim habet: *Qui post me venit*. Sed videant et ibi quid praemiserit: *Verbum*, inquit, *caro fac-*

1) Hac comparatione utuntur etiam Athanasius or. 3. c. arianos n. 35. et ep. ad episc. Aegypti n. 17., necnon Gaudentius brixianus Serm. 19.

tum est (Joan. 1, 14). Et ideo non addidit virum, quia carnem dixerat: per carnem autem istic virum intelligimus, et per virum carnem. Ergo quia dixerat: *Verbum caro factum est*, virum hoc loco nominare superfluum fuit, quem carnis expressione signaverat.

67. Qui exemplo in posterioribus quoque et agnum praemisit, qui tolleret peccata mundi (Ibid 29), et ut incarnatum intelligeres, quem ante memoraverat, ait: *Hic est de quo ante dixi: Post me venit vir, qui ante me factus est*, hoc est, virum dixi, non Deum factum. Sed ut ipsum incarnatum declararet esse qui ante secula erat, ne duos filios crederemus, ait: *Quia prior me erat*. Nam si *factus est* ad divinam generationem retulisset, quid opus erat, ut adhuc adderet tertium, atque iteraret quod supra dixerat? Sed quia ante de incarnatione tantum dixerat: *Post me venit vir, qui ante me factus est*, ideo addidit: *Quia prior me erat*, quoniam Divinitatis aeternitas fuerat exprimenda. Et haec est causa praelationis ¹⁾, ut merito ante-

1) Hac explicatione facile solvitur difficultas ex verbis Joannis Baptistae *ante me factus est* petita: haec enim referri nequeunt ad humanam Christi na-

latus videatur, qui proprii Patris sempiterna virtus est.

68. Dat tamen intellectus spiritalis ubertas, ut excurrere et evagari ad concludendos libeat arianos, qui volunt factum hoc loco non ad virum, sed ad Divinitatem referre. Quid est enim tenere quod possint, cum dixerit Baptista: *Post me venit, qui ante me*

turam, secundum quam post Joannem natus, hinc et factus est. Proinde hic verba *ante me factus est*, significant, mihi praelatus, antepositus est. Hanc vero interpretationem probant 1. ratio adjecta, *quia me prior erat*: jam vero prioritas dignitatis vel etiam temporis ratio quidem est praelationis, non vero prioritatis productionis: 2. textus remotior tam antecedens v. 1 ss., quam consequens v. 18., ubi praerogativae Filii recensentur, quod sit aeternus, omnium creator etc., quae certe ratio optima sunt praelationis Christi, pugnant vero cum Verbi productione. 3. loci paralleli Matth. 3, 11; Luc. 3, 16; Marc. 1, 7., ubi s. Joannes Baptista clarius explicat, quo sensu Christus prior ipso sit ac proinde ante ipsum factus. Ita loquitur priori loco: *Ego quidem baptizo vos in aqua in poenitentiam: qui autem post me venturus est, fortior me est, cujus non sum dignus calceamenta portare: ipse vos baptizabit in aqua et Spiritu sancto*. Quam 4. interpretationem confirmant suffragio suo Augustinus tract. 3. in Joan. n. 7; tr. 4. n. 9, 11; serm. 380; Cyrillus alex. in Joan. l. 1. p. 98. et in l. quod Maria sit Deipara n. 28; nominatim vero Chrysostomus hom. 13. al. 12. in Joan.; hom 16, 17.

factus est, hoc est, supra meritum meum factus, supra meam gratiam, tempore carnis posterior, Divinitatis honore venerabilis? *Post me enim venit*, temporis est: *Prior me erat*, aeternitatis: *ante me factus est*, honoris, quia etiam incarnationis mysterium supra humanam est gratiam.

69. Denique in inferioribus quid supra contexuisset expressit dicens: *Post me venit vir, cujus non sum dignus calceamenta portare* (Joan. 1, 27), praestantiam utique dignitatis, non aeternitatem divinae generationis exponens. Quod eo usque ad incarnationem pertinet, ut typum in hominibus mystici calceamenti ante praemiserit. Lege enim proximo defuncti vel fratri copula deferebatur ejus uxoris, ut semen fratris, vel proximi resuscitaret (Num. 36, 6—9). Unde quod Ruth, licet ipsa alienigena, tamen quia maritum habuerat ex judaeis, qui reliquerat superstitem proximum, eamque colligentem manipulos suae messis, quibus alebat et se et socrum, Booz vidit et amavit (Ruth. 4, 5—7): non aliter eam accipit uxorem, nisi calceamentum ejus ante solvisset, cui uxor debebatur ex Lege.

70. Historia simplex, sed alta mysteria; aliud enim gerebatur, aliud figurabatur. Nam

si secundum literam sensum torqueamus, prope quidam pudor et horror in verbo est, si ad commixtionis corporeae consuetudinem sententiam intellectumque referamus. Designabatur autem futurus ex judaeis, ex quibus Christus secundum carnem, qui proximi sui, hoc est, populi mortui semen doctrinae coelestis semine suscicaret, cui calceamentum nuptiale Ecclesiae copulandae praescripta Legis spiritalia deferebant ¹⁾).

1) Applicat historiam Ruth et Booz tamquam typum Ecclesiae et Christo tamquam antitypo. Booz origine judaeus typum gerebat Christi, Ruth ex gentibus nata Ecclesiae ex gentibus collectae. Haec destinata est divinitus sponsa Christo, qui eam coelestis doctrinae semine fecundavit. Sicut vero primus propinquus Ruth solvebat calceamentum suum et tradebat Booz, ut significaret se cedere juri suo in Ruth illudque transferre in Booz (Ruth 4, 7, ss.) ita solvebant Moyses et Josue calceamenta sua, ut significarent, se non esse Ecclesiae sponsores: Christo vero solvenda non erant calceamenta (Joan. 1, 27.), ut significaretur, eum verum esse Ecclesiae sponsum. Ecclesia autem jam messe Christi dives non deserit synagogam seu potius sollicita est illius viduae morte filii exhaustae Synagogae, sicut Ruth curam gessit Noemi socii, filios ex ea etiam colligens et novos ex aliis gentibus. Hoc ita expressit Rabanus Maurus comment. in l. Ruth c. 8., ubi etiam haec Ambrosii verba affert: „Ecclesia gratiam, quam sponsi sui munere percepit, synagogae genitrici praesentat,

71. Non Moyses sponsus; illi enim dicitur: *Solve calceamentum pedum tuorum* (Exod. 3, 5), ut Domino suo cedat. Non Jesus Nave filius sponsus; nam et ipsi dicitur: *Solve calceamentum pedum tuorum* (Josuë 5, 16), ne ex similitudine nominis sponsus Ecclesiae crederetur. Non alius sponsus, sed solus Christus est sponsus, de quo dixit Joannes: *Qui habet sponsam sponsus est* (Joan. 3, 29). Illis igitur calceamentum solvitur, huic solvi non potest, sicut dixit Joannes: *Non sum dignus solvere corrigiam calceamenti ejus* (Id. 1, 27).

72. Solus ergo Christus est sponsus, cui illa veniens ex gentibus sponsa, ante inops atque jejuna, sed jam Christi messe dives, innubat: quae manipulos fecundae segetis

quatenus eam provocet ad fidem et de concesso secum aetetur dono; et c. 11: „Ditata Ecclesia gentium donatione Christi atque onerata fructibus virtutum, credit ad socrum h. e. ad primitivam Ecclesiam sive ad synagogam judaeorum narrans ei omnia magnalia, quae sibi fecisset Dominus, quatenus Ecclesiam scil. antiquam incitaret ad congratulationem vel synagogam provocaret ad conversionem: quia hoc proprium est pietatis, ut non parca nec invida in datis, sed larga et benevola sit in bonis possessis!“ Non invidet vero Christus manipulos synagogae sicut nec Booz Noemi, pro qua colligebat Ruth de agro spicas etc.

Verbique reliquias gremio legat mentis interno; ut exhaustam illam viduam morte filii, atque inopem defuncti populi matrem novis pascat alimentis, non relinquens destitutam viduam, et novos quaerens.

73. Solus ergo Christus est sponsus, qui nec synagogae ipsi manipulos suae messis invidet. Utinam se non ipsa excluderet! Habuit quos per se colligeret; sed quia populus ejus est mortuus, quasi filio egenae defuncto, per Ecclesiam manipulos, quibus viveret, colligebat; quos venientes in exultatione portabunt, sicut scriptum est: *Venientes autem venient in exultatione, tolentes manipulos suos* (Psal. 125, 6).

74. Quis enim sibi alius sponsam audeat Ecclesiam vindicare, quam a Libano unus et solus vocavit dicens: *Ades huc a Libano, sponsa; ades huc a Libano* (Cant. 4, 8). Aut de quo alio potuit Ecclesia dicere: *Fauces ejus dulcedines, et totus desiderium* (Id. 5, 26)? Et quia de calceamento pedum tractatum sumpsimus, cui alii nisi Verbo Dei incarnato convenit dictum: *Crura ejus columnae marmoreae, fundatae super bases aureas* (Ibid. 15)? Solus enim Christus inambulatur animis, et graditur in mente sanctorum, in quibus velut aureis basibus funda-

mentisque pretiosis solidata vestigia Verbi coelestis haeserunt.

75. Claret igitur et virum et typum ad incarnationis spectare mysterium.

CAPUT XI.

Redit ad locum propositum, et ubi Christus dicitur factus, hoc vel ad incarnationem vel ad causam sive adjunctum aliquod referri docet. Ad eum sensum plurima sacrorum codicum et Pauli imprimis testimonia edisserit: maxime autem in eo immoratur, ut Christum verum sacerdotem esse atque in Melchisedech praefiguratum, eique cum Patre operationis unitatem, non vero solam similitudinem inesse persuadeat.

76. Non ergo ad substantiam Divinitatis, sed ad incarnationem saepe, nonnunquam etiam ad causam ¹⁾ pertinet, cum dicitur factus. Nam si ad Divinitatem refers, ergo et in opprobrium Deus factus est: sic enim habes: *Tu autem repulisti, et ad nihilum redelegisti, dispulisti Christum tuum*; et infra: *Et factus est in opprobrium vicinis suis* (Psal. 88, 39 et 42). *Vicinis*, inquit, non civibus, non domesticis, non adhaerentibus; quoniam *qui adhaeret Domino, unus*

1) *Ad causam*, ad certum munus, sub aliquo tantum respectu.

spiritus est (1. Cor. 6, 17): qui vicinus est, non adhaeret. Et, *Factus est in opprobrium*; quia crux Domini judaeis scandalum, graecis stultitia (1. Id. 1, 23). Nam sapientibus per eandem crucem excelsior factus est coelis, excelsior angelis, et melioris testamenti factus est sponsor, ipse qui erat prioris.

77. Vide quam non defugiam ista, ut etiam congeram: sed quomodo factus sit, considera.

78. Primum quod *purificatione facta, consistet in dextera magnitudinis in excelsis, tanto melior factus angelis* (Hebr. 1, 3. 4). Ubi purificatio, hostia: ubi hostia, corpus: ubi corpus, oblatio: ubi munus oblationis, ibi sacrificium passionis.

79. Deinde *sponsor melioris testamenti* (Id. 7, 22). *Ubi testamentum, mors necesse est praecedat testatoris* (Id. 9, 16), sicut subter est scriptum: mors autem non ad Divinitatis aeternitatem, sed ad fragilitatem refertur humanam.

80. *Excelsior quoque coelis factus* quomodo sit, ostenditur: *Immaculatus*, inquit, *segregatus a peccatoribus, et excelsior coelis factus: qui non habet quotidie necessitatem, sicut sacerdotes, prius pro suis delictis hostiam offerre, deinde pro populi.*

Hoc enim fecit semel se offerendo (Id. 7, 26. 27), sicut scriptum est. Nemo excelsior factus dicitur, nisi qui in aliquo fuerit humilior: in eo igitur excelsior factus est, sedendo ad dexteram Patris, in quo se minor angelis factus (Id. 2, 9) obtulit passioni.

81. Postremo ipse Apostolus ad Philippenses ait, quia *in similitudine hominis factus, et specie inventus ut homo, humiliavit, semetipsum, factus obediens usque ad mortem* (Philip. 2, 7. 8). Vide ubi factus sit: In similitudine, inquit, hominis, non in potestate Dei: et factus obediens usque ad mortem; ut obedientiam quidem hominis haberet, regnum Divinitatis.

82. Quantis igitur adhuc utemur exemplis ad incarnationem, vel ad aliquid referendum esse quod factus est? Quod autem et factum est, idem est et creatum: *Dixit enim, et facta sunt: ipse mandavit, et creata sunt* (Psal. 148, 5). *Dominus creavit me* (Prov. 8, 22), secundum carnem dictum: creatum quoque supra ostendimus in libro primo de incarnatione dictum videri ¹⁾.

83. Ipse etiam Apostolus asserendo serviendum non esse creaturae, significavit ex

1) Supra scil. c. 14. seq.

Deo Filium non creatum esse, sed genitum (Rom. 1, 25). Tamen etiam alibi, ut manifestaret quomodo in Salomone sit lectum: *Dominus creavit me*; quid in Christo creatum esset, ostendit.

84. Itaque totius seriem capitis recenseamus; sic enim habes: *Ergo quia filii participes sunt carnis et sanguinis, et ipse similiter particeps factus est eorundem; ut per mortem destrueret hunc, qui mortis habebat imperium* (Hebr. 2, 14). Quis ergo est qui nos participes suae voluit esse carnis et sanguinis? Utique Dei Filius. Quomodo nisi per carnem particeps factus est noster? aut per quam, nisi per corporis mortem mortis vincula dissolvit? Mortis enim mors facta est susceptio mortis in Christo. Ergo de incarnatione proposuit.

85. Videamus sequentia: *Nec enim statim angelos, inquit, assumpsit, sed semen Abrahæ. Unde habuit per omnia fratribus similari, ut misericors fieret et fidelis princeps, sacerdos ad Deum, ut expiaret peccata populi. In quo enim passus est ipse, et tentatus, potest et tentatos juvare* (Ibid. 16 17). *Propter quod, fratres sanctissimi, vocationis coelestis participes, intuemini Apostolum et principem sacerdotum*

confessionis nostrae Jesum fidelem esse creatori suo, sicut et Moyses in domo ejus (Id. 3, 1. 2). Haec nempe verba sunt Apostoli.

86. Videtis in quo creatum dicat: In quo *assumpsit*, inquit, *semen Abrahae*, corporealem utique generationem asserit. In quo autem, nisi in corpore expiavit populi peccata? In quo passus est, nisi in corpore, sicut et supra diximus: *Christo passo secundum carnem?* In quo sacerdos, nisi in eo, quod sacerdotali assumpsit ex genere?

87. Sacerdos enim aliquid debet offerre et secundum Legem in sancta intrare per sanguinem (Hebr. 9, 25): ergo quia sanguinem taurorum hircorumque repudiaverat Deus hunc utique sacerdotem per suum sanguinem, sicut legisti, in Sancta sanctorum coeli summa penetrantem oportebat intrare (Ibid. 12), ut aeterna nostrorum esset oblatio peccatorum. Idem ergo sacerdos, idem et hostia: et sacerdotium tamen et sacrificium humanae conditionis officium est; nam et agnus ad immolandum ductus est, et sacerdos est secundum ordinem Melchisedech.

88. Nemo igitur ubi ordinem cernit humanae conditionis, ibi jus Divinitatis asserat. Nam et illum Melchisedech, per quem Abraham hostias suas obtulit (Gen. 14, 18. et

seqq.), non angelum utique secundum judaica ludibria ¹⁾ intelligit Ecclesia sed virum sanctum ac sacerdotem Dei, qui typum gerens Domini, et sine patre et sine matre, et sine generationis enarratione, et sine initio, et sine fine describitur, ut ostenderet sempiternum Filium Dei in hunc mundum esse venturum, qui et sine Patre secundum incarnationem natus est, et sine matre secundum divinam generationem, et sine enarratione generationis, quia scriptum est: *Generatio- nem autem ejus quis enarrabit* (Isai. 53, 8)?

89. Ergo illum Melchisedech in Christi typo sacerdotem Dei accepimus; sed illum in typo, hunc in veritate: typus autem umbra est veritatis: illum in nomine unius civitatis, hunc regem in reconciliatione totius mundi; quia scriptum est: *Deus erat in Christo mundum reconcilians sibi* (2. Cor. 5, 19), hoc est, sempiterna Divinitas: aut, si Pater in Filio, sicut Filius in Patre, et substantiae utique et operationis unitas non negatur.

90. Quomodo autem negare merito possunt,

1) Hieronymus ep. 25. ad Evagrium hanc opinionem non judaeis, sed Origeni ac Didymo adscribit.

etiam si velint, cum scriptum sit: *Pater autem qui in me manet, ipse facit opera*; et: *Opera quae ego facio, ipse facit* (Joan. 14, 10)? Non dixit, et ipse facit, ne similitudinem magis, quam unitatem operis aestimares: sed dicendo: *Quae ego facio, ipse facit*, manifestum reliquit, quod unum opus Patris et Filii credere debeamus.

91. Denique ubi similitudinem operum, non unitatem voluit intelligi: *Qui credit, inquit, in me, opera quae ego facio, et ipse faciet* (Ibid. 12). Bene hic et interponendo, similitudinem nobis donavit; et tamen unitatem naturalem negavit. Unum est igitur opus Patris et Filii, etiam si non placeat arianis.

CAPUT XII.

Regnum Patris atque Filii unum esse ac indivisum;
et unam similiter utriusque Divinitatem.

92. Quaero autem quomodo regnum velint Patris et Filii esse divisum, cum Dominus dixerit, ut supra ostendimus: *Omne regnum in se divisum, facile destruetur* (Matth. 12, 25)?

93. Et ideo ad excludendum arianæ sacrilegium saevitatis, unum imperium Patris et

Filii etiam Petrus sanctus asseruit dicens: *Quapropter satagite, fratres, certam vestram vocationem et electionem facere. Haec enim facientes non errabitis; sic enim abundantius ministrabitur vobis introitus in aeternum imperium Dei et Domini nostri conservatoris Jesu Christi* (2. Petr. 1, 10. 11).

94. Aut si quis de Christi tantum imperio dictum putat, et hoc ideo sic accipit, ut Patrem Filiumque potestate secernat; is tamen et regnum Filii fatebitur, et aeternum. Itaque non solum duo inducent regna divisa, ut obnoxia sint defectui; sed etiam cum regna comparabilia nulla sint Dei regno, quod Filii esse, etiamsi velint, negare non possunt: aut contra suam sententiam redibunt, ut idem Patris et Filii regnum esse fateantur: aut, quod sacrilegium est dicere, jus Patri regni minoris adscribent: aut, quod contrarium est, quem minorem Divinitate impie memorant, ejus regnum fatebuntur aequale.

95. Sed hoc non quadrat, non congruit, non cohaeret. Dicant igitur unum esse regnum, sicut nos dicimus et probamus: probamus autem non nostris, sed coelestibus testimoniis.

96. Primum enim etiam aliis exemplis disce regnum coelorum, regnum etiam Filii

esse; ipse enim dixit: *Amen, amen dico vobis, quoniam sunt aliqui de hic astantibus, qui non gustabunt mortem, donec videant Filium hominis venientem in regnum suum* (Matth. 16, 28). Dubitari ergo non potest, quod sit regnum Filii Dei.

97. Sed accipe ipsum esse regnum Filii, quod Patris est: *Amen dico vobis, quod sunt quidam circumstantium, qui non gustabunt mortem, donec videant regnum Dei veniens in virtute* (Marc. 8, 39) Eo enim usque unum regnum est, ut unum sit praemium, idem heres, eadem merita, idem sponsor.

98. Quomodo non idem regnum, cum praesertim ipse de se Filius dixerit: *Tunc justi fulgebunt sicut sol in regno Patris mei* (Matth. 13, 43)? Quod enim Patris est per majestatis proprietatem, id etiam Filii est per ejusdem claritudinis unitatem (Joan. 17, 5). Ergo et Patris regnum Scriptura dixit, et Filii.

99. Accipe nunc quia ubi regnum Dei dicit, nec Patris nec Filii separat potestatem, quia et paternum et Filii regnum uno Dei nomine comprehendit, sicut habes: *Cum videritis Abraham, Isaac et Jacob, et omnes prophetas in regno Dei* (Luc. 13, 28) An negamus in regno Filii prophetas esse, cum

et latroni dicenti: *Momento mei, cum veneris in regnum tuum*; responderit Dominus: *Amen dico tibi, hodie mecum eris in paradiso* (Id. 23, 42. 43)? Aut quid est esse in regno Dei, nisi aeternam nescire mortem? Qui autem nesciunt aeternam mortem, vident Filium hominis venientem in regnum suum.

100. Quomodo ergo potest non in potestate habere quod donat dicens: *Tibi dabo claves regni coelorum* (Matth. 16, 19)? Et videto distantiam. Servus aperit, Dominus largitur: iste per se, ille per Christum: famulus claves accipit, Dominus ordinat potestates: aliud jus donantis, aliud dispensantis obsequium est.

101. Accipe adhuc unum regnum, unum imperium esse Patris et Filii. Habes ad Timotheum: *Paulus Apostolus Jesu Christi secundum imperium Dei salvatoris nostri et Christi Jesu spei nostrae* (1. Tim. 1, 1). Unum igitur Patris et Filii regnum evidenter est declaratum, sicut et apostolus Paulus asseruit dicens: *Hoc enim scitote, quod omnis impudicus, aut immundus, aut avarus, quod est idololatria, non habet hereditatem in regno Christi et Dei* (Ephes. 5, 5). Ergo unum regnum et una Divinitas.

102. Unam Divinitatem Lex probavit, quae

dicat unum Deum (Deut. 6, 4). Probavit et Apostolus, dicendo de Christo: *In quo habitat omnis plenitudo Divinitatis corporaliter* (Coloss. 2. 9). Si enim juxta Apostolum plenitudo omnis corporaliter Divinitatis in Christo est, aut unius Divinitatis Patrem et Filium fatebuntur: aut si Patris et Filii Divinitatem cupiunt separare, cum omnem plenitudinem Divinitatis corporaliter Filius habeat; quid est quod existimant amplius reservandum, cum amplius nihil sit plenitudine perfectionis? Ergo una Divinitas.

CAPUT XIII.

Filio majestatem suam esse, ac paternae aequalem: cujus socii non sint angeli, sed spectatores.

103. (*Al. cap. VI.*) Imaginem autem unam et similitudinem unam supra diximus ¹⁾, superest ut unius quoque majestatis Patrem Filiumque doceamus. Nec longe aberit; cum enim ipse dixerit de se Filius: *Cum venerit Filius hominis in majestate sua, et omnes angeli cum eo, tunc sedebit super sedem majestatis suae* (Matth. 25, 31). Ecce Filii expressa majestas est: quid ei deest, cujus in-

1) Scil. l. 1. c. 7,

creatam majestatem negare non possunt? Est ergo Filii majestas.

104. Accipiant nunc, ut dubitare non possint, quod Patris et Filii una majestas sit; ipse enim Dominus dixit: *Nam qui me erubuerit et meos sermones, hunc Filius hominis erubescet; cum venerit in majestate sua et Patris, et sanctorum angelorum* (Luc. 9, 26). Quid est: *Et sanctorum angelorum*, nisi quia honorantur et servi dignitate Domini sui?

105. Dignitatem ergo suam ad Filium et Patrem retulit; non ut angeli habeant cum Patre et Filio aequale consortium, sed ut praeeminentem gloriam Dei cernant. Neque enim suam majestatem angeli habent, sicut lectum est de Filio: *Cum sederit in sede majestatis suae* (Matth. 25, 31); sed assistant, ut Patris et Filii gloriam videant, quibus aut possunt aut merentur aspectibus.

106. Denique ipsa se explanant verba divina, ut intelligas illam gloriam Patris et Filii cum angelis non esse communem; sic enim habes: *Cum autem venerit Filius hominis in majestate sua, et omnes angeli cum eo*. Et ut doceret unam majestatem et unam gloriam esse Patris et suam, ipse in alio libro ait: *Et Filius hominis confundet*

eum, cum venerit in gloria Patris sui cum angelis sanctis (Marc. 8, 38). Illi in obsequio, hic in gloria: illi in comitatu, hic in suggestu: illi stant, hic sedet; ut verbo tamen usus utamur humani, hic judicat, hi ministrant

107. Divinam autem non praemisit majestatem Patris, et subdidit suam et angelorum; ne de superioribus ad inferiora fecisse gradum quendam et ordinem videretur. Sed quia Pater inferior videri non poterat, praemisit majestatem suam, et addidit Patris et angelorum; ne se medium inter Patrem et angelos nominando, aut ab angelis ad Patrem per sui quoque incrementa fecisse quendam videretur ascensum, aut a Patre rursus ad angelos per ordinem cum sui etiam diminutione crederetur descensum. Nam nos, qui unam Divinitatem Patris et Filii confitemur, diversum, ut ariani, ordinem non putamus.

CAPUT XIV.

Unius substantiae cum Patre Filium esse: hanc autem etiam secundum Divinitatem sumi debere in multis Scripturarum testimoniis, tametsi in aliis nonnullis hoc verbum aut de possessionibus aut de incarnatione intelligatur.

108. De substantia autem, imperator Auguste, quid loquar unius Filium cum Patre esse substantiae, cum imaginem paternae substantiae Filium legerimus (Sap. 7, 26), ut in nullo secundum Divinitatem a Patre intelligas discrepare?

109. Juxta hanc imaginem dixit: *Omnia quae Pater habet, mea sunt* (Joan. 16, 15). Ergo nec substantiam in Deo possumus denegare; neque enim insubstantivus est, qui aliis dedit habere substantiam: licet alia sit substantia Dei, alia creaturae. Non posset insubstantivus Filius Dei esse, per quem cuncta subsistunt.

110. Et ideo ait: *Non est occultatum os meum quod fecisti in abscondito, et substantia mea in inferioribus terrae* (Psal. 138, 15). Virtuti enim et Divinitati ea, quae ante constitutionem mundi vel imperspicabili majestate sunt gesta, abscondita esse non poterant. Legimus ergo substantiam.

111. Sed dices de incarnatione dictam esse substantiam. Iterum nomen substantiae lectum probavi, et lectum non pro patrimoniiis, ut dicitis. Jam, si placet, accipiamus, secundum mysterium in inferioribus Christi fuisse substantiam. Etenim ut defunctorum animas in sui corporis anima liberaret, vincula

mortis solveret, peccata donaret, operatus est in inferno.

112. Et tamen quid obstat, quo minus illam divinam intelligas esse substantiam; cum Deus ita ubique sit, ut ei dictum sit: *Si ascendero in coelum, tu illic es: si descendero ad infernum, ades* (Psal. 138, 8)?

113. Denique ad substantiam divinam derivandum esse intellectum sequentibus declaravit dicens: *Inoperatum meum viderunt oculi tui* (Ibid. 16); eo quod non operis factura sit Filius, sed Verbum genitum potestatis aeternae: ἀκατέργαστον enim dixit, hoc est, inoperatum atque increatum Verbum sine alicuius creaturae testimonio ex Patre natum: et tamen abundamus aliis substantiae testimoniis. Sit ista hoc loco substantia corporalis ¹⁾, dummodo non opus Dei Filium, sed

1) Praeter alios praetextus, propter quos nolebant ariani Patrem et Filium unius esse substantiae fateri, et hic erat, vocem hanc *substantiae* non occurrere in divinis literis: vel si occurrat designare divitias, patrimonium. Provocat ad Ps. 138, 15. s. doctor, quo probat 1. falsum esse in divinis literis vocem *substantiae* tantum de divitiis seu patrimonio occurrere. Nititur deinde 2. suadere, hic vocem substantiae referri ad divinam naturam (quod etiam in sequentibus circa alia testimonia probare studet): permittit tamen 3. posse eam referri ad incarnationem

inoperatam ejus Divinitatem et ipse fatearis.

114. Scio autem aliquos dicere inoperatum esse etiam incarnationis mysterium, quod non sit virilis copulae usus operatus, quia partus est Virginis. Si ergo plerique hoc loco nec Mariae partus opus esse dixerunt, tu ariane, opus putas esse Dei Verbum?

115. Aut hic tantum substantiam legimus? Nonne et alibi dixit: *Portae civitatum effractae sunt, montes ceciderunt, et revelata est substantia* (Nahum 2, 6)? Numquid hic quoque creatura signatur? Solent enim aliqui dicere pecuniariam esse substantiam. Ergo si ad hunc sensum refers, ideo occiderunt montes, ut pecuniarium patrimonium cerneretur.

116. Sed meminerimus qui montes ceciderunt, illi utique de quibus dictum est: *Si habueritis fidem sicut granum sinapis, dicetis huic monti: Tollere, et jactare in mare* (Matth. 17, 19). Montes ergo sunt altitudines se extollentes.

117. Denique in graeco *regna ceciderunt* habetur. Quae regna nisi satanae, de quo dixit Dominus: *Quomodo stabit regnum ip-*

seu ad naturam humanam assumptam, sed certum fixumque manere Verbum esse increatum.

sus (Id. 12, 26)? Ipsos ergo legimus montes, quae regna sunt diaboli. Ideoque istis cadentibus regnis de corde fidelium, revelatum est paternae Dei Filium Christum esse substantiae. Qui sunt etiam illi ipsi montes aerei, de quorum medio quatuor currus procedunt (Zach. 6, 1)?

118. Advertimus altitudinem illam extollem se adversus scientiam Dei verbo Domini corruisse, cum diceret Dei Filius: *Obmutesce, et exi, immunde spiritus* (Marc. 1, 25). De quo et propheta dixit: *Ecce ego ad te, mons corrupte* (Jer. 51, 25).

119. Isti ergo ceciderunt montes, et revelatum est, quod esset in Christo divina substantia, dicentibus iis, qui viderant: *Vere Filius Dei est* (Luc. 4, 41); non enim humana, sed divina potestate daemoniis imperabat. Jeremias quoque dicit: *Super montes accipite luctum, et super semitas desertas planctum, quia defecerunt; eo quod non sint homines, non acceperunt vocem substantiae: a volatilibus usque ad jumenta expaverunt et defecerunt* (Jer. 9, 10).

120. Nec praeteriit etiam alibi, cum fragilitates exponerent conditionis humanae, ut susceptam a se infirmitatem carnis, et affectum nostrae mentis ostenderet, dixisse Do-

minum per prophetam: *Memento, Domine, quae est substantia mea* (Psal. 88, 48) quia in natura fragilitatis humanae Dei Filius loquebatur.

121. De quo supra, ut incarnationis mysteria revelaret, ait: *Tu vero repulisti, Domine, et pro nihilo habuisti: dispulisti Christum tuum, evertisti testamentum servi tui, profanasti in terra sanctitatem ejus* (Psal. 88, 39. 40). In quo utique servum dixit, nisi in carne, quia *non rapinam arbitratus est esse se aequalem Deo, sed semetipsum exinanivit formam servi accipens, in similitudinem hominum factus, et specie inventus ut homo* (Philip. 2, 6. 7)? Mea ergo susceptione servus, sua Dominus potestate.

122. Quid illud quod habes? *Quoniam quis stetit in substantia Domini; et alibi: Et si stetissent in substantia mea; et audissent verba mea¹, et si docuissent plebem meam; avertissem eos a nequitiiis et adinventionibus suis* (Jer. 23, 18. et 22)?

CAPUT XV.

Cum Filium Patri ἐτεροούσιον ariani dicant, eos in Deo substantiam aperte agnoscere: nec ob aliud hanc vocem defugere, nisi quod illum verum Dei Filium fateri nolint, ut significavit Eusebius nicomediensis.

Recte igitur constitutum a niceanis patribus verbum ὁμοούσιον, utpote haeresi oppositum et in Scriptura firmatum; proindeque neglectis, quae isti fingunt de sabellianis, retinendum.

123. Quomodo negant Dei esse substantiam? Quomodo verbum substantiae, quod creberrimum in Scripturis est, putant esse vitandum, cum ipsi ex alia substantia, hoc est, ἑτεροούσιον dicendo Filium, substantiam tamen in Deo esse non abnuant?

124. Non igitur verbum, sed vim verbi fugiunt; quia nolunt verum esse Dei Filium. Nam licet humano verbo non possit divinae generationis series comprehendere, tamen judicarunt patres fidem suam tali proprie contra ἑτεροούσιον sermone signandam, auctoritatem secuti prophetae, qui ait: *Quis stetit in substantia Domini, et vidit Verbum ejus?* Secundum impietatem igitur suam positum substantiae verbum recipiunt ariani, secundum pietatem autem fidelium comprobatum repudiant et refutant.

125. Nam quid est aliud, cur ὁμοούσιον Patri nolint Filium dici, nisi quia nolunt verum Dei Filium confiteri? sicut auctor ipsorum ¹⁾ Eusebius nicomediensis epistola sua

1) *Auctor ipsorum*, quia potens arianorum pa-
Opusc. SS. Patrum, XXX.

prodidit scribens: Si verum, inquit, Dei Filium et increatum dicimus, ὁμοούσιον cum Patre incipimus confiteri. Haec cum lecta esset epistola in concilio nicaeno, hoc verbum in tractatu fidei posuerunt patres, quia id viderunt adversariis esse formidini; ut tamquam evaginato ab ipsis gladio ipsorum nefandae caput haereseos amputarent.

126. Frustra autem verbum istud propter sabellianos declinare se dicunt, et in eo suam imperitiam produnt; ὁμοούσιον enim aliud alii, non ipsum est sibi. Recte ergo ὁμοούσιον Patri Filium dicimus, quia verbo eo et personarum distinctio et naturae unitas significatur.

127. An negare possunt οὐσίαν lectam, cum et panem ἐπιούσιον Dominus dixerit (Matth. 6, 11), et Moyses scripserit (Exod. 19, 6): ὑμεῖς ἔσσεσθε μοι λαὸς περιούσιος? Aut quid est οὐσία, vel unde dicta, nisi οὐσα αἰεί, quod semper maneat ¹⁾? Qui enim est et est sem-

tronus, qui artibus fraudibusque suis multum hanc promovit haeresim.

1) Advertant maurini editores h. in l.: „Quod autem ad etymologiam, quam hic et l. de incarn. dominicae sacr. c. 9. tradit s. doctor, fatemur quidem eam dictionem simpliciter repetendam a participio οὐσα, sed in huiusmodi originibus rem ad vivum rescare velle aequo severius est.“

per, Deus est, et ideo manens semper ὁμοία dicitur divina substantia. Propterea ἐπιούσιος panis, quod ex Verbi substantia substantiam virtutis manentis cordi et animae subministret; scriptum est enim: *Et panis confirmat cor hominis* (Psal. 103, 15).

128. Servemus igitur praecepta majorum, nec hereditaria signacula ausi rudis temeritate violemus. Librum signatum illum propheticum non seniores, non potestates, non angeli, non archangeli aperire ausi sunt: soli Christo explanandi ejus praerogativa est servata (Apoc. 5). Librum sacerdotalem quis nostrum resignare audeat, signatum a confessoribus, et multorum jam martyrio consecratum? Quem qui resignare coacti sunt, postea tamen damnata fraude, signarunt ¹⁾: qui violare non ausi sunt, confessores et martyres extiterunt. Quomodo fidem eorum possumus denegare, quorum victoriam praedicamus?

CAPUT XVI.

Ut catholici contra fraudes arianorum praemuniantur, subdolas quasdam eorum confessiones exponit: nec

1) Respicit hic episcopos, qui interfuere synodo ariminensi tristis memoriae, de qua cf. supra l. 1. n. 122. Nomine autem libri sacerdotalis intelligit Ambrosius definitionem et symbolum nicaenum.

sufficere, quod Filium nonnunquam Deum vocitent, nisi eum admittant Patri aequalem, collectis argumentis probat.

129. Nemo metuat, nemo formidet: plus confert fidelibus, qui minatur. Venenatae sunt blanditiae perfidorum, tunc cavendae, cum id quod negant, praedicare se simulant. Sic decepti sunt et ante, qui facile crediderunt, ut ibi perfidiae laqueos inciderent, ubi fidem esse credebant.

130. Qui dicit, inquit, Christum creaturam secundum ceteras creaturas, anathema sit. Audierunt simplices, et crediderunt; *Innocens* enim, sicut scriptum est, *credit omni verbo* (Prov. 14, 15). Audierunt ergo et crediderunt, primo decepti sono; ac velut aves intenti ad escam fidei, extentum sibi laqueum non caverunt. Ita dum fidem sequuntur, hamum nefandae fraudis attrectaverunt. Et ideo: *Estote, inquit, astuti sicut serpentes et simplices sicut columbae* (Matth. 10, 16); praemittitur astutia, ut sit tuta simplicitas.

131. Sunt enim serpentes evangelici, qui exuunt veterem usum, ut induant novos mores, sicut scriptum est: *Exspoliantes veterem hominem cum actibus ejus, et induentes novum secundum imaginem ejus, qui creavit*

eum (Coloss. 3, 9. 10). Discamus ergo depositis vetusti hominis exuviis evangelicorum serpentium vias, ut more serpentium servare caput, fraudem cavere noscamus.

132. Satis fuerat dicere: Qui dicit creaturam Christum, anathema sit. Cur bono confessionis, ariane, venena permisces, ut totum corpus contamines? Addendo enim: Secundum ceteras creaturas, non creaturam Christum negas, sed creaturam dicis esse dissimilem; creaturam enim dicis, etsi praestantiores ceteris asseras creaturis. Denique Arius hujus impietatis magister Dei Filium creaturam dixit esse perfectam, sed non sicut ceteras creaturas. Videtis igitur hereditario patris vestri vos usos esse sermone? Sat est creaturam negare, quid opus fuit addere: Sed non sicut ceteras creaturas? Recide quod putruit, ne serpat contagio: venenum habet: mortem affert.

133. Deinde dicis interdum Deum Christum: sed ita dic Deum verum, ut plenitudinem ei paternae Divinitatis assignes; sunt enim qui dicuntur dii sive in coelo, sive in terra. Non ergo perfunctorie nuncupandus Deus, sed ita ut eandem Divinitatem praedices in Filio, quam Pater habet, sicut scriptum est: *Sicut enim Pater vitam habet in se-*

metipso, sic dedit et Filio vitam habere in semetipso (Joan. 5, 26). Dedit utique quasi Filio per generationem, non quasi inopi per gratiam.

134. *Et potestatem dedit ei iudicium facere, quia Filius hominis est* (Joan. 5, 27). Vide quid addidit, ne tu calumniēris ex verbo. Filium hominis legis, et accipientem arguis? Nega ergo Deum, si non omnia Filio quae Dei sunt, deferuntur; cum enim dixerit: *Omnia quae Pater habet, mea sunt* (Id. 16. 15); cur tu non omnia quae divinae naturae sunt, etiam in Filio confiteris? Nam qui dicit: *Omnia quae Pater habet, mea sunt*; quid excipit quod non habet?

135. Quid est quod ἐμπατικῶς, quam fidei magis sermone commemorares, quod mortuos suscitaverit, maria pedes transmiserit, infirmitates hominum curaverit? Haec enim etiam servulis suis praestitit. Plus ista miror in hominibus, quod tantam eis dederit potestatem. Aliquid de Christo audire desidero, quod speciale sit Christi, quod cum iis quae creata sunt non possit esse commune; quia genitus, quia unicus est Dei Filius, quia Deus verus ex Deo vero, quia ad dexteram Patris sedet.

136. Ubicunque lego consessum Patris et

Filii, semper ad dexteram Filius sedet. Numquid melior Filius Patre? Non hoc dicimus: sed quem caritas Dei honorat, humana iniquitas derogat. Scivit Pater serendas esse de Filio quaestiones, praeuit nobis quo sequeremur, pietatis exemplum, ne Filio derogemus.

CAPUT XVII.

Objectioni quae hic nasci poterat, occurrens, cur Dominus Stephano stare visus explicat: et ex hujus ad Filium precibus ejusdem ac Patris aequalitate confirmata, librum terminat.

137. Uno tantum loco stantem ad dexteram Dei Jesum Stephanus vidisse se dixit. Et hoc disce, ne quam hinc moveas quaestionem. Curenim ubique ad dexteram sedere ostenditur, uno legitur in loco stare? Sedet quasi iudex, vivorum et mortuorum: stat quasi advocatus suorum. Stabat ergo quasi sacerdos, quando Patri hostiam boni martyris offerebat: stabat quasi bono luctatori bravium tanti praesul certaminis redditurus.

138. Accipe et tu Spiritum Dei, ut ista distinguas, sicut accepit et Stephanus; et dicas sicut dixit et martyr: *Ecce video coelos apertos, et Filium hominis stantem ad dex-*

teram Dei (Act. 7, 55). Qui coelos apertos habet, Jesum ad dexteram Dei cernit: qui clausos oculos habet mentis, Jesum ad dexteram Dei non videt. Confiteamur ergo Jesum ad dexteram, ut coelum et nobis aperiatur. Claudunt sibi coelum, qui aliter confitentur.

139. Quod si qui objiciunt quod Filius stabat, ostendant hoc loco quod Pater sedebat. Nam licet Filium hominis stare dixerit, tamen hoc loco nec Patrem sedere commemoravit.

140. Ut autem evidentius cognosceretur nulla esse stantis injuria, sed potestas, Filium Stephanus obsecrabat, ut se amplius commendaret Patri, dicens: *Domine Jesu, recipe spiritum meum* (Act. 7, 58). Et ut eandem Patris et Filii potestatem esse ostenderet, repetivit dicens: *Domine, ne statuas illis hoc peccatum* (Ibid. 59). Hoc Dominus in passione propria quasi Filius hominis Patri dicit; hoc et Stephanus Filium Dei in suo martyrio deprecatur. Cum eadem gratia a Patre Filioque deposcitur, eadem potentia declaratur.

141. Aut si volunt Stephanum Patri dixisse, videant quid propria testificatione significant. Licet nos ista non moveant, advertant tamen qui totum in litera constituunt

et in ordine, quod Filius prius sit rogatus. Nos autem et secundum eorum interpretationem ostendimus unitatem paternae majestatis et Filii; nam cum Pater rogatur et Filius, aequalitas precationis operationis indicat unitatem. Si autem illis non placet Filio dictum *Domine*, videmus quod etiam Dominum eum negare conantur.

142. Sed jam quia martyris tanti corona processit, studia certaminis relaxemus, ferias hodierni sermonis habeamus. Prosequamur sanctum martyrem laudibus, sicut post magna decebat certamina, vulneribus quidem adversarii cruentatum, sed Christi praemiis coronatum.

LIBER IV.

CAPUT I.

Haud mirum esse quod homines in Christi cognitione erraverint, sed quod Scripturae non obtemperaverint: illum quoque nec ab angelis nisi revelatione fuisse cognitum, sicut nec ab ipso praecursore. Ejusdem Christi in coelum ascendentis triumphus qualis, et raptu prophetarum quorundam quanto praestantior. Tum descripto angelorum hac de re colloquio, contra arianos Filius omnipotens esse ostenditur.

1. Consideranti mihi, imperator Auguste, qua ratione sic erraverit genus hominum, ut de Dei Filio plerique, vae mihi ¹⁾, diversa sequerentur; nequaquam satis mirum videtur quia erravit humana scientia de supernis, sed quod Scripturis non detulit obedientiam

2. Quid enim mirum, si mysterium Dei Patris et Domini Jesu Christi, in quo sunt omnes thesauri sapientiae et scientiae absconditi (Coloss. 2, 3), per sapientiam mundi non potuerunt homines comprehendere, quod

1) *Vae mihi*, interjectio doloris propter tam multiplicem humani generis de Christo errorem.

nec angeli cognoscere nisi ex revelatione potuerunt?

3. Quis enim potuit opinione magis quam fide sequi Dominum Jesum, nunc de coeli altissimis inferna penetrantem, nunc ab inferis ad coelestia resurgentem: subito eximantem, ut habitaret in nobis; nec unquam imminutum, cum semper Filius in Patre, et in Filio Pater esset?

4. Dubitavit in eo ipse praenuncius, licet per synagogae typum ¹⁾, dubitavit ipse ante Domini faciem destinatus. Denique missis discipulis interrogat: *Tu es qui venturus es, an alium expectamus* (Matth. 11, 3)?

5. Obstupuerunt et angeli coeleste mysterium. Unde cum resurgeret Dominus, atque illum, quem dudum secundum carnem angustus sepulcri locus texerat, resurgentem ab inferis coeli alta sustinere non possent, praeserunt etiam coelestia opinionis incerto.

6. Veniebat enim novis victor redimitus

1) *Per synagogae typum* i. e. in quantum synagogae figura erat, ejus personam repraesentabat: in quantum autem Christi praecursor, non cadebat in aalem prophetam tanti erroris suspicio, ut ipse Ambrosius tradit l. 5. in Luc. n. 93., ubi fusius haec prosequitur. Edit. maurini. In sequentibus respicit ad Psalmum 23, 7. Cf. infra n. 9.

exuviis, Dominus in templo sancto suo; praeibant angeli et archangeli, mirantes spoliū ex morte quaesitum: et quamvis scirent nihil Deo accedere ex carne potuisse, quia infra Deum omnia sunt, tamen trophaea crucis, cujus principium super humeros ejus, et triumphatoris aeterni manubias intuentes, quasi eum quem emiserant coeli portae, capere non possent, licet nunquam ejus capiant majestatem, majorem viam quaerebant aliquam revertenti: adeo nihil exinanitus amiserat!

7. Debit tamen novo victori novum iter parari; semper enim victor tamquam major et praecelsior est: sed quia aeternae sunt justitiae portae, eademque novi et veteris Testamenti, quibus coelum aperitur, non mutantur utique, sed elevantur; quia non unus homo, sed totus in omnium Redemptore mundus intrabat.

8. Translatus erat Enoch, raptus Elias: sed non est servus supra Dominum. *Nullus enim ascendit in coelum, nisi qui descendit de coelo* (Joan. 3, 13). Nam et Moysen, licet corpus ejus non apparuerit in terris (Deut. 34, 6), nusquam tamen in gloria coelesti legimus, nisi posteaquam Dominus resurrectionis suae pignore vincula solvit inferni et

piorum animas elevavit ¹⁾. Translatus ergo Enoch, raptus Elias; ambo famuli, ambo cum corpore; sed non post resurrectionem, non cum manubiis mortis et triumpho crucis viderant illos angeli.

9. Et ideo Dominum omnium primum ac solum de morte triumphantem venire cernentes, tolli portas principibus imperabant, cum admiratione dicentes: *Tollite portas, principes vestri* ²⁾; *et elevamini, portae aeternales: et introbit Rex gloriae* (Psal. 23, 7).

10. Erant tamen adhuc et in coelestibus qui stuperent, qui admirarentur novam pompam, novam gloriam; et ideo requirebant: *Quis est iste Rex gloriae* (Ibid. 8)? Sed quia et angeli processus habent scientiae et capacitatem profectus, habent utique discretionem virtutis atque prudentiae: solus enim sine processu Deus, quia in omni perfectione semper aeternus est.

11. Dicebant alii, illi utique qui affuerant

1) Ergo animae justorum, ut ad gloriam admittantur coelestem, exspectare non debent corporum resurrectionem atque iudicium universale, qui tamen error a nonnullis etiam s. Ambrosio tribuitur.

2) *Principes vestri* οἱ ἄρχοντες ὑμῶν, qui sunt principes inter vos.

resurgenti, illi qui viderant vel jam cognoverant: *Dominus fortis et potens, Dominus potens in praelio.*

12. Iterum multitudo angelorum triumphali agmine praecinebant: *Tollite portas, principes vestri, et elevamini, portae aeternales: et introibit Rex gloriae.*

13. Rursus alii stupentes dicebant: *Quis est iste Rex gloriae? Vidimus eum non habentem speciem neque decorem* (Isai. 53, 2): si ergo ipse non est, *quis est iste Rex gloriae?*

14. Respondetur a scientibus: *Dominus virtutum, ipse est Rex gloriae.* Ergo Dominus virtutum ipse est Filius. Et quomodo infirmum ariani dicunt, quem Dominum virtutum, sicut et Patrem, credimus? Quomodo ariani discretionem faciunt potestatis, cum Dominum sabaoth Patrem, Dominum sabaoth Filium legerimus? Nam et hic sic positum plerique codices habent, quod *Dominus sabaoth ipse sit rex gloriae*: sabaoth autem interpretes alicubi Dominum virtutum, alicubi regem, alicubi omnipotentem interpretati sunt. Ergo quoniam qui ascendit Filius est: qui ascendit autem Dominus est sabaoth, omnipotens utique Dei Filius est.

CAPUT II.

In coelum sine fide ascensurum neminem, vel si quis ascenderit, ejiciendum: illam itaque sedulo conservari debere. Esse etiam in nobis coelos, quorum portae aperiendae, ac per Christi Divinitatis confessionem elevandae sunt. Has ab arianis non elevari, nec ab iis qui requirunt Filium inter terrena; proindeque illos cum Magdalena remittendos ad apostolos, in quos portae inferi non praevallebunt. Colligitur ex dictis a servo Domini dignitati non derogandum.

15. Quid igitur agemus? Quomodo ascendemus ad coelum? Sunt illic dispositae potestates, ordinati principes, qui coeli januas servant, qui ascendentem interrogant: quis me admittet, nisi omnipotentem annunciem Christum? Clausae sunt portae, non cuicunque aperiuntur: non quicumque vult, nisi qui fideliter credit, ingredietur. Custoditur aula imperialis.

16. Sed esto, indignus obrepserit, latuerit principes portarum coelestium, discubuerit in coena Domini; ingressus Dominus convivii, videns non indutum nuptiale fidei vestimentum, projiciet eum in tenebras exteriores, ubi sit fletus et stridor dentium (Matth. 22, 11. et seqq.), si fidem pacemque non servet.

17. Servemus igitur nuptiale quod accepimus vestimentum, nec Christo propria denegemus, quem omnipotentem annunciant angeli, prophetae significant, apostoli testificantur, sicut jam supra ostendimus (Sup. lib. 2. cap. 4).

18. Et fortasse non de istius tantummodo coeli portis propheta dixerit, quod praeteribit; et alios enim coelos Dei Verbum penetrat, de quibus dictum est: *Habemus enim sacerdotem magnum, principem sacerdotum, qui pertransivit coelos, Jesum Filium Dei* (Hebr. 4, 14). Qui sunt isti coeli, nisi et hi de quibus dicit propheta: *Coeli enarrant gloriam Dei* (Psal. 18, 2)?

19. Stat enim Christus ad januam mentis tuae, audieum dicentem: *Ecce sto ad januam et pulso; si quis mihi aperuerit, ingrediar ad illum: et coenabo cum eo, et ipse mecum* (Apoc 3, 20). Et Ecclesia de eo dicit: *Vox fratris mei pulsat ad januam* (Cant. 5, 2).

20. Stat ergo, et non solus stat; sed praecedunt eum angeli, qui dicunt: *Tollite portas, principes vestri* (Psal. 23, 7). Quas portas? Illas utique de quibus et alibi dicit: *Aperite mihi portas justitiae* (Psal. 117, 19). Aperi ergo Christo portas tuas, ut in-

grediatur in te: aperi portas justitiae, aperi portas pudicitiae, aperi portas fortitudinis atque sapientiae.

21. Crede angelis dicentibus: *Et elevamini, portae aeternales, et introibit Rex gloriae, Dominus sabaoth.* Porta tua vocis fidelis canora confessio est: porta tua ostium verbi est, quam sibi Apostolus optat aperiri dicens: *Ut aperiatur mihi ostium verbi ad eloquendum mysterium Christi* (Coloss. 4, 3).

22. Aperiatur igitur Christo porta tua, nec solum aperiatur, sed etiam elevetur; si tamen aeternalis est, non caduca; scriptum est enim: *Et elevamini, portae aeternales.* Elevatum est superlimen Isaiae, quando Seraphim labia ejus tetigit, et vidit regem Dominum sabaoth (Isai. 6, 7).

23. Tuae ergo portae elevabuntur, si sempiternum, si omnipotentem, si inaestimabilem, si incomprehensibilem, si eum qui et praeterita omnia et futura noverit, Filium Dei credas. Quod si praefinitae potestatis et scientiae subjectumque opinaris, non elevas portas aeternales.

24. Eleventur ergo portae tuae, ut non ariano sensu parvulus, non pusillus, non subditus ad te Christus introeat: sed intret in Dei forma, intret cum Patre, intret talis,

qualis est et coelum et omnia supergressus, emittat tibi Spiritum sanctum. Expedit tibi ut credas, quia ascendit et sedet ad dexteram Patris. Nam si eum inter creaturas et terrena impia cogitatione detineas, si non tibi abeat, non tibi ascendat, nec Paracletus ad te veniet, sicut ipse dixit: *Nam si ego non abiero, Paracletus non veniet ad vos: si autem abiero, mittam illum ad vos* (Joan. 16, 7).

25. Quod si inter terrena eum requiras, sicut Maria Magdalene requirebat, cave ne et tibi dicat: *Noli me tangere; nondum enim ascendi ad Patrem meum* (Id. 20, 17). Portae enim tuae angustae sunt, capere me non queunt: elevari non queunt, intrare non possum.

26. Vade ergo ad fratres meos, hoc est, ad illas portas aeternales, quae cum Jesum viderint, elevantur. Aeternalis porta est Petrus, cui portae inferi non praevallebunt (Matth. 16, 18). Aeternales portae Joannes et Jacobus, utpote filii tonitruui (Marc. 3, 17). Aeternales portae sunt Ecclesiae, ubi laudes Christi annunciare propheta desiderans, dicit: *Ut annunciem omnes laudationes tuas in portis filiae Sion* (Psal. 9, 15).

27. Grande ergo mysterium Christi, quod stupuerunt et angeli; et ideo venerari debes,

et Domino famulus derogare non debes. Ignorare non licet, propterea enim descendit ut credas; si non credis, non descendit tibi, non tibi passus est. *Si non venissem, inquit, et locutus non fuisset his, peccatum non haberent: nunc autem excusationem non habent de peccato suo. Qui me odit, et Patrem meum odit* (Joan. 15, 22. et 23). Quis igitur odit Christum, nisi qui derogat? Sicut enim amoris est deferre, ita odii est derogare. Qui odit, quaestiones movet; qui amat, reverentiam defert.

CAPUT III.

Verba illa: *Omnis viri caput Christus caput autem Christi Deus*, primo in arianos ipsos retorquet: deinde Christi tantum secundum naturam humanam considerati Deum caput esse ex alio Scripturae loco, quem objicere solebant iidem haeretici, probat: nec prudentius quoque oppositum ab ipsis textum illum: *Qui autem plantat et qui rigat unum sunt*. Quibus explicatis, quo pacto Pater in Filio, et Filius in Patre, nec non in utroque fideles esse dicantur, aperitur.

28. (*Al. cap. II.*) Itaque discutiamus eorum alias quaestiones. Scriptum est, inquit: *Omnis viri caput Christus est, caput autem mulieris vir, caput autem Christi Deus* (1. Cor. 11, 3). Qua in quaestione di-

cant mihi, velim, utrum conjungere, an dividere haec quatuor velint. Si enim conjungere, atque ita dicunt Deum caput esse Christi, sicut vir est mulieris caput, videte quid incidant. Nam si haec tamquam ex paribus sumpta est comparatio, et haec quatuor, id est, mulier, vir, Christus et Deus, quasi ex unius atque ejusdem naturae similitudine comparantur: ergo mulier et Deus unius incipient esse naturae.

29. Quod si hoc displicet, quia sacrilegum est dicere, ut volunt dividant. Itaque si Christum apud Deum Patrem ita volunt esse, sicut est mulier apud virum; unius utique Christum et Deum dicunt esse substantiae, quoniam mulier et vir unius sunt in carne naturae (Gen. 2, 24); nam quod distat, in sexu est. Cum vero inter Christum et Patrem sexus non interveniat, quod unum inter Filium et Patrem in natura est, fatebuntur: quod diversum in sexu est, denegabunt.

30. Placetne ista divisio? An mulierem, virum et Christum unius volunt esse substantiae, et Patrem separant? Haecne igitur divisio placet? Si ita est, videte quid incidant. Aut enim non solum arianos, sed etiam photinianos se necesse est confiteantur; quia Christum hominem tantum faten-

tur, quem humanae tantummodo naturae aestimant copulandum: aut vel invitos acquiescere par est nostrae sententiae, per quam id quod impie cogitarunt, pie religioseque defendimus; ut sit Christus quidem secundum generationem divinam Dei virtus, secundum assumptionem autem carnis, unius cum omnibus hominibus in carne substantiae, salva tamen incarnationis suae gloria; quia veritatem suscepit, non imaginem carnis.

31. Sit ergo juxta humanam conditionem caput Christi Deus; non enim dixit caput Christi Pater, sed *caput Christi Deus*; quia Divinitas, utpote creatrix, caput est creaturae. Et bene dixit: caput Christi Deus; ut et Divinitatem Christi significaret, et carnem, hoc est, incarnationem in Christi nomine: in Deo autem unitatem Divinitatis et magnitudinem potestatis.

32. Eo usque autem caput Christi Deus secundum incarnationem dictum est, ut et caput viri Christus secundum incarnationem Verbi dictum sit. Quod alibi Apostolus evidenter exposuit dicens: *Quoniam vir caput est mulieris, sicut et Christus caput Ecclesiae* (Ephes. 5, 23). Et in consequentibus addidit: *Qui se tradidit pro ea* (Ibid. 25). Secundum incarnationem igitur caput viri

Christus; quia secundum incarnationem facta traditio est.

33. Est ergo caput Christi Deus; ubi servi, hoc est, hominis, non Dei forma tractatur. Sed nihil praejudicat Dei Filio, si secundum carnis veritatem similis sit hominibus, qui in Divinitate cum Patre unum est; non enim potestas hac interpretatione minuitur, sed misericordia praedicatur.

34. Quis autem unam Divinitatem Patris et Filii pie abneget, cum ipse Dominus consummaturus praecepta discipulis suis dixerit: *Ut sint unum, sicut et nos unum sumus* (Joan. 17, 11)? Pro testimonio enim fidei positum est, licet ab arianis ad argumentum perfidiae derivetur. Etenim quoniam toties lectam negare non queunt unitatem, extenuare conantur; ut talis videatur Divinitatis unitas inter Patrem et Filium, qualis est inter homines unitas devotionis et fidei: licet etiam inter ipsos homines unitas naturae sit ex communitate naturae.

35. Unde et illud apertissime solvitur, quod ad extenuationem dominicae unitatis objicere consuerunt, quia scriptum est: *Qui autem plantat et qui rigat, unum sunt* (1. Cor. 3, 8). Hoc ariani, si saperent, non objicerent. Quomodo enim negare conantur quia

Pater et Filius unum sunt, cum Paulus et Apollo et natura unum sint et fide? Sed tamen per omnia unum esse non possunt, quia nequeunt comparari humana divinis.

36. Inseparabilis ergo Deus Pater Verbo, inseparabilis virtute, inseparabilis sapientia per divinae unitatem substantiae; et est in Filio, sicut frequenter est scriptum: est vero non ut egentem sanctificans, nec ut vacuum implens, quia non vacua Dei virtus. Nec enim virtus virtute augetur, quia non duae virtutes, sed una virtus: nec Divinitas Divinitatem accipit, quia non duae Divinitates, sed una Divinitas: nos autem per acceptam et inhabitantem in nobis virtutem unum erimus in Christo.

37. Communis ergo litera, sed discrepans divina humanaque substantia. Nos unum erimus, Pater et Filius unum sunt: nos secundum gratiam, Filius secundum substantiam. Alia autem per conjunctionem, alia per naturam unitas. Denique vide quid ante prae-miserit: *Ut omnes unum sint, sicut tu, Pater, in me, et ego in te* (Joan. 17, 21).

38. Considera ergo quia non dixit: Tu in nobis, et nos in te: sed *tu in me, et ego in te*; ut se a creaturis separaret. Et addidit: *Et isti in nobis* (Ibid.), ut etiam hic suam

potentiam et Patris a nobis secerneret; ut quod nos in Patre et Filio unum sumus, non naturae videatur esse, sed gratiae: quod autem Filius et Pater unum sunt, non hoc Filius accepisse per gratiam, sed naturaliter ut Filius possidere credatur.

CAPUT IV.

Objectum ab haereticis locum illum: *Non potest Filius facere a se quidquam* etc. primo e subsequentibus verbis exponit: deinde singulas integri textus voces expendens, eas ariana interpretatione sumi sine impietate aut absurditate haudquaquam posse potissimum creationis mundi et quorundam Christi miraculorum exemplis docet.

39. (Al. cap. III.) Aliud rursus objiciunt, asserentes unam atque eandem potestatem Filii et Patris esse non posse, quia ipse dixit: *Amen, amen dico vobis, non potest Filius facere a se quidquam, nisi quod viderit Patrem facientem* (Joan. 5, 19). Itaque nihil ex se fecisse Filium dicunt, nec facere posse, nisi quod viderit facientem Patrem.

40. O praescia sapientia infidelium argumentorum! quae subjecit quod solveret quaestionem, addendo quod sequitur: *Quia quaecunque ille fecerit, eadem et Filius facit similiter* (Ibid.); hoc nempe sequitur. Cur

ergo scriptum est: Eadem facit Filius, et non talia ¹⁾; nisi ut in Filio unitatem, non imitationem paterni operis aestimares?

41. Sed tamen ut illorum quoque argumenta discutiamus, quaero ut respondeant, utrum videat Filius opera Patris. Videt itaque, annon? Si videt, ergo et facit: si facit, desinant omnipotentem negare, quem omnia posse facere quae Patrem facientem viderit, confitentur.

42. Quid est autem, *viderit*? Corporaliumne aliquis usus oculorum est? Sed si hoc de Filio velint dicere, corporalis etiam in Patre usum operationis ostendent, ut facientem videat, quod ipse facturus est.

43. Quid est autem: *Non potest Filius facere a se quidquam*? Hoc interrogemus, hoc consideremus. Est ergo aliquid impossibile Dei virtuti atque sapientiae? Hoc est enim Dei Filius, qui utique non alienam accipit fortitudinem: sed quemadmodum vita est, non aliena vivificatione subnixus, sed alios vivificans; quia ipse vita est: ita etiam sapientia est, non quasi insipiens accipiens

1) Mss. aliquot *et non alia*; reliqui et editi omnes, *et non talia*; rectius; eadem quippe facere aequalitatis est; talia i. e. similia, imitationis.

sapientiam, sed qui de suo alios faciat esse sapientes: ita etiam virtus est, non quasi per infirmitatem consecutus incrementa virtutis, sed ipse virtus, qui virtutem fortibus largiatur.

44. Quomodo ergo virtus quasi cum iurjurandi attestatione dicit: *Amen, amen dico vobis* (Joan. 5, 19), quod est *fideliter*, fideliter dico? Fideliter ergo dicis, Domine Jesu, et cum sacramenti quadam repetitione confirmas, quod nihil facere potes, nisi quod facientem Patrem videris. Fecisti mundum, numquid alterum mundum Pater tuus fecit, quem quasi ad exemplar acceperis? Ergo necesse est fateantur impii aut duos, aut certe multos esse mundos, quod philosophi asserunt; ut se etiam in hoc errore gentilitatis involvant. Aut si velint verum sequi dicant sine exemplari te fecisse, quod feceris.

45. Dic mihi, Domine, quando in mari Patrem incarnatum videris ambulantem (Marc. 6, 48). Ego enim nescio, ego hoc de Patre credere sacrilegum puto, qui te solum carnem assumpsisse cognovi. Quando videris in nuptiis Patrem aquam in vina vertentem (Joan. 2, 9). Sed solum te unigenitum Filium legi ex Patre natum, solum te ex Spiritu sancto accepi et Virgine secundum incar-

nationis sacramenta generatum (Matth. 1, 25). Ergo ista, quae memoravimus a te gesta, non fecit Pater: sed sine exemplari paterni operis ad redimendam tuo sanguine salutem mundi solus immaculatus ex alvo Virginis processisti.

46. An ne forte incarnationis tantummodo putent sequestrandum esse mysterium (licet cum dicunt: *Non potest Filius a se facere quidquam* (Joan. 5, 19), nihil excipiant, ita ut et quidam impius dixerit: Nec culicem facere potest; tam temerario ausu petulantique sermone majestatem supernae virtutis irridens), dic, Domine Jesu, quam terram sine te Pater fecerit? Coelum enim sine te non fecit, quia scriptum est: *Verbo Domini coeli firmati sunt* (Psal. 32, 6).

47. Sed nec terram sine te fecit, quia scriptum est: *Omnia per ipsum facta sunt, et sine ipso factum est nihil* (Joan. 1, 3). Nam si aliquid sine te Deo Verbo Pater fecit, non ergo omnia facta per Verbum, et evangelista mentitur. Quod si omnia facta per Verbum, et omnia per te coeperunt esse, quae non erant; utique quae non vidisti a Patre facta, a te ipse fecisti. Nisi forte philosophicas tibi ideas Platonica illa disputatione praestituunt, quas ab ipsis tamen philosophis scimus irrisas.

Si autem ex te ipse fecisti, vana est assertio perfidorum, quae auctori omnium, cui suppetit ex se faciendi magisterium, tribuit discendi profectum.

48. Quod si per te negant coelum esse factum, vel terram, considerent impii, quo se suo furore praecipitent, cum scriptum sit: *Dii qui non fecerunt coelum et terram, pereant* (Jerem. 10, 11). Peribit ergo, ariane, qui quod perierat, et reperit et redemit? Sed ad proposita revertamur.

CAPUT V.

Coeptam objecti loci expositionem urgens, rationes quatuor quibus aliquid fieri non posse affirmamus, explicat, et earum primas tres in Christum non cadere, solutis quibusdam objectiunculis, demonstrat; et Filium propter solam potestatis cum Patre unitatem nihil a se facere posse deducit.

49. *Quomodo non potest Filius facere a se quidquam?* Quaeramus quid sit quod facere non possit. Multae sunt impossibilitatum differentiae. Est aliquid natura impossibile, et est aliquid quod est possibile per naturam, impossibile per infirmitatem. Est etiam tertium quod sit possibile per corporis et animi firmitatem: impossibile per imperitiam aut impotentiam. Est etiam quod per definitio-

nem immutabilis propositi, et constantis perseverantiam voluntatis atque amicitiae fidem sit impossibile mutari.

50. Sed haec ut evidentius possimus advertere, per exempla nobis disputatio dirigatur. Impossibile est ut avis sapientiae disciplinam aliquam assequatur aut artem: impossibile est et lapidem prodire quoquam; impossibile est enim lapidem moveri, nisi motu moveatur alterius: non potest ergo lapis per se ipsum moveri, et transire de loco. Non potest etiam aquila humanis imbui disciplinis. Habes unam speciem, cui impossibilitatis causa natura est.

51. Impossibile est et debili facere opera robusti: sed huic alia impossibilitatis causa est; quod enim facere potest per naturam, per infirmitatem non potest. Causa igitur huic quoque impossibilitati infirmitas. Alia ergo impossibilitatis haec species; quoniam a faciendi possibilitate corporis infirmitate revocatur.

52. Tertia quoque impossibilitatis est causa, qua etiamsi per naturam quis et firmitatem corporis facere aliquid possit, non potest tamen facere per imperitiam vel impotentiam, ut aut indoctus aut servus.

53. Quas igitur harum, quas enumeravi-

mus, impossibilitatum causas, ut quartam interim sequestremus, Filio Dei existimas convenire? Numquid insensibilis per naturam et immobilis, sicut lapis? Lapis quidem est impiis in ruinam, fidelibus angularis (1. Petr. 2, 7). Sed non insensibilis, supra quem sensibilibus populorum fideles aedificantur affectus. Non immobilis petra: *Bibebant enim ex consequenti petra; petra autem erat Christus* (1. Cor. 10, 4). Non ergo paternum opus per naturae distantiam impossibile Christo.

54. Numquid forte per debilitatem impossibile ei aliquid existimamus? Sed non ille debilis, qui aliorum debilitates imperiali sermone sanabat. An debilis videbatur, cum paralytico praecipiens: *Tolle grabatum tuum, et ambula* (Marc. 2, 11), sanitatis jam mandabat officium, cum adhuc ille remedium debilitatis oraret? Non debilis Dominus virtutum, cum illuminaret coecos (Psal. 145, 8.), inclinatos erigeret, mortuos suscitaret (Matth. 11, 5), votis nostris medicinae praecurreret effectus, orantes curaret, et fimbriae munderet attactus (Marc. 6, 56).

55. Nisi forte debilitatem illam, impii, putabatis, quando vulnera videbatis. Erant quidem illa corporis vulnera, sed non erat vulneris illius ulla debilitas, ex quo

omnium vita profluebat. Unde et propheta dixit: *Livore ejus nos sanati sumus* (Isai. 53, 5). An qui in vulnere debilis non erat, erat in majestate? Quomodo quaero. Cum daemoniis imperaret, et reis peccata dimitteret (Luc. 5, 20); an cum rogaret Patrem?

56. Quo loco fortasse dicant: Quomodo Pater et Filius unum sunt, si Filius nunc imperat, nunc precatur? Et unum sunt, et imperat et precatur: sed neque cum imperat, solus; nec cum precatur, infirmus. Solus non est, quia quaecunque Pater facit, eadem similiter et Filius facit (Joan. 5, 19): infirmus non est, quia etsi in carne infirmatus est propter peccata nostra, tamen illud nostrae erat in eo pacis eruditio, sicut scriptum est (Isai. 53, 5), non sua majestatis infirmitas.

57. Denique ut scias quia secundum hominem rogat, Divinitate imperat, habes in Evangelio, quia Petro dixit: *Rogavi pro te, ut non deficiat fides tua* (Luc. 22, 32). Eisdem autem supra dicenti: *Tu es Christus Filius Dei vivi*, respondit: *Tu es Petrus, et super hanc petram aedificabo Ecclesiam meam, et tibi dabo claves regni coelorum* (Matth. 16, 18). Ergo cui propria auctoritate regnum dabat, hujus fidem firmare non po-

terat, quem cum petram dicit, firmamentum Ecclesiae indicavit ¹⁾? Quomodo igitur roget,

1) Ergo Petrus Ecclesiae fundamentum et hinc Ecclesiae firmamentum est, de quo commentario cf. quae annotavimus opusc. 14, 18., quo l. ostendimus, quam antiquus, quam vulgatus, quam solemnus sit hic commentarius, ac proinde quam authenticus. Jam licet testimonia quaedam addere ad assertionem confirmandam. Reperitur nimirum commentarius ille in ep. Pseudo-Clementis ad Jacobum n. 1., ubi ille ita scribit: „Notum tibi sit, domine mi, quod Simon, qui propter veram fidem et firmissimam doctrinae suae basim Ecclesiae fundamentum esse definitus est, atque ob id ab ipso Jesu ore non fallaci transnominatus est Petrus etc. praesentem vitam per vim cum morte commutavit.“ In breviario gothico passim hanc reperimus interpretationem. Die 22. Febr. incipit hymnus ad Vesperas: „Petre, petra Ecclesiae;“ et ad benedictionem haec dicitur oratio: „Christus Dei Filius, qui in bb. Petro apostolo suo primam fundavit Ecclesiam, fundatos vos in se sine macula et ruga possideat.“ Sed praeclarissima sunt Rabani Mauri verba l. 5. in Matth. 16, 23: „Prudens lector inquirat, quomodo post tantam beatitudinem: *Beatus es Simon Barjona* etc., nunc autem: *Vade retro me satana, scandalum mihi es*; aut quae sit tam repentina conversio, ut post tanta praemia satanas retro dicatur. Sed consideret qui hoc quaerit, illam benedictionem ac beatitudinem ac potestatem et aedificationem super eum Ecclesiae in futuro promissam, non in praesenti datam. *Aedificabo*, inquit, super te Ecclesiam, et portae inferi non *praevallebunt* adversus eam, et tibi *dabo* claves regni coelorum. Omnia de futuro: quae si

quando imperet, considera. Rogat, quando passurus ostenditur: imperat, quando Filius Dei creditur.

58. Duas igitur species impossibilitatis vacare jam cernimus, quod neque insensibilis, neque infirma potest esse Dei virtus. Numquid tertium profertis in medium, quod quasi imperitus sine magistro facere nihil possit, aut servus sine domino? Ergo mentitus es, Domine Jesu, quod te et magistrum, et Dominum ipse dixisti; et fefellisti discipulos tuos dicens: *Vos vocatis me magistrum et Dominum, et bene dicitis, sum etenim* (Joan. 13, 13). Sed non falleres, Veritas, eos praeertim, quos amicos vocasti.

59. Tamen si ut imperitum te ab artifice secernunt, viderint ut tibi, hoc est, Dei sapientiae dicant peritiam defuisse; unitatem tamen substantiae inter te et Patrem separare non possunt. Artificem namque ab imperito imprudentia, non natura secernit: sed non in Patre artificium, neque in te insipientia; non est enim insipiens sapientia.

60. Ergo si neque insensibilis in Filio natura, neque debilitas, neque imperitia, neque

statim dedisset, nunquam in eo pravae confessionis error inveniret locum." Notetur haec illatio!

servitus potest esse; considerent quod et per naturam et majestatem unum sit cum Patre Filius, et per operationem non discrepet a Patre virtus; cum omnia quae Pater fecerit, eadem Filius faciat similiter: neque enim similiter potest quisquam facere idem opus, quod alius fecerit, nisi qui et inaequalitatem non habeat operationis, et naturae ejusdem habeat unitatem.

61. Adhuc tamen requiro, quid sit quod non possit facere a se Filius, nisi viderit facientem Patrem; et insipienter aliqua de vilioribus exempla propono: *Factus sum insipiens, vos me coëgistis.* (2. Cor. 12, 11). Nam quid insipientius, quam de majestate Dei argumenta discutere, *quae quaestiones magis praestant, quam aedificationem Dei, quae est in fide* (1. Tim. 1, 4. 5)? Sed argumentis argumenta respondeant: illis verba, nobis caritas, quae in Deo est, *de corde puro et conscientia bona et fide non ficta.* Ergo ad infirmationem tam ineptae propositionis non piget etiam ridicula derivare.

62. Quomodo ergo videt Filius Patrem? Videt equus picturam, quam per naturam imitari non potest: non utique sic videt Filius. Videt parvulus viri opera majoris, sed

imitari non potest: nec utique sic videt Dei Filius.

63. Ergo si Filius per ejusdem cum Patre arcanum commune naturae invisibiliter et videre et facere potest ¹⁾, et per plenitudinem

1) Videt Filius Patrem facientem et eatenus facere aliquid potest, quatenus unam eandemque vi generationis cum Patre possidet naturam et operationem „per ejusdem cum Patre arcanum commune naturae.“ Juverit hic verba Petavii adduxisse, qui paucis complectitur, quae patres occasione hujus loci disputant. „Patrem indicare Filio, inquit ipse de Trinit. l. 2. c. 4. n. 6, vel eum docere quid faciendum sit, et quasi monstrando praeire, nihil aliud est, nisi eidem una cum natura et essentia rerum faciendarum intelligentiam et earum formas atque ideas communicare gignendo. Basilii (de Spir. s. c. 8.) quoque similiter ac Gregorius exponit, quod jubere Pater atque imperare Filio dicitur, non esse Domini vocem servo aliquid imperantis, sed ut Deo dignum est voluntatis trajectionem velut formae cujusdam expressionem in speculo, a Patre in Filium sine tempore dimanantem. Sic auctor breviiarii (fidei adv. arianos) paulo ante laudatus: „Nec enim sic docuit, quasi indoctum genuerit, sed hoc est eum genuisse, quod est doctum et scientem genuisse.“ Quamobrem visio Filii vel auditio est generatione ipsa divina communicata substantia. „Nam non alia visio ejus et alia substantia“, ait Augustinus tr. 20. in Joan. Qui et in 2. l. de Trinit. hanc in istis et similibus loquendi formis posuit regulam, ut non inaequalitas sed nativitas Filii ostendi credatur. Et ita videt Filius

Divinitatis quod voluerit exsequi: quid superest, nisi ut per unitatem inseparabilem potestatis nihil credamus Filium facere, nisi quod viderit Patrem facientem; quia per incomparabilem caritatem nihil a se facit Filius, quoniam nihil vult, quod Pater nolit? Quod utique non infirmitatis, sed unitatis est.

CAPUT VI.

Accedit ad quartam e rationibus supra memoratis et Filium nihil facere quod non probetur a Patre, cum sit utriusque perfecta voluntatis atque potestatis unitas, liquido probans, nonnullas difficultates subinde tollit.

64. Ergo nec contumax Filius, ut etiam de quarta propositione dicamus; nihil enim consiliarius Filius fecit, quod cum Patris non conveniat voluntate. Denique vidit Pater quae fecit Filius, et probavit quia bona valde; sic enim habes in Genesi: *Et dixit Deus: Fiat lux, et facta est lux; et vidit Deus lucem, quia bona est* (Gen. 1, 3, 4).

Patrem, ut quo eum videt, hoc ipso sit Filius. Non enim aliud illi est esse de Patre i. e. nasci de Patre, quam videre Patrem; aut aliud videre operantem, quam pariter operari, sed ideo non a se, quia non est a se.⁶ Hactenus e Petavio, qui tamen mallet haec verba Joan. 5, 19. ad humanam Christi naturam referre.

65. Numquid hic dixit Pater: Fiat talis lux, qualem ipse feci; aut fiat lux quae ante non fuerat: aut Filius qualem faceret, interrogavit? Sed fecit, ut voluit, qualem Pater usque eo voluit, ut probaret. Ergo novum opus Filii est.

66. Deinde si reprehenditur in Filio secundum interpretationes arianorum, quia quod viderit, fecit, qui utique secundum Scripturas quod non vidit, et fecit, et dedit esse quae non erant: quid dicunt de Patre, qui quod viderat praedicavit ¹⁾, quasi ea quae facienda forent, non potuerit praevidere.

67. Similiter ergo videt Filius Patris opus, sicut Pater opus Filii: nec quasi alienum laudat, sed quasi proprium recognoscit: *Quaecunque enim Pater fecerit, eadem Filius facit similiter* (Joan. 5, 19); ut idem opus Patris Filiique sentiret. Nihil ergo facit Filius, nisi quod Pater probet, Pater laudet, Pater velit, quia ex Patre totus est: non ut creatura, quae multa committit, dum studio lapsuque peccati voluntatem frequenter offendit auctoris. Nihil ergo Filius facit, nisi quod

1) *Quod viderat* scil. lucem et reliqua, quae fecit Filius Gen. 1., *praedicavit*, laudavit, postquam facta coram ipso extiterunt, quasi non praeviderit, qualia illa Filii opera essent futura.

placeat Patri, quia una voluntas, una sententia est, una est vera caritas, unius operationis effectus.

68. Denique ut scias caritatis esse, quod *non potest Filius a se facere quidquam, nisi quod viderit facientem Patrem*, cum praemisisset: *Quaecunque ille fecerit, eadem et Filius facit similiter*, subiecit: *Pater enim diligit Filium*. Ergo quod dixit Scriptura quia *non potest*, ad inseparabilis et individuae caritatis retulit unitatem.

69. Quod si naturaliter ¹⁾ est, ut vere est, inseparabilis caritas, inseparabilis utique est etiam operatio naturaliter: et impossibile ut opus Filii cum Patris non conveniat voluntate, quando id quod Filius operatur, operatur et Pater: et quod Pater operatur, operatur et Filius: et quod loquitur Filius, loquitur et Pater, sicut scriptum est: *Pater meus qui in me manet ipse loquitur; et opera quae ego facio, ipse facit* (Joan. 14, 10). Nihil enim Pater sine virtute atque sapientia sua condidit; quia omnia in sapientia fecit, sicut scriptum est: *Omnia in sapientia fe-*

1) *Naturaliter* scil. propter naturae identitatem, huic enim innititur caritatis inseparabilitas, de qua hic loquitur.

cisti (Psal. 103, 24). Nihil etiam Deus Verbum sine Patre fecit.

70. Non operatur sine Patre, non sine patria voluntate sacrosanctae illi se obtulit salutaris mundi totius hostia passioni (Hebr. 10, 10), non sine patria voluntate mortuos suscitavit. Denique Lazarum suscitaturus levavit oculos sursum, et dixit: *Pater, gratias ago tibi, quia audisti me: et ego sciebam, quia semper me audis: sed propter turbam quae circumstat, dixi; ut credant quia tu me misisti*: ut quamvis ex personae hominis incarnati susceptione loqueretur, unitatem tamen paternae voluntatis et operationis exprimeret; quia Pater omnia audit, omnia videt quae vult Filius. Videt ergo et Pater facientem Filium, audit volentem. Denique non rogavit, et exauditum se esse dixit.

71. Nec existimari potest, quia non audit Pater, quod velit Filius: et ut scias, quia semper auditur a Patre, non quasi servus, nec quasi propheta, sed quasi Filius: *Et ego, inquit, sciebam quia semper me audis: sed propter turbam quae circumstat dixi; ut credant quia tu me misisti* (Joan 11, 41).

72. Propter nos igitur gratias agit; ne eundem Patrem, eundemque Filium esse credamus, cum idem opus Patris audimus

et Filii. Nam ut cognosceres non quasi infirmum gratias egisse, sed quasi Dei Filium semper sibi divinam potentiam vindicare, clamavit: *Lazare, veni foras*. Imperantis utique vox ista est, non precantis.

CAPUT VII.

Proposita doctrina hinc confirmatur, quod Filius sit Patris Verbum, non quale nostrum, sed vivum et operatorium; atque adeo non possit negari ejusdem cum Patre voluntatis, potestatis ac substantiae.

73. Sed ut ad superiora redeamus et proposita concludamus, facit quasi Verbum Filius voluntatem Patris. Verbum hoc nostrum utique prolativum est, syllabae sunt, sonus est; et tamen a sensu nostro et mente non discrepat, et quae interiori tenemus affectu, ea tamquam operantis verbi testificatione signamus. Sed non sermo noster operatur, solum est Verbum Dei, quod nec prolativum est, nec quod ἐνδιόθετον dicunt; sed quod operatur et vivit et sanat ¹⁾.

74. Vis scire quale Verbum? Audi dicentem: *Vivum est enim Verbum Dei, et validum atque operatorium et acutum, et penetrabilius omni gladio acutissimo, penetrans*

1) Cf. annot. opusc. XXVIII, 121.

usque ad divisionem animae et spiritus, artuumque et medullarum (Hebr. 4, 12).

75. Verbum igitur audis Dei Filium, et a patria voluntate et potestate secernis? Audis quia vivit, audis quia sanat: noli ergo nostro comparare verbo. Si enim verbum nostrum quae non obtutu viderit, non auditu audierit, loquitur; et loquitur tamen cognita per quaedam naturae humanae interna mysteria: quomodo non impius, qui secundum Divinitatem in Dei Verbo et obtutum quendam corporeum exigit et auditum: et putat quod non possit a se quidquam facere Filius, nisi quod Patrem facientem viderit; cum per unitatem, ut diximus, ejusdem substantiae idem velle atque idem nolle et idem posse et in Patre sit et in Filio et in Spiritu sancto?

76. Quod si homines plerumque sensuum qualitate discreti, tamen unius propositi intentione concordant, quid de Patre nos et Dei Filio congruit aestimare, cum id quod humana imitatur caritas, substantia divina possideat?

77. Ponamus tamen ¹⁾, sicut ipsi volunt,

1) Hinc evidenter patet, s. Ambrosium in Patre et Filio (et Spiritu s.) unitatem agnovisse substantiae plano numericam et singularitatis, non tau-

quia quasi in exemplari, quod viderit Patrem facientem, Filius faciat. Et hoc utique ejusdem substantiae est; nullus enim potest alterius imitationem operationis implere, nisi qui ejusdem naturae habeat unitatem.

CAPUT VIII.

Haereticorum objectionem, qua Filium quod alium generare non possit, Patri negabant esse aequalem, primo in adversarios ipsos retorquet: deinde hominum ostendit exemplis, quod quispiam generet aut secus, ad potentiam non pertinere; maxime cum aliqui ipsemet Pater minus potens dicendus esset. Inde colligit divina ex humanis non esse judicanda, sed standum Scripturae auctoritati. Postremo omnipotentiam vel Patri abjudicandam, vel abjudicandam Filio ubi demonstravit, ipsos si filios non genuerint, propriis servis, qui sobolem procreaverint, minus potentes fore inducit, proindeque totam eorum disputationem ineptam esse.

78. (*Al. cap. IV.*) Illud ridiculum est, imperator Auguste, quod quidam hoc etiam ad inaequalitatem Dei Patris et Filii objiciendum usurpare consuerunt, quod dicant, omnipotentem Patrem esse, quod generavit Filium: negent autem omnipotentem Filium, dicentes quia generare non potuit.

tum specificam, proinde non censuisse eam pro personarum numero multiplicari.

79. Sed vide quemadmodum saeva impietas, ut dialectica philosophorum se ipsa convincat. Hac enim quaestione aut coaeternum Patri Filium necesse est sua voce fateantur; aut si principium temporis Filio aliquod adscribunt, principium potentiae necesse est tribuant etiam Patri. Ita cum omnipotentem Filium negant, incipiunt, quod nefas dictu est, asserere per Filium Patrem omnipotentem esse coepisse.

80. Nam si per generationem omnipotens Pater, utique aut coaeternus Patri Filius est; quia si semper omnipotens Pater, sempiternus et Filius: aut si fuit ¹⁾, quando non erat Filius sempiternus, fuit ergo quando non erat omnipotens Pater. Nam cum volunt dicere Filium aliquando coepisse, in illud recidunt, ut et Patris potentiam dicant non semper fuisse, sed ex Filii generatione coepisse. Ita dum Filio Dei cupiunt derogare, plus tribuunt, ut contra fas omne auctorem paternae potentiae declarare videantur; cum Filius dicat: *Omnia quae Pater habet, mea sunt* (Joan. 16, 15), hoc est, non quae Patri ipse tradiderit, sed quae a Patre jure generationis acceperit.

1) *Aut si fuit* scil. tempus.

81. Et ideo Filium sempiternam dicimus esse virtutem: si ergo sempiterna ejus virtus atque Divinitas, utique et potentia ejus est sempiterna (Rom. 1, 16). Filio igitur qui derogat, Patri derogat, pietatem offendit, violat caritatem. Nos honorificemus Filium, in quo Pater complacet; placet enim Patri ut laudetur Filius, in quo ipse complacuit.

82. Respondeamus tamen intentioni eorum, ne epilogo ¹⁾ quodam invidiam quaestionis declinasse videamur. Generavit, inquiunt, Pater, non generavit Filius. Quod hic argumentum est inaequalitatis? Generatio enim paternae proprietatis est, non potentiae: et pietas aequat, non separat. Denique in ipso usu nostrae infirmitatis frequenter evenire cognoscimus, ut et infirmi filios habeant, et non habeant fortiores: habeant servi, non habeant domini: habeant inopes non habeant qui potentes sunt.

83. Sed si dicunt et hoc infirmitatis esse

1) *Epilogo*. Hac voce ejusmodi significat sermonem, qualem oratores, ut judicum mentes a causae quae agitur cogitatione avertant, ad movendos ciendosque affectus adhibere solent. Cf. edit. maurin. in h. l. Ceterum ad hanc certe non facilem quaestionem cum theologis respondere conati sumus annot. opusc. XXVIII, 164. q. 2, 3.

quia volunt homines filios habere, nec possunt: quamvis humana non sint conferenda divinis, intelligant tamen inter ipsos quoque homines non potentiae esse, sed paternae proprietatis habere filios, vel non habere: nec in potestate nostrae voluntatis esse generare, sed in corporis qualitate; nam si esset potentiae, utique potentior multos haberet. Ergo non est potentiae habere filios vel non habere.

84. Numquid naturae est? Si naturae infirmitatem putatis, et ad humana vos confertis exempla, eadem Patris est natura quae Filii est. Itaque aut verum Filium dicitis, et Patri in Filio derogatis ¹⁾ per unitatem ejusdem naturae (sicut enim Pater natura Deus est, ita et Filius: deos autem ait Apostolus (1. Cor. 8, 5) non natura deos esse, sed dici;) aut si negatis esse verum Filium, hoc est, ejusdem naturae, non est ergo generatus: si non est generatus Filius, non generavit Pater.

85. Colligitur itaque juxta sententiam vestram, ut non sit omnipotens Deus Pater, quia

1) *In Filio derogatis*, nam quilibet naturae defectus redundat in Patrem propter unitatem naturae, quae est in utroque. In tam subtili quaestione de mysterio plane inscrutabili egregium est dilemma propositum, ad quod ariani ne mutire quidem possunt,

generare non potuit, si non generavit Filium, sed creavit. Sed quia omnipotens Pater, cum juxta sententiam vestram solus generator omnipotens sit, generavit utique Filium, non creavit. Verum ipsi magis quam vobis credendum est. Ille ait *genui* (Psal. 109, 3), et frequenter ait ¹⁾ generationis suae testis.

86. Non est ergo naturae, non est potentiae in Christo aliqua, quia non generavit infirmitas; quia generatio, sicut saepe jam diximus, non ad sublimitatem potentiae, sed ad proprietatem refertur naturae ²⁾. Nam si ideo omnipotens Pater, quia Filium habet, omnipotentior ergo esse potuit, si plures haberet.

87. An vero potentia ejus in una genera-

1) *Et frequenter ait*, non quidem semper diserte sed et aequivalenter, quoties eum cum emphasi Filium suum vocat.

2) *Sed ad proprietatem naturae*. Hanc Ambrosii sententiam Petavius l. 2. de Trin. c. 5. n. 16. ita exponit: „Hoc est, inquit, proprium quiddam esse personae sive naturae divinae, qua in Patre subsistit.“ Quod ut adhuc fiat planius, advertendum ex natura Patris generari Filium, non quatenus natura est, sed quatenus est in Patre, ut ille simul et consubstantialis sit Patri, et ab eo personaliter distinctus. Edit. maurin. Quare Pater genuerit unicum Filium diximus annot. opusc. XXVIII, 164. q. 2.

tione defecit? At ego ostendam et Christum habere filios, quos quotidie generat, sed ea generatione vel potius regeneratione, quae potestatis est, non naturae; adoptio enim potestatis est, generatio proprietatis. Quod ipsa Scriptura nos docuit; dicit enim Joannes, quia *in hoc mundo erat, et mundus per ipsum factus est, et mundus eum non cognovit. In propria venit, et sui eum non receperunt. Quotquot autem receperunt eum, dedit illis potestatem filios Dei fieri, his qui credunt in nomine ejus* (Joan. 1, 10. et seqq.).

88. Dicimus itaque potestatis esse, quod nos filios Dei fecit: proprietatis autem generationem esse oracula divina declarant; dicit enim Sapientia Dei: *Ex ore Altissimi prodivi* (Eccli. 24, 5), hoc est, non coacta, sed libera: non potestati obnoxia, sed nata generationis arcano, privilegio dominationis et jure potestatis. Denique de eadem Sapientia, hoc est, de Domino Jesu, alibi Pater dicit: *Ex utero ante luciferum genui te* (Psal. 109, 3).

89. Quod utique ideo dixit, non ut corporalem alvum declararet, sed ut proprietatem verae generationis ostenderet. Nam si ad corporalem referas, ergo omnipotens Pater cum

dolore et conceptione generavit. Sed absit, ut Deum ex infirmitate corporis metiamur. Est quidam uterus paternae arcanum substantiae interiusque secretum, quod non angeli, non archangeli, non potestates, non dominationes, non aliqua creaturarum potuit penetrare natura. Cum Patre enim semper et in Patre semper est Filius: cum Patre per distinctionem indissociabilem Trinitatis aeternae, in Patre per divinae unitatem naturae.

90. Quis igitur hic arbiter Divinitatis, qui discutiatur Patrem ac Filium: ille, quare generaverit: iste, cur non generaverit? Servulum suum aut ancillulam cur generaverit, nemo condemnat: isti condemnant, cur non generaverit Christus; condemnant enim sua opinione, cum derogant. Nec conjugibus inter se cur non generaverint, aut caritas minuitur, aut meritum derogatur: isti quia non generavit, Christi minuunt potestatem.

91. Cur, inquit, Filius Pater non est? Quia et Pater Filius non est. Cur non iste generavit? Quia nec ille generatus est. Nec ideo minus habet Filius, quia Pater non est: nec Pater minus habet, quia Filius non est. Dixit enim Filius: *Omnia quae Pater habet mea sunt* (Joan. 16, 15). Adeo generatio

in paterna proprietate, non in jure est potestatis!

92. Est quaedam indistincta distinctae incomprehensibilis et inenarrabilis substantia Trinitatis. Distinctionem etenim accepimus Patris et Filii et Spiritus sancti, non confusionem: distinctionem, non separationem: distinctionem, non pluralitatem ¹⁾. Divino itaque admirandoque mysterio manentem semper accipimus Patrem, semper Filium, semper Spiritum sanctum: non duos Patres, non duos Filios, non duos Spiritus. *Unus enim Deus Pater, ex quo omnia, et nos in ipso: et unus Dominus Jesus, per quem omnia, et nos per ipsum* (1. Cor. 8, 6). Unus natus ex Patre Dominus Jesus, et ideo Unigenitus. *Unus et Spiritus sanctus* (Id. 12, 11), ut idem Apostolus dixit: Sic accipimus, sic legimus, sic tenemus. Distinctionem scimus, secreta nescimus: causas non discutimus, sacramenta servamus.

93. Facinus indignum, ut qui generationis suae facultatem non habent, divinae generationis examen sibi arrogent, vindicent potestatem! Negent ergo aequalem Patri Filium, quia non generavit Filius: negent aequalem

1) *Non pluralitatem i. e. naturae, substantiae.*

Patri Filium, quia Patrem habet. Hoc si de hominibus dicerent, quorum aliqui volunt filios habere, nec possunt, injuriam putaremus: sic etiam si inter duos honore pares habenti filios qui non habet negaretur aequalis. Et ideo hoc, inquam, grave et de ipsis hominibus videtur, ut quis ideo minor putetur, quod patrem habet. Nisi forte tamquam constitutum in familia putant Christum dolere, quod emancipatus a Patre non sit, et administrandi patrimonii non habeat facultatem. Sed non est Christus in sacris ¹⁾, qui sacra universa destruxit.

94. Quomodo volunt tamen, respondeant, verane generatio sit, et verus Filius ex Deo Patre natus, hoc est, ex substantia Patris, an ex alia natus substantia? Si enim dicunt ex Patre, hoc est ex Dei substantia, convenit; quia ex substantia Patris Filium dicunt. Ergo quia unius substantiae, unius utique potentiae. Si vero ex alia substantia Filius est, quomodo omnipotens Pater est, et omnipotens Filius non est? Quid enim praestantius si ex alia substantia Filium Deus fecit, cum

1) *In sacris.* Pupilli dicebantur in sacris esse, ut patet ex cod. Theod. de maternis bonis leg. 1. et 9.

utique et Filius ex alia nos substantia filios Dei fecerit? Ergo aut unius substantiae Filius cum Patre, aut unius potentiae.

95. Friget igitur eorum quaestio, quia de Christo judicare non possunt; imo quia vincit ille, cum judicatur. Digni tamen sunt isti iudicio suo, qui hanc obijciunt quaestionem. Si enim ideo aequalis Patri Filius non est, quia non generavit Filium, et isti utique fateantur, si non habent filios, qui serunt hujusmodi quaestiones, suos sibi etiam servulos praeferendos, eo quod habentibus filios aequales esse non possunt. Si autem habent filios, non putent sibi meritum, sed filiorum juri deferri.

96. Non consistit igitur haec quaestio, quia aequalis Filius Patri ideo esse non possit, quia Pater generaverit Filium, Filius nullum ex se ipse generaverit. Nam et fons fluvium generat, et fluvius fontem ex se ipse non generat: et lux splendorem generat, non splendor lucem; et una natura est splendoris et lucis.

CAPUT IX.

Varias arianorum captiunculas, quibus Filium coepisse argutabantur, profert et explodit. Nam praeterquam quod eos aut contra se, aut nihil efficere constat,

cum rerum omnium principio non possit esse principium, in humanis etiam eorum argumentatio vitiosa est. Tempus igitur non praecessisse auctorem suum: qui si aliquando non fuit, tunc Pater fuit sine sua virtute ac sapientia. Denique ubi humanis exemplis ostensum est aliquem priusquam nascatur, esse dici, haereticorum temeritatem detestatur.

97. Unde cum inaequalitatem ex generationis objectu probare non potuerint, intelligant etiam illam divulgatam suae calumniam quaestionis explosam. Solent enim proponere: Quomodo aequalis potest esse Filius Patri? Nam si Filius est, antequam generaretur, non erat: aut si erat, cur natus est? Et arianos se negare consuerunt, qui proponunt Arii quaestiones ¹⁾?

98. Itaque exigunt a nobis responsionem, ut si dixerimus: Antequam generaretur, erat, astute referant: Ergo antequam generaretur, creatus est, et non differt a ceteris creaturis; quia prius coepit creatura esse quam Filius. Et adjiciunt: Cur qui erat, natus est? An quia imperfectus erat, ut postea perfectior fieret? Si autem responderimus quia non erat,

1) Ii, contra quos agebat s. doctor, nolebant dici ariani, sed iisdem tamen verbis et argumentis adversus dogma catholicum utebantur, quibus jam antea usus erat Arius. Ceterum ad hanc difficultatem cf. annot. opusc. XXIX, 222.

objiciunt statim: Ei ergo generatio contulit ut esset, quia non erat antequam nasceretur, ut hinc colligant: Erat ergo, quando non erat Filius.

99. Sed qui hoc proponunt, et obscuritate volunt involvere veritatem, dicant ipsi utrum temporaliter generet Pater, an intemporaliter. Si enim temporaliter dixerint, quod Filio objiciunt, Patri adscribent; ut videatur Pater coepisse esse, quod non erat: si intemporaliter, quid superest, nisi ut ipsi solvant, quam proposuerint quaestionem; ut cum generationem Patris abnuant temporalem, generationem quoque Filii temporalem non esse fateantur?

100. Si ergo non est generatio ejus ex tempore, aestimari datur quod nihil praecesserit ante Filium, qui non sit ex tempore. Si enim aliquid ante Filium, jam non sunt in ipso creata omnia, quae vel in coelo sunt vel in terris, et Apostolus redarguitur, qui hoc in Epistola sua scripserit (Coloss. 1, 16): quod si nihil ante generationem, non adverto cur posterior asseratur, quem nemo praecessit.

101. Connectenda est alia eorum plena impietatis objectio, quae latentem habeat dolum, quo sensus facilius mentesque perstringat. Interrogant enim, utrum omne quod finem

habet, aliquando coeperit. Et si acceperint ejusmodi responsionem, quia quod finem habet, coepit aliquando; referunt, utrum Pater desierit generare Filium. Quod cum tenuerint nostro aspirante consensu, contexunt: coepit ergo generatio. Id si non abnuas, consequi videtur, ut si coepit generatio, videatur in eo coepta, qui natus est; ut natus esse dicatur, qui ante non fuerat; unde definiant: Aliquando ergo Filius non fuit.

102. Adjiciunt alias ineptias loquacitatis suae dicentes: Si Verbum Patris Filius est, et ideo genitus dicitur, quia Verbum est: quod autem Verbum est, opus non est: multifariam locutus est Pater (Hebr. 1, 1); multos ergo generavit filios, si non operatus est, sed locutus est Verbum. Amentes homines! quasi non intelligant, quid intersit inter prolativum sermonem, et in aeternum permanens Dei Verbum ex Patre natum: natum utique, non prolatum: in quo non composita syllaba, sed plenitudo Divinitatis aeternae est et vita sine fine.

103. Subtexunt aliam impietatem, proponentes utrum volens, an invitus generaverit Pater; ut si dixerimus volentem, antiquiorem generatione voluntatem videamur fateri, et referant quia non sit Filius coae-

ternus Patri, quem aliquid antecessit: aut quia et ipse sit creatura, quia scriptum est: *Omnia quae voluit, fecit* (Psal. 113, 11); cum hoc ipsum non de Patre et Filio, sed de his quas Filius fecit, dictum sit creaturis. Sin autem invitum Patrem generasseresponderimus, invalidum Patrem dixisse videamur ¹⁾).

104. Sed nihil in sempiterna generatione praecedit, nec velle, nec nolle: ergo nec invitum dixerim, nec volentem; quia generatio non in voluntatis possibilitate est, sed in jure quodam et proprietate paterni videtur esse secreti. Nam sicut bonus Pater non aut ex voluntate est, aut necessitate, sed super utrumque, hoc est, natura; ita non generat ex voluntate aut necessitate Pater.

105. Esto tamen, sit generatio in voluntate generantis, quando hanc voluntatem fuisse dicunt? Si in principio, in principio utique Filius: si sempiterna voluntas, sempiternus et Filius: si coepit voluntas, displicuit igitur sibi quod erat Deus Pater, ut mutaret statum. Displicuit ergo sibi sine Filio, placere coepit sibi in Filio.

106. Jam illa consequentia ut dicamus: Si studium generandi nostro more assumpsit;

1) Cf. de hac exceptione opusc. XXIX. p. 215.

ergo et cetera quae generationem praecedere solent, nostro more assumpsit: nostro autem usu generationis votum est, non voluntas.

107. Produnt igitur impietatem suam, qui volunt generationem coepisse Christi; ut videatur non generatio illa Verbi manentis, sed prolatio fluentis esse sermonis: deinde multos inducendo filios, negent in Christo divinae proprietatem naturae; ut nec unigenitus, nec primogenitus aestimetur: postremo ut si principium credatur accepisse, etiam finem videatur habiturus.

108. Sed neque principium assumpsit aliquando Dei Filius, qui erat in principio: neque finem habebit qui est principium universitatis et finis. Nam cum sit principium (Joan. 8, 25), quomodo quod habebat, accepit? aut quomodo sui finem habebit, cum omnium ipse sit finis, ut in illo fine sine fine maneamus? Dei enim generatio cum temporalis non sit, nec ante se, nec in se tempus invenit.

109. Frigida igitur eorum et vana quaestio in creaturis ipsis non habet locum; ipsa etenim quae temporalia sunt, discretionem in quibusdam habere temporis non videntur. Lux nempe splendorem generat, nec comprehendi potest quod splendor luce posterior

sit, aut lux splendore antiquior; quia ubi lumen est, splendor est: et ubi splendor, etiam lumen est. Itaque nec sine splendore lumen, nec splendor potest esse sine lumine; quia et in splendore lumen, et splendor in lumine est. Unde et Apostolus splendorem paternae gloriae Filium dixit (Hebr. 1, 5); quia splendor paternae lucis est Filius: coaeternus, propter virtutis aeternitatem: inseparabilis, propter claritudinis unitatem.

110. Ergo si temporalia et aërea haec comprehendere et separare non possumus quae videmus, Deum quem non videmus, qui super omnem est creaturam, in ipso suae generationis arcano possumus comprehendere? Possumus eum a Filio tempore separare, cum omne tempus opus Filii sit?

111. Desinant ergo dicere: Et antequam generaretur, non erat. Ante enim temporis est, generatio ante tempora: et ideo quod posterius est, prius non est: nec opus ante auctorem potest esse, cum opera ipsa principium de operatore suo sumant. Nam quomodo ante operatorem suum usus operis aestimetur, cum omne tempus opus sit, et omne opus de operatore suo ut esset, accepit?

112. Experiri igitur adhuc istos volo, qui sibi videntur astuti; ut de nostris respondeant,

qui calumniantur divinis, longeque refugiunt ab inscrutabili supernae generationis arcano: quaestionem suam humanae astruant generationis exemplo. De Filio Dei dicunt, quia antequam generaretur non erat, hoc est, de Dei sapientia, de virtute Dei, de Dei Verbo, cujus generatio nihil ante se novit. Quod si aliquando, ut volunt, non fuit (quod nefas dictu est), non fuit ergo in Deo perfectionis aliquando plenitudo divinae, si postea processum generationis accepit.

113. Tamen ut sciant quam vana sit et solubilis eorum quaestio, licet nihil in eo humanis divinisve commune, tamen docebo homines, antequam nascerentur, fuisse. Aut negent Jacob sanctum fuisse, priusquam nasceretur, qui fratrem supplantavit in materni adhuc uteri positus arcano (Gen. 25, 23): negent Jeremiam, antequam nasceretur, fuisse, cui dicitur: *Priusquam te formarem in utero matris tuae, novi te: et priusquam exires de vulva, sanctificavi te, et prophetam in gentibus posui te* (Jerem. 1, 5). Quid hoc evidentius tanti exemplo prophetae, qui sanctificatus est, antequam natus, et antequam formaretur, est cognitus?

114. Quid etiam de Joanne loquar, de quo mater religiosa testatur, quia intra materna

situs adhuc viscera, praesentiam Domini spiritu cognovit, exultatione consignavit, sicut scriptum meminimus, matre dicente: *Ecce enim ut facta est in auribus meis vox salutationis tuae, exultavit in gaudio infans in utero meo* (Luc. 1, 44)? Erat igitur qui prophetabat, annon erat? At certe erat; erat enim qui venerabatur auctorem, erat qui loquebatur in matre. Denique Elisabeth filii spiritu replebatur, Maria filii spiritū sanctificabatur; sic enim habes, quia *exultavit infans in utero ejus, et repleta est Spiritu sancto Elisabeth* (Ibid. 41).

115. Vide singulorum verborum proprietates. Vocem quidem Mariae prior Elisabeth audivit, sed Joannes prior Domini gratiam sensit. Pulchre sibi conveniunt oracula oraculis, femina mulieri. et pignus pignori. Istae gratiam loquuntur, illi intus operantur, pietatisque mysterium maternis adoriuntur profectibus; duplicique miraculo, licet honore diverso, prophetant matres spiritu parvulorum. Quis igitur auctor hujus miraculi, nonne Dei Filius, qui fecit esse non natos?

116. De rebus humanis quaestio vestra non potest convenire, potestne de divinis convenire secretis? Quid est, antequam generaretur, non erat? Numquid Pater aliqua

tempora conceptionis accepit, ut Filium tempora praevenirent? Aut femineae more naturae generationis molitus est partum, ut molitio ipsa Filio esset antiquior? Quid est hoc? Cur divina secreta discutimus? Proprietatem legi divinae generationis non qualitatem.

117. Facinus indignum, ut ex se quidam coelestia metiantur, qui Christum non nasci potuisse, sed fieri, (tamquam unum de spadonibus) putant ¹⁾: aut tamquam unum de spadonibus Patrem Filium, quem generare non potuerit, adoptaverit.

CAPUT X.

Objicientibus Christum, Joanne teste, vivere propter Patrem, ac proinde ipsi aequalem non habendum, respondetur Filii vitam secundum Divinitatem nec coepisse ex tempore, nec pendere ab aliquo: locum vero de humana ipsius vita intelligendum ex eo probari, quod ibidem de corpore ac sanguine suo praemiserat. Tam duarum controversi loci expositionum primam referri ad humanitatem, et secunda Filii cum Patre aequalitatem, necnon cum homine similitudinem signari docet. Deinde perstricta quam Filio inurebant, injuria, quo pacto etiam secundum Divinitatem propter Patrem vivat, aperit. Ac tandem exposito quae vitae nostrae cum divina unitas sit, aliam objectio-

1) Haec quae uncinis inclusimus, licet in editis leguntur, omnino expungenda nobis videntur.

nem, qua Filius per Patrem clarificari opponitur, paucis absolvit.

118. (Al. cap. V.) Plerique etiam hinc faciunt quaestionem, quia scriptum est: *Sicut misit me vivus Pater, et ego vivo propter Patrem: et qui manducat me, et ipse vivit propter me* (Joan. 6, 58); dicentes: Quomodo aequalis est Patri Filius, qui dixit quia propter Patrem vivit?

119. Qui hoc proponunt, primum respondeant, cujusmodi vita sit Filii, utrum ea quam Pater largitus sit non habenti? Sed quomodo vitam aliquando potuit non habere, cum ipse sit vita, sicut ait: *Ego sum via, veritas et vita* (Joan. 14, 6)? Vita utique sempiterna, sicut virtus est sempiterna (Rom. 1, 20). Aliquando ergo, ut sic loquar, se vita non habuit?

120. Considerate quid lectum sit hodie de Domino Jesu, quia *mortuus est pro nobis, ut sive vigilemus, sive dormiamus, simul cum illo vivamus* (1. Thess. 5, 10). Cujus mors vita est, hujus Divinitas vita non est, cum Divinitas vita sit sempiterna?

121. An vero vita ejus in Patris est potestate? Sed ne corporis quidem sui vitam in alterius fuisse potestate memoravit, sicut scriptum est: *Ego pono animam meam, ut*

iterum sumam illam. Nemo tollit eam a me, sed ego pono eam a me ipso. Potestatem habeo ponendi eam, et iterum potestatem habeo sumendi eam: hoc mandatum accepi a Patre meo (Joan. 10, 17. et seqq.).

122. Ejus ergo vita secundum Divinitatem in alterius potestate posita judicatur, cujus vita secundum corpus alienae non erat subdita potestati? Aliena enim potestas erat, si non erat unitas potestatis. Sed sicut potestatis suae esse significat ponere animam, et liberae voluntatis: ita etiam quod secundum mandatum deposuit Patris, suae ac paternae voluntatis significat unitatem.

123. Ergo si vitam Filius neque aliquo accepit ex tempore, neque alienae habet potestati subditam, videamus qua ratione dixerit: *Sicut misit me vivus Pater, et ego vivo propter Patrem* (Id. 6, 58). Exponamus ut possumus; imo ipse potius exponat.

124. Considera igitur quid ante praemisit; ait enim: *Amen, amen dico vobis. Ante instruit, quemadmodum audire debeas: Vere, inquit, vere dico vobis, nisi manducaveritis carnem Filii hominis, et biberitis sanguinem ejus, non habebitis vitam in vobis* (Ibid. 54). Secundum Filium hominis se dicere ante praemisit, et tu quod secundum Filium

hominis de carne est locutus et sanguine, ad Divinitatem putas esse referendum?

125. Denique addidit: *Caro enim mea vere est esca, et sanguis meus est potus* (Joan. 6, 56). Carnem audis, sanguinem audis, mortis dominicae sacramenta cognoscis, et Divinitati calumniaris? Audi dicentem ipsum: *Quia spiritus carnem et ossa non habet* (Luc. 24, 39). Nos autem quotiescunque sacramenta sumimus, quae per sacrae orationis mysterium in carnem transfiguntur ¹⁾ et sanguinem, mortem Domini annunciamus (1. Cor. 11, 26).

126. Ergo posteaquam se loqui secundum hominis Filium declaravit, et carnem saepe repetivit et sanguinem, subdidit postea: *Sicut misit me vivus Pater, et ego vivo prop-*

1) *Transfigurantur*, transmutantur, eo sensu, quo de mysteriis c. 9. n. 50. (opusc. VII.) dixerat, *benedictione etiam ipsa natura mutatur*. Hoc sensu haec verba debere accipi patet ex clarissima alioquin s. Ambrosii doctrina de reali corporis Christi in eucharistia praesentia et quidem per veram substantiae panis mutationem seu transubstantiationem, quam tradit et pluribus confirmat de mysteriis c. 8, 9. Absurda vero est ea explicatio, qua verba *sacramenta transfigurantur in carnem et sanguinem*, significant, sacramenta fieri figuram carnis et sanguinis: haec enim plane abhorret a doctrina ibidem tradita.

ter Patrem; et qui manducat me, et ipse vivit propter me (Joan. 6, 58). Quomodo igitur hoc accipiendum putant? Potest enim duplex videri comparatio. Prima ita: *Sicut misit me vivus Pater, et ego vivo propter Patrem*. Secunda ita: *Sicut misit me vivus Pater, et ego vivo propter Patrem; ita et qui manducat me, ipse vivit propter me*.

127. Si primam eligunt, hoc significat, quia sicut missus sum a Patre et descendi a Patre, ita vivo propter Patrem. Quasi quis ¹⁾ autem missus est atque descendit, nisi quasi Filius hominis, sicut ipse supra dixit: *Nemo ascendit in coelum, nisi qui de coelo descendit Filius hominis* (Id. 3, 13)? Ergo sicut quasi Filius hominis missus est atque descendit, ita quasi Filius hominis vivit propter Patrem. Denique et qui manducat, quasi Filium hominis, et ipse vivit propter Filium hominis. Actum ergo incarnationis suae adventui comparavit.

128. Quod si secunda complacuit, nonne et aequalitatem Filii cum Patre, et similitudinem ejus cum homine manifesta distinctione colligimus? Nam quid est: Sicut ipse

1) *Quasi quis*, in cujus conditione ac nomine missus est atque descendit, nisi quasi etc.

vivit propter Patrem, et nos vivimus propter ipsum; nisi quia sic vivificat Filius hominem, sicut Pater in Filio carnem vivificavit humanam? *Sicut enim Pater suscitavit mortuos et vivificat, sic et Filius, quos vult, vivificat* (Joan. 5, 21), ut ipse Dominus supra dixit.

129. Aequalitas ergo Filii ad Patrem per unitatem quoque vivificationis astruitur, quando sic vivificat Filius, ut Pater. Agnosce ergo ejus vitam et potentiam sempiternam. Similitudo etiam nostra ad Filium, et quaedam secundum carnem unitas declaratur; quoniam quemadmodum Dei Filius a Patre, sic homo est vivificatus in carne. Sic enim scriptum est, quia sicut Deus Jesum Christum a mortuis suscitavit, ita etiam nos quasi homines vivificamur a Dei Filio (Rom. 4, 24).

130. Secundum hanc ergo expositionem non solum ad conditionem humanam derivatur gratia largitatis, sed etiam Divinitatis aeternitas praedicatur: Divinitatis, quia ipsa vivificat: humanae autem conditionis, quia vivificata est in Christo.

131. Quod si quis utrumque ad Christi refert Divinitatem: ergo Filius Dei hominibus comparatur; ut ita Filius propter Patrem vivat, sicut nos propter Filium Dei vivimus. Sed Filius Dei vitam largitur aeter-

nam, nos autem largiri nequimus : ergo nostri comparatione nec ille largitur. Habeant igitur ariani fidei suae praemium, ne vitam aeternam adipiscantur a Filio.

132. Libet jam ulterius progredi ; nam si illis placet hunc locum ad divinae perpetuitatem referre substantiae, accipiant etiam tertiam expositionem. Nonne evidenter videtur dicere, quod sicut vivus Pater est, ita vivit et Filius ? Quod utique quis non advertat ad unitatem vitae, quod eadem Patris et Filii vita sit, esse referendum ? *Sicut enim Pater vitam habet in semetipso, sic dedit et Filio vitam habere in semetipso* (Joan. 5, 26). Dedit per unitatem : dedit non ut auferat, sed ut clarificetur in Filio : dedit, ut complaceat : dedit non ut Pater custodiret, sed ut Filius possideret.

133. Sed obijciendum putant, quia dixerat : *Ego vivo propter Patrem* (Id. 6, 58). Uti-que si ad Divinitatem referunt, propter Patrem vivit Filius, quia ex Patre Filius est : propter Patrem, quia unius substantiae cum Patre : propter Patrem, quia eructatum est Verbum ex Patris corde (Psal. 44, 2), quia a Patre processit, quia ex paterno generatus est utero (Id. 109, 3), quia fons Pater Filii est, quia radix Pater Filii est.

134. Sed dicunt fortasse: Si unitatem putas Patris ac Filii vitae esse, cum Filius dixerit: *Et ego vivo propter Patrem* (Joan. 6. 58); numquid unitas est Filii vitae atque hominum: cum dixerit Filius, quia *qui manducat me, et ipse vivit propter me*?

135. Imo plane, sicut unitatem fateor esse vitae coelestis in Patre et Filio per divinae unitatem substantiae; ita vel divinae naturae vel dominicae incarnationis excepto privilegio ¹⁾, societatem nobiscum vitae spiritalis

1) Sicut Filius propter eandem numero naturam eum Patre eandem cum ipso vivit vitam divinam, ita nos propter eandem specie naturam humanam cum Christo vitam vivere possumus, quam vivit Christus homo, quae quidem plenissime in eo residet tamquam in capite et fonte et ex ipso in nos sua membra redundat, sed cum aliquo tamen discrimine, neque enim comparatio est adaequata, *excepto* scil. *divinae naturae vel dominicae incarnationis privilegio*. Nam cum divina natura una sit numero, una numero est vita Patris et Filii, non ita una numero est vita Christi et vita nostra. Praeterea haec vita in Filio subsistens hypostatice unitur humanae naturae assumptae; non tam arcto vinculo nobiscum communicatur, sed in nos redundat tantum per quandam participationem. Cf. quae hac de re disputavimus opusc. XXVII. praef. n. 15. Sed s. doctor forte id tantum vult significare, nos in Christo vivere et sedere per corporis unitatem, quia cum Christus eandem nobiscum specie habet naturam, quadantenus propter hanc

in Filio esse profiteor per humanae unitatem naturae: *Qualis enim coelestis, tales et coelestes* (1. Cor. 15, 48). Denique sicut in illo sedemus ad dexteram Patris, non quia cum ipso sedemus, sed quia sedemus in Christi corpore, de quo postea dicemus plenius (Infr. lib. 5): sicut, inquam, sedemus in Christo per corporis unitatem; ita et in Christo vivimus per corporis unitatem.

136. Non solum autem non vereor quia scriptum est: *Et ego vivo propter Patrem*; sed etiam si per Patrem dixisset, non vererer.

137. (*Al. cap. VI*). Solent enim etiam illud obijcere quia dixit: *Haec infirmitas non est ad mortem, sed pro claritate Dei; ut clarificetur Filius ejus per ipsum* (Joan. 11, 4). Non solum enim per Patrem et a Patre Filius clarificatur, quia scriptum est: *Clarifica me Pater* (Id. 17, 5); et alibi: *Nunc clarificatus est Filius hominis, et Deus clarificatus est in eo, et Deus clarificat eum* (Id. 13, 31. 32): sed etiam per Filium et a Filio clarificatur Pater, quia Veritas dixit: *Ego te clarificavi super terram* (Id. 17, 4).

consanguineitatem ad totam speciem spectat, quod naturae humanae in Christo convenit: sed plenius priori modo explicatur comparatio cum Christo adhibita ab Ambrosio.

138. Sicut ergo clarificatur per Patrem, ita etiam propter Patrem vivit. Unde et quidam δόξαν opinionem magis putaverunt esse, quam gloriam; et ideo sic interpretati sunt: Ego te clarificavi super terram, opus consummavi quod dedisti mihi; et nunc clarifica me, Pater, hoc est, δόξασον ut sit hic sensus: Ego opinionem de te hominibus hujusmodi infudi, ut cognoscant te Deum verum; et tu hanc de me confirma illis opinionem, ut credant me tuum Filium et Deum verum.

CAPUT XI.

Discrimen quod conflare ariani moliebantur e verbis Apostoli ex Patre omnia, et per Filium omnia esse docentis, irridetur. Ostenditur enim illic eandem Patris ac Filii omnipotentiam exprimi: quod cum ex aliis locis, tum ex ipsius Pauli textu confirmatur. Hunc absurde ad Patrem referri ab haereticis, ac pertinere ad Filium ex ejusdem serie demonstrari: nec tamen quidquam Filii derogari potentiae, si de Patre intelligatur. Postremo in istis, *ex quo, per quem et in quo* aliquid, nullam intercredere differentiam, et haec omnia de tribus personis dici, evincit.

139. Jam illud ridiculum est, quod quidam ex illo apostolico discretionem inter Patrem et Filium faciunt potestatis, quia scriptum est: *Nobis tamen unus Deus Pater, ex quo omnia, et nos in ipso: et unus Do-*

minus Jesus Christus, per quem omnia, et nos per ipsum (1. Cor. 8, 6). Ajunt enim non mediocrem divinae majestatis esse distantiam quia dictum est: *Ex illo omnia, et per hunc omnia*. Nihil autem expressius, quam quod hoc loco omnipotens Filius evidenti ratione signatur, nam ut ex illo omnia, ita per hunc omnia ¹⁾.

140. Inter omnia Pater non est, cui dictum est: *Quia universa serviunt tibi* (Psal. 118, 91). Inter omnia Filius non est, quia *omnia per ipsum facta sunt* (Joan. 1, 3), *et omnia in ipso constant, et ipse est super omnes coelos* (Coloss. 1, 17). Non ergo inter omnia Filius, sed super omnia: qui secundum carnem quidem est ex familia judaeorum, idem tamen super omnia Deus benedictus in secula (Rom. 9, 5): cujus est nomen super omne nomen, et de quo dicitur: *Omnia subjecisti sub pedibus ejus* (Psal. 8, 8). Subjiciendo autem omnia, nihil reliquit ei non subiectum, sicut Apostolus dixit (Hebr. 2, 8). Quod si hoc etiam secundum incarnationis locutus est sacramentum, quemadmodum possumus de supernae generationis incomparabili majestate dubitare?

1) Cf. supra annotat. ad l. 1. c. 3. n. 26.

141. Nihil igitur potestatis inter Patrem et Filium certum est interesse. Denique eo usque nihil interest potestatis, ut idem Apostolus ex ipso dixerit esse omnia, per quem omnia, sicut habes: *Quoniam ex ipso, et per ipsum et in ipso sunt omnia* (Rom. 11, 36).

142. Si igitur Pater, sicut putant, tantummodo significatur, non potest idem et omnipotens esse, quia ex ipso omnia; et omnipotens non esse, quia per ipsum omnia. Aut igitur invalidum, nec omnipotentem Patrem sua assertione memorabunt, aut certe omnipotentem etiam Filium vel inviti voce propria fatebuntur.

143. Eligant tamen utrum hic Patrem declaratum putent. Si Patrem, ergo et per ipsum omnia: si Filium, ergo et ex ipso omnia. Si autem et per Patrem omnia, nihil utique Filio derogandum: et si ex Filio omnia, similiter et Filio deferendum.

144. Ac ne insidiari nos unius arbitrentur obreptione versiculi, totum caput recenseamus: *O altitudo, inquit, divitiarum sapientiae et scientiae Dei: quam inscrutabilia sunt iudicia ejus, et investigabiles viae ejus! Quis enim cognovit sensum Domini? aut quis consiliarius ejus fuit? aut quis prior dedit illi, et retribuetur ei? Quoniam ex ipso,*

et per ipsum, et in ipso sunt omnia, ipsi gloria in secula (Rom. 11, 33—36).

145. De quo igitur dictum putant, de Patre, an de Filio? Si de Patre: sed non est sapientia Dei Pater, quia Sapientia Dei Filius est. Quid est autem quod non possit Sapientia, de qua scriptum est: *Cum sit una omnipotens et permanens, in se omnia innovat* (Sap. 7, 27)? Non ergo accedentem legimus, sed permanentem. Habes ergo juxta Salomonem, omnipotentem et permanentem Sapientiam. Habes etiam bonam, quia scriptum est: *Sapientiam autem non vincit malitia* (Ibid. 30).

146. Sed ad propositum revertamur. *Quam inscrutabilia sunt*, inquit, *judicia ejus!* Si igitur omne judicium Pater dedit Filio (Joan. 5, 22), Filium Pater videtur declarare ¹⁾, qui judicat.

147. Denique ut scias quia non de Patre, sed de Filio dicit, addidit: *Quis prior*, inquit, *dedit illi?* Dedit enim Pater Filio: sed dedit jure generationis, non munere largitatis. Et ideo quia negari non potest a Patre accepisse Filium, secundum quod scriptum

1) *Filium Pater* (forte *Paulus?*) *videtur declarare* hic, in hoc Pauli loco, significare.

est: *Omnia mihi tradita sunt a Patre meo* (Matth. 11, 27); dicendo tamen: *Quis prior dedit illi?* non accepisse per naturam a Patre Filium denegavit, sed priorem non posse dici inter Patrem et Filium declaravit; quia etsi Pater dedit Filio, non tamen quasi posteriori dedit: quia increata et inaestimabilis Trinitas, quae unius est aeternitatis et gloriae, nec tempus nec gradum vel posterioris recipit vel prioris.

148. Quod si graecos magis codices sequendos putamus, qui habent *τὸς προσέδωκεν αὐτῷ*, vides quoniam cui nihil addi potest, non dispar a pleno est. Ergo si Filio magis convenit hoc totum apostolicum caput, videamus et de Filio esse credendum, quia ex ipso omnia, sicut scriptum est: *Quoniam ex ipso, et per ipsum, et in ipso sunt omnia.*

149. Esto tamen de Patre dictum putent. Itaque meminerimus, quia sicut ex ipso legimus omnia, ita etiam per ipsum omnia: in universitatem quippe totius creaturae Patris et Filii profertur auctoritas. Ac licet superius omnipotentem Filium paterno probaverimus exemplo; tamen quia illis derogare studium est, considerent quia et Patri derogant. Si enim infirmus Filius, quia per ipsum omnia,

numquid infirmus et Pater, quia et per Patrem omnia?

150. Sed ut agnoscant nullam discretionem inter haec esse, iterum demonstrabo ejusdem esse, ex quo aliquid, et per quem aliquid; et ostendam utrumque de Patre lectum. Sic enim habemus: *Fidelis Deus, per quem vocati estis in communionem Filii ejus* (1. Cor. 1, 9). Quid Apostolus dixerit, considerent. Per Patrem vocamur, et nihil est quaestionis: per Filium creamur, et hoc vilius aestimarunt? Pater in communionem Filii vocavit, et religiose hoc sicut debemus, accipimus: Filius omnia creavit, et putant non liberae fuisse voluntatis arbitrium, sed coactae atque servilis operationis obsequium?

151. Ut autem agnoscas plenius nihil distare inter Patris et Filii potestatem, cum per Patrem in communionem Filii ejus vocemur; ex Filio est ipsa communio, sicut scriptum est: *Quoniam de plenitudine ejus nos omnes accepimus* (Joan. 1, 16); licet secundum graecum Evangelium, ex plenitudine ejus intelligere debeamus.

152. Ecce et per Patrem communio, et ex Filio communio: sed non discrepans, sed una communio; sicut idem Joannes in Epistola sua dixit: *Et communicatio nostra sit cum*

Patre et cum Filio ejus Jesu Christo (1. Joan. 1, 3).

153. Accipe etiam quia non solum ex Patre et Filio, sed etiam ex Spiritu sancto unam nobis communionem Scriptura commemoravit: *Gratia, inquit, Domini nostri Jesu Christi, et caritas Dei, et communicatio sancti Spiritus cum omnibus vobis* (2. Cor. 13, 13).

154. Quaero autem in quo minor videatur is per quem omnia, quam is ex quo omnia? An quia operator asseritur? Sed operatur et Pater; quia verus est, qui dixit: *Pater meus usque modo operatur, et ego operor* (Joan. 5, 17). Sicut igitur Pater operatur, operatur et Filius. Non ergo operator infirmus aut vilis est, quoniam operatur et Pater: et ideo quod commune est Filio cum Patre vel propter Patrem inferiore loco accipi non oportet, ne Patri potius in Filio ab haereticis derogetur.

155. Nec mediocre illud, quod alibi etiam idem sanctus Joannes ad refellendas arianæ perfidiae quaestiones ait: *Si scitis quoniam justus est, scitote quoniam qui facit justitiam, ex ipso natus est* (1. Joan. 2, 29). Justus autem quis nisi Dominus, qui justitias dilexit (Psal. 10, 8)? Aut quem,

sicut superiora indicant, repromissorem vitae habemus aeternae, si Filium non habemus? Si igitur Filius Dei vitam nobis promisit aeternam, et ipse justus est, ex ipso utique nati sumus. Aut si ex Filio nos per gratiam natos negant, nec justum Filium confitentur.

156. Credas igitur necesse est etiam ex Dei Filio omnia; quia omnium sicut Deus Pater, ita et Filius et auctor est et creator. Videmus ergo inanem esse hanc quaestionem, cum et de Filio credi conveniat, quoniam *ex ipso, et per ipsum, et in ipso sunt omnia.*

157. Diximus quomodo ex ipso, quomodo etiam per ipsum. In ipso autem omnia esse quis dubitet, cum alibi scriptum sit: *Quoniam in ipso condita sunt omnia in coelis, et in ipso creata sunt: et ipse est ante omnes, et omnia in ipso constant* (Coloss. 1, 16)? Habes ergo ex ipso gratiam, ipsum operatorem, in ipso omnium firmamentum.

CAPUT XII.

Quod obiciebatur ex Joanne Filium viti et Patrem agricolae comparari, de incarnatione intelligendum: qui vero secundum generationem divinam illud accipiant, Filio duas injurias inferre, quem et Paulo postponant, et aequent aliis hominibus: totidem etiam Patri, quem non solum eidem Apostolo parem, sed etiam nihili esse testificentur. Tum falsa interpre-

tatione denuo rejecta veraque confirmata, Filius quoque secundum Divinitatem agricola esse, ac uva secundum humanitatem, astringitur; unde superior prae-cellentiae paternae explicatio stabilitur.

158. (*Al. cap. VII.*) Illud quoque ad separandam Patris et Filii Divinitatem obijcere consueverunt, quia Dominus dixit in Evangelio: *Ego sum vitis vera et Pater meus agricola est* (Joan. 15, 1); agricolam et vitem diversae dicentes esse naturae, et vitem in agricolae esse potestate.

159. Sic ergo vultis esse Filium secundum Divinitatem, sicut vitis est, ut sine cultore nihil valeat, et possit deseri vel recidi: et ex litera calumniam comparatis, quia Dominus vitem se esse dixit, incarnationis suae significans sacramentum? Tamen si placet ut ex litera argumentemur, fateor et ego, imo profiteor quia vitem se Filius nominavit. Vae enim mihi, si sacramentum salutis publicae denegavero!

160. Quomodo ergo vultis accipere quod se vitem Dei Filius nominavit? Si secundum divinam substantiam dictum accipitis et sicut inter agricolam et vitem, ita etiam inter Patrem et Filium Divinitatis creditis esse distantiam, geminam Filio, geminam Patri facitis injuriam: Filio, quia si secundum Di-

vinitatem inferior est quam agricola, inferior etiam Paulo apostolo vestra assertione necesse est aestimetur, quia et Paulus agricolam se esse dixit, sicut habes: *Ego plantavi, Apollo rigavit; sed Deus incrementum dedit* (1. Cor. 3, 6). Num ergo vultis ut Paulus melior sit Dei Filio?

161. Habetis unam injuriam. Alteram, quia si secundum substantiam generationis aeternae vitis est Filius, cum dixerit: *Ego sum vitis, vos palmites estis* (Joan. 15, 5); unius nobiscum etiam illa divina generatio videbitur esse substantiae. Sed *quis similis tibi in diis, Domine* (Exod. 15, 11), sicut scriptum est? Et rursus in Psalmo: *Quoniam quis in nubibus aequabitur Domino? aut quis similis erit Deo inter filios Dei* (Psal. 88, 7)?

162. Nec tamen soli Filio derogatis, sed etiam Patri. Nam si in agricolae nomine omnis paternae praerogativa est potestatis; cum etiam Paulus agricola sit, Patri utique, cui Filium negatis aequalem, Apostolum comparatis.

163. Deinde cum scriptum sit: *Sed neque qui plantat, est quidquam, neque qui rigat: sed qui dat incrementum Deus* (1. Cor. 3, 7); in eo nomine vos summam

paternae majestatis locabitis, quod videtis infirmum. Si enim qui plantat, et qui rigat, nihil est, sed qui dat incrementum Deus; videte quid vestra asserere moliatur impietas, ut et Pater nomine sit contemnendus agricolae; et Deus aliquis incrementum paterno operi qui tribuat, requirendus. Impie igitur ex nomine agricolae praeferendam Dei Patris existimant potentiam, in quo sit Patri Deo cum homine appellationis commune consortium.

164. Quid autem egregium, si ei (ut vultis haeretici) Filio praeferatur, cujus divina substantia ab humana conditione non discrepet? Nam si vitem Filium secundum divinam substantiam appellatum putatis, non solum corruptelae incertisque elementorum obnoxium judicatis, sed etiam humanae tantummodo consortem naturae, quia unius naturae sunt vitis et palmites: ut non per incarnationis sacramentum carnem Dei Filius assumpsisse videatur, sed principium sumpsisse de carne.

165. Ego autem dicam plane carnem ejus, licet novo generationis mysterio, unius tamen naturae fuisse nobiscum, et hoc salutis nostrae sacramentum esse, non divinae generationis exordium. Vitis enim est, quia meas sustinet passiones, quandoquidem in illo nixa

fragilis prius humana conditio fecundis redi-
vivae fructibus pietatis adolevit.

166. Verumtamen si te pompa delectat
agricolae, dicas, velim, quis ille sit, qui lo-
cutus est in propheta: *Domine, notum mihi
fac, ut sciam: tunc vidi cogitationes eorum.
Ego ut agnus ductus sum innocens ad im-
molandum, et nesciebam: adversum me co-
gitaverunt consilium, dicentes: Venite, inji-
ciamus lignum in panem ejus* (Jerem. 11, 18.
19). Si enim Filius incarnationis futurae loqui-
tur sacramentum, quia impium est ut de Patre
credas, Filius est utique qui supra dicit:
*Ego plantavi te vitem fructiferam, quo-
modo conversa es in amaritudinem vitis
aliena* (Jerem. 2, 21)?

167. Itaque et Filium vides esse agricolam,
unius nominis cum Patre, unius operis, unius
dignitatis atque substantiae. Ergo si agri-
cola et vitis est Filius, vitem utique secun-
dum incarnationis accipimus sacramentum.

168. Sed non solum se esse vitem dixit,
sed etiam botryonem voce prophetica nuncu-
pavit, tunc quando ad vallem botryonis ex-
ploratores Moyses jussu Domini direxit (Num.
13, 24). Quae est illa vallis, nisi humilitas in-
carnationis et fecunditas passionis? Et puto
botryonem ideo dictum, quia ex vinea illa

translata ex Aegypto (Psal. 79, 9), hoc est, ex familia judaeorum, utilis mundo fructus emicuit. Nemo certe botryonem potest ad generationem referre divinam: aut qui refert, aliud nihil relinquit, nisi ut botryonem illum natum ex vite credamus. Itaque adscribit insipiens Patri, quod reprehendit in Filio.

169. Verum si jam dubitari non potest, quod vitis secundum incarnationem Dei Filius nominatus sit, videtis secundum quod sacramentum Dominus sit locutus: *Quoniam Pater major me est* (Joan. 14, 28). Nam cum hoc in superioribus dixerit, continuo subjecit: *Ego sum vitis vera, et Pater meus agricola est* (Id. 15, 1); ut agnosceres secundum id Patrem esse majorem; quia sicut agricola vitium, ita Pater dominicae carnis est cultor: quae et augeri potuit per aetatem et per passionem recidi, ut omne humanum genus ab aestu secularium noxio voluptatum diffusae salutaribus brachiis crucis umbra velaret.

LIBER V.

PROLOGUS.

Quisnam fidelis et prudens servus? Ejus merces in Petro indicatur, item etiam in Paulo, cujus auctoritati parere Ambrosius cupiens hunc librum aliis adjectum voluit, qui non potuerit in superiore comprehendere. Quid in hoc disputaturus sit, quoque consilio? Deberi sibi veniam, cum ab omnibus ministris quaerenda sit creditae sibi pecuniae usura. Hanc sibi usuram fideles esse: beatum autem fore, si mercedem sperare sibi liceat; se tamen sanctorum praemia non tam optare, quam poenarum immunitatem, ad quam merendam omnes hortatur.

1. *Quisnam est fidelis servus et prudens, quem constituit Dominus super familiam suam, ut det illis in tempore cibum? Beatus ille servus, quem veniens Dominus ejus invenerit sic facientem* (Matth. 24, 45. 46). Non vilis hic servus est, magnus aliquis esse debet: quis sit iste consideremus.

2. Est Petrus ipsius Domini ad pascendum gregem electus iudicio ¹⁾, qui tertio meretur audire: *Pasce agniculos meos, pasce*

1) Clare hic s. doctor Petri prae ceteris apostolis praerogativam significat. Neque enim verba illa Christi

agnos meos, pasce oviculas meas (Joan. 21, 15. et seqq). Itaque pascendo bene cibo fidei gregem Christi, culpam lapsus prioris abolevit. Et ideo tertio admonetur ut pascat, tertio utrum Dominum diligat, interrogatur, ut quem tertio ante crucem negaverat, tertio fateatur (Matth. 26, 70. et seqq.).

3. Beatus et ille servus, qui potest dicere: *Lac vos potavi, non escam; nondum enim poteratis* (1. Cor. 3, 2); novit enim quos quemadmodum pascat. Quis nostrum hoc facere potest? Quis nostrum potest vere dicere: *Factus sum infirmis infirmus, ut infirmos lucrifaciam* (Id. 9, 22)?

4. Et tamen ille tantus ad curam gregis electus a Christo qui sanaret infirmos, curaret invalidos, haereticum a commisso sibi ovili statim post unam correptionem repellit (Tit. 3, 10); ne unius erraticae ovis scabies serpenti ulcere totum gregem contamineat. Jubet praeterea stultas quaestiones et contentiones esse vitandas (Ibid. 9).

5. Quid igitur nos agemus, inter messis an-

omnibus applicat apostolis in communi, sed Petro in primis, dein quasi secundo loco s. Paulo, qui, si charismata s. Spiritus, missionem et labores consideres, quandam etiam prae ceteris apostolis praerogativam (extraordinariam) habuisse dici poterit.

tiquae nova zizania imprudentes accolae constituti? Si taceamus, cedere videbimur: si contendamus, verendum est, ne nos quoque judicemur esse carnales. Scriptum est enim de hujusmodi quaestionibus, quae generant lites: *Servum autem Domini non oportet litigare, sed mansuetum esse ad omnes, docibilem, patientem, cum modestia docentem eos qui resistunt* (2. Tim. 2, 23. 24); et alibi: *Si quis contentiosus est, nos talem consuetudinem non habemus, neque Ecclesia Dei* (1. Cor. 11, 16). Eoque scribere aliquid sententiae fuit, ut sine strepitu aliquo impietati haereticorum nostra pro nobis scripta respondeant.

6. Quintum itaque, imperator Auguste, hunc librum paramus ordiri: nam et quartum librum oportuit in illa vitis disputatione finire; ne coacervasse magis librum eundem quodam videremur quaestionum tumultu, quam fructu spiritalis vineae replevisse: nec inconsummatam fidei vindemiam tantis adhuc superfluentibus disputationibus decuit derelinqui.

7. Quinto igitur libro de Patris ac Filii et Spiritus sancti inseparabili Divinitate digerimus, sequestrata interim pleniore disputatione de Spiritu sancto, provocati magisterio evangelicae lectionis, ut credita nobis quin-

que fidei talenta (Matth. 25, 15), quasi quadam horum quinque sorte librorum, humanis feneremus affectibus; ne forte cum venerit Dominus, et invenerit in terra absconditam pecuniam suam, dicat mihi: *Serve male et piger, sciebas quia meto, ubi non semino; et congrego, ubi non sparsi: oportuit ergo te committere pecuniam meam nummulariis; ut veniens ego recepissem quod meum est* (Ibid. 26, 27): autquemadmodum in alio libro est: *Et ego, inquit, veniens cum usuris utique exegissem illam* (Luc. 19, 23).

8. Date ergo veniam, si quos prolixioris hujusmodi sermonis offendit audacia. Officii contemplatio cogit credere quod accepimus: *Dispensatores sumus mysteriorum coelestium* (1. Cor. 4, 1). Ministri sumus, non ex aequo omnes: *Sed unicuique, inquit, sicut Dominus dedit. Ego plantavi, Apollo rigavit: sed Deus incrementum dedit* (Id. 3, 5. 6). Unusquisque igitur enitatur, ut mercedem possit accipere secundum suum laborem; *Dei enim sumus*, ut Apostolus dixit, *cooperarii, Dei cultura, Dei aedificatio* (Ibid. 9). Beatus itaque ille qui tales feneratoris sui cernit usuras: beatus et ille qui fructus sui operis intuetur: beatus quoque *qui superaedificat supra fundamentum fidei*

aurum, argentum, lapides pretiosos (Ibid. 12).

9. Vos nobis estis omnia, qui haec auditis aut legitis: vos feneratoris usurae; verbi usurae, non pecuniae: vos agricolae redditus: vos aedificatoris aurum, argentum lapidesque pretiosi. In vestris meritis sacerdotalis summa laboris est, in vestris animis fructus episcopalis operis enitescit; in vestris profectibus aurum Domini refulget, multiplicatur argentum, si eloquia divina teneatis. *Eloquia enim Domini, eloquia casta: argentum igne examinatum, probatum terrae, purgatum septuplum* (Psal. 11, 7). Vos ergo facietis feneratorem divitem, agricolam fructuosum: vos peritum probabitis architectum. Non arroganter dico, quia non tam mea sunt, quam vestra, quae voveo.

10. O si mihi liceat secure de vobis tunc temporis dicere: *Domine, quinque talenta mihi dedisti, et ecce alia quinque lucratus sum* (Matth. 25, 20); et ostenderestrarum talenta pretiosa virtutum! *Habemus enim thesaurum in vasis fictilibus* (2. Cor. 4, 7). Haec sunt talenta, quae jubet Dominus spiritaliter fenerari: aut duo aera novi et veteris Testamenti, quae spoliato illi a latro-

nibus samaritanus ille evangelicus ad curanda vulnera dereliquit (Luc. 10, 35).

11. Neque ego, fratres, voti avarus ideo haec opto, ut supra multa constituar: sate est mihi praemium de vestro profectu. Utinam non indignus eo inveniar quod accepi! Ea quae sunt me majora melioribus tribuenda, non exigo! licet soleas, Domine, dicere: *Volo autem et huic novissimo dare, sicut et tibi* (Matth. 20, 14). Accipiat potestatem supra decem civitates, qui meretur (Luc. 19, 17).

12. Sit ille talis, qualis Moyses, qui Legis decem verba conscripsit. Sit ille Jesus Nave, qui subegit quinque reges, et gabaonitas in deditionem accepit (Josue 10, 12. seqq.); ut esset typus venturum ejus nominis virum, cujus imperio corporales omnes deliciae vincerentur, converterentur gentes; ut fidem Jesu Christi magis, quam pristina studia sua et vota sequerentur. Sit ille David, cui occurrerunt psallentes juvenulae, dicentes: *Saul triumphavit in millibus, David in decem millibus* (1. Reg. 18, 7).

13. Mihi sat est, si non in exteriores tenebras extrudar, quemadmodum ille, qui commissum sibi talentum in terra quadam suae carnis abscondit: sicut princeps synagogae ceterique principes judaeorum, qui credita

sibi eloquia Dei humo quadam sui corporis ¹⁾ occuparunt (Matth. 23, 14. seqq.) deliciisque carnis intenti, quasi in quandam exaltati cordis foveam fenus coeleste merse-
runt.

14. Nos igitur non intra latibula carnis absconditam Domini teneamus pecuniam, vel unam illam in sudario reponamus (Luc. 19, 20): sed tamquam boni nummularii cum sudore quodam mentis et corporis aequo et parato semper libremus affectu, ut prope sit verbum in ore tuo et in corde tuo (Deut. 30, 14).

15. Hoc verbum Dei est, pretiosum est talentum, quo redimeris. Haec est pecunia per mensas animarum saepe cernenda; ut frequenter agitando in omnem terram bonorum sonus possit exire nummorum, per quem vita paretur aeterna. *Haec est autem vita aeterna*, quam largiris omnipotens Pater, ut cognoscamus *te solum verum Deum, et quem misisti Jesum Christum* (Joan. 17, 3).

CAPUT I.

Quam impii sint ariani, dum illud in quo humana felicitas constat, impugnant. Joannem semper cum

1) *Humo quadam sui corporis* scil. vel in proprium commodum terrenum et carnale verterunt, ut ipsis exprobrat Christus Matth. 23, 14. ss., vel sensu carnali explicarunt.

Patre Filium conjungere, maxime ubi ait: *Ut cognoscant te solum verum Deum etc.* Illic igitur verum Deum etiam intelligendum de Filio, quando is nec Deus negari possit, nec falsus dici; imo nec etiam nuncupativus. Quod ultimum ubi ex Apostolo demonstratum est, Christum verum Deum esse rite conficitur.

16. Unde advertant ariani quam impii sint, qui de spe nostra et voto nobis faciunt quaestiones. Et quoniam hinc prae ceteris vociferari solent, dicentes separatum a solo et vero Deo Christum, intellectus impios pro nostris viribus confutemus ¹⁾.

17. Hoc enim loco magis intelligere debent, quia haec utilitas, haec merces est perfectae virtutis, hoc divinum et incomparabile munus, ut cognoscamus cum Patre Christum, nec separemus a Patre Filium, sicut Scriptura non separat. Namque hoc magis ad unitatem, quam ad distantiam divinae proficit potestatis, quod idem praemium, unum honorem nobis dat Patris Filiique cognitio: quam mercedem habere non poterit, nisi qui et Patrem cognoverit et Filium; sicut enim Patris, ita Filii cognitio vitam acquirit aeternam.

18. Itaque sicut in principio statim Ver-

1) Cf. annotationem opusc. XXIX, 271.

bum cum Deo Patre pia confessione junxit Evangelista dicens: *Et Verbum erat apud Deum* (Joan. 1, 1); ita et hic scribendo verba Domini: *Ut cognoscant te solum verum Deum, et quem misisti Jesum Christum* (Id. 17, 3); conjunctione illa Patrem utique copulavit et Filium, ut Christum verum Deum a majestate Patris nemo secernat: nunquam enim conjunctio separat.

19. Et ideo dicendo: *Ut cognoscant te solum verum Deum, et quem misisti Jesum Christum*; et sabellianos interficit, et judaeos exclusit, eos utique qui audirent loquentem; ne aut illi eundem Patrem putarent esse quem Filium, si non addidisset et Christum: aut isti a Patre Filium separarent.

20. Quaero autem cur non putent subaudiendum et ex superioribus colligendum, ut quia praemisit solum verum Deum Patrem, subaudiamus etiam Jesum Christum solum verum Deum? Exprimendum enim aliter non fuit, ne duos deos dicere videretur; nam neque duos dicimus deos, et ejusdem cum Patre Divinitatis Filium confitemur.

21. Itaque quaeramus, qua ratione Divinitatis hic putent factam esse distantiam, utrum Deum negent Christum? Sed negare non possunt. An verum Deum negent? Sed dicant,

si verum negant, utrum falsum, an nuncupativum Deum judicent? Nam secundum Scripturas aut verus Deus est, aut tantummodo nuncupativus, aut falsus. Verus ut Pater, nuncupativus ut sancti, falsus ut daemones atque simulacra. Dicant igitur qua Filium Dei confessione designent, utrum falso praesumptum Dei nomen, an vero quasi nuncupativo inspirationem tantum Divinitatis inesse arbitrantur.

22. Falso praesumptum nomen non puto quod dicant, ut apertiore se crimine impietatis involvant; ne ut daemoniis et simulacris, ita etiam Christo falsum Dei inditum nomen insinuando se prodant. Sin autem ideo dictum putant Deum, quia inspirationem Divinitatis habuit, sicut et multi sancti viri (eos enim Scriptura deos dixit, ad quos sermo fiebat Dei (Joan. 10, 35), ergo non ultra homines eum praeferunt, sed comparandum hominibus arbitrantur; ut hoc eum putent esse, quod hominibus ipse donavit, dicens ad Moysen: *Posui te in Deum Pharaoni* (Exod. 7, 1). Unde et in Psalmo dictum est: *Ego dixi: Dii estis* (Psal. 81, 6).

23. Et hanc tamen sacrilegorum opinionem Paulus excludit, qui ait: *Nam etsi sunt qui dicantur dii, sive in coelo, sive in terra*

(1. Cor. 8, 5). Non dixit: Sunt dii, sed *sunt qui dicantur*. *Christus* autem, sicut scriptum est, *heri et hodie ipse est* (Hebr. 13, 8). *Est*, inquit, hoc est, non solum nomine, sed etiam veritate.

24. Et bene scriptum est: *Heri et hodie ipse est*; ut Arii impietas astruendi sacrilegii locum invenire non posset. Qui cum legeret in Psalmo secundo dicentem Filio Patrem: *Filius meus es tu, ego hodie genui te* (Psal. 2, 7); annotavit *hodie* non *heri*, ad aeternitatem divinae generationis referens, quod de carnis assumptione memoratum est, sicut Paulus in Actibus Apostolorum ait: *Et nos vobis annunciamus, quae ad patres nostros repromissio facta est; quoniam hanc Deus adimplevit filiis nostris, resuscitans Dominum Jesum Christum, sicut scriptum est in Psalmo secundo: Filius meus es tu, ego hodie genui te* (Act. 13, 32. 33). Sancto igitur Spiritu repletus Apostolus, ut illam elideret saevitatem, ait: *Heri et hodie ipse est, et in secula: heri*, propter aeternitatem: *hodie*, propter corporis susceptionem ¹⁾.

25. Est ergo Christus et est semper; qui

1) Ceterum *hodie* non inepte referri potest cum pluribus patribus ad aeternitatem, in qua neque prae-teritum, neque futurum est, sed tantum praesens.

enim est, semper est. Christus autem semper est, de quo dicit Moyses: *Qui est, misit me* (Exod. 3, 14). Erat utique Gabriel, erat Raphaël, erant angeli: sed semper esse, qui aliquando non fuerint, nequaquam pari ratione dicuntur. Christus autem, sicut legimus, *non fuit est et non: sed est in illo fuit* (2. Cor. 1, 19): unde vere Dei solius est esse, qui semper est.

26. Ergo si et nuncupativum Deum non audent dicere, et falsum eum dicere majoris est impietatis, restat ut Deus verus sit, veri Patris non dissimilis, sed aequalis. Qui cum et justificet et sanctificet quos velit (Rom. 9, 18), non foris assumens, sed in se habens sanctificandi potestatem, quomodo non est verus Deus? Nam Apostolus eum utique verum Deum dixit, qui naturaliter Deus esset, sicut habes: *Quia tunc, inquit, nescientes Deum, servistis his qui natura non erant dii* (Galat. 4, 8); hoc est, qui veri dii esse non poterant, quibus hoc naturaliter minime suppetebat.

CAPUT II.

Cum probatum sit Filium esse verum Deum, nec in eo minorem Patre; ostenditur per vocem *solus* cum in Scripturis de Patre dicitur, non excludi Filium;

quin imo hanc ei vocem prae cunctis et soli ipsi convenire. Trinitatem non inter omnia, sed super omnia solam esse: Filium vero solum facere, quae facit Pater, ac solum habere immortalitatem; nec proinde in verbis controversis eum a Patre separandum; licere tamen eum locum intelligere de incarnatione: ab illis demum Patrem ab hominum redemptione secludi, quod ab hoc Filium sejunctum volunt.

27. Verum copiose jam verum Deum Christum in superioribus libris Scripturarum lectionibus approbavimus. Ergo si Christus, ut edoctum est, Deus verus est, quaeramus quare ratione, cum solum verum Deum Patrem legant, a Patre Filium cupiunt separare.

28. Si dicunt quia verus Deus solus Pater est, negare non possunt quia et Filius solus Deus veritas est; quia Christus veritas est. Numquid veritas vero minor est, cum secundum appellationem nominum verus plerumque a veritate dicatur, sicut sapiens a sapientia, justus a justitia? Hoc nos inter Patrem non sentimus et Filium; quia et Patri nihil deest, quia Pater est verax: et Filius quia veritas est, aequalis est vero.

29. Ut sciant autem, cum *solum* legunt, nequaquam esse a Patre Filium separandum, meminerint in prophetis a Deo dictum: *Ego extendi coelum solus* (Isai. 44, 24). Et utique non extendit sine Filio Pater. Ipse enim

Filius qui sapientia Dei est, dicit: *Quando parabat coelum, cum ipso aderam* (Prov. 8, 27). Et Paulus de Filio dictum esse confirmat: *Initio terram tu fundasti, Domine, et opera manuum tuarum sunt coeli* (Hebr. 1, 10, et Psal. 101, 26). Sive ergo Filius coelum fecit, sicut et Apostolus voluit intelligi, et ipse utique non sine Patre coelum solus extendit, sive ut in Proverbiis habes: *Deus in sapientia fundavit terram, paravit autem coelos in intellectu* (Prov. 3, 19), ostenditur quia nec Pater solus sine Filio coelos fecit, nec sine Patre Filius; et tamen qui coelum extendit, solus dicitur.

30. Quam vero id et de Filio aperte intelligendum sit, quod solus appelletur, etsi nunquam, inscio Patre, aliquid fecisse credatur, etiam alibi habes, ubi scriptum est: *Extendens coelum solus, et ambulans quasi in pavimento super mare* (Job. 9, 8). Namque Evangelium Domini docuit nos, quod in mari non Pater, sed Filius ambulavit, quando Petrus rogavit eum dicens: *Domine, jube me venire ad te* (Matth. 14, 28). Sed etiam prophetia ipsa documento est; sanctus enim Job adventum Domini prophetabat, de quo vere dixit, quia magnum cetum erat debellaturus (Job. 3, 8), et factum est: nam feralem

illum cetum, diabolum scilicet, ultimis temporibus venerabili corporis sui passione prostratum perculit et afflixit (Isai. 27, 1).

31. Est ergo solus et verus Deus Filius; haec enim et Filio praerogativa defertur. De nullo namque qui creatus est, proprie dici potest, quia solus est. Nam cui inest communitas creaturae, quemadmodum quasi solus potest a ceteris separari? Itaque homo rationabilis videtur inter omnia terrena animalia, sed tamen non est solus rationabilis; scimus enim rationabilia esse et coelestia opera Dei, angelos et archangelos rationabiles confitemur. Si ergo angeli rationabiles, non utique solus rationabilis homo dicitur.

32. Sed dicunt solum dici posse solem, quia sol alter non est. At et ipse sol habet communia multa cum stellis, quod percurrit coelum, quod aetherae illius coelestisque substantiae est, quod creatura est, quod inter omnia Dei opera computatur, quod cum omnibus Deo servit, cum omnibus benedicit Deum, cum omnibus laudat (Psal. 148, 3). Non ergo solus proprie dicitur, quia nec a ceteris separatur.

33. Itaque cum Patris et Filii Spiritusque sancti Divinitati, quae sola non inter omnia, sed super omnia est, nulla possit creatura

conferri, ut de Spiritu interim assertio reser-
vetur: sicut Pater dicitur solus Deus verus,
cui nihil sit commune cum ceteris; ita etiam
solus est Filius imago veri Dei, solus dex-
tera Patris, solus virtus Dei atque sapientia.

34. Solus ergo Filius facit sicut et Pater,
quia scriptum est: *Quaecunque facio, ipse
facit* (Joan. 5, 19). Cum enim unum opus
sit Patris et Filii, bene de Patre et Filio di-
citur, quia Deus solus operatus est; unde
etiam cum creatorem dicimus, et Patrem et
Filium confitemur. Nam utique cum Paulus
diceret: *Qui servierunt creaturae potius
quam creatori* (Rom. 1, 25); nec Patrem
creatorem negavit, ex quo omnia haec; nec
Filium, per quem omnia.

35. A quo alienum utique non videtur, quia
scriptum est: *Qui solus habet immortali-
tatem* (1. Tim. 6, 16). Quomodo enim im-
mortalitatem non habet, qui vitam habet in
semetipso? Habet utique in natura, habet in
substantia; et habet non per gratiam tem-
poralem, sed per sempiternam Divinitatem:
habet non ex dono quasi servus, sed ex gene-
rationis proprietate quasi Filius coaeternus;
et habet sicut Pater. *Sicut enim Pater ha-
bet vitam in semetipso, ita et Filio dedit
vitam habere in semetipso* (Joan. 5, 26);

sicut habet, inquit, sic dedit. Didicisti supra quemadmodum dederit (Sup. lib. 4, cap. 6); ne putares esse gratiae largitatem, ubi generationis arcanum est. Cum ergo inter Patrem et Filium vitae nulla distantia sit, quemadmodum quod immortalitatem solus habeat Pater, Filius non habeat, aestimari potest?

36. Unde intelligant nec hoc loco a solo vero Deo Patre Filium separandum: quia probare non possunt, quod solus et verus Deus Filius non sit: cum praesertim et hic aut subaudiatur, ut diximus, et Christum verum solum Deum esse: aut certe aliud ad Divinitatem Patris et Filii, aliud ad incarnationem Christi relatum intelligendum sit; quia non est perfecta cognitio, nisi quae et secundum aeternitatem Unigenitum Deum verum Dei Filium Jesum Christum, et secundum carnem generatum ex Virgine confitetur. Quod alibi hic ipse evangelista nos docuit dicens: *Omnis spiritus qui confitetur Jesum Christum in carne venisse, de Deo est* (1. Joan. 4, 2).

37. Denique quam non alienum sit etiam incarnationis hoc loco intelligere sacramentum, docet nos ipsius series lectionis; sic enim habes: *Pater, venit hora, clarifica Filium tuum* (Joan. 17, 1). Utique cum et

horam venisse commemoret, et clarificari petat, quomodo nisi secundum carnis assumptionem locutum eum convenit aestimari? Nam nec ulla sibi temporum praescripta momenta Divinitas habet, nec clarificatione indiget lumen aeternum. Ergo in solo vero Deo Patre et Filium Dei solum verum secundum Divinitatis intelligimus unitatem, et in Jesu Christi nomine, quod ex Virgine natus accepit, incarnationis agnoscimus sacramentum.

38. Quod si cum solum verum Deum Patrem legunt, Filium cupiunt separare; ergo cum de Filii incarnatione legunt: *Hic est lapis qui reprobatus est a vobis aedificantibus, qui factus est in caput anguli*; et infra: *Non est aliud nomen sub coelo datum hominibus, in quo oporteat nos salvos fieri* (Act. 4, 11. 12), Patrem existimant ab impertiendae nobis salutis beneficio separandum. At neque sine Patre salus, neque vita aeterna sine Filio.

CAPUT III.

Arianis contra urgentibus deos induci duos ex unitate substantiae, respondetur pluralitatem ex diversitate potius inferri, proindeque in ipsos recidere suam accusationem. Diversitatem multiplicem in causa esse, cur duo homines unus homo dici non possint; cum tamen omnes homines singulariter homo dicantur,

ubi naturae unitas indicatur. Solam in his naturam unam esse; at omnimodam in personis divinis unitatem: a Patre igitur non separandum Filium; maxime cum ei debitam esse adorationem negare non audeant.

39. Sed asserunt ariani: Si solum verum Deum sicut Patrem, ita et Filium dicitis, et unius substantiae Patrem et Filium confitemini, non unum Deum, sed duos deos inducitis; quia qui unius substantiae sunt, non unus Deus, sed duo dii videntur esse, sicut duo homines, aut duae oves pluresve dicuntur: homo autem et ovis nec duo homines dicuntur, nec duae oves; sed unus homo et una ovis.

40. Haec ariani dicunt, et hac disputatione versuta simpliciores capere nituntur. Tamen si legamus Scripturas divinas, inveniemus pluralitatem magis in ea cadere, quae diversae discretaeque substantiae sunt, hoc est, ἑτεροουσία. Idque in Salomonis libris habemus expressum, eo loco scilicet in quo dixit: *Tria sunt autem impossibilia intelligere, et quartum quod non cognosco; vestigia aquilae volantis, et vias serpentis super petram, et semitas navis navigantis, et vias viri in juventute* (Prov. 30, 18 et 19). Utique aquila et navis et serpens unius non sunt generis atque naturae, sed differentis discre-

taeque substantiae, et tamen tria sunt. Contra se igitur sua esse intelligunt argumenta testimoniis Scripturarum.

41. Itaque dicendo Patris et Filii discretam esse substantiam differentemque Deitatem, duos utique ipsi deos asserunt: nos autem cum et Patrem confitemur et Filium, asserendo tamen unius esse Deitatis, non duos deos, sed unum Deum dicimus. Et hoc dominicis eloquiis approbamus; quia ubi plures sunt, ibi aut naturae aut voluntatum et operationum est differentia. Denique ut suis sibi testimoniis revincantur, duo homines dicuntur; quia licet unius naturae sint jure nascendi, tamen et tempore et cogitatione et opere et loco distant: et ideo non potest unus homo dici in significatione et numero duorum; quia unitas non est, ubi est diversitas: unus autem Deus dicitur, et Patris et Filii ac Spiritus sancti gloria et plenitudo signatur.

42. Denique tanta veritas unitatis est, ut etiam quando natura sola generationis aut carnis significatur humanae, et unus homo de multis dicatur, sicut habes: *Dominus mihi adjutor, non timebo quid faciat mihi homo* (Psal. 117, 6), id est, non una persona hominis, sed una caro et una fragilitas generationis humanae. Et addidit: *Bonum est*

sperare in Domino, quam sperare in homine (Ibid. 8). Nec hic utique specialem hominem, sed generalem conditionem designavit. Denique statim subiecit de pluribus: *Bonum est confidere in Domino, quam confidere in principibus* (Ibid. 9). Sed ubi homo dicitur, naturae interdum, ut supra diximus, communis inter omnes unitas significatur: ubi principes, variarum quaedam differentia potestatum est.

43. Sed inter homines aut in hominibus unius alicujus rei unitas est, aut caritatis, aut cupiditatis, aut carnis, aut devotionis et fidei: generalis autem unitas, et quae in se secundum Divinitatis gloriam complectitur omnia, solius est Patris et Filii et Spiritus sancti ¹⁾.

1) Haec disputatio quamvis forte sufficiat ad retundendos crassioris intelligentiae arianos, nondum tamen satis explicat, quare Pater et Filius non possint dici duo dii, cum tamen Petrus et Paulus dici possint duo homines et non dicantur unus homo. Rationem magis propriam jam alibi reddidit, quod unitas naturae Patris et Filii non sit tantum specifica, ut penes homines, sed numerica plane, eadem enim numero non specie inest Patri et Filio. Hanc rationem hic non satis inculcat, quamvis ea inferri forte possit ex perfecta Filii cum Patre aequalitate, quam s. doctor semper urget. Haec enim supponit

44. Unde et Dominus cum diversitatem inter se hominum designaret, qui nihil habent inter se quod possit ad unitatem individuae substantiae pertinere: *In Lege vestra*, inquit, *scriptum est, quod duorum hominum testimonium verum est* (Joan. 8, 17). Et cum praemisisset: *Duorum hominum testimonium verum est*; ubi venit ad suum et Patris testimonium, non dixit: Verum est testimonium nostrum, quia duorum deorum testimonium est; sed: *Ego*, inquit, *sum qui testimonium perhibeo de me ipso, et testimonium perhibet de me, qui misit me, Pater* (Ibid. 18). Supra quoque similiter ait: *Et si judico ego, judicium meum verum est; quia solus non sum, sed ego et qui misit me Pater* (Joan. 8, 16). Itaque et infra et supra et Patrem significavit et Filium, nec pluralitatem admiscuit, nec divinae unitatem substantiae separavit.

45. Evidens est igitur, quia quod unius

eandem plane naturam divīnam debere esse in Patre et Filio, nullatenus vero patitur, ut natura inferior sit in Filio, ut contendebant ariani. Admissa autem semel perfecta Filii cum Patre aequalitate facilis est gradus ad inferendam naturae in utroque indentitatem, tum quia notio naturae, quae est ipsa entis plenitudo, exigit unitatem, tum quia ipsi ariani naturae proprie divinae unitatem non negarunt.

est substantiae, separari non potest; etiamsi non sit singularitatis, sed unitatis. Singularitatem hanc dico, quae graece μονότης dicitur. Singularitas ad personam pertinet, unitas ad naturam. Ea vero quae diversae substantiae sunt, non solum unum, sed etiam plura dici solere licet jam et prophetico claruerit testimonio, expressius tamen ipse Apostolus declaravit dicens: *Nam et si sunt qui dicantur dii, sive in coelo, sive in terra* (1. Cor. 8, 5). Vides igitur quia hi, qui ex diversis substantiis sunt, et non ex unius veritate naturae, dii appellantur? Pater autem et Filius quia unius substantiae sunt, non duo dii, sed *unus Deus Pater ex quo omnia, et unus Dominus Jesus Christus, per quem omnia*. Unus, inquit, Deus Pater, et unus Dominus Jesus; et supra: *Unus Deus, non duo dii*; et infra: *Unus Dominus, et non duo* (Ibid. 4 et 6).

46. Pluralitas ergo excluditur, non unitas sequestratur (Sup. lib. 2. cap. 5). Sed quemadmodum cum legimus Dominum Jesum, nec Patrem, ut supra diximus, a dominationis jure secernimus, quod ei commune cum Filio est: ita cum legimus solum verum Deum Patrem, nec Filium a solius veri Dei jure

possumus separare, quod ei commune cum Patre est.

47. Aut dicant quid aliud sentiant, quidve arbitrentur, cum legimus: *Dominum Deum tuum adorabis, et ipsi soli servies* (Matth. 4, 10); utrum Christum non adorandum, et Christo non existiment serviendum? Quod si illa, quae adoravit eum chananaea, impetrare meruit quod poposcit (Matth. 15, 25); et Paulus apostolus, qui servum se Christi prima scriptorum suorum praefatione profitetur, Apostolus esse meruit, non ab hominibus neque per hominem, sed per Jesum Christum (Rom. 1, 1); dicant quid arbitrentur sequendum, utrum cum Ario malint sibi societatem esse perfidiae, ut solum et verum Deum Christum negando, ostendant quia nec adorandum eum, nec serviendum ei judicent: an vero consortium malint habere cum Paulo, qui serviendo atque adorando etiam Christum, utique solum verum Deum voce affectuque non diffitebatur, quem pio servitio fatebatur.

CAPUT IV.

Objiciebatur ab haereticis Christum Patri adorationem exhibuisse. At reponitur et hoc referendum ad humanitatem, ut ex loci examine manifestatur; illic tamen addita esse Divinitatis testimonia, quod in aliis etiam Christi operibus factum videmus.

48. (*Al. cap. II.*) Quod si quis dicat, quoniam Deum Patrem adorat et Filius, quia scriptum est: *Vos adoratis quod nescitis, nos adoramus quod scimus* (Joan. 4, 22); consideret quando, et apud quem, et cujus suscepto loquatur affectu.

49. Denique et in superioribus non immerito praemisum est, quia Jesus fatigatus ex itinere sedebat, et a samaritana bibere postulabat (Ibid. 6 et 7); quia secundum carnem hominis loquebatur: nam secundum Divinitatem nec fatigari poterat, nec sitire.

50. Deinde cum samaritana quasi judaeum appellaret, et prophetam putaret, quasi judaeus qui spiritaliter mysteria Legis doceret, respondit: *Vos adoratis quod nescitis, nos adoramus quod scimus. Nos*, inquit, hoc est, se hominibus copulavit. Quomodo autem nisi secundum carnem hominibus copulatur? Et ut ostenderet, quia secundum incarnationem responderat, addidit: *Quia salus ex judaeis est* (Joan. 4, 22).

51. Sed statim post hoc sequestravit hominis affectum, dicens: *Veniet hora et nunc est, quando veri adoratores adorabunt Patrem* (Ibid. 23). Non dixit: Adorabimus. Quod utique dixisset, si consortium nostri subiret obsequii.

52. Verum cum legerimus quod Maria adoravit eum (Matth. 28, 9), intelligere debemus, quod non potest pereandem naturam et adorare quasi servus et adorari quasi Dominus: sed potius quia ut homo inter homines adorare dicitur, et quasi Dominus a famulis adoratur.

53. Multa ergo secundum incarnationis legimus et credimus sacramentum, sed in ipsa naturae humanae affectione majestatem licet spectare divinam. Fatigatur ex itinere Jesus, ut reficiat fatigatos: petit bibere, sitientibus potum spiritalem daturus: esurit, cibum salutis esurientibus traditurus; moritur, vivificaturus: sepelitur, resurrecturus: tremulo pendet in ligno, confirmaturus tremantes: coelum caligine obducit, ut illuminet: terras tremefacit, ut solidet: maria conturbat, ut mitiget: reserat tumulos mortuorum, ut ostendat domicilia esse vivorum: creatur ex Virgine, ut ex Deo natus esse credatur: nescire se simulat, ut scire faciat nescientes: adorare quasi judaeus dicitur, ut quasi verus Deus Filius adoretur.

CAPUT V.

Dominica ad Zebedaei filiorum matrem verba ingerentibus Ambrosius respondet, quod Christus maestitia illam afficere noluerit, clementiae fuisse. Afferitur

hujusce indulgentiae causa multiplex. Maluisse igitur Dominum petitionis illius concessionem ad Patrem remittere, quam eandem impossibilem pronunciare; nec tamen Christo incommodare suum responsum, tum ex ipsis ejusdem verbis, tum ex aliorum locorum comparatione ostenditur.

54. Quomodo, inquiunt, Filius Dei solus verus Deus potest esse similis Patri, cum ipse dixerit filiis Zebedaei: *Calicem quidem meum bibetis, sedere autem ad dexteram meam vel ad sinistram non est meum dare vobis, sed quibus paratum est a Patre meo* (Matth. 20, 23)? Hoc igitur vestrum divinae, ut vultis, inaequalitatis est argumentum; cum in eo magis venerari Domini clementiam, adorare gratiam deberetis: si tamen virtutis atque sapientiae Dei profunda secreta possetis advertere.

55. Considerata enim quae cum filiis et pro filiis petat. Mater est utique, cui pro filiorum honore sollicitae immoderatio quidem, sed tamen ignoscenda mensura votorum est. Atque mater aetate longaeva, studio religiosa, solatio destituta: quae tunc temporis quando vel juvanda vel alenda foret validae prolis auxilio, abesse, sibi liberos patiebatur, et voluptati suae mercedem sequentium Christum praetulerat filiorum: qui prima voce vo-

cati a Domino, ut legimus, relictis retibus et patre, secuti sunt eum (Matth. 4, 22).

56. Haec igitur studio maternae sedulitatis indulgentior, obsecrabat Salvatorem, dicens: *Dic ut sedeant hi duo filii mei, unus ad dexteram tuam, et alter ad sinistram in regno tuo* (Ibid. 20, 21). Etsi error, pietatis tamen error est; nesciunt enim materna viscera patientiam: etsi voti avara, tamen veniabilis cupiditas, quae non pecuniae est avida, sed gratiae: nec invereconda petitio, quae non sibi, sed liberis consulebat. Matrem considerate, matrem cogitate.

57. Sed nihil mirum si vilis vobis videtur circa filios affectus parentum, qui etiam omnipotentis Patris vilem putatis esse circa Unigenitum Filium caritatem. Dominus coeli atque terrarum verecundabatur (ut secundum assumptionem carnis et virtutes animae loquar) verecundabatur, inquam, et ut ipsius verbo utar, confundebatur matri pro filiis postulanti etiam suae sedis consortium denegare: vos aeterni Dei Filium proprium interdum pro ministerio stare contenditis, interdum famulatorium, hoc est, non ex maiestatis unitate, sed ex Patris praeceptione vultis ejus esse consessum; et negatis hoc

Deo vero Dei Filio, quod ille hominibus aperte noluit denegare.

58. Considerabat enim matris dilectionem, quae filiorum mercede grandaevam solabatur senectam, et desideriiis licet fessa maternis, carissimorum pignorum tolerabat absentiam.

59. Considerate etiam feminam, hoc est, sexum fragiliorem, quem Dominus propria nondum confirmaverat passione. Considerate, inquam, Evae illius primae mulieris heredem transfusa in omnes immoderatae cupiditatis successione labentem, quam Dominus adhuc proprio sanguine non redemerat, nondum inolitam affectibus omnium immodici contra fas honoris appetentiam suo cruore diluerat. Hereditario igitur mulier delinquebat errore.

60. Et quid mirum si mater pro filiorum suorum, quod est tolerabilius quam pro se, quando etiam apostoli ipsi inter se, sicut legimus, de sui praelatione certabant (Luc. 22, 24)?

61. Non debuit igitur medicus omnium destitutam matrem et aegram adhuc mentem pudoris convicio sauciare; ne postulato sibi superbius denegato, quasi immoderatae petitionis damnata moereret.

62. Denique Dominus, qui honorandam sciret esse pietatem, non mulieri, sed filiis

ejus respondit dicens: *Potestis bibere calicem, quem ego bibiturus sum?* Dicentibus autem illis: *Possumus*; ait illis Jesus: *Calicem quidem meum bibetis; sedere autem ad dexteram meam, vel ad sinistram non est meum dare vobis, sed quibus paratum est a Patre meo* (Matth. 20, 22. 23).

63. Quam patiens et clemens Dominus, quam alta sapientia et bona caritas! Volens enim ostendere, quia non perfunctoriam rem aliquam discipuli postularent, sed eam, quam impetrare non possent, praerogativam ejus paternae honorificentiae reservavit: non metuens, ne quid juri proprio derogaret, *qui non rapinam arbitratus est esse se aequalem Deo* (Philip. 2, 6); simul diligens discipulos, quia, sicut habes, *usque in finem dilexit eos* (Joan. 13, 1), noluit iis quos diligeret, videri quod peterent denegasse: sanctus et bonus Dominus, qui mallet aliquid dissimulare de jure, quam de caritate deponere. *Caritas enim patiens est, benigna est, non aemulatur, non quaerit quae sua sunt* (1. Cor. 13, 4).

64. Denique ut agnoscatis non infirmis, sed indulgentiae esse, quia dixit: *Non est meum dare vobis*; ubi sine matre filii Zebedaei rogant, nihil de Patre dixit; sic enim

habes: *Non est meum dare vobis, sed quibus paratum est* (Marc. 10, 40). Ita Marcus evangelista posuit. Ubi vero mater pro filiis rogat, hoc est, secundum Matthaeum: *Non est, inquit, meum dare vobis, sed quibus paratum est a Patre meo* (Matth. 20, 23); hic addidit: *A Patre meo*; quia majorem indulgentiam maternus poscebat affectus.

65. Quod si putant, dicendo: *Quibus paratum est a Patre meo*, quia aut Patri plus tribuit, aut sibi aliquid derogavit, dicant utrum et illic putent Patri aliquid derogatum, quia dixit in Evangelio Filius de Patre: *Pater non judicat quemquam* (Joan. 5, 22).

66. Quod si sacrilegum putamus credere, quia Pater ita judicium detulit Filio, ut ipse non habeat; habet enim, nec potest amittere quod habet naturaliter divina majestas: sacrilegum utique aestimare debemus, quia non potest Filius dare quidquid aut homines mereri possunt, aut quaevis accipere creatura; praesertim cum ipse dixerit: *Ego ad Patrem vado, et quodcunque ab eo petieritis in nomine meo, hoc faciam* (Joan. 14, 12. 13). Si enim quod Pater dare potest, Filius non potest, mentita est ergo Veritas, et non potest facere quidquid in nomine ejus Pater fuerit obsecratus. Nec enim ideo dixit:

Quibus paratum est a Patre meo, ut tantummodo a Patre poscatur: nam omnia, quaecunque a Patre fuerint postulata, se donare memoravit. Denique non dixit: Quodcunque a me petieritis, hoc faciam; sed: Quodcunque ab eo petieritis in nomine meo, hoc faciam.

CAPUT VI.

Accuratius propositam soluturus objectionem, contendit memoratam petitionem, si modo in se impossibilis non fuit, possibilem fuisse Christo; maxime cum ipsi omne iudicium Pater dederit, quod sine ulla imperfectionis nota intelligendum. Attamen idem postulatum inter impossibilia censendum probat. Quod ut omnino esset possibile, tunc responsum Christi secundum naturam humanam accipiendum tradit, ac loci explicatione declarat. Denique iterum suam confirmat de sessionis hujus impossibilitate responsionem.

67. Quaero nunc utrum possibile aliquid humanae conditioni, aut alicui creaturae, an impossibile putent a Zebedaei conjuge et filiis postulatum? Si possibile, quomodo ad sinistram suam vel ad dexteram impertiendae apostolis sedis non habuit potestatem, qui omnia fecit esse, quae non erant? Aut quomodo non poterat judicare de meritis hominum, cui Pater dedit omne iudicium?

68. Notum est quemadmodum dederit

Joan. 5, 22) : nam quomodo quasi indigens accepit Filius, qui omnia creavit ex nihilo? Quorum igitur naturas fecerat, eorum iudicium non habebat? Dedit autem Pater Filio omne iudicium; *Ut omnes, inquit, honorificent Filium, sicut honorificant Patrem* (Ibid. 23). Non igitur potentia Filii, sed cognitio nostra proficit: neque aliquid ad substantiam ejus accedit, sed ad nostram utilitatem, quod a nobis cognoscitur; ut cognoscendo Dei Filium, vitam habeamus aeternam.

69. Cum autem in cognitione Filii Dei honor illius, noster autem non illius sit profectus; si quis putat, quia Dei virtus illo honore cumulatur, necesse est etiam Deum Patrem credat posse cumulari; quia et ipse per cognitionem nostram clarificatur sicut Filius, juxta quod scriptum est, dicente Filio: *Ego te clarificavi super terram* (Id. 17, 4). Ergo si possibile aliquid erat quod petebatur, in potestate utique Filii fuit.

70. Sed tamen ostendant, si possibile putant, qui de hominibus aut ceteris creaturis aut ad dexteram, aut ad sinistram Dei sedeant; Pater enim dicit Filio: *Sede ad dexteram meam* (Psal. 109, 1). Itaque si quis ad dexteram Filio sedet, inter ipsum utique et Pa-

trem, ut humano usu loquamur, Filius medius reperitur.

71. Non ergo possibile homini aliquid petebatur, sed noluit dicere quod homines sedere secum non possint; siquidem divinam suam gloriam celari, priusquam resurgeret, non divulgari cupiebat. Nam et supra cum inter famulos suos Moysen et Eliam apparuisset in gloria, monuerat discipulos ne cui dicerent, quod vidissent (Matth. 17, 9).

72. Itaque si possibile non erat hominibus vel creaturis ceteris hoc mereri, non debet videri Filius minus posse, quia non dedit apostolis, quod nec Pater hominibus vel creaturis ceteris dedit. Aut dicant cui horum dederit Pater. Non utique angelis, de quibus Scriptura dicit, quia omnes angeli stabant in circuitu sedis (Apoc. 7, 11). Denique Gabriel se stare dixit, sicut habes: *Ego sum Gabriel, qui adsto ante Dominum* (Luc. 1, 19).

73. Non ergo angelis, non senioribus qui adorant sedentem; illi enim non super sedem majestatis sedent: sed, ut dixit Scriptura, in circuitu sedis; sedes enim aliae viginti et quatuor sunt, ut habes in Apocalypsi Joannis: *Et supra sedem viginti quatuor seniores sedentes* (Apoc. 4, 4). In Evangelio quo-

que ipse Dominus dicit: *Cum sederit Filius hominis in sede majestatis suae, sedebitis et ipsi super sedes duodecim, judicantes duodecim tribus Israël* (Matth. 19, 28). Non ergo sedis suae dixit apostolis dari posse consortium, sed alias illas sedes esse duodecim; quas tamen non pro corporali consensu, sed pro successu ¹⁾ spiritualis gratiae aestimare debemus.

74. Denique in libro Regnorum dixit Michaeas propheta: *Vidi Dominum Deum Israël sedentem super thronum suum, et omnis militia coeli stabat circa eum, ad dexteram ejus et ad sinistram* (3. Reg. 22, 19). Quomodo igitur stantibus angelis ad dexteram vel ad sinistram Domini Dei, stante omni militia coelesti, sedebunt homines ad dexteram Dei, vel ad sinistram, quibus pro virtutis praemio angelorum similitudo promittitur, sicut Dominus dicit: *Eritis sicut angeli in coelo* (Matth. 22, 30)? Sicut angeli, dicit, non plus quam angeli.

75. Si ergo nihil plus dedit Pater quam

1) *Pro successu.* Illas sedes duodecim apostolis tribuendas non debemus intelligere sensu literali de sedibus materialibus, sed sensu spirituali de fructu, praemio ipsorum meritis ex gratia ortis a Christo parato.

Filius, nihil utique minus dedit Filius quam Pater: nihil igitur minus Filius potest quam Pater.

76. Ponite tamen possibile impetratu hominibus quod posceretur, quid est quod ait: *Sedere autem ad dexteram meam vel ad sinistram non est meum dare vobis* (Matth. 20, 23)? Quid est *meum*? Supra dixit: *Calicem quidem meum bibetis*; et infra posuit: *Non est meum dare vobis*; et supra *meum*, et infra *meum* dixit, nec immutavit. Ergo superiora docent propter quid dixerit *meum*.

77. Rogatus enim a muliere quasi homo, ut ad dexteram vel ad sinistram suam filios ejus sedere pateretur; quia illa quasi hominem rogaverat, et Dominus quasi tantummodo homo de sua passione respondit: *Potestis bibere calicem, quem ego bibiturus sum* (Matth. 20, 22)?

78. Itaque quia secundum carnem de passione sui corporis loquebatur, demonstrare voluit quod secundum carnem quidem subeundae passionis nobis exemplum ac similitudinem derelinqueret, secundum humanam autem conditionem non sedis supernae consortia donaret. Hoc est enim quod dixit: *Non est meum*; sicut alibi: *Mea doctrina non est mea* (Joan. 7, 16); non est enim,

inquit, secundum carnem meam: quia quae divina sunt, non sunt carnis eloquia.

79. Indulgentiam autem suam circa discipulos quos diligeret, quam expresse revelavit, praemittens: *Calicem quidem meum bibetis?* Etenim quia non debebat id dare quod petierant, aliud proposuit; ut prius commemoraret quid iis tribueret, quam quid negaret: quo magis aequitatem sibi petitionis, quam studium dominicae liberalitatis intelligerent defuisse.

80. *Calicem quidem*, inquit, *meum bibetis* hoc est, passionem quidem, quae carnis meae est, non negabo; quod enim humanae assumptionis habeo, potestis imitari: donavi vobis victoriam passionis, hereditatem crucis: *Sedere autem ad dexteram meam, vel ad sinistram non est meum dare vobis.* Non dixit: Non est meum dare; sed: *Non est meum dare vobis*, hoc est, non sibi potestatem deesse asserens, sed meritum creaturis.

81. Accipe aliter: *Non est meum dare vobis.* Quod est: *Non est meum*, qui veni humilitatem docere: *Non est meum*, qui veni non ministrari, sed ministrare: *Non est meum*, qui iustitiam servo, non gratiam.

82. Denique ad Patrem referens, addidit: *Quibus paratum est*; ut ostenderet Patrem

quoque non petitionibus deferre solere, sed meritis, quia Deus personarum acceptor non est (Act. 10, 34). Unde et Apostolus ait: *Quos praescivit, et praedestinavit* (Rom. 8, 29); non enim ante praedestinavit, quam praesciret: sed quorum merita praescivit, eorum praemia praedestinavit ¹⁾.

1) Quam clare tuetur hic s. doctor sententiam de praedestinatione ad gloriam *post praevisa merita gratiae*, quae dici potest inter patres *communis*; neque enim vel unus afferri potest, qui ita clare doceat, Deum praedestinare adultos *ante praevisa merita supernaturalia*. Quae enim testimonia afferri solent, vel excludunt merita naturalia, vel agunt de praedestinatione adaequate spectata, scil. ad gratiam et ad gloriam seu ad universum ordinem supernaturalem, quae certe est gratuita. Ceterum patres praesertim dum explicant haec verba Christi: *Non est meum dare* etc. Matth. 20, 23. magno consensu nostram tuentur sententiam. Ita Hieronymus l. 2. c. Jovin. 28. et in h. l., ubi ita illum interpretatur: „Regnum coelorum non est dantis, sed accipientis. Non est enim acceptio personarum apud Deum: sed quicumque talem se praebuerit, ut regno coelorum dignus fiat, hic accipiet, *quod non personae, sed vitae* paratum est. Si itaque tales estis qui consequamini regnum coelorum, quod Pater meus triumphantibus et victoribus praeparavit, vos quoque accipietis illud.“ Epiphanius haer. 69. n. 58; Chrysostomus hom. 65. n. 3., hom. 8. contra anomoeos de petitione filiorum Zebedaei; Caesarius (vel qui unque alius auctor) dial. 3. interrog. 131;

83. Jure igitur reprehenditur mulier, quae et impossibilia et speciali quodam privilegio

Cyrillus alex. thesauri assert 26: „Non est meum dare: non quod id praestare non posset, sed quia praemia certantium laboribus proportionem quadam respondere debent. Proinde ac si quis iis, qui ad certamen vocati sunt, praemia proponens dicat: Non est meum, boni viri, summum praemium rapere, et cui libuerit conferre, neque enim idcirco curriculi terminos statui; sed ille hoc auferet, qui reliquos vincendo summo honore affici meritus fuerit. Ita et Servator iniquum esse censuit summum honorem petentibus prompte conferre, repulsis iis, quibus legitime debetur; iis enim deferri aequius est, quibus praescientia Patris ob virtutum recteque factorum excellentiam eum praeparavit.“ Basilius or. 24., qui inter alia ita praeclare disserit: „Si thronum quis petat et regnum quaerat et sedere ad dexteram affectet, tunc quid possum curiose dispicio, fusos pro pietate sudores testes reposco: nam horum merces est in meo versari consessu. Si reperero quod his condignum sit, tunc est meum dare: vocat enim dantis potestatem accipientis merita. Ideo non est meum dare, sed Patris est dare, sed iis quibus paratum est a Patre meo. Pater dum probat, parat: non leviter effundit gratiam, sed munus recondit. Non est meum dare. Neque enim Patris est temere gratisque talia largiri. Propterea martyrium perferenti regnum concedo.“ Cf. etiam l. 4. contra Eunomium (Mig. 29, 710). Nec ab horum patrum sententia dissentit praeclara Augustini expositio in Ps. 126. n. 5.: „Quid est, non est meum dare vobis? Non est meum dare superbis: hoc enim adhuc erant; sed

ab eo Domino postulavit, qui ea quae sanctis judicavit esse donanda, non duobus apostolis, sed omnibus discipulis, etiam sine cujusquam precatione, voluntaria sui largitate contulerit, sicut scriptum est: *Duodecim vos sedebitis super sedes, judicantes duodecim tribus Israël* (Matth. 19, 28).

84. Ergo etiamsi possibile putemus postulatum fuisse, calumniae locus non est; tamen cum legerim Seraphim stare (Isai. 6, 2), quomodo possum quod homines ad dexteram vel ad sinistram Filio Dei sedeant, arbitrari? Supra Cherubim Dominus sedet, sicut habes:

si vultis accipere, nolite esse quod estis. Aliis paratum est; et vos alii estote et vobis paratum est.^a Quam expositionem sequuntur Beda in h. l. et in Marci 10, 40; Paulus diaconus hom. 85; Rabanus Maurus et Christianus Druthmarus in h. l. (Mig. 106, 1425). Ea autem, ut id obiter innuamus, aequivalenter continet notum illud axioma: *Si non es praedestinatus, fac ut praedestineris*: quare hoc axioma censi potest non solum *verum*, uti est, sed et *augustinianum*, quod tantus doctor illud suo suffragio approbaverit. Ceterum mirum esse non debet, quod s. Ambrosius tam prolixè hanc versetur arianorum exceptionem. Nam ut patet ex aliorum patrum scriptis, ariani eam admodum urgebant eique multum fidebant. Nemo vero non miretur Ambrosii in ea solvenda ingenii solertiam atque dexteritatem.

Qui sedes super Cherubim, appare (Psal. 79, 2); quomodo apostoli super Cherubim sedebunt?

85. Et hoc tamen colligo non ex meo ingenio, sed ex dominicae vocis oraculo; ipse enim Dominus in posterioribus apostolos commendans Patri, ait: *Pater, quos dedisti mihi, volo ut ubi ego sum, et illi sint mecum* (Joan. 17, 24). Utique si judicasset quia divinam sedem Pater hominibus daret, dixisset: Volo ut ubi ego sedeo, et illi sedeant mecum; Sed: *Volo, inquit, ut sint mecum*, non ut sedeant mecum; et: *Ubi ego*, non quomodo ego.

86. Deinde sequitur: *Ut videant claritatem meam*. Nec hic dixit: Ut habeant claritatem meam, sed: *Ut videant*; servus enim videt, Dominus possidet, sicut et David docuit dicens: *Ut videam voluptatem Domini* (Psal. 26, 4). Et ipse Dominus in Evangelio revelavit asserens: *Beati mundi corde, ipsi enim Deum videbunt* (Matth. 5, 8). *Videbunt*, inquit, non super Cherubim cum Deo sedebunt.

87. Desinant ergo viliora secundum Divinitatem aestimare de Dei Filio; ne viliora quoque de Patre aestiment. Qui enim male crediderit de Filio, non potest bene sentire

de Patre: qui male crediderit de Spiritu, non potest bene sentire de Filio. Ubi enim una dignitas, una gloria, una caritas, una majestas est; in commune derogatur, quidquid in aliquo putaveris derogandum: jam enim non erit plenitudo quam discernas et divides in aliquas portiones.

CAPUT VII.

Objectio petita ex hoc loco: *Dilexisti eos, sicut et me dilexisti*, ut diluatur, primo arianorum expositio-
nis impietas demonstratur, deinde comparantur eadem
verba cum similibus, ac demum totus locus conside-
ratur. Hinc deducitur Christi missionem, etsi se-
cundum carnem accipienda est, illi non officere. Quo
probato, qui fiat divina missio describitur.

88. (*Alias cap. III.*) Existunt tamen, im-
perator Auguste, qui hanc divinae unitatem
substantiae negare cupientes, extenuare stu-
deant Patris et Filii caritatem; quia scriptum
est: *Et dilexisti eos, sicut et me dilexisti*
(Joan. 17, 23). Quod cum dicunt, quid aliud
agunt, nisi inter Dei Filium et homines ae-
qualitatem quandam comparisonis indu-
cunt?

89. Numquid sic diligi possunt a Deo ho-
mines quemadmodum Filius, in quo com-
placuit Pater? Ille per se complacet, nos per

ipsum: in quibus enim Deus Filium suum ad imaginem suam cernit, eos per Filium adsciscit in gratiam filiorum; ut quemadmodum per imaginem ad imaginem sumus, sic per generationem Filii in adoptionem vocemur. Alius igitur naturae amor sempiternus, alius gratiae.

90. Aut si ex verbis faciunt quaestionem, quia scriptum est: *Et dilexisti eos, sicut et me dilexisti*; et comparisonem factam putant: ergo et illud comparative dictum putant: *Estote misericordes, sicut et Pater vester qui est in coelis, misericors est* (Luc. 6, 36); et alibi: *Estote perfecti, sicut et Pater meus qui in coelis est, perfectus est* (Matth. 5, 48). Quod si ille secundum plenitudinem majestatis suae perfectus est, nos autem perfecti secundum virtutis accedentis profectum; etiam Filius diligitur a Patre secundum semper manentis plenitudinem caritatis: in nobis autem caritatem Dei virtutis emeretur profectus.

91. Vides igitur quam gratiam Deus dederit hominibus, et tu Patris et Filii vis dissolvere naturalem et individuum caritatem; et tu verba adhuc discutis, ubi unitatem majestatis advertis?

92. Vide totum hunc locum, ex cujus af-

fectu loquatur: habes enim dicentem ipsum: *Clarifica me, Pater, claritate ea quam habui, priusquam mundus esset, apud te* (Joan. 17, 5). Vide quia ex primi hominis loquatur affectu; quia nobis ea petitione deprecatur, quae ante peccatum in paradiso homo meminere collata, ut et latroni in passione memoravit: *Amen, amen dico tibi, hodie mecum eris in paradiso* (Luc. 23, 43). Haec est ante mundum claritas. Mundum autem pro hominibus dixit, sicut habes: *Ecce mundus totus post ipsum abit* (Joan. 12, 19); et alibi: *Ut cognoscat hic mundus, quia tu me misisti* (Id. 17, 21).

93. Et tamen ut scires magnum Deum et salutarem et omnipotentem Dei Filium, indicium suae majestatis admiscuit dicendo: *Et mea omnia tua sunt, et tua mea* (Id. 17, 10). Omnia habet, et tu missum esse ad injuriam derivas?

94. Quid si secundum carnem non accipis missum (Rom. 8, 3), ut Apostolus dixit, et ex verbo simplici praejudicium struis, quo dicas inferiores a superioribus mitti solere: quid ad illa respondes, quia Filius ad homines missus est? Nam si minorem putas eum qui mittitur, eo videlicet a quo mittitur; disce quod et minor majorem misit, et ma-

jores ad minores missi sunt. Nam et Tobias Raphaëlem archangelum misit (Tob. 9, 3), et angelus ad Balaam missus est (Num. 22, 22), et Dei Filius ad judaeos.

95. Numquid ergo minor etiam judaeis Dei Filius, ad quos mittebatur? De ipso enim scriptum est: *Novissime autem misit eis Filium suum unicum dicens: Verebuntur Filium meum* (Matth. 21, 37). Et vide quia ante servos, postea Filium nominavit; ut scias quod Deus Filius unigenitus secundum Divinitatis potentiam nec nomen habet, nec consortium commune cum servis: reverendus mittitur, non cum famulis conferendus.

96. Et bene addidit *meum*, ut non unus de multis, nec degeneris naturae, nec minoris alicujus potestatis: sed verus a vero, et paternae imago venisse substantiae credetur.

97. Esto tamen, minor sit qui mittitur, eo a quo mittitur; ergo et Pilato minor Christus, quoniam Pilatus misit eum ad Herodem. Sed sermo non praejudicat ¹⁾ potestati:

1) *Sermo non praejudicat potestati.* Etiam si verbum *missus* penes homines forte aliquam imperfectionem includat, non tamen propterea quia Dei Filius dicitur *missus*, ejus minuitur potestas; cum enim res significatae non pendeant a verbis, verba etiam minus apta rebus significatis nequeunt inferre damnum.

Scriptura, quae missum dicit a Patre, missum dicit a praeside.

98. Unde si sobrie de Dei Filio quae digna sunt, opinemur, ideo missum intelligere debemus, quia ex illo incomprehensibili innarrabilique secreto majestatis profundae dedit se comprehendendum pro captu nostro mentibus nostris Dei Verbum, non solum cum se exinaniret, sed etiam cum habitaret in nobis, sicut scriptum est: *Quoniam inhabitabo in illis* (2. Cor. 6, 16). Denique et alibi habes quia Deus dixit: *Venite, descendamus et confundamus linguas eorum* (Gen. 11, 7). Non enim Deus de loco aliquando descendit, qui ait: *Ego coelum et terram compleo* (Jerem. 23, 24); sed in eo descendere videtur, si nostros Dei Verbum penetret affectus, sicut dixit propheta: *Parate viam Domino, rectas facite semitas ejus* (Isai. 40, 3); ut quemadmodum ipse promisit, veniens cum Patre apud nos faciat mansionem. Evidens est igitur quomodo veniat.

CAPUT VIII.

Christo in quantum verus est Dei Filius, Dominum non esse, sed in quantum homo est; ut verbis ejusdem modo Patrem modo Dominum compellantis signi-

ficatur. Quot haereses uno jugulentur Scripturae versiculo. Distinguenda igitur quae Christo vel ut Dei vel ut Davidis filio conveniant; illi enim sub ultimo tantum nomine adscribendum, quod servus fuerit. Ad extremum complures locos demonstrat non nisi secundum incarnationem accipi posse.

99. Unde et evidens est quomodo Dominum dicat, quem Patrem novit; ait enim: *Confiteor tibi, Pater, Domine coeli et terrae* (Matth. 11, 25.). Ante Patrem dixit Sapientia suum, postea creaturae Dominum nuncupavit. Itaque dominatum non esse ubi vera progenies est, ipse Dominus ostendit in Evangelio suo, dicens: *Quid vobis videtur de Christo? cujus Filius est? Dicunt ei: David. Ait illis Jesus: Quomodo ergo David in spiritu vocat eum Dominum, dicens: Dixit Dominus Domino meo: Sede a dextris meis?* Et addidit: *Si ergo David in spiritu vocat eum Dominum, quomodo filius ejus est? Et nemo poterat ei respondere verbum* (Id. 22, 42. seqq.).

100. O quam caute propter arianos etiam in hoc testimonio Dominus fidei prospexit! Non enim dixit: Vocat eum spiritus dominum: sed quia David dixit in spiritu; ut cujus secundum carnem filius est, David scilicet, ejus etiam secundum Divinitatem et Do-

minus et Deus crederetur. Vides igitur quia nomen pietatis et dominii discretum est.

101. Et bene Dominus suum quidem Patrem, coeli autem et terrae Dominum praedicavit; ut tu cum legis et Patrem et Dominum, intelligas Patrem Filii, et Dominum creaturae. In alio praerogativa naturae est, in alio auctoritas potestatis; formam enim servi accipiens, eo utique Dominum vocat, quo servitutem suscepit, aequalis in Dei forma, servus in corporis: servitus enim carnis, dominatus autem Divinitatis est. Unde et Apostolus ait: *Deus Domini nostri Jesu Christi, Pater gloriae* (2. Cor. 1, 3), hoc est, Deum assumptionis humanae asserens, Patrem autem gloriae. Num enim duos filios habuit Deus Christum et gloriam? Minime. Ergo si unus Dei Filius Christus, utique Christus est gloria. Quid autem ei derogas, qui Patris gloria est?

102. Si ergo et Filius gloria est, et Pater gloria; quia Pater gloriae non potest aliud esse quam gloria: non divisio gloriarum, sed una est gloria. Itaque ad proprietatem naturae gloria refertur, dominatus autem ad suscepti corporis servitutem. Si enim caro etiam justi animae subdita est, sicut scriptum est: *Castigo corpus meum, et servi-*

tuti redigo (1. Cor. 9, 27); quanto magis subjecta est Divinitati, de qua dicitur: *Quoniam universa serviunt tibi* (Psal. 118, 91)?

103. Una autem quaestione et sabellianos et photinianos et arianos Dominus exclusit. Nam cum Dominum dixisse Domino dicit, Sabellius excluditur, qui eundem Patrem vult esse quem Filium. Excluditur Photinus, qui secundum carnem iudicat ¹⁾; quia Dominus David regis non poterat esse, nisi qui Deus est; scriptum est enim: *Dominum Deum tuum adorabis, et illi soli servies* (Deut. 6, 13). Numquid contra Legem propheta sentiret, qui sub Lege regnaret? Excluditur Arius, qui Filium sedere audit ad dexteram Patris; ut si ex usu argumentetur humano, ipse se perimat, et venenum sacrilegae disputationis suae in se refundat, ut duminaequalitatem Patris et Filii ex consuetudine hominum interpretatur, in utroque a vero devius, eum praeferat cui derogat, confessurus priorem quem audit ad dexteram. Excluditur etiam Manichaeus; non enim negat esse se David filium secundum carnem; utpote qui clamantibus caecis: *Jesu fili David*,

1) Photinus Christum fuisse antequam carnem susciperet negat.

miserere nobis (Matth. 20, 30); et delectatus est fide, et stetit et curavit eos: sed negat hoc suae esse aeternitatis, si David solius filius a perfidis nominetur.

104. Nam Filius Dei est contra Hebionem ¹⁾, Filius David est contra Manichaeos: Filius Dei est contra Photinum, Filius David est contra Marcionem: Filius Dei est contra Paulum Samosatenum, Filius David est contra Valentinum: Filius Dei est contra Arium atque Sabellium gentilis erroris haeredes: Dominus David est contra judaeos, qui Dei Filium in carne cernentes, hominem tantummodo impio furore credebant.

105. Sed ecclesiastica fide et Dei Patris et David idem atque unus est Filius; quia incarnationis Dei mysterium universae salus est creaturae, secundum quod scriptum est: *Ut sine Deo pro omnibus gustaret mortem* (Hebr. 2, 9), id est, quod creatura omnis sine passione aliqua Divinitatis Domini sanguinis redimenda sit pretio, ut alibi habet: *Omnis creatura liberabitur a servitute corruptionis* (Rom. 8, 21).

1) Hebion Christum purum fuisse hominem contendebat. Circa humanam vero naturam Christi errabant Marcion et Valentinus: sicut et alii circa ejus naturam divinam.

106. Aliud est igitur secundum divinam substantiam, aliud secundum susceptionem carnis filium nominari: nam secundum generationem divinam Deo Patri aequalis est Filius, et secundum susceptionem corporis Deo Patri servus est; quia formam servi, inquit, accepit (Philip. 2, 7): unus tamen atque idem est Filius. Contra autem sancto patriarchae David secundum gloriam suam Dominus est, secundum corporalis successionis seriem filius est, non deficiens a se, sed nostrae jus sibi adoptionis acquirens.

107. Nec solum ex genere David servitutem suscepit in persona hominis; sed etiam ex nomine, sicut habes: *Inveni David servum meum* (Psal. 88, 21); et alibi: *Ecce ego mittam ad vos servum meum, Oriens nomen est ei* (Zach. 3, 8). Et ipse Filius ait: *Sic dicit Dominus, qui finxit me ex utero servum sibi, et dixit mihi: Magnum tibi est vocari puerum meum. Ecce posui te in testamentum generis mei, in lucem gentium; ut sis in salutem usque ad extremum terrae* (Isai. 49, 5. 6). Cui hoc dicitur, nisi Christo? qui cum in forma Dei esset, exinanivit se, et formam servi accepit (Philip. 2, 6. 7). Quid est in Dei forma, nisi in Divinitatis plenitudine?

108. Disce igitur quid sit: Formam servi accepit, id est, plenitudinem perfectionis humanae, plenitudinem obedientiae. Ideoque dicit in Psalmo trigesimo: *Statuisti in loco spatioſo pedes meos. Super omnes inimicos meos factus sum opprobrium. Illustra faciem tuam super servum tuum* (Psal. 30, 9, 12 et 17). Servus dictus est homo, in quo sanctificatus est: servus homo, in quo unctus est: servus homo in quo factus sub Lege, factus ex Virgine est; et ut compendio dicam, servus dictus est, in quo matrem habet, sicut scriptum est: *O Domine, ego servus tuus, ego servus tuus, et filius ancillae tuae* (Psal. 115, 16); et alibi: *Afflictus sum et humiliatus sum nimis* (Id. 37, 9).

109. Quis nimis humiliatus est, nisi Christus, qui venit ut omnes liberaret per obedientiam? *Sicut enim per inobedientiam unius hominis peccatores constituti sunt plurimi, ita et per unius obedientiam iusti constituentur multi* (Rom. 5, 19). Quis calicem salutarem accepit, Christus princeps sacerdotum, an David, qui neque sacerdotium habuit, neque passionem subiit? Quis sacrificavit hostiam laudis (Psal. 115, 13 et 17)?

110. Sed in hoc parum est, accipe aliud: *Custodi animam meam, quoniam ego san-*

ctus sum (Id. 85, 2). Numquid de se hoc diceret David? Sed ille dicit, qui ait: *Non derelinques animam meam in inferno, nec dabis Sanctum tuum videre corruptionem* (Id. 15, 10). Idem ergo utrumque dicit.

111. Addidit vero: *Salvum fac servum tuum* (Id. 85, 2); et infra: *Da potestatem puero tuo, et filio ancillae tuae* (Ibid. 16), et alibi, id est, in Ezechiële: *Et suscitabo super eos pastorem unum, et reget eos servus meus David. Ipse pascet eos, et erit eorum pastor: et ego Dominus ero illis in Deum, et servus meus David in medio eorum princeps* (Ezech. 34, 23 et 24). Utique David jam defunctus erat, filius Jesse. De Christo itaque dicit, qui propter nos filius ancillae factus est secundum formam hominis; nam secundum divinam generationem non matrem habet, sed Patrem: nec corporalis ventris est fructus, sed sempiterna Dei virtus.

112. Ergo etiam illud cum legimus, quia dixit Dominus: *Tempus meum nondum impletum est* (Joan. 7, 8); et: *Adhuc modicum vobiscum sum*; et: *Vado ad eum qui misit me* (Ibid. 33); et: *Clarificatus est Filius hominis* (Id. 13, 31), ad incarnationis sacramentum referre debemus. Cum autem legi-

mus: *Et Deus clarificatus est in eo, et Deus clarificavit eum* (Ibid.); quid ibi est quaestionis, ubi et Filius clarificatur a Patre, et Pater clarificatur a Filio?

113. Denique ut fidem unitatis et copulam Trinitatis aperiret, etiam ab Spiritu clarificandum esse se dixit, sicut habes: *Ille de meo accipiet, et clarificabit me* (Joan. 16, 14). Clarificat ergo Dei Filium etiam Spiritus sanctus. Quomodo igitur ipse dixit: *Si ego clarificavero me ipsum, claritas mea nihilum est* (Id. 8, 54)? Ergo nihil est claritas Filii? Sacrilegum est dicere, nisi referas ad carnem; quia ex persona hominis Filius loquebatur, eo quod comparatione Divinitatis nulla est carnis claritas.

114. Desinant igitur impie objicere, quod in suam perfidiam retorquetur. Dicunt enim: Scriptum est: *Nunc clarificatus est Filius hominis*. Non nego scriptum: *Clarificatus est Filius hominis*; sed videant quid sequatur: *Et Deus clarificatus est in eo*. Ego excusationem habeo de Filio hominis, ille de Patre non habet; quia Pater non suscepit carnem. Excusationem habeo, et non utor: ille non habet, et calumniatur. Aut simpliciter me patiatur intelligere, aut ad carnem referre quae carnis sunt. Pia mens, quae leguntur

secundum carnem Divinitatemque, distinguit: sacrilega confundit, et ad Divinitatis detorquet injuriam, quidquid secundum humilitatem carnis est dictum.

CAPUT IX.

Judaico more ordinem verborum: *In nomine Patris et Filii et Spiritus sancti*, objicientibus, praeter responsum quod vir sanctus indicat a se jam datum, regerit etiam Filium ante Patrem saepe locari.

115. (*Alias cap. IV.*) Quid quod etiam more judaico falsi et impudentes interpretes ariani verborum sunt divinorum, dicentes usque adeo aliam Patris, aliam Filii, aliam Spiritus sancti esse potestatem, ut scriptum sit: *Ite, docete omnes gentes, baptizantes eos in nomine Patris et Filii et Spiritus sancti* (Matth. 28, 19); et ex verborum ordine differentiam divinae faciunt potestatis?

116. Ego autem licet hoc ipsum testimonium in superioribus libris pro unitate asseruerim majestatis ac nominis, tamen si hinc faciunt quaestionem, possum testimoniis asserere Scripturarum in plerisque locis prius Filium nominatum, postea Patrem dictum. Numquid igitur quia Filii significatio ante praemissa est, verborum, ut ariani vo-

lunt, praejudicio Pater secundus a Filio est? Absit, inquam, absit. Nescit hunc ordinem fides, nescit discretum Patris et Filii honorem. Non legi, non audiui, nec aliquem in Deo inveni gradum. Nusquam secundum, nusquam tertium Deum legi: primum legi (Isai. 44, 6), primum ac solum audiui.

117. Si ordinis exigimus superstitionem, nec ad dexteram Patris sedere Filius debet, nec primum se et principium debuit dicere. Male ergo Evangelista prius a Verbo, quam a Deo coepit, dicens: *In principio erat Verbum, et Verbum erat apud Deum* (Joan. 1, 1). Etenim juxta humani ritus ordinem, prius Patrem debuit nominare. Nescivit etiam Apostolus ordinem, qui ait: *Paulus servus Christi Jesu, vocatus Apostolus, segregatus in Evangelium Dei* (Rom. 1, 1); et alibi: *Gratia Domini nostri Jesu Christi, et caritas Dei, et communicatio Spiritus sancti* (2. Cor. 13, 13). Si verborum persequamur ordinem, in primo Filium posuit, in secundo Patrem. Sed verborum ordo saepe mutatur; et ideo non debes vel de ordine, vel de gradu Patri Deo et Filio ejus facere quaestionem, cum secundum Divinitatem divisio nulla sit unitatis.

CAPUT X.

Arianos ad gentiles palam transire, dum obijciunt illa verba: *Qui in me credit, non in me credit*, etc. Verus loci sensus explicatur, et ne credatur Dominus nostram in ipsum fidem prohibuisse, alias ut Deus, alias ut homo locutus ostenditur. Mox variis ejusdem fidei effectibus prolatis in medium, alios quoque nonnullos locos eodem modo sumendos probat.

118. Ad extremum ut christianos se non esse manifestent, negant in Christum esse credendum, dicentes scriptum esse: *Qui in me credit, non credit in me, sed in eum qui me misit* (Joan. 12, 44). Hanc ego expectabam confessionem, quid me quibusdam ambagibus ludebatis? Sciebam mihi adversum gentiles esse contentionem: sed illi convertuntur, vos non convertimini. Illi si credant, salvum est sacramentum: vos perdidistis acceptum; et nec coeptum ¹⁾ fortasse, sed fictum.

1) *Nec coeptum*, forte *nec acceptum*, vel coeptum eodem sensu quo *acceptum* usurpat. Dubitat autem propterea de arianorum baptismo, quod forte mutaverint illius formam, quod mirum non esse debet saltem de nonnullis, quod inaequalitatem Filii cum Patre tantopere urgerent totque congererent in Filii injuriam, ut vel ex hac s. Ambrosii disputatione patet.

119. Scriptum est, inquiunt: *Qui in me credit, non in me credit, sed in eum qui me misit.* Sed videte quid sequatur, et videte sic quemadmodum se Dei Filius vult videri; sequitur enim: *Et qui videt me, videt eum qui me misit* (Joan. 12, 45), hoc est quia Pater videtur in Filio. Exposuit igitur id quod ante praemisit, quia ille credit in Filium, qui confitetur et Patrem. Nam qui Filium nescit, nec Patrem novit; omnis enim qui negat Filium, nec Patrem habet: qui confitetur Filium, et Filium et Patrem habet.

120. Quid est ergo: *Non credit in me?* Non in id quod corporaliter cernitis, non in hominem tantummodo, quem videtis: non enim in hominem tantummodo credendum asseruit, sed ut credas, quia Jesus Christus ipse est Dei Filius et homo. Propter quod et utrumque ait: *A me ipso non veni* (Id. 7, 28); et alibi: *Ego sum principium quod et loquor vobis* (Id. 8, 25). Quasi homo, a se non venit: quasi Dei Filius, non ex homine principium habet: sed sum, inquit, ipse *Principium quod et loquor vobis*: neque humana, sed divina sunt, quae locutus sum.

121. Neque enim fas est credere, quod negaverit in se esse credendum, cum ipse dixerit: *Ut omnis qui credit in me, in tene-*

bris non maneat (Id. 12, 46); et alibi: *Haec est enim voluntas Patris mei qui me misit, ut omnis qui videt Filium et credit in eum, habeat vitam aeternam* (Id. 6, 40); et alibi: *Creditis in Deum, et in me credite* (Id. 14, 1).

122. Nemo ergo Filium sine Patre accipiat, quia Filium legimus. Habet Patrem Filius, sed non temporalem, non ex passione, non ex conceptione, non ex gratia. Generationem legi, non legi conceptionem. Et Pater dicit *genui* (Psal. 2, 7) non dicit *creavi*: et Filius non creatorem suum Deum secundum aeternitatem divinae generationis, sed Patrem nominat.

123. Se quoque nunc ex persona hominis, nunc in Dei maiestate significat: nunc unitatem sibi Divinitatis cum Deo Patre vindicans, nunc fragilitatem humanae carnis assumens: nunc doctrinam suam se non habere, nunc voluntatem suam se non quaerere: nunc testimonium suum verum non esse, nunc verum esse significans. Nam ipse dixit: *Si ego testimonium perhibeo de me ipso, testimonium meum non est verum* (Joan. 5, 31). Et ipse in posterioribus ait: *Et si ego testimonium perhibeo de me, verum est testimonium meum* (Id. 8, 14).

124. Quomodo igitur non est verum testi-

monium tuum, Domine Jesu, cui qui credidit, in cruce licet positus, et inter confessi scele-
ris supplicia constitutus, merita latronis exuit,
praemia innocentis emeruit (Luc. 23, 41, et
seqq) ?

125. Deceptus est ergo Paulus, qui ideo
recepit oculos (Act. 9, 12), quia credidit, quos
amiserat, antequam crederet ?

126. Erravitne etiam Jesus Nave, qui du-
cem militiae coelestis agnovit (Josuë, 5, 13) ?
Sed posteaquam credidit, statim vicit, dignus
qui fidei praelio triumpharet. Denique non
aeratas acies in bella produxit, nec ariete ce-
terisque tormentorum machinis, sed tubarum
septem sacerdotalium sono, murorum hosti-
lium septa deposuit (Id. 6, 19). Ita bellum
immane confecit tubae clangor et infula sa-
cerdotis.

127. Vidit hoc meretrix, et quae in excidio
civitatis remedia desperaret salutis, quia fides
vicerat, signa fidei atque vexilla dominicae
passionis attollens, coecum in fenestra liga-
vit (Josuë 2, 18); ut species cruoris mystici,
quae foret mundum redemptura, vernaret. Ita
foris Jesu nomen fuit praeliantibus ad vi-
ctoriam, intus species dominicae passionis
periclitantibus ad salutem. Unde quia intelle-
xit Rahab coeleste mysterium, dicit Dominus

in Psalmo: *Memor ero Rahab et Babylonis scientium me* (Psal. 86, 4).

128. Quomodo ergo non est verum testimonium tuum, Domine, nisi secundum fragilitatem hominum? *Omnis enim homo mendax* (Id. 115, 2).

129. Denique ut secundum hominem dixisse se demonstraret, ait: *Qui misit me Pater ipse testimonium perhibet de me* (Joan. 8, 18). Verum autem est testimonium secundum Divinitatem, sicut ipse ait: *Et verum est testimonium meum; quia scio unde veni, et quo vado: vos autem nescitis unde veni, et quo vado. Vos secundum carnem judicatis* (Ibid. 14, 15). Non ergo secundum Divinitatem, sed secundum hominem judicant, qui putant Christo testificandi scientiam defuisse.

130. Ergo cum audis: *Qui credit in me, non credit in me; et: Qui misit me Pater, ipse mihi mandatum dedit* (Id. 12, 44 et 49); didicisti quo id putes esse referendum. Denique mandatum quod esset, ostendit dicens: *Pono animam meam, ut iterum sumam illam. Nemo tollit eam a me, sed ego pono eam a me ipso* (Id. 10, 17). Vides ideo dictum, ut ostenderet liberam sibi ponendae ac resumendae animae potestatem,

sicut ipse dixit: *Potestatem habeo ponendi eam, et potestatem habeo iterum sumendi eam. Hoc mandatum accepi a Patre meo* (Ibid. 18).

131. Sive igitur mandatum, sive, ut aliqui latini codices habent, praeceptum, non utique secundum Divinitatem, sed secundum incarnationem datur, ad subeundae victoriam passionis.

CAPUT XI.

Quod Christus legatur nihil a se loqui, hoc referendum ad ipsius humanitatem. Quomodo etiam secundum Divinitatem audire ac videre Patrem recte dicatur, exposito, Dei Filium creaturam non esse multis coacervatis argumentis evincit.

132. (Alias cap. V.) An vero in hanc humilitatem Dei Filium deducemus, ut nisi quae audierit, facere aut loqui nesciat: et praescriptam agendi loquendique ei putemus esse mensuram, quia scriptum est: *Ex me ipso non sum locutus*; et infra: *Sicut dixit mihi Pater, ita loquar* (Joan. 12, 49. 50)? Sed ad obedientiam carnis, aut ad fidem unitatis ¹⁾ ista referantur. Plerique enim doctio-

1) *Ad fidem unitatis.* Si haec et ejusmodi testimonia non intelligantur de Christo secundum huma-

res et audire Filium, et dicere aliquid Filio Patrem accipiunt per unitatem naturae; quod enim per unitatem voluntatis novit Filius Patrem velle, videtur audisse.

133. Unde non officium corporale, sed arbitrium indissociabile cooperationis declaratur; neque enim verborum hic aliquem significat auditum, sed unitatem voluntatis atque virtutis, quae et in Patre est et in Filio. Quam etiam in Spiritu sancto esse memoravit alio loco, dicens: *Non enim loquetur a se, sed quaecunque audit loquetur* (Joan. 12, 13); ut adverteremus, quia quidquid Spiritus loquitur, loquitur et Filius: et quidquid loquitur Filius, loquitur et Pater; quia una sententia et operatio Trinitatis est. Sicut enim Pater videtur in Filio, non utique specie corporali, sed unitate Divinitatis; ita etiam Pater loquitur in Filio, non temporali voce, nec corporali sono, sed operis unitate. Denique cum dixisset: *Pater qui in me manet, ipse loquitur: et opera quae ego facio, ipse facit* (Joan. 14, 10); addidit: *Credite mihi, quia*

nam ejus naturam, significant unitatem naturae, quae est in Patre et Filio, sed ita ut a Patre per generationem Filio sit communicata. Proinde significant Filium non esse a se, sed a Patre genitum.

ego in Patre, et Pater in me est. Alioquin propter opera ipsa credite (Ibid. 12).

134. Hic intellectus est noster secundum divinarum seriem Scripturarum: ariani autem qui nolunt de Deo aestimare quae digna sunt, vel apto suis meritis confutentur exemplo ¹⁾, ne totum carnaliter credant, cum ipsi patris sui diaboli opera incorporaliter videant. Sicut de eorum consortibus judaeis Dominus declaravit dicens: *Vos quod vidistis patrem vestrum facientem, facitis* (Id. 8, 38); cum utique non quia diabolum operantem viderint, sed quia arbitria ejus fecerint, arguantur, invisibiliter in his secundum iniquitatem suam diabolo operante peccatum. Hoc secundum Apostolum propter insipientiam posuimus perfidorum (2. Tim. 3, 9).

1) *Confutentur exemplo.* Ut ariani convincantur, non omnia, quae de Christo dicuntur, ad literam sed sublimiori saepe quodam sensu esse accipiendā, utar exemplo mordaci quidem, sed quo dignos se reddunt propter suum in Christum odium. Quae Christus de judaeis dicit: *Vos quod vidistis patrem vestrum facientem, facitis*, ea de arianis repetere licet. Jam vero haec non ad literam sunt intelligenda, sed de inspiratione daemonis et consensione judaeorum in illam. Ergo neque similia quae de Filio relate ad Patrem legimus ad literam sunt intelligenda, sed de consensione atque naturae unitate.

135. Ceterum satis probatum est Scripturarum exemplis ad unitatem majestatis pertinere divinae, quod et Pater maneat in Filio; et ea quae loquitur Filius, a Patre videatur audisse. Unitatem autem majestatis quibus aliis possumus intelligere, quam quod eadem Patri et Filio deferuntur? Nam quid praecellentius potest dici, quam quod Apostolus dixit Dominum majestatis crucifixum (1. Cor. 2, 8)?

136. Filius ergo est et Deus majestatis et Dominus majestatis; sed non creaturis subiecta majestas: non ergo creatura Filius.

137. Filius paternae est imago substantiae (Hebr. 1, 3): omnis autem creatura dissimilis supernae substantiae, sed non dissimilis Dei Patris Filius: non ergo creatura Filius.

138. Filius non rapinam arbitratus est esse se aequalem Deo (Philip. 2, 6): sed nulla creatura aequalis Deo, aequalis autem Filius: non ergo creatura Filius.

139. Omnis creatura mutabilis: sed non mutabilis Dei Filius: non ergo creatura Dei Filius.

140. Omnis creatura accidentia et boni et mali recipit suae capacitate naturae, eademque decessionem sentit: Dei autem Filio ni-

hil potest ex ejus Divinitate vel decedere vel accedere: non ergo creatura Dei Filius.

141. Omne opus suum adducet Deus in judicium (Eccle. 12, 14): sed Dei Filius non adducitur in judicium; quia ipse judicat: non ergo creatura Dei Filius.

142. Postremo ut unitatem intelligas, de ovibus dicens Salvator: *Nullus, inquit, rapit eas de manu mea. Pater quod dedit mihi, majus omnibus est, et nemo potest rapere de manu Patris mei. Ego et Pater unum sumus* (Joan. 10, 29. 30).

143. Sic vivificat Filius, ut Pater. *Sicut enim Pater suscitavit mortuos et vivificat; sic et Filius quos vult, vivificat* (Id. 5, 21). Sic suscitavit Filius, ut Pater: sic conservat Filius, ut Pater. Qui non impar est gratia, quomodo impar est potestate? Sic etiam non perdit Filius, ut Pater. Et ideo ne quis vel duos deos crederet, vel discretionem potestatis induceret, unum se esse cum Patre dixit. Id quemadmodum potest dicere creatura? Non ergo creatura Dei Filius est.

144. Non idem est regnare et servire: Christus autem et rex est et filius regis: non ergo servus est Dei Filius. Omnis autem creatura servit; sed non servit Dei Filius, qui

340 L. V. c. 12. Filius venit in mundum,

ex servis filios Dei facit: non ergo creatura
Dei Filius.

CAPUT XII.

Superiora confirmat ex parabola divitis ad quaerendum sibi regnum proficiscentis; ostenditque cum regnum tradat Patri Filius, ad contumeliam non accipiendum, si omnia huic subicere Pater dicatur. Nos hic esse Christi regnum et in Christi regno; futuros aliquando in regno Dei, ubi regnat ex aequo tota Trinitas.

145. Divine itaque illam parabolam induxit divitis (Luc 19, 12), qui in regionem longinquam profectus est accipere regnum et reverti, se ipsum secundum substantiam Divinitatis incorporationisque describens. Ipse enim dives secundum plenitudinem Divinitatis, qui pro nobis pauper factus est, cum dives esset et rex aeternus et aeterno rege progenitus: peregre profectus secundum corporis susceptionem, quia vias hominis tamquam iter ingressus alienum, venit in hunc mundum, ut regnum sibi pararet ex nobis.

146. Venit ergo Jesus in hanc terram regnum accipere de nobis, quibus ait: *Regnum Dei intra vos est* (Id. 17, 21). Hoc est regnum, quod Christus accepit, hoc est, quod

Patri tradidit. Nam quomodo regnum accepit, qui fuerat rex sempiternus? *Venit ergo Filius hominis accipere regnum et reverti* (Luc. 19, 12). Noluerunt eum suscipere iudei, de quibus ait: *Illi qui noluerunt me regnare super se, adducite et interficite eos* (Ibid. 27).

147. Sequamur Scripturarum ordinem. Ille qui venit, regnum Deo Patri tradet: et cum tradiderit regnum, tunc et ipse subjectus erit ei, qui sibi subiecit omnia, ut sit Deus omnia et in omnibus (1. Cor. 15, 24—28). Si ut Filius hominis regnum accepit Dei Filius, ut Filius utique hominis etiam traditurus est, quod accepit: si ut Filius hominis tradit, ergo et ut Filius hominis subiectionem utique per conditionem carnis, non per maiestatem Divinitatis, agnoscit.

148. Et tu ad contumeliam objicis, quod ei subjecerit omnia Deus; cum audias quod regnum Filius hominis Deo tradat, et ut in superioribus diximus libris (Vide Sup. lib. 2, cap. 4), legeris: *Nemo venit ad me, nisi Pater attraxerit eum, et ego resuscitabo eum in novissimo die* (Joan. 6, 44)? Si litteram sequamur, vide magis atque adverte unitatem honorificentiae: et Pater subiecit Filio, et Filius Patri tradit. Dic quid sit amplius

trahere, an resuscitare? Nonne secundum morem hominum ministerium trahentis, potestas est suscitantis? Sed et Filius ad Patrem trahit, et Pater ad Filium trahit; et Filius suscitatur, et Pater suscitatur. Facessant sacrilegae commenta discretionis, ubi unitas potestatis est.

149. Tradat igitur Patri regnum suum Filius. Non deperit Christo regnum quod tradidit, sed proficit. Nos sumus regnum, quia nobis dictum est: *Regnum Dei intra vos est* (Luc. 17, 21). Et sumus regnum Christi ante, postea Patris, quia scriptum est: *Nemo venit ad Patrem, nisi per me* (Joan. 14, 6). Cum in via sum, Christi sum; cum pervenero, Patris sum: sed ubique per Christum, et ubique sub Christo.

150. Bonum est in regno Christi esse, ut Christus nobiscum sit, sicut ipse ait: *Ecce ego vobiscum sum usque ad consummationem mundi* (Matth. 28, 20). Sed melius est esse cum Christo: *Dissolvi enim et cum Christo esse multo melius* (Philip. 1, 23). Cum in hoc mundo sub peccato sumus, Christus nobiscum est, ut per unius obedientiam justi constituentur multi (Rom. 5, 19). Et si peccatum hujus mundi evasero, incipiam esse cum Christo. Denique ait: *Veniam iterum,*

et assumam vos ad me; et infra: Volo ut ubi ego sum, et isti sint mecum (Joan. 14, 3).

151. Ergo nunc sub regno Christi sumus, dum in corpore versamur, et nondum forma exuimur servi, quam ille cum se exinanivisset, accepit: cum vero gloriam ejus viderimus, quam habuit priusquam mundus esset, erimus in regno Dei, in quo patriarchae sunt et prophetae, de quibus scriptum est: *Cum videritis Abraham, Isaac et Jacob, et omnes prophetas in regno Dei* (Luc. 13, 28); ut jam pleniore Dei cognitione potiamur.

152. Sed in Filii regno et Pater regnat, et in regno Patris Filius regnat; quia Pater in Filio, et in Patre Filius: et in quo habitat Filius, habitat et Pater; et in quo habitat Pater, habitat et Filius, sicut ipse ait: *Ego et Pater ad eum veniemus, et apud eum mansionem faciemus* (Joan. 14, 23). Ergo sicut una domus, ita et unum regnum. Eo usque autem unum Patris et Filii regnum est, ut quod Filius tradit, Pater accipiat: et quod Pater accipit, Filius non amittat. Ergo in uno regno unitas potestatis est. Nemo igitur Divinitatem inter Patrem Filiumque cernat.

CAPUT XIII.

Quae Christi subjectio sit, quaesiturus, ubi subjectiones varias proposuit ac rejecit, apostolicum textum percurrit; unde impiam explodit haereticorum hac de re opinionem. Subjectionem quae futura significatur, Divinitatis esse non posse, cum inter Patrem et Filium voluntatis summa semper fuerit concordia. Etiam eidem Filio secundum Divinitatem vere omnia subjecta esse, at nondum subjecta hoc sensu dici, quod ejus mandatis non pareant omnes homines: qui postquam illi fuerint subditi, tum Christus in his subicietur, et Patris opus perfectum erit.

153. (*Alias cap. VI.*) Quod si Patri et Filio unum Dei nomen et jus est, cum Deus verus et rex sempiternus sit etiam Dei Filius, non utique secundum Divinitatem subjectus est Dei Filius. Subjectum itaque, imperator Auguste, quemadmodum debeamus accipere, consideremus.

154. Quomodo enim subjectus Dei Filius? Ut creatura vanitati? Sed impium est de Divinitatis substantia tale aliquid aestimare.

155. An quemadmodum creatura omnis Dei Filio, quia aequè scriptum est: *Omnia subjecisti sub pedibus ejus* (Psal. 8, 8)? Sed non Christus sibi ipse subjectus est.

156. An quemadmodum mulier viro, sicut legimus: *Mulieres viris suis subjectae sint*

(Ephes. 5, 22); et alibi: *Mulier in silentio discat cum omni subjectione* (1. Tim. 2, 11)? Sed sacrilegum est vel Patri virum, vel Dei Filio mulierem comparare.

157. An quemadmodum Petrus dixit: *Subjecti estote omni humanae creaturae* (1. Petr. 2, 13)? Nec sic utique Christus.

158. Vel quemadmodum Paulus scripsit: *Deo et Patri subjecti invicem in timore Christi* (Ephes. 5, 21)? Sed neque in suo, neque in alterius Christi timore subjectus est Filius, quia unus est Christus. Quorum verborum vim considerate, quia Patri subjecti sumus, dum etiam Christum veremur.

159. Quomodo ergo subjectum intelligimus? Totum apostolicum caput recenseamus; ut nihil videatur fraude subtractum, aut obreptione praestricum. *Si in hac, inquit, vita tantum in Christo sperantes sumus, miserabiliores sumus omnibus hominibus. Si autem Christus resurrexit a mortuis primitiae dormientium* (1. Cor. 15, 19. 20). Videtis quoniam de resurrectione Christi tractata est disputatio.

160. *Quoniam sicut per unum hominem, inquit, mors, et per hominem resurrectio mortuorum. Sicut enim in Adam omnes moriuntur, ita et in Christo omnes vivifi-*

cabuntur. Unusquisque autem in suo ordine, primitiae Christus: deinde hi qui sunt Christi, qui in adventum ejus crediderunt. Deinde finis, cum tradiderit regnum Deo et Patri, cum evacuaverit omnem principatum, et potestatem et virtutem. Oportet enim illum regnare, donec ponat omnes inimicos sub pedibus ejus. Novissime autem inimica destruetur mors; omnia enim subjecit sub pedibus ejus. Cum autem dicat: Omnia subjecta sunt ei, sine dubio praeter eum qui subjecit ei omnia. Cum autem subjecta illi fuerint omnia, tunc et ipse Filius subjectus erit illi, qui sibi subjecit omnia; ut sit Deus omnia in omnibus (1. Cor. 15, 21—28). Quod etiam ad Hebraeos idem Apostolus dixit: Nunc autem nondum videmus omnia illi esse subjecta (Hebr. 2, 8). Accipimus apostolicae seriem lectionis.

161. Quomodo igitur subjectum dicimus? Sabelliani et marcionitae dicunt, quod haec futura sit Christi ad Deum Patrem subjectio, ut in Patrem Filius refundatur. Si ergo ea erit Verbi subjectio, ut resolvatur in Patrem Deus Verbum: ergo et quaecunque Patri Filioque subjecta sunt, in Patrem et Filium solventur, ut sit Deus omnia et in omnibus creaturis. Sed absurdum est dicere: non igi-

tur per refusionem subjectio. Alia sunt enim quae subjiciuntur, ea utique quae creata sunt: et alius, cui fit illa subjectio. Conticescant itaque saevae refusionis interpretes.

162. Atque utinam et illi tacerent, qui quoniam resolubile Dei Verbum Deique sapientiam probare non possunt, infirmitatem Divinitati subjectionis adscribunt, dicentes quia scriptum est: *Cum autem subjecta illi fuerint omnia, tunc et ipse Filius subjectus erit illi* (1. Cor. 15, 28).

163. Videmus igitur quia nondum subjectum, sed subjiciendum esse Scriptura commemorat: ergo nunc non est subjectus Deo Patri Filius. In quo igitur Filium subjectum fore dicitis? Si in Divinitate, nec inobediens est, quia non est a Patre discors: nec subjectus, quia non est servus, sed unicus proprio Patri Filius. Denique cum coelum crearet, terram conderet, et potestatem exercebat et caritatem ¹⁾. Nulla igitur servilis in Christi Divinitate subjectio. Si autem nulla subjectio, voluntas libera est.

164. Quod si eam subjectionem putant Filii, quia cum ejus voluntate omnia faciat

1) *Caritatem* consensionem cum Patre, nam Pater per Filium omnia creavit.

Pater: discant hoc ipsum esse individuae potestatis argumentum; quia unitas voluntatis est, quae non coepit ex tempore, sed erat semper. Ubi autem unitas perpetua voluntatis, non utique temporalis subjectionis infirmitas. Si enim per naturam subjiceretur, semper subjectus maneret: cum vero subijciendus dicatur in tempore, dispensationis ergo susceptae, non perpetuae infirmitatis erit illa subjectio; maxime cum sempiterna Dei virtus non possit statum mutare pro tempore, nec Deo Patri ex tempore jus potestatis accidere. Nam si Filius aliquando mutabitur, ut secundum Divinitatem subijciatur: ergo et Deus Pater, si aliquando plus poterit, ut subjectum secundum Divinitatem habeat Filium, nunc interim minus posse secundum interpretationem vestram necesse est aestimetur.

165. Quid autem culpae commeruit Filius, ut postea secundum Divinitatem subijci posse credatur? Numquid secundum carnem ad dexteram Patris sedere praeripuit, et invito Patre sibi praerogativam paterni solii vindicavit? Sed ipse ait: *Omnia quae placita sunt ei, facio semper* (Joan. 8, 29). Ergo si in omnibus Patri complacet Filius, cur subijcietur qui ante subjectus non erat?

166. Videamus itaque ne non Divinitatis illa, sed nostra fiat in Christi timore subjectio, plena gratiae et plena mysterii. Itaque rursus apostolica verba pendamus. *Cum autem subjecta*, inquit, *illi fuerint omnia, tunc et ipse subjectus erit ei, qui sibi subiecit omnia; ut sit Deus omnia et in omnibus*. Ergo quid dicis? Nunc subjecta non sunt ei omnia? Non subjecti sanctorum chori? non angeli, qui in terris posito ministrabant (Matth. 4, 11)? non archangeli, qui etiam ad Mariam adventus dominici praenuncii mittebantur (Luc. 1, 26)? non omnis militia coelestis? non Cherubim et Seraphim, non throni et dominationes et potestates, quae venerantur et laudant?

167. Quomodo ergo subjecta erunt? Sic utique quemadmodum ipse Dominus dixit: *Tollite jugum meum super vos* (Matth. 11, 29); non enim indomiti jugum portant, sed humiles atque mansueti. Haec est plane nec ipsis hominibus vilis, sed gloriosa subjectio; *ut in nomine Jesu omne genu curvetur coelestium, et infernorum: et omnis lingua confiteatur quia Dominus Jesus in gloria est Dei Patris* (Philip. 2, 10). Ideo autem ante subjecta non erant omnia, quia nondum receperant sapientiam Dei, nondum habile

jugum Verbi^{mentis} quadam cervice portabant. *Quotquot autem*, sicut scriptum est, *receperunt eum, dedit eis potestatem filios Dei fieri* (Joan. 1, 12).

168. Dicet aliquis: Ergo jam subjectus est Christus, quia plurimi crediderunt? Minime; quia non in paucis est Christi subjectio, sed in omnibus. Sicut enim si in me concupiscat adhuc caro adversus spiritum, spiritus autem adversus carnem, non videor esse subjectus, etsi ex parte sim subditus: ita quia omnis Ecclesia unum corpus est Christi, quamdiu genus dissentit humanum, Christum dividimus. Nondum ergo subjectus est Christus, cujus non sunt adhuc membra subjecta. Cum autem fuerimus non multa membra, sed unus spiritus: tunc et ipse subjectus erit, ut per ipsius subjectionem *sit Deus omnia et in omnibus*.

169. Sicut autem nondum subjectus est Christus, ita nondum perfectum est opus Patris; quia dixit Filius Dei: *Meus cibus est ut faciam voluntatem Patris mei, qui me misit, et perficiam opus ejus* (Joan. 4, 34). Quid igitur quaestionis est, quia in me erit Filii subjectio, in quo imperfectum est opus Patris, quia non sum ipse perfectus? Ergo qui imperfectum opus facio Patris, ipse

Filium facio esse subjectum? Sed non est injuria ista, sed gratia; quia in eo quod subjicimur, noster utique, non Divinitatis, est profectus, ut subjiciamur Legi, subjiciamur gratiae. Quoniam ante, sicut ipse dixit Apostolus, sapientia carnis inimica erat in Deum. *Legi enim non erat subdita* (Rom. 8, 7): nunc autem jam per Christi est subdita passionem ¹⁾).

CAPUT XIV.

Prosequitur coeptam difficultatem, et Christum non nisi secundum carnem subjectum docet: sed ipsum dum carne subjiceretur, praeuisse tamen signa Divinitatis. Repugnare ut secundum hanc subjiciatur: humanitatem vero quam adoptavit, ita in nobis subditam esse, quo pacto in eadem ejus humanitate exaltatur et nostra. Denique quando futura sit eadem illa Christi subjectio, explicatur.

170. Et tamen ne quis calumniatur, videte quid divinitus inspirans Scriptura praecaverit; ostendit enim nobis in quo subjectus erit Deo Christus, dum docet in quo sibi universa subjecerit. Ideoque dicit: *Nunc autem non videmus omnia ei subjecta* (Hebr. 2, 8). Nam paulo minus quam angelos minoratum vi-

1) Cf. aliorum patrum in eandem sententiam testimonia opusc. XXII, 168. annot. n. 2.

dimus Jesum propter passionem mortis. Ostendit itaque minorem factum in carnis susceptione. Quid igitur impedit quin etiam subjectionem in carnis susceptione significet, per quam subjiciet sibi omnia, dum in ipsa Patri Deo est ipse subjectus?

171. Consideremus itaque ejus subjectionem. *Pater, inquit, meus, si vis, transfer calicem hunc a me: verum non mea voluntate, sed tua fiat* (Luc. 22, 42). Ergo secundum humanae naturae assumptionem erit illa subjectio; quia sicut legimus: *Specie inventus ut homo, humiliavit semetipsum, factus obediens usque ad mortem* (Philip, 2, 8): subjectio utique obedientiae est, obedientia mortis, mors assumptionis humanae: assumptionis ergo humanae erit illa subjectio. Nequaquam igitur Divinitatis infirmitas, sed dispensatio ista pietatis est.

172. Vide quam non timeam eorum propositiones. Illi objiciunt subjiciendum Patri Deo, ego lego Mariae subditum matri; quia scriptum est de Joseph et Maria: *Et erat subditus illis* (Luc. 2, 51). Aut si hoc putant, dicant quia hominibus erat subjecta Divinitas.

173. Non igitur praejudicet quia subjectus dicitur, cui non praejudicat quia servus legitur, quia crucifixus asseritur, mortuus prae-

dicatur. Qui cum moreretur, vivebat; cum subjiceretur, regnabat: cum sepeliretur, resuscitabat; ac subjectum se potestati praebebat humanae, alias se Dominum majestatis declarabat aeternae. Erat subjudice, et ad dexteram Dei solium sibi judex perpetuus vindicabat. Scriptum est denique: *Amodo videbitis Filium hominis sedentem ad dexteram virtutis Dei, et venientem in nubibus coeli* (Matth. 26, 64). Vapulabata judaeis, imperabat angelis: natus ex Maria sub Lege erat, ante Abraham supra Legem erat (Galat. 4, 4). In cruce venerandus natura: denique sol refugit, terra contremuit, conticuerunt angeli (Matth. 27, 51). Cujus igitur passionem elementa videre timuerunt, hujus generationem videre potuerunt? Et in quo subjectionem corporis non tulerunt, in eo subjectionem naturae venerabilis sustinebunt?

174. Sed cum unius naturae sint Pater et Filius et Spiritus sanctus, utique non erit Pater sibi ipse subjectus. Et ideo non erit in eo subjectus Filius, in quo cum Patre unum est; ne per unitatem Divinitatis videatur et Pater Filio esse subjectus. Ergo sicut in illa cruce non Divinitatis plenitudo, sed nostra fragilitas erat subdita: ita etiam postea subjectus erit Filius Patri in nostrae utique parti-

cipatione naturae; ut subjectis carnis illecebris non divitiae sint cordi, non ambitio, non voluptas: sed omnia nobis Deus sit, si per omnia quantum capere possumus, ad ejus imaginem similitudinemque vivamus.

175. Ad communitatem igitur beneficium transivit a specie ¹⁾; quia in sua carne naturam totius humanae carnis edomuit. Et ideo juxta Apostolum: *Sicut portavimus imaginem hujus terreni, portemus et imaginem hujus coelestis* (1. Cor. 15, 49). Quod utique nisi per interiorem hominem non potest evenire. Deponentes igitur universa, hoc est illa quae legimus: *Iram, animositatem, blasphemiam, turpiloquium* (Coloss. 3, 8); et sicut infra dictum est: *Exspoliantes nos veterem hominem cum actibus suis, indua-*

1) *A specie.* Quae in humana Christi natura, quae specie eadem cum nostra erat, contigerunt, in omnes quadantenus redundant, seu propter unitatem specificam Christi hominis nobiscum quaedam veluti communicatio idiomatum inter ipsum et nos locum habet. Sicut ipse in nobis est subjectus, ita nos in ipso sumus resuscitati, sedemus ad dexteram Patris, ut infra praesertim n. 182. docet; seu ut clarius docet n. 181., in carne Christi ipsa natura humana, cujus universum genus, omnes homines sunt participes, honoratur, et hinc hoc beneficium, hic honor ad omnes transit, in omnes derivatur.

mus novum, qui renovatur in agnitionem, secundum imaginem ejus, qui creavit eum (Ibid. 9 et 10).

176. Et ut scires, quia cum dicit: *Ut sit Deus omnia et in omnibus*, a Deo Patre non separet et Christum, ipse ad Colossenses dicit: *Ubi non masculus, inquit, et femina, judaeus et graecus, barbarus et scythia, servus et liber: sed omnia et in omnibus Christus* (Coloss. 3, 11). Ergo etiam ad Corinthios dicens: *Ut sit Deus omnia et in omnibus*, (1. Cor. 15, 28), et unitatem et aequalitatem cum Deo Patre complexus est Christi, quia nec a Patre Filius separatur. Et similiter sicut Pater omnia et in omnibus, ita omnia in omnibus etiam Christus operatur. Si ergo Christus quoque in omnibus omnia operatur (Id. 12, 6), non utique in Divinitatis maiestate subjectus est, sed in nobis. Quomodo autem subjectus est in nobis, nisi eo modo quo minor angelis factus est, in corporis scilicet sacramento? In eo enim nondum subjecta ei omnia videbantur, quae creatori suo a principio sui utique serviebant.

177. Quod si quaesieris quemadmodum sit subjectus in nobis, ipse ostendit dicens: *In carcere eram, et venistis ad me: infirmus eram, et visitastis me. Quod enim uni*

horum minimorum fecistis, mihi fecistis (Matth. 25, 36, et seqq). Infirmum audis, et non moveris: subjectum audis, et moveris; cum in eo infirmus, in quo subjectus, in quo peccatum atque maledictum pro nobis factus est.

178. Sicutigitur non propter se, sed propter nos peccatum atque maledictum factus est: ita non pro se, sed pro nobis erit subjectus in nobis, non in natura subjectus aeterna, neque in natura maledictus aeterna: *Maledictus enim omnis qui pendet in ligno* (Galat. 3, 13). Maledictus, quia nostra maledicta suscepit: subjectus quoque, quia subjectionem nostram ipse suscepit, sed in servilis formae assumptione, non in Dei maiestate; ut dum ille nostrae fragilitatis se praeferret in carne consortem, nos in virtute sua divinae faceret consortes naturae. Non quo aut hoc nobis cum superna Christi generatione naturale consortium aut Divinitatis in Christo sit illa subjectio: sed sicut in illo per carnem illam, quae est pignus nostrae salutis, sedere nos in coelestibus Apostolus dixit (Ephes. 2, 6), utique non sedentes; sic et ille per nostrae assumptionem naturae dicitur subjectus in nobis.

179. Quis enim tam demens qui putet,

ut supra diximus (Vide supra cap. 5 et seqq.), quod ad dexteram Dei Patris sedes sibi venerabilis debeatur, cum licet etiam secundum carnem Christo ea a Patre generationis tamen supernae et aequalis potentiae deferatur? Angeli adorant, et tu ibi praesumptione sacrilega solium Dei sternis?

180. Scriptum est, inquires, quia *cum mortui essemus peccatis, convivificavit nos in Christo, cujus gratia estis salvi facti; et simul suscitavit simulque fecit sedere in coelestibus in Christo Jesu* (Ephes. 2, 5. 6).

Agnosco scriptum: sed non ut homines sedere ad dexteram sibi patiatur Deus, sed ut in Christo sedere; quia ipse est omnium fundamentum et ipse est caput Ecclesiae (Id. 5, 23), in quo communis secundum carnem natura praerogativam sedis coelestis emeruit: in Christo enim Deo caro, in carne autem humani natura generis omnium hominum particeps honoratur.

181. Sicut nos ergo in illo sedemus per corporeae communitatem naturae, ita et ille, qui per susceptionem nostrae carnis maledictum pro nobis factus est (Galat. 3, 13), cum maledictum utique in benedictum Filium Dei non cadat: ita, inquam, et ille per obedientiam omnium erit subjectus in nobis;

cum gentilis crediderit, cum judaeus agnovit, quem crucifixit; cum manichaeus adoraverit, quem in carne venisse non credidit; cum arianus omnipotentem confessus fuerit, quem negavit; cum postremo in omnibus fuerit sapientia Dei, justitia, pax, caritas, resurrectio. Per sua igitur opera Christus et genera diversa virtutum erit in nobis Patri subditus; cum vitiis abdicatis et feriente delicto, unus in omnibus Deo coeperit in uno sensu populorum omnium spiritus adhaerere, tunc erit Deus omnia et in omnibus (1. Cor. 15, 28).

CAPUT XV.

Superius disputata strictim resumit, ex unitate divinae potestatis in Patre ac Filio quaecunque de Filii subjectione dicuntur, ad solam referenda humanitatem scite colligens: quod praeterea ex caritate, quae eadem utriusque est, confirmat.

182. Conclusionem igitur totius absolutionis breviter colligamus. Unitas potestatis opinionem injuriosae subjectionis excludit: evacuatio potestatum et victoria de morte quaesita triumphatoris utique non minuit potestatem: subjectionem operatur obedientia, obedientiam Christus assumpsit, obedien-

tia usque ad carnem, crux ad salutem. Ergo ubi opus, ibi et auctor est operis. Cum igitur omnia Christo subjecta fuerint per obedientiam Christi, ut in nomine ejus omnes genu flectant, tunc erit ipse omnia in omnibus; nunc enim, quia non omnes credunt, non videntur omnes esse subjecti. Cum omnes ergo crediderint et Dei fecerint voluntatem, erit omnia et in omnibus Christus: cum Christus fuerit omnia et in omnibus, erit omnia et in omnibus Deus, quia Pater manet semper in Filio. Quomodo ergo infirmitatis arguitur, qui redemit infirmos?

183. Ac ne forte et illud ad infirmitatem Filii referas, quod scriptum est, quia subjecit ei Deus omnia; discce quod omnia sibi etiam ipse subjecerit; scriptum est enim: *Nostra autem conversatio in coelis est; unde et Salvatorem exspectamus Dominum Jesum, qui transfigurabit corpus humilitatis nostrae, conforme ut fiat corpori gloriae sua secundum operationem, quo possit etiam subjicere sibi omnia* (Philip. 3, 20. 21). Didicisti ergo quod omnia possit sibi ipse subjicere, secundum operationem utique Divinitatis.

184. Discce nunc quoniam secundum carnem omnia subjecta accipiat, sicut scriptum est: *Qui operatus est in Christo, suscitans*

eum a mortuis, et constituens eum ad dexteram suam in coelestibus, supra omnem principatum, et potestatem, et virtutem, et dominationem, et omne nomen quod nominatur non solum in hoc seculo, sed etiam in futuro; et omnia subiecit sub pedibus ejus (Ephes. 1, 20. 21). Secundum carnem igitur ei omnia subjecta tradentur, secundum quam et a mortuis suscitatus est, et secundum animam humanam ac rationabilem subjectionem.

185. Divine plerique interpretantur quod scriptum est: *Nonne Deo subjecta erit anima mea* (Psal. 61, 2): animam dixit, non Divinitatem; animam, non majestatem. Et ut sciremus quod Dominus per prophetam de susceptione naturae est locutus humanae, addidit: *Usquequo adjicietis super hominem* (Ibid. 4)? secundum illud quod ait in Evangelio: *Quid me quaeritis interficere hominem* (Joan. 8, 40)? Et addidit: *Verumtamen pretium meum voluerunt repellere, cucurrerunt in siti, ore suo benedicebant, et corde suo maledicebant* (Psal. 61, 5). Judaei enim, reportante Juda pretium, recipere noluerunt (Matth. 27, 6), currentes in siti amentiae, quia spiritalis potus gratiam recusarunt.

186. Haec est pia subjectionis interpretatio. Etenim cum dominicae passionis hoc munus sit, utique in quo passus est, in hoc erit subjectus in nobis. Quaerimus qua causa? Ut neque angeli, neque virtutes, neque altitudo, neque profundum, neque praesentia, neque futura, neque creatura alia separare nos possit a caritate Dei, quae est in Christo Jesu (Rom. 8, 38. 39). Videmus itaque ex his quae diximus, nullam exceptam esse creaturam: sed istis, quas supra dixit, omnem, si qua est, annumeratam esse.

187. Simul etiam illud est considerandum, quod cum in superioribus dixerit: *Quis nos separabit a caritate Christi* (Ibid. 35)? subter posuit: *Neque mors, neque vita, nec alia creatura separare nos poterit a caritate Dei, quae est in Christo Jesu*. Videmus ergo eandem caritatem Dei esse, quae Christi est. Denique non otiose posuit caritatem Dei, *quae est in Christo Jesu*, ne separatam Dei et Christi intelligeres caritatem. Nihil autem est quod caritas dividat, nihil quod Divinitas sempiterna non possit, nihil quod lateat veritatem, fallat justitiam, praetereat sapientiam.

CAPUT XVI.

Arianos a Spiritu sancto per David condemnatos, quippe qui scientiae Christi derogare audeant. Locum ab illis ad hoc citatum suspicione corruptionis minime carere; sed ut maxime careat, distinguendam esse vocem *Filius*; Christo enim ut Dei Filio scientiam deesse non posse, cum sit sapientia: nec partis ullius cognitionem, cum omnia creavit. Eum qui secula fecerit, futurum non posse non cognoscere, et multo minus diem iudicii. Sive quid magnum sit ea cognitio, sive quid parvum, eam Filio non negandam; imo neque etiam Spiritui sancto. Demum his addit varia signa, quibus haec scientia inesse Christo colligi potest.

188. (*Alias cap. VII.*) Unde execrabiles eos, quia ista commemorant, et a Spiritu sancto esse damnatos scire debemus. Quos enim alios, nisi specialiter arianos propheta condemnat, qui dicunt quod Dei Filius nesciat tempora et annos? Non enim est aliquid quod ignoret Deus: est autem Deus Christus et altissimus Christus; ipse est enim super omnia Deus (Rom. 9, 5).

189. Videte quemadmodum sanctus David hujusmodi homines, qui Dei Filio scientiam derogent, perhorrescat; sic enim habes: *In laboribus hominum non sunt, et cum hominibus non flagellabuntur; ideo obtinuit*

eos superbia eorum; cooperti sunt iniquitate et impietate sua: prodiit quasi ex adipe iniquitas eorum, pertransierunt in dispositionem cordis (Psal. 72, 5—7). Utique eos condemnat qui ex dispositione cordis aestimanda quae divina sunt, arbitrantur: nam Deus nec dispositioni est subjectus nec ordini; quando etiam ipsa, quae sunt in usu hominum et successione generis humani, non semper aliqua solemnis dispositione rationis, sed plerumque secretis latentibusque decursa mysteriis evenire cernamus.

190. *Cogitaverunt, inquit, et locuti sunt nequitiam, iniquitatem in Excelsum locuti sunt, posuerunt in coelum os suum* (Ibid. 8, 9). Videmus itaque quod impii sacrilegii reos damnet, qui ex similitudine humanae naturae dispositionem sibi arrogent coelestis arcani.

191. Et dixerunt: *Quomodo scivit Deus? et si est scientia omnis in Altissimo* (Ibid. 11)? Nonne haec quotidie perstrepunt ariani, scientiam omnem in Christo esse non posse? Quia ipse, inquiunt, diei et horae se professus est esse ignarum. Nonne dicunt: Quomodo scivit, qui eum non potuisse scire commemorant, nisi quae audierit et viderit: et ea quae spectant ad divinae unitatem naturae

ad infirmitatem sacrilega interpretatione derivant?

192. Scriptum est, inquiunt: *De die autem illo et hora nemo scit, neque angeli coelorum, nec Filius, nisi solus Pater* (Marc. 13, 32). Primum veteres non habent codices graeci, quia nec Filius scit ¹⁾: sed non mirum si et hoc falsarunt, qui Scripturas interpolare divinas. Qua ratione autem videatur adjectum, proditur, dum ad interpretationem tanti sacrilegii derivatur.

193. Ponetamen ab Evangelistis scriptum. Medium utique nomen est Filii: nam et Filius hominis dicitur; ut secundum imprudentiam assumptionis nostrae ²⁾ diem futuri

1) Non solum apud Matthaeum haec non legit s. Ambrosius, sed neque apud Marcum, alioquin haereticis expedita fuisset responsio, haec ipsa in Marci Evangelio exstare. Hieronymus quoque idem quodammodo indicat in eundem v. 36. Matth. 24., cum ex eo, quod memorata non reperiantur in graecis et maxime in Adamantii et Pierii exemplaribus, argumentum elicit adversus Arium atque Eunomium, quibus utique ut hujus rationis vim eliderent, sufficiebat, si apud Marcum eadem habebantur. Ceterum de hac difficultate cf. annot. opusc. XXIX, 276.

2) *Secundum imprudentiam assumptionis nostrae.* Sensus est: Possunt haec intelligi de Filio secundum humanam naturam. Hanc enim assumens, assumsit et ejus defectus, proinde et ignorantiam vel saltem

iudicii nescisse videatur. Quomodo enim nesciret diem {Dei Filius, cum in ipso sint thesauri sapientiae et scientiae Dei absconditi (Coloss. 2, 3)?

194. Quaero autem utrum ex substantia, an ex accidenti habuerit scientiam; omnis enim scientia aut ex natura, aut ex disciplina est: ex natura suppetit, ut equo currere, pisci natare; haec enim faciunt antequam discant: ex disciplina rursus suppetit natare homini; nam nisi didicerit, scire non poterit. Cum ergo mutis animantibus suppetat ex natura facere et scire quae non didicerint, quid censes de Dei Filio, utrum ex institutione, an ex natura habeat scientiam? Si ex institutione: ergo non est natus sapientia, et ex processu coepit esse perfectus, nec erat semper. Quod si naturalem scientiam habet, utique perfectus in principio erat, perfectus ex Patre processit; et ideo praescientia non eguit futurorum.

195. Non ergo nescivit diem; neque enim sapientiae Dei est ex parte scire et ex parte nescire. Nam quomodo potest nescire partem,

ignorantiae speciem, qua ita se gerebat ac si aliqua nesciret. Ita Ambrosium esse explicandum patet ex n. 221, 222. Cf. etiam annot. ad l. 2. n. 98.

qui fecit omnia (Joan. 1, 3), cum minus sit scire, quam facere? Multa enim scimus, quae facere non possumus: nec eodem modo omnes scimus, sed ex parte cognoscimus. Novit enim ventorum vim stellarumque cursus aliter rusticus, aliter civitatis incola, aliter gubernator. Etsi non omnes norunt omnia, tamen nosse dicuntur: solus autem plene novit ille, qui fecit omnia. Novit gubernator, quanta vigilia procedat Arcturus, quales ortus exploret Orionis ¹⁾; non tamen colligationes Vergiliarum ceterarumque stellarum aut numerum novit, aut nomina, sicut ille *qui numerat multitudinem stellarum, et omnibus his nomina vocat* (Psal. 146, 4): quem utique non fallit operis sui virtus.

196. Quomodo enim vultis haec fecisse Dei Filium? Numquid quasi annulum ²⁾, qui

1) *Orion* a multitudine aquarum nomen obtinuit, quod oriatur hiemali tempore et pluvias tempestatesque ciere existimetur. — *Vergiliae* a latinis idcirco, quod vere ortum suum habeant, fuerunt nominatae, sicut et a graecis *Plejades*, quod plures simul appareant, unde Ambrosius noster nominat *colligationes*, sive ut in mss. quibusdam legitur, *collegiationes Vergiliarum*. Edit maurini in h. l. Secundum alios *Vergiliae* a *virga* derivantur.

2) Annulum signatorium intellige, qui expressam sui in ceris relinquit imaginem.

non sentit quod exprimit? Sed omnia in sapientia Pater fecit (Psal. 103, 24), id est, omnia per Filium fecit, qui est virtus Dei et sapientia (1. Cor. 1, 24): sapientiae autem id convenit, ut suorum operum et virtutes norit et causas. Et ideo non potuit creator omnium ignorare quod fecit, nescire quod ipse donavit: novit ergo diem quem fecit.

197. Sed dicis, quia praesentem novit, nescit futurum. Licet inepta sit propositio, tamen ut de Scripturis satisfaciam tibi, disce quia non solum praeterita fecit, sed etiam quae futura sunt, sicut scriptum est: *Qui fecit quaeventura sunt* (Isai. 45, 11). Et alibi ait Scriptura: *Per quem et facta sunt secula, splendor est gloriae et character substantiae ejus* (Hebr. 1, 2.3). Secula enim et praeterita et praesentia et futura sunt. Quomodo ergo facta sunt quae futura sunt, nisi quia operatoria virtus et scientia comprehendit numerum omnium seculorum? Sicut enim vocat quae non sunt tamquam quae sunt (Rom. 4, 17): sic et fecit quae futura sunt, tamquam quae sint: quia non contingit ut non sint, sed necessario sunt futura, quae esse praecepit. Ergo qui fecit quae futura sunt, eo genere quo sunt futura cognovit.

198. Si hoc de seculis, multo magis de

judicii credendum est die, eo quod cognitionem ejus habeat Dei Filius tamquam a se jam factae; quia scriptum est: *Dispositione tua permanebit dies* (Psal. 118, 91). Nec solum permanet, dixit, sed etiam *permanebit*, ut ejus dispositione quae ventura sunt, gubernetur. Quae disposuit ergo, non novit? *Qui plantavit aurem, non audiet? qui finxit oculum, non considerat* (Id. 93, 9)?

199. Videamus tamen ne quid forte magnum sit, quod Creatorem suum potuerit praeterire; et tamen eligant utrum quasi magnum aliquid et praestantius putent esse quam cetera: an quasi minimum atque abjectum? Si minimum atque abjectum, non est injuria, ut nostro usu loquar, vilia et exigua nescire; nam cum potentiae sit scire quae maxima sunt, despexisse magis videtur degeneris operis vilitatem. Fastidio igitur absolutus est, non potestate fraudatus.

200. Quod si magnum et summum arbitrantur scire judicii diem, dicant quid Deo Patri majus aut melius sit. Patrem igitur Deum novit, ut ipse ait: *Nemo novit Patrem, nisi Filius, et cui voluerit Filius revelare* (Matth. 11, 27). Patrem, inquam, novit, et diem nescit? Sic ergo creditis quia Patrem revelat, et diem non potest revelare?

201. Deinde quia gradus quosdam facitis, ut Patrem Filio, Filium Spiritui praeferatis; dicite mihi utrum Spiritus sanctus noverit judicii diem; nihil enim de eo scriptum est hoc loco. Negatis profecto. Quid si doceo quod noverit? Lectum est enim: *Nobis autem revelavit Deus per Spiritum suum; Spiritus enim omnia scrutatur, etiam alta Dei* (1. Cor. 2, 10). Utique quia alta Dei scrutatur cum Deus noverit judicii diem, etiam Spiritus novit. Novit enim omnia quae Deus novit, sicut Apostolus declarat dicens: *Quis enim scit hominum quae sunt hominis, nisi spiritus hominis qui in ipso est? Sic et quae Dei sunt, nemo cognovit, nisi Spiritus Dei* (Ibid. 11). Videte igitur, ne aut negando Spiritum sanctum scire, negetis et Patrem scire; quia quae Dei sunt, cognovit et Dei Spiritus: quae autem non cognovit Spiritus Dei, utique Dei non sunt: aut confitendo quia Spiritus Dei novit, quod negatis Filium scire, contra vestram assertionem Spiritum Filio praeferatis. Verum non solum sacrilega ista, sed etiam inepta dubitatio.

202. Nunc consideremus quibus modis scientia colligatur, et ostendamus ipsum Filium demonstrasse, quod et diem sciret. Quod enim scimus, aut tempore, aut loco, aut sig-

nis, aut personis declaramus, aut ordine. Quomodo igitur nescivit iudicii diem, qui et horam iudicii et locum, et signa expressit et causas.

203. Denique sic habes: *In illa hora qui fuerit in tecto, non descendat tollere vasa de domo sua; et qui in agro, similiter non redeat retro* (Luc. 17, 31). Eo usque igitur futurorum norat periculorum eventus, ut etiam praesidia periclitantibus demonstraret.

204. An poterat Dominus diem ignorare ¹⁾, qui ipse de se dixit quia Filius hominis Dominus est sabbati (Matth. 12, 8)?

205. Locum quoque etiam alibi designavit, cum sibi structuras templi ostendentibus discipulis diceret: *Videtis haec omnia? Amen dico vobis, non relinquetur lapis super lapidem, qui non destruatur* (Id. 24, 2).

206. De signo quoque interrogatus ab apostolis respondit: *Videte ne seducamini. Multi*

1) Ne cui videatur obscurum, quod Ambrosius diem iudicii Christo cognitum fuisse exinde probet, quia Dominus est etiam sabbati, advertendum hanc esse mentem doctoris nostri, Christum scil. ea, quorum fuerat ipse Dominus, ignorare haudquaquam posse: eum autem diei iudicii dominum esse ex eo doceri, quod sit Dominus etiam sabbati, qui dies et aliorum omnium praestantissimus, et resurrectionis, ut idem Ambrosius saepius tradit, figura est. Edit. maur.

*enim venient in nomine meo dicentes, quia ego sum Christus; et infra: Terrae motus, inquit, magni erunt per loca singula, et fa-
mes, et pestilentia, terroresque de coelo, et
signa magna erunt* (Luc. 21, 8. 11). Itaque et
personas expressit et signa.

207. Quo autem modo vel circumdaturus
exercitus Jerusalem dicat, vel implenda tem-
pora gentium, et quo ordine, evangelicae uti-
que lectionis attestazione reseratur. Scivit
ergo omnia.

CAPUT XVII.

Quod Christus diem iudicii revelare noluerit, in hoc
nostrae utilitati consultum esse. Illud alia Domini
sententia declaratur; nec non et Pauli loco plane si-
mili. Urgentibus vero cur ita responderit discipulis
ac si nescisset, alii loci quibus Patri eadem tribui
videtur ignoratio, opponuntur: ex quibus si ignoran-
tiam impotentiamve in Patre illi admittant, hinc in
Filio eandem quae in Patre substantiam admittendam
esse contra ipsos arguit Ambrosius; nisi tamen ma-
lint mendacii accusare Filium; cum neque in hunc
neque in Patrem cadat fallere, sed memoratis locis
utriusque unitas designetur.

208. Sed quaerimus qua ratione designare
momenta noluerit. Si quaeramus, non igno-
rantiae inveniemus esse, sed sapientiae. No-
bis enim scire non proderat; ut dum certa

futuri iudicii momenta nescimus, semper tamquam in excubiis constituti et in quadam virtutis specula collocati, peccandi consuetudinem declinemus; ne nos inter vitia dies Domini deprehendat. Non enim prodest scire, sed metuere quod futurum est; scriptum est enim: *Noli alta sapere, sed time* (Rom. 11, 20).

209. Nam si diem designasset expresse, uni aetati hominum, quae proxima erat iudicio, videretur disciplinam praescripsisse vivendi, superioris temporis aut justus esset remissior, aut peccator securior. Namque adulter nisi quotidianam poenam metuat, non potest ab adulterandi cupiditate desinere: nec latro obsessorum saltuum secreta deserere, nisi sciat sibi momentis omnibus imminere supplicium. Plerumque enim quibus incentivum est impunitas, timor taedio est.

210. Ideo ergo dixi quia scire non proderat, imo proderat ignorare; ut ignorantes timeremus, ut observantes emendaremur, sicut ipse dixit: *Estote parati, quia nescitis qua hora Filius hominis venturus est* (Matth. 24, 44). Namque miles nisi bellum in manibus esse cognoscat, praetendere non novit in castris.

211. Unde alibi quoque ipse Dominus in-

terrogatus ab apostolis, inquam, qui utique non sicut Arius intelligebant, sed Filium Dei futura scire credebant; nam nisi hoc credidissent, nunquam interrogassent: interrogatus ergo quando restitueret regnum Israël, non se nescire dixit, sed ait: *Non est vestrum scire tempora et annos, quae Pater posuit in sua potestate* (Act. 1, 7). Attende quid dixerit: *Non est vestrum scire*. Lege iterum: *Non est vestrum*. *Vestrum* dixit, non *meum*; jam enim non secundum perfectionem, sed secundum profectum humani corporis ac nostrae animae loquebatur ¹⁾. *Vestrum* ergo dixit, non, *meum*.

212. Quod et Apostolus secutus: *De temporibus autem et momentis, fratres, non habetis*, inquit, *opus ut vobis scribamus* (1. Thess. 5, 1). Itaque ne Apostolus quidem ipse Christi servus dixit se nescire momenta, sed non opus esse doceri populum, qui semper spiritalibus munimentis esse debet armatus, ut virtus Christi in unoquoque praetendat ²⁾. Cum autem dicit Dominus: *De temporibus, quae Pater posuit in sua potestate*, utique

1) Sensus videtur: Noluit hanc communicare cognitionem, quae certe aliqua perfectio est, cum vellet utilitati et profectui nostro consulere.

2) *Praetendat*, ulterius, in anteriora tendat.

non potest exsors esse scientiae paternae, cuius nequaquam exsors est potestatis; cum potestas ex sapientia et virtute gignatur, quod utrumque Christus est.

213. Sed quaeritis qua causa non ita discipulis negaverit, quasi sciret et nollet dicere: sed neque angelos, neque Filium scire memoraverit (Marc. 13, 32)? Interrogabo vos et ego, qua causa in Genesi Deus dicat: *Descendam itaque, ut videam secundum clamorem illorum venientem ad me, si consummabuntur: sin autem, ut sciam* (Gen. 18, 21)? Qua causa etiam Scriptura de Domino dicat: *Et descendit Dominus videre civitatem et turrim, quam aedificarent Filii hominum* (Id. 11, 5)? Qua causa etiam dicat propheta in Psalterio: *Dominus respexit super filios hominum, si est intelligens, aut requirens Deum* (Psal. 52, 3); quasi et illic si non descenderet Deus, et hic si non prospiceret Dominus, aut opera hominum ignoraret aut merita?

214. Sed etiam in Evangelio habes secundum Lucam, quia Pater dicit: *Quid faciam? mittam filium meum dilectissimum, forsitan hunc verebuntur* (Luc. 20, 13). Secundum Matthaeum autem et secundum Marcum habes: *Quoniam misit unicum filium suum,*

dicens: Verebuntur filium meum (Matth. 21, 37, et Marc. 12, 6). In uno libro dixit: *Forsitan verebuntur*, et quasi nesciens dubitat; nam hic sermo dubitantis est: in duobus autem aliis libris: *Verebuntur*, inquit, *filium meum*; hoc est, confirmat reverentiam deferendam.

215. Sed neque dubitare Dei est, neque falli; dubitat enim, qui ignorat quod futurum est: fallitur autem, qui aliud praedixit, et aliud est secutum. Quid autem evidentius, quam quod Scriptura habet aliud Patrem dixisse de Filio, et aliud accidisse eadem Scriptura testatur? Ille dixit: *Verebuntur filium meum*: Filius autem vapulavit, illusus est, crucifixus est, mortuus est (Matth. 27, 29, et seqq.); multoque illis servis, qui prius fuerant destinati, graviora secundum carnem passus est. Fefellit igitur Pater, an ignoravit, vel subvenire non potuit? Sed verus nescit fallere; scriptum est enim: *Fidelis Deus qui non mentitur* (Tit. 1, 2). Quomodo autem ignoravit, qui novit omnia (Dan. 13, 42)? Aut quid non potuit, qui omnia potest?

216. Tamen si aut ignoravit, aut non potuit (facilius enim acquiescitis, ut dicatis Patrem ignorasse, quam confiteamini Filium scisse), videtis quia ex hoc ipso unius sub-

stantiae est Filius cum Patre; si quemadmodum Pater, ita et Filius, ut secundum vestram insipientiam loquar, aut non omnia novit, aut non omnia potest. Non sum enim avarus aut praeceps circa Filii laudes, ut plus audeam dicere Filium posse quam Patrem, qui nullam inter Patrem et Filium discretionem facio potestatis.

217. Sed fortasse dicatis, non ita dixisse Patrem, sed de Patre Filium fefellisse. Jam ergo non solum infirmitatis Filium, sed etiam sacrilegii et mendacii arguitis. Verumtamen si non creditis de Patre Filio, nec de eo credatis; si enim fallere nos voluit, quia dixit dubitasse Patrem, quasi nesciret quod esset futurum: fallere ergo etiam de se nos voluit, quia futura nescire se dixit; multoque tolerabilius ad pudorem ¹⁾, si ignorantiam ante praetendit, quod de se facit, quam si contrario promissis lusus videatur effectus, quod de Patre praedicavit.

218. Sed neque fallitur Pater, neque fallit Filius: verum ea est in Scripturis consuetudo divinis, sicut et superiora, et multa alia exem-

1) Longe facilius admitti posset, Filium simulasse ignorantiam, qua tamen caruit, quam quod adscribat Patri scientiam, quam non habuit seu quod Patrem exhibeat deceptum.

pla testantur, ut Deus dissimulet se nescire quod novit. Et in hoc ergo unitas Divinitatis et unitas dispositionis in Patre probatur et Filio, si quemadmodum Deus Pater cognita dissimulat, ita Filius etiam in hoc imago Dei, quae sibi sunt nota dissimulet.

CAPUT XVIII.

Dominici ad Apostolos responsi causam allaturus, primo illud indulgentiae Christi acceptum refert, mox alia quorundam ratione proposita, germanam hanc esse profitetur, quod idem Dominus ex humano affectu locutus fuerit. Inde colligit scientiam Patris ac Filii aequalem esse, atque adeo non minorem Patre Filium. Postea ubi textui quo dicitur minor, alium quo aequalis traditur, opposuit, arianorum de Filio judicantium temeritatem castigat, et cum illum impie minorem astruerent, ipsum pie lapidem a se dici ostendit.

219. Edoctum est igitur non ignorasse Dei Filium quae futura sunt. Quod si fatentur, et ego, ut jam respondeam qua ratione neque angelos, neque Filium, sed Patrem scire memoravit, solemnem ejus in discipulos caritatem etiam in hoc loco et gratiam recognosco, quod ex frequentia ipsa debet omnibus esse jam cognitum. Mavult enim Dominus nimio in discipulos amore propensus, petentibus his quae cognitu inutilia judicaret, vi-

deri ignorare quod noverat, quam negare; plusque amat nostram utilitatem instruere, quam suam potentiam demonstrare.

220. Sunt tamen plerique non ita timidiore, ut ego; malo enim alta timere, quam sapere: sunt tamen plerique eo freti, quod scriptum est: *Et Jesus proficiebat aetate et sapientia et gratia apud Deum et homines* (Luc. 2, 52), qui dicant confidenter, quod secundum Divinitatem quidem ea quae futura sunt, ignorare non potuit, sed secundum nostrae conditionis assumptionem ignorare se quasi Filium hominis ante crucem dixit. Etenim cum Filium dicit, non quasi de alio dicit; nam ipse est et Dominus roster Dei Filius, et Filius Virginis: sed medio verbo nostrum informat affectum, ut quasi hominis filius secundum susceptionem nostrae imprudentiae ¹⁾ vel profectus non plene adhuc scisse omnia crederetur; non enim est nostrum scire quae futura sunt. Eadem igitur videtur ignorare conditione, qua proficit: nam quomodo secundum Divinitatem proficit, in

1) Cf. supra annot. ad n. 194. Ex hoc et seq. n. sequitur, Ambrosium non approbasse illorum sententiam, qui opinabantur, Christum revera secundum naturam humanam quaedam ignorasse.

quo habitat plenitudo Divinitatis (Coloss. 2, 9)? Aut quid est quod nesciat Dei Filius qui dicebat: *Quid cogitatis mala in cordibus vestris* (Matth. 9, 4)? Quomodo nesciat, de quo dicit Scriptura: *Jesus autem norat cogitationes eorum* (Luc. 6, 8)?

221. Haec tamen alii dicant: ego autem ut ad superiora redeam, qui proposuerim scriptum quia Pater dixit: *Fortasse reverebuntur Filium meum* (Id. 20, 13); quod utique ideo arbitror positum, ut quia de hominibus loquebatur Pater, humano locutus videatur affectu: multo magis arbitror, quia Filius qui cum hominibus conversatus est et hominem egit, et carnem suscepit, nostrum assumpsit affectum; ut nostra ignorance nescire se diceret, non quia aliquid ipse nesciret. Nam etsi homo in veritate corporis videbatur, erat tamen vita, erat lux, et virtus exhibat de eo (Luc. 6, 19), quae vulnera sauciorum majestatis suae auctoritate sanabat.

222. Advertitis ergo quaestionem vobis esse sublatam, cum et Filii dictum ad suspensionem integrae conditionis referatur humanae, et de Patre ideo scriptum sit, ut vel sic calumniari Filio desinatis.

223. Nihil ergo fuit quod ignoraverit Dei Filius; nihil enim fuit quod ignoraverit Pa-

ter. Quod si nihil et Filius ignoravit, ut jam concludamus, dicant in quo eum minorem velint videri. Si minorem generavit Deus Filium, minus contulit; si minus contulit, aut minus voluit, aut minus potuit: sed nec infirmus, nec invidus Pater; quia nec voluntas ante Filium ¹⁾, nec potestas: in quo enim minor, qui omnia habet quae Pater habet? Nam et omnia a Patre jure generationis accepit (Joan. 16, 15), et totum Patrem gloria suae majestatis expressit.

224. Scriptum est, inquiunt: *Quoniam Pater major me est* (Id. 14, 28). Sed scriptum est: *Non rapinam arbitratus est se esse aequalem Deo* (P'ulip. 2, 6). Scriptum est quod propterea volebant illum judaei occidere, quia Filium se dicebat Dei, aequalem se faciens Deo (Joan. 5, 18). Scriptum est: *Ego et Pater unum sumus* (Id. 10, 30). Unum legunt, multa non legunt. Numquid ergo et minor et aequalis per naturam ean-

1) *Nec voluntas ante Filium*: Filius enim genitus est per intellectum, intellectus vero praecedit voluntatem. Eodem sensu statuit synodus toletana XI. a. 675.: „Deus Pater nec voluntate, nec necessitate (illata) genuisse (Filius) credendus est; quia nec ulla in Deo necessitas (seu vis illata) cadit, nec voluntas sapientiam praevenit.“

dem potest esse? Sed aliud ad Divinitatem refertur, aliud ad carnem.

225. Minorem dicunt: quaero quis mensus sit, quis tam exaltati cordis, qui velut ante tribunal suum Patrem Deum et Filium constituat, ut de praelatione dijudicet? *Non est exaltatum cor meum, neque in vanum elati sunt oculi mei* (Psal. 130, 1), David dicit. Rex David exaltare cor metuit in rebus humanis, nos exaltamus adversus divina secreta. Quis igitur judicat de Dei Filio? Throni, dominationes, angeli, potestates? Sed famulantur et serviunt archangeli, sed ministrant cherubim et seraphim, sed laudant. Quis igitur judicat de Dei Filio, cum legerit quia ipse Pater noverit Filium, non judicet. *Nemo enim novit Filium, nisi Pater* (Matth. 11, 27). *Novit*, inquit, non judicat. Aliud est nosse, aliud judicare. Habet Pater in se scientiam, Filius supra se non habet potestatem. Etrursus: *Nemo novit Patrem, nisi Filius*; et ipse novit Patrem, sicut eum Pater novit.

226. Sed dicis quia minorem se dixit: dixit et lapidem. Plus dicis, et impie calumniaris: minus dico, et pie astruo ¹⁾. Minorem

1) *Plus dicis*, cum eum dicis tantum minorem et supra angelos confiteris quam si diceres lapidem et

dicis, et supra angelos confiteris: ego minorem angelis dico, et non derogo; quia non Divinitatem arguo, sed misericordiam praedico.

CAPUT XIX.

Conversus ad Deum Patrem vir sanctus, cur Filium eo minorem non statuatur, exponit: tum asserit suum non esse ut metiatur Dei Filium, cum angelo metiri tantum Hierusalem datum fuerit, imo et forte Christo, ut homini: sed Arium satanae imitatore se prae-buisse. Temere igitur de divina generatione disputari; cum tantum humanae signum per Isaiam sit propositum, nec debeat comparatio fieri in divinis. Postremo quantum fugienda sit Arianarum arrogantia, variorum Scripturae exemplorum oppositione demonstrat.

227. Ad te nunc, omnipotens Pater, cum lacrymis verba convertito. Ego te quidem inaccessibleem, incomprehensibilem, inaestimabilem prompte dixerim: sed Filium tuum minorem non ausim dicere. Nam cum illum splendorem gloriae, et imaginem substantiae tuae legerim (Hebr. 1, 3); vereor ne mino-

angelis minorem, et tamen *impie calumniaris*, quia eum negas Patri aequalem. *Minus dico* ego, quia eum voco lapidem (secundum illa Matth. 21, 42. etc.) et minorem angelis quam tu, qui eum dicis tantum minorem et supra angelos confiteris et nihilominus eum *pie astruo* et credo Patri aequalem.

rem imaginem tuae dicendo substantiae, minorem substantiam tuam dicere videar, cujus imago sit Filius; cum plenitudo tuae Divinitatis omnis in Filio sit. Immensum te Filiumque tuum et Spiritum sanctum, in-circumscriptum, inaestimabilem, inenarrabilem legi frequenter, credo libenter. Et ideo aestimare non possum, ut examinare possim.

228. Esto tamen, spiritu ausuque temerario metiri te velim; unde, quaeso, te metiar? Funiculum agrimensorium vidit propheta, quo metiebatur angelus Hierusalem (Ezech. 40, 3). Metiebatur tamen angelus, non Arius: metiebatur Hierusalem, non Deum. Et fortasse nec Hierusalem metiri poterat angelus, vir enim erat ¹⁾. Denique sic habes: *Et allevavi oculos et vidi: et ecce vir, et in manu ejus funiculus agrimensorius* (Ibid.) Vir erat, quia typus suscipiendi corporis declarabatur. Vir erat ille, de quo est dictum: *Post me venit vir, cujus non sum dignus solvere corrigiam calceamenti ejus* (Joan. 1, 27). Ergo Christus in typo Hierusalem metitur, Arius Deum.

1) *Vir enim erat.* Ille angelus, quem propheta vidit urbem Jerusalem metientem, vir exhibetur ac proinde homo: hinc potius erat Christus, quem in visione vidit propheta.

229. Et satanas transfigurat se in angelum lucis (2. Cor. 11, 14), quid mirum si Arius suum imitatur auctorem, ut usurpet illicita? Licet quod pater suus diabolus per semetipsum non fecit, intolerabiliore iste sacrilegio divinorum sibi scientiam secretorum et supernae generationis arcana praesumat; diabolus enim verum Dei Filium fatebatur, Arius negat.

230. Si ergo metiri te, omnipotens Pater, non queo, possumne sine sacrilegio de tuae generationis disputare secreto? Possumne dicere quod aliquid inter te et Filium tuum plus minusve sit, cum ipse qui ex te natus est, dixerit: *Omnia quae Pater habet mea sunt* (Joan. 16, 15)? Quis me constituit judicem aut divisorem de rebus humanis? Hoc Filius dicit, et nos inter Patrem et Filium divisionem nobis et iudicium vindicamus? Bona pietas arbitros refugit etiam in divisione patrimonii. Nos ergo erimus arbitri, ut inter te et Filium tuum increatae maiestatem substantiae dividamus?

231. *Generatio, inquit, haec, generatio nequam est: signum quaerit, et signum non dabitur ei, nisi signum Jonae prophetae* (Luc. 11, 29). Signum utique datur non Divinitatis, sed incarnationis. Denique de in-

carnatione dicturus ait: *Pete tibi signum.* Et cum ille dixisset: *Non petam, neque tentabo Dominum*, responsum est: *Ecce virgo in utero accipiet* (Isai. 7, 11. et seqq). Ergo signum Divinitatis videre non possumus, mensuram quaerimus? Vae misero mihi, impie discutere audemus, quem digne rogare non possimus!

232. Viderint tamen quid faciant ariani: ego te, Pater, si majorem omnibus dixero, injuriose te tuis operibus comparavi: si majorem Filio, ut Arius asserit, impie judicavi. De te prior erit illa sententia ¹⁾, nam neque ulla fieri potest nisi ex comparatione praelatio, neque praeferri quisquam, nisi de quo prius fuerit judicatum.

233. Jurare nobis per coelum non licet, judicare de Deo licet: sed Filio tuo soli judicium de omnibus detulisti.

234. Joannes carnem Domini baptizare metuebat, Joannes prohibebat dicens: *Ego a te debeo baptizari, et tu venis ad me* (Id. 3, 14); et ego Christum judicio meo subdam?

235. Moyses excusat sacerdotium, Petrus imperatum in ministerio declinat obsequium:

1) *Sententia*, judicium, quia ut Filius comparari et minor judicari possit, prius Pater erit metiendus.

Arius scrutatur etiam alta Dei? Sed non Arius Spiritus sanctus: sed Ario et hominibus dictum est: *Altiora te ne quaesieris* (Eccli. 3, 22).

236. Moyses vultum Domini prohibetur videre (Exod. 33, 23): Arius meruit videre secretum. Moyses et Aaron in sacerdotibus ejus, Moyses qui cum Domino apparet in gloria; Moyses, ergo ille posteriora tantummodo Dei in typo vidit: Arius totum Deum facie ad faciem comprehendit. *Sed nemo, inquit, videre potest faciem meam, et vivit* (Ibid. 20).

237. Paulus etiam de inferioribus dicit: *Ex parte cognoscimus, et ex parte etiam prophetamus* (1. Cor. 13, 9): Arius dicit, ex toto Deum, non ex parte cognovi. Inferior ergo Paulus, quam Arius; et vas electionis ex parte scit, vas perditionis totum scit: *Scio, inquit, hominem, sive in corpore, sive extra corpus nescio, Deus scit, quoniam raptus est in paradysum, et audivit verba ineffabilia* (2. Cor. 12, 3. 4). Paulus raptus usque ad tertium coelum, se ipsum nescivit: Arius in stercore volutatus ¹⁾ Deum sci-

1) Respicit hic tristem Arii mortem.

vit. Paulus dicit de se ipso: *Deus scit*: Arius de Deo dicit: Ego novi.

238. Sed non Arius raptus in coelum quamvis eum secutus sit, qui jactatione damnabili divina praesumeret, dicens: *Ponam thronum meum super nubes, et ero similis Altissimo* (Isai. 14, 14); sicut enim ille dixit: *Ero similis Altissimo*: sic et Arius altissimum Dei Filium sui similem vult videri quem non in Divinitatis aeterna maiestati veneratur, sed ex carnis infirmitate metitur

INDEX CAPTUM.

	Pag.
Praefatio	1

LIBER I.

Prologus. Gratiano laudato et commemorata operis difficultate concilium nicaenum se secuturum profitetur	3
Cap. I. Catholicam de Deo fidem exponit. Ariani tres deos inducunt	7
Cap. II. Una Christi et Patris voluntas et operatio. Christo conveniunt divina attributa. Varias Christi appellationes exponit.	9
Cap. III. Unitas Patris et Filii ex Scripturis probatur, praecipue ex Isai. 45, 14. et Baruch 3, 36. seqq. Prophetarum auctoritati fidendum	12
Cap. IV. Magorum muneribus duplicem Christi naturam, in angelo cum tribus pueris in fornace ignis Divinitatem ac Trinitatem docet adumbratam	18
Cap. V. Arianorum blasphemiae. Haeretici in sophismatibus spem suam collocant .	20
Cap. VI. Haeretici non conveniunt inter se. Haeresim ut monstrum quoddam exhibet.	22
Cap. VII. Christus Patri similis probatur tum	

ex aliis Scripturae locis, tum maxime ex Genes. 1, 26	25
Cap. VIII. Deducitur Filii aeternitas, eademque ex Isaia et Joanne probatur	28
Cap. IX. Filii aequae ac Patris aeternitatem ex Dei immutabilitate colligit	32
Cap. X. Divina generatio non ad modum humanae sed spiritaliter intelligenda . . .	34
Cap. XI. Nec ex Scriptura nec ex humana generatione Patrem priorem Filio probari posse. Ariani impiissimi, cum Christum dicunt ex tempore natum.	37
Cap. XII. Quibus non indiget Pater, iis nec indiget Filius, cujus utraque generatio plane singularis	41
Cap. XIII. Filii qualis generatio fuerit. Visio Nabuchodonosoris et Petri	44
Cap. XIV. Multis argumentis probat Christum non esse creaturam	48
Cap. XV. Christus factus dicitur secundum humanam naturam	52
Cap. XVI. Filius, cum sit genitus, non est creatura. Quod confirmatur ex testimonio S. Pauli	54
Cap. XVII. Probatur Divinitas Christi ex eo quod sit Filius proprius. Una Patris et Filii voluntas et operatio	57
Cap. XVIII. Cur errores ariani in nicaenam definitionem recepti sint. Eorum cum suo anathemate enarratio	62
Cap. XIX. Filii aeternitatem probat ex Joan. 1. Arii mors. Objectiones solvuntur . . .	64
Cap. XX. Preces et vota	67

LIBER II.

Prologus. Duodecim nomina Filii Dei exponens et cum lapillis vestis sacerdotalis comparans concludit fidem operibus esse attendendam, cujus fidei de Filio summam subdit.	70
Cap. I. Arianorum blasphemia, qua Dei Filio bonitatem abjudicant, solvitur.	77
Cap. II. Bonum esse Dei Filium ex operibus probat. Testimonium Patris et judaeorum, quibus pejores ariani	79
Cap. III. Bonitas et veritas Filii Dei ex unitate Dei probatur	83
Cap. IV. Omnipotentia Filii probatur ex Scriptura	84
Cap. V. Difficultates contra Filii omnipotentiam ex Scripturis petitas solvit	86
Cap. VI. Filii libertas probatur	89
Cap. VII. Quae in Christo Divinitati non congruunt, ad id, quod simul Deus et homo erat, referri	91
Cap. VIII. Quo sensu dictum sit: <i>Pater major me est</i> , exponitur	95
Cap. IX. Solvitur difficultas ex missione Filii petita. Monitum pro interpretandis locutionibus de Christo	103
Cap. X. Solvitur difficultas ex Filii obedientia deprompta. Una Trinitatis potentia et Divinitas	109
Cap. XI. Exemplo Christi humaniter cum arianis agendum. Consilium incarnationis et fidei in illam utilitas exponitur	111
Cap. XII. Christum judicem sibi catholici con-	

cilient. Difficultas ex judicio et sessione desumpta solvitur. Angelicum Trisagion .	117
Cap. XIII. Haereticorum de Christo blasphemiae refelluntur. Catholicis mitius erit judicium	121
Cap. XIV. Proponitur judicis sententia, a qua nulla admittitur provocatio	125
Cap. XV. Scriptura divinae generationi suffragatur. Ariani, ut judaei perveraces, deserendi ut antichristi et haeretici	127
Cap. XVI. Gratiano pro pietate victoriam spondet. Preces et vota.	130

LIBER III.

Cap. I. Consilium scribendi. Excusatio de usu fabularum a Scripturae exemplo	135
Cap. II. Qui Christam secundum Divinitatem negat altissimum, Patri incarnationem adscribere. Cum Deus dicitur solus, Christum non excludi	138
Cap. III. Filium a Patre non separandum, utpote natura plane aequalem. Quo sensu Pater pariterque Filius solus dicatur . .	141
Cap. IV. Christus secundum carnem factus propria virtute opera sua perfecit, oravit ut homo, sed imperio se Deum manifestavit.	148
Cap. V. Factum non idem ac creatum ex usu Scripturae	152
Cap. VI. Solvitur difficultas ex Joan. 1, 4 .	155
Cap. VII. Christum creatum dici relate ad incarnationem; ipsum esse principium ut virtutum magistrum	158

	Pag.
Cap. VIII. De loco Isaiae: <i>Filius datus est nobis</i> . Isai. 9, 6	162
Cap. IX. Solvitur difficultas ex Prov. 8, 23.	165
Cap. X. Solvitur difficultas ex Joan. 1, 30: <i>Post me venit vir, qui ante me factus est</i> .	167
Cap. XI. Quo sensu Christus dicatur factus. De Christi sacerdotio et de Melchisedech.	175
Cap. XII. Patris atque Filii unum esse regnum, unam indivisamque Divinitatem . .	181
Cap. XIII. Filio majestatem suam esse paternae aequalem, cujus angelos non socios sed spectatores esse	185
Cap. XIV. Unius substantiae cum Patre Filium esse. Quid per substantiam in Scripturis intelligatur	187
Cap. XV. Cur ariani substantiae vocabulum in Deo admittere nolint	193
Cap. XVI. Dolosae quaedam arianorum confessiones exponuntur	196
Cap. XVII. Cur Filius ad dexteram Patris Stephano stare visus explicatur. Confirmatur Patris ac Filii aequalitas	199

LIBER IV.

Cap. I. Christum nonnisi revelatione cognitum fuisse, ne ab angelis quidem. Angelorum colloquium de glorioso Christi in coelos ascensu	202
Cap. II. Necessitas fidei plenae et confessionis de Christi Divinitate enarratur . .	207
Cap. III. Quo sensu Deus caput Christi sit, et quomodo Pater in Filio et Filius in Patre sit, exponitur	211

Cap. IV. Solvitur difficultas ex eo petita, quod Filius in Scripturis nil a se facere posse asseratur	216
Cap. V. Eadem solutio continuatur. Ob potestatis cum Patre unitatem Filius nil a se facere posse probatur	220
Cap. VI. Filius nil facere potest, quod non probetur a Patre, ob plenam voluntatis unitatem	228
Cap. VII. Filius est Patris Verbum operatorium ideoque ejusdem voluntatis, potestatis et substantiae	232
Cap. VIII. Respondetur ad objectionem, quod Filius generare non possit. Arianorum inepta disputatio	234
Cap. IX. Filius non coepit. Arianorum cavillationes quaedam solvuntur. Recte quis esse dicitur, antequam nascatur	243
Cap. X. Solvitur objectio ex eo petita quod Filius vivat propter Patrem. Textus Joan. 6, 58 exponitur	252
Cap. XI. Solvitur difficultas ex eo sumpta, quod Paulus asserat <i>ex</i> Patre omnia et <i>per</i> Filium omnia esse	261
Cap. XII. Solvitur objectio, quam ariani faciebant ex eo, quod Filius vitis, et Pater agricola dicitur	268

LIBER V.

Prologus. Consilium scribendi	274
Cap. I. Impietas arianorum Filium a Patre separantium, quos Joannes semper conjungit.	280
Cap. II. Per vocem <i>solus</i> Filius non separatur a Patre, sed Deus a creaturis	285

	Pag.
Cap. III. Ex unitate substantiae non inducuntur duo dii. Diversa humanae et divinae naturae unitas	291
Cap. IV. Solvitur objectio petita ex adoratione a Filio Patri exhibita	297
Cap. V. Responsum Christi ad petitionem matris filiorum Zebedaei exponitur et Christi clementia praedicatur	299
Cap. VI. Postulatum hoc matris impossibile fuisse probatur	305
Cap. VII. Objectio petita ex loco Joan. 17, 23: <i>Dilexisti eos, sicut et me dilexisti</i> diluitur, idemque locus exponitur	315
Cap. VIII. Christus in quantum Deus est, non est Dominus. Quot haereses uno Scripturae loco confutentur. Alia de Christo ut Deo, alia ut de filio David accipienda	319
Cap. IX. Objectionem petitam ex ordine verborum: <i>In nomine Patris et Filii</i> etc. solvit ostendendo in Scripturis Patrem et Filium vocari nulla ordinis habita ratione .	328
Cap. X. Solvitur difficultas ex verbis: <i>Qui in me eredit, non in me credit</i> (Joan. 12, 24) orta et locus exponitur	330
Cap. XI. Quomodo Christus nil a se loquatur; quomodo Patrem videre et audire dicatur. .	335
Cap. XII. Parabola hominis ad quaerendum regnum proficiscentis exponitur. Quale sit Christi et Patris regnum	340
Cap. XIII. Qualis sit Christi erga Patrem subjectio, et quando perfecta futura sit . .	344
Cap. XIV. Christus tantum secundum carnem subjectus erat, cum Divinitati subjectio re-	

pugnet. Quando plena futura sit Christi sub- jectio	351
Cap. XV. Quae de Filii subjectione dicuntur, ad solam humanitatem esse referenda	358
Cap. XVI. Christus non ignoravit diem iudicii	362
Cap. XVII. Christum non revelando diem iudi- cii nostrae utilitati consuluisse. Arianis difficultatem urgentibus respondet	371
Cap. XVIII. Quomodo Christus nesciat diem iudicii	379
Cap. XIX. Hominis non esse metiri Dei Fi- lium. Quam fugienda Aarii arrogantia	382
Annotatio I. De Filii aeternitate	29
Annotatio II. De Filii aeternitate	73
Annotatio III. Christus nostra suscepit, ut ea sanaret	93
Annotatio IV. De immortalitate Angelorum.	143
Annotatio V. De loco Joan. 1, 30	169
Annotatio VI. Ruth et Booz Ecclesiae et Christi typus	172
Annotatio VII. Petrus Ecclesiae fundamentum.	224
Annotatio VIII. Praedestinatio post praevisa merita	311

O. A. M. D. G.

